

UTL AT DOWNSVIEW



D RANGE BAY SHLF POS ITEM C  
39 10 15 04 02 006 7

BP  
75  
S8  
v.2

Su'ād, Yūsuf, Düzceli  
Mirāt el-şu'ūn

PLEASE DO NOT REMOVE  
CARDS OR SLIPS FROM THIS POCKET

---

UNIVERSITY OF TORONTO LIBRARY

---











Su'ād, Yūsuf, Düzceli

# مِرَاثُ السُّعُونِ

Mirāt el-ṣū'un



سير سنیه جناب رسالتینامہ بیہ دائرہ ابضاحات  
ومعلومات تاریخچہ بی حاویدر




جلد ثانی


مؤلفی :

مکتوبی مشیخت علیا قلمی خلفاسندن


یوسف سعاد



{ معارف نظارت جلیلہ سنک فی ۸ مایس سنہ ۱۳۱۶ }  
{ تاریخچہ و ۱۰۶ نومرو لی رخصتنامہ سنی حائر در . }



مهر سز نسخہ لر ساختہ در




عصر مطبعہ سی : باب عالی جادہ سندہ نومرو ۵

۱۳۱۸

نصائح لطلاب

BP  
75  
88  
v.2



1085732

ACT

## دین اسلام بمحشده [۱]

— ۱ —

لیل سیفام ضلالت ، بر صبح صفادار هدایتہ  
ایردیکی ومهر منیر اسلامیت ، مشرق انوار هدادن  
شعشعہ کیتی فروزی ایلہ پرتو پاش ظهور اولدینی زمان  
شوساحہ فسیحہ غبراء ، تماماً بر جہالتخانہ وسیع الانحایہ  
منقلب اولمش بر حالہ بولنیور ایدی :

تاریخ ظهور دین اسلامدن الی عصر مقدم سلسلہ  
حیات انبیاء کسلمش خلق عالم ایسه فترت زمانیه ، فترت  
انیا نامیلہ بین الملاء متعارف اولان اشبو زمان جاهلیتده  
ظلمت ظلم وضلالتہ دوشمش ایدی .

رفع حضرت عیسادن بعث جناب ﷺ خاتم الانبیاء  
ارہ سی بش الی عصرک بر زمان اولدینی حالہ خلقی  
ظلمت ضلالتدن قور تارمق ایچون هیج بر یردن نور  
الهدای رسالت ظهور ایتماشدر . انجق انبیای سالفه  
واسطه لریله خالقہ اعلان اولنسان کتب سماویہ وقوانین

[۱] «مصور ترقی» جریده علمیه وادبیہ سنده مندرجدر .



مقدسة الهية وبالخاصه انجيل شريف، اوزمان هنوز  
المرده بولندقلرندن انلك انذار و دعوتلری باقى ديمك  
ایدى .

لكن خلقى زیر اداره تحکمنه المش اولان جهالت،  
كتب مقدسه نك نسخ صحیحه سنی دست تد اولدن دوشورمش  
وجهالتله برابرینه تأثیردن خالى قالمیان فکر وارزوی  
اجتهاد! كتب منزله یی تحریفه اوغراشمشدى انجيل شريفك  
تاریخ تنزیلندن اون اوج قدر عصر صوکره ظهورایدن  
مارتین لوتر واکا ممائل علمای خرسیتیانیه نك انی  
تفسیر و تشریح صره سنده استخراجات عقلیه ده بولمخرینه  
دنیا خلقنى استیلا ایدن جنود سپهنمود جهالت، کویا که  
اوزمان بيله براستعداد تام ویرمش، حاضر لامشدى!

او عصر لرده انسانی عالمك احوال حالیه و ماضیه سنه  
مطلع ایدمك وسائط و مدونات منتظمه نك عدم  
موجودیتندن خلقه توجه و تحدث ایتمکده اولان حالت  
وبرده قوانین مقدسة الهیه احکام شریفه سنك بین الخلق  
متروکیتی کبی ایکی جهت، شو جهالت عمیمه و مستولیه  
اساس اولمشدى .

تورات شریف، جبر شدتك، انجيل شريف ايسه

حلم و متانت ، صبر و سکونتک صوک درجه سنی امر  
و توصیه اتمکده ایدی . که بونلردن اولکیسی ملوک  
و حکمدارانک ، ایکنجیسی دخی افراد و رعایای آوودیجی  
اوامرو و صایای حاوی اولدینی اعتباریله ینه جباره نك  
افراد علیهنده کی منافع متغلبانه لرینه هر حالده مساعد .  
ایدی .

انسانلر ایسه ظهور اسلام و اکا قریب اولان  
زمانلرده نه اوجبر و شدته ، نه ده بودرجه صبر و سکونته  
غیر متحمل بر طبیعت کسب ایتشلردی .

بناءً علیه طبیعتلرینک و عموماً طبایع بشرک میل  
و رغبت ایله دیکی عزت نفس علیهنده وبالخاصه حال و زمانک  
مقتضیاتنه مطابقت و موافقتی زائل اولان کتب منزله قسماً  
تحریف قسماً ترک و تخفیف ایدلمش ؛ دنیاده دین و خالق یولنده  
شو صورتله حادث اولان اختلافات ، بر پیغمبرک هر یرده  
و هر امرده اعتدالی توصیه ایده جک و خلقک عزت  
نفسی ارزو ایدن طبیعتلرینه دهـا ملایم ، دهـا موافق  
کله جک بر کتاب شریف ایله برابر طرف حق جل  
و علادن ارسال بیوریلوب تعیین مسالک جهان و تسویه  
مصالح عباد ایتسنه احتیاج اشد حاصل ایتشدی .

مع مافیه کتب منزله ، او غرا دینی تحریفات ایله  
برابر خاتم الانبیا افندیمرک اوصاف شریفه سنی ینه خلقه  
طویور مش و او حضرتک فیض نور نبوتیله و نشرایده جکی  
کتاب و شریعت غرآی عدالتیله جهانک شهره حق  
و هدایت و اصل اوله جغنی تبشیر ایله مشدر .

بناءً علیه خلقده انک ظهور نور رسالتلری زمانه  
شدتلی ، حرارتلی انتظار لر پیدا اولمشدی . از جمله مرضعه  
رسالتپناهی « حلیمه بنت ابی ذؤیب » ک نزدنده افندیمرک  
بولسیدینی زمان معروض اولدقاری حالت نا کهمانیدن  
طولای حسب الزوم مراجعت اولنان کاهنک بیانات  
و مطالعاتی ، اخیراً شام سیاحت تجاریه لرنده بحیرا  
و نسطورا نام راهبرله اولان ماجرای ملاقاتی شدت  
انتظاره دلالتی تأیید ایدن بشائر ظهور نبوتلرینک اک  
مهملرندن ایدیلر !

کبار صحابه کرامدن جناب سلمان فارسی حضرتلرینک  
دخی لوحه حیاتلرنده تصادف اولنان رحلت حقیرستانه ،  
سیاحت پیمبر جویانه سی اساساً ایشته انجق بوکا مبنی ایدی .  
کذلک تاریخ نبوتدن اوتوز ایکی سنه مقدم تبریک  
موفقیت ایچون صنعایه کیدن عبدالمطلبک سیف بن



ذی الیزدن وقوعبولان استبشارائی سیفده کی انتظاره ،  
 یدنجی سنه هجریده شرقی روما ایمپراطوری هراکلیوس  
 ایله ابوسفیان اره سنده بوخصوصه متعلق جریان ایدن  
 محاوره دخی هراکلیوسده کی فکر پیمبر جویانه یه قطعاً  
 وصراحتاً دلالت ایدر .

رومانك او زمانكی مدینته ، معارف مایه سنه برنظر  
 اولدیفنی وبعده پیغمبرك حقیقت نبویه سنی تحقیق ضمنده  
 برده هراکلیوس طرفندن ایراد اولنان سؤالروسؤاللرك  
 تماس ایتدیکی نقطه لر ، اساسلر ملاحظه ایدلدیکی تقدیرده  
 ظلمت جهالتك دنیای احاطه واستیلا ایتدیکی او یله بر  
 زمانده هراکلیوسك حقیقت نبویه مدار اطلاع اوله جق  
 بویله اساسلی نقطه لر ی بوله بیلمسی ، انبیای سالفه نك  
 شؤن حیاتیه لرینه متعلق معلومات تاریخییه دن بك غافل  
 اولمادیغنی وكتب منزله دن نبی اخرا الزمانك اوصاف  
 شریفه سی حقنده معلومات لازمه استحصال واستحضار  
 ایده بیلمش اولدیغنی بیلدیرمکله برابرینه جداً شایان  
 تعجب کورینور !

— ۳ —

التي شو قدر عصرك جهالتله مروری ، معارف

ومدينتك فقد انى ايجاب ايمكله كرك جزيرة العرب احوالك ،  
 كرك ممالك سائر مده اخلاق عموميه نك فساد لئسنه ، دين  
 وآينجه بر جوق افكار وآثار سخيغه نك ميدان المسنه  
 سبب اولمشدى .

حكمت حكومتلى ، محضا محاسن اخلاق اساسى  
 اوزرينه مؤسس بولان روماليلر كى اك متين ومشهور  
 دولتلر ، شو سايله ده ! اخلاقجه بيوك فسادلره  
 اوغرا مشلر ! اساس اداره حكومتلىنى اولوجهلر كره  
 زده له مش اولد قلرندن بقاء حيات حكومتلىنى تهلكيه  
 صالمشلر !

كذلك عربلر ! او فساد تامماً معروض ايديلر !  
 سفك دماء ، قتل وزناء ، بهتان وافتراء مثللو مساوى  
 اخلاقيه ومعبوديت اصنام واوثانه قائل اولق كى سخافت  
 اعتقاده ايله نجات قوميله رنى لكهله مشلردى .

والحاصل كورمكده اولديغمز شوخا كدان فسيح ،  
 سراپا بردار الشرار فساد كسلمش ، او عصرلر ك هر آنى  
 يعنى هر جزء غير قابل الانقسامى مظلم برر ليال الضلال  
 اولمش كيمشدى .

بناءً عليه احوال عالمك اصلاحى ، اساس شريعتى

حسن اخلاق ، حکمت بحث و رسالتی تهذیب اخلاق امت  
اولق اوزره بر پیغمبرك ظهورینه توقف ایتمشدی . لیکن  
بو پیغمبر عظیم الاتر زرده وهانکی قومدن ظهور  
ایده جکدی ؟

جناب حق اولجه کافه عبادینه تبشیر بیورمشدی که  
او پیغمبر منتظر ، جانب بطحاده اولاد اسماعیلدن ظهور  
ایده جک! .

اوت! او پیغمبر مستبشر ، بطحاده و اولاد اسماعیلدن  
ظهور ایتمش ، جزیره العربی لوٹ کفر و ضلالتدن تماماً  
تطهیر بیورمشد .

بشریتک بوده غرابئنددرکه آوازه صیت خاتمی ،  
کتب مقدسه سماویه واسطه سیله خلقک مسامع انتظارینه  
طولدرلمش اولان او ذات معظمک اک صوکره آل  
هاشمندن بریتیم اولدینی و هر درلو مفاخر خارجیه دن  
عاری بولندینی حالده ظهور ایتمی ، توراتلرله انجیللرک  
اواباده کی تصویرات و توضیفاته ، تبشیراته مباین  
کورینه رک صناید قریشدن چوق کیمسه لری ارتیاب  
واعتدایه سوق ایتمش و حتی داد حق اولان منصب جلیل  
رسالتی اکا یاقشدیرمدقلرینی سویله یه بیلملرینه قدر



ایلری به طوغری چوق کیمسه لری تجاوزده  
بولندیرمشدر . صدق رسالتنه ایناندقلری حالد طرف  
حقدن واقع شوتوجیه وجیه رسالتنه مظهریتدن ناشی او  
حضرت ذیشانہ حسدایدہ رک ظاہراً تصدیق رسالتنه شرف  
قبول تابعیتدن « امیه ابن ابی الصلت » کبی چوق  
کیمسه لری ده محروم برافمشدر !

رسول بالحق اولدینی کرک ارهاصات علیہ احمدیه لری ،  
کرک معجزات باهرات محمدیه لرله ثابت وشرف کرانهای  
خاتمیتی ده حائز بولن ان جناب سید المرسلین افسدیمزک  
بطحاده شرف ظهورلری ایسه عقل وحکمتہ ، مقتضای  
سال ومصلحته تماماً موافق بر کیفیت ایدی .  
زیرا اوزمانلره کلنجهیه دکین بیوک انقلابات وتبدلاته  
اوغرادینی کورولمش اولمیان بختیار حجاز ، روما ، ایران  
کبی دنیانک ایکی بیوک حکومتی طرفدن تهدید وتضییق  
ایدلمکده ایدی .

بولنریمن حکومت حمیریہ سی ده برطرفدن اشتراک ایدہ رک  
اوده نفس بطحایه طوغری تجاوز کوسترمکده ایدی .  
که بوحرکملر زیر دست اسارتہ کیردیکنی کورمیان وقور  
عربلر ایچون اغیر بر مسئله اولدیغدن هر اوج حکومت  
محاربهیه مقابله ، مرتبه وجودده ایدی .

حالبوکه ادوار مدینتک هنوز سن طفولیتند بولان  
 عربلر ایچون امر مقابله ممکن و متصور دکلدی . چونکه  
 او مثلولره مقابله ، جمیع زمانده انجق اجتماع و اتحاد ایله  
 حاصل و قابل اولمقده در !

عربلر اره سنده ایسه اجتماع و اتفاق یرینه بالعکس عظیم  
 اختلافلر موجود ایدی . محافظه وطن اوغورنده خدمت  
 ایتملری ، انجق عموم قباائل و عشائر عربک قوی بر جهت وحدت  
 اساسی اوزرنده مؤسس بر نقطه اتحادده جمع اولسنه  
 توقف ایتمکده ایدی . اتفاق و اتحاد حصولیچون میدانده  
 اساس اوله بیله جک جهت وحدت ایسه یالکیز وحدت  
 لسانیه دن باشقه برشی دکلدی .

حالبوکه قباائل عرب بیننده موجود اولان مذهب  
 اختلافاتنده کی شدت ، حصول اتحاد خصوصنده وحدت  
 لسانیه دن مأمول بولنه جق هر درلو تأثیرانی تعطیل  
 ایتمشدی .

بناء علیه عربلر بیننده تضییقات و تجاوزات اجنبیه  
 قارشى مقابله و مدافعه ایتمک ایچون مطلوب درجه ده  
 قوتلی ، متانتلی اتحاد عمومی حصولی پک مشکلدی .  
 مع مافیه قطعياً الزمیتی اولوجهله تحقق ایتمش اولان

اتحاد عرب تحصیلي ایچون اول امرده حجاز قطعه سی  
وبالخاصه بطحا، مرکز اداره اعتبار واتخاذ ایدملی ایدی.  
ثانیاً اصراب سائر ارم سنده قریش قبیله سی ریاست  
اداره یه تنسیب وانتخاب اولملی ایدی . بو ایکی ماده  
بر کره وجود پذیر اولدقدن سوکره تأسیس اتحاد  
مسئله سنک تهوین حصوله مساعد برمسلك قویم تعیین  
وتهیه ایدلمش اولیور ایدی .

زیرا حجاز قطعه سی، مناسبت موقعیه سی اعتبار یله جزیره نك  
بر مرکز مهمی اولدینی کبی عموم عربك حرمت وتعظیمه  
مجبور اولدینی کبه معظمه یی ده مشتملدر . بوندن فضله قطعه  
حجازیه ده قبائل عرب ارم سنده اسماعیل علیه السلامك  
نسلی بولنق شرفی حائر اولان قریش قبله سی اک معتبر  
ومتاز بر قبیله وحتی بنی اسماعیلک لسانی، لسان عربك  
افصحی اولدیغنه منی بین العرب لسان قریش، بر لسان  
ادب ایدی .

انکچوندرکه عربك اوزمان انتشار ایدن بتون  
اشعاری، آثار ادبیه سی قریش لسانی اوزره انتشار  
ایدردی .

ایشته بطحاده وقریشیلر ارم سنده ظهور ایدن



سید کائنات افندیمز حضرتلرینک من قبل الرحمن نشر  
وتعمیمنه مأمور بیورلد قلمری دین مبین اسلام، تأسیس  
اتحاد ایچون اساسلی برجهت وحدت اولمشدر :

خلقت آدمدنبری صیت شریعت غراسی وعلویت  
کعب شریفنک آوازه رسالت انماسی، فضای فسیح الا  
نحای ملک وملکوته طنین انداز اولمش بولان قافله سالار  
اصفیاء جناب خاتم الانبیا افندیمز حضرتلری، یدنجی عصر  
میلادی اوائلنه طوغری شرفظهور ایتمش وارلق اوندن  
اوله دنیا تماماً حقیقته ایروب افکار باطلهیه محل قالماشدر.

— ۳ —

سوء اخلاق یوزندن تزلزل وتخلخل عارضه سینه  
اوغرامش اولان خلقک اصلاح احوالنه مأمور بولان  
حضرت فخر کائنات افندیمز، مکارم اخلاق امتک اتمامنه  
مبعوث ایدی .

معتدل الاحکام بر قانون قویمه توفیقاً تهذیب اخلاقه  
دقت اولند قجه صلاح واصلاح احوالک حصولی انی  
تعقیب ایدم جکی طبیعی بولندیغنه بناء قانون مقدس الهی  
اولان حضرت قرآنک احکام عادلّه منیفه سی موجبنجه  
اولا عشرت قریبه سنی، قوم وقبیله سنی توحید ذات الهییه

وکندی نبوت و رسالتی تصدیقه دعوت بیوروب  
اولوجهله اخلاق باطنه واحوال ظاهره امتی برابرتهدیب  
واصلاحه تشبث ایله مشدر .

دعوتك شوزمان ابتدالرنده اوداعی منهج الصواب  
هدایت افندیمز، قریشك بتلری علیهنده کی آیت کریمه یی  
تبلیغ ایتدیکی زمانه دکن قوم وقبيله سندن شدت معاملیه  
يك تصادف ایتماشکن قریشك واصنامك حصب جهنم  
اولدینی اعلان اولمسی، غلیان قریشی موجب اوله رق  
اندن صوکره اسلام ایله کفرک آچیلان ارسى بردها  
بولنه مایوب کرک افندیمز، کرک اصحاب کرامی حقلرنده  
هردرلو معاملات شدیدہ روا کورولمش، واشبو معاملاتک  
کافه سنده بعض اقارب پیغمبری دخی کفارمکه ایله برابرال  
برلکی ایتملردر !

حتی اصحاب کرامک برابرض حبشه بعده مدینه یه،  
افندیمزک دخی برطائقه نهایت مدینه یه هجرتلری، قریشك  
کوستردیکی شدت اذا ایجابی ایدی !  
شایان دقتدرکه شدت ممانعت وعداوتلرینک  
بودرجه سیله برابر کفارمکه؛ دین مبین اسلامک اقطارعالمه  
طوغری انتشارینه بردرلومانع اوله مامشاردر ! لکن  
سبب نه ایدی ؟

سبب، دین مبین اسلامک مزایای مخصوصه سیدر!  
 فی الحقیقه دین اسلام کبی طبیعت و مدینتیه مساعد بر مذهب  
 دها عالمده کور و لاما مشدر. ذات خالقک محض اثر رحمتی  
 اولق اوزره کنزالازل طبیعتده محفوظ بر دین کرینی،  
 وراء حجب الحفاء حقیقتده مستور بر کتاب مبینی وار  
 ایدی که ایشته اودین ده انجق بزم دین اسلام و او کتاب  
 ده حضرت قرآندر! ناصل که انس ایله جان، اتیان  
 مثل قرآن ایچون یکدیگرینه ظهیر اولسه لر بیله مثنی  
 وجوده کتیره میه جک لرینه جزماً معتقد ایسه ک او کتاب  
 مبینک بزه ارانه ایتدیکی نهج القویم شریعتدن، صراط  
 المستقیم هدایتدن دها اسلم بر طریق دیکرک وضع و اتیاننه  
 مقتدر اوله میه جکلرینه دخی اوله جه معتقدز.

بتون دنیانک حال حاضرده کی مدینتیه اساس،  
 اسلامیتدر. سعادت عمرانیه، مدینت حاضره ظهور  
 اسلام ایله برابر باشلامشدر:

شریعت اسلامییه، مسلمانلر بیننده مساوات کامله  
 اعلان ایدم یورایدی. تورات و انجیل شریفلرده خلقک  
 بوله مدینی مساوات، تماماً شریعت اسلامییه موجوددر!  
 دین اسلام، حقوق و وظائف ترقیده هیچ بر کی مسیه.

بر امتیاز و بر مامشدر . یعنی نظر اسلامده هر کس بر در .  
 انجق لیاقت و اقتدار ذاتی ایلله یکدیگر ندن ممتاز اوله بیلیر لر .  
 عادی و عالی هر شخص ، انجق لیاقت و اقتدار ذاتیمی  
 ایلله واصل اقصى المراتب اوله بیلیر .

دین اسلام ، امانت و مخالفت ، مواخات و محبت ، صدق  
 و عفت ، حیا و نظافت ، كذلك تراور ، عیادت مرضا ،  
 اجابت دعوت و لائمه کبی ادامه الفت و مناسبتہ خادم هر  
 در لو محاسن خلقیه بی مسلمانلره مسنون ایتدی .

دین اسلام ، حیلہ ، خدعه ، کذب ، خیانت ، بغض  
 عداوت ، غیبه ، نیمه ، هتک عرض کبی حصول برودت  
 و منافرتہ مدار اوله جق مساوی خلقیه بی مسلمانلر  
 ایچون ممنوع و منهی ایلله مشدر .

دین اسلام ، دشمن علیهنده بد و احده کبی متحد و متفق  
 اولمیری مسلمانلره امر و توصیه ایدیور .

دین اسلام ، عزت نفسی ، وقار و سکینتی توصیه  
 ایدیور . التزام حقیقت ، دفع شبهات ، تحری کمال اسلامک  
 شرائط اساسیه سندن در انجیل شریفک امر معاملات  
 و معاشرانه عائد بعض احکام مفرطه سنی حضرت قرآن  
 « و ان عاقبتکم فمأقبوا بمثل ما عوقبتکم به ! » آیت کریمه سیله



تعدیل ایدیور. که محافظه حقوق، محافظه عزت نفس  
ایچون شو تعدیل ایله هر کسک انه سلاح المقابله یی ویرمش  
اولیور!.

اسلامده تحصیل علم و معارف، همان مجبوری  
درجه سنده! . کسب معلومات ایچون بذل ما حصل اهتمام  
خصوصی پیغمبریمزک طرف اشرفلرندن امر و فرمان  
یورولمش و : « جاهل اولان نام مسلمان اوله مز،  
تخذیر عظیمی ده شرفصادر اولمشدر .

قوة خالقه، هیئت اجتماعیه اسلامیه نك دین و مذهبی  
معارفه اولوجهله مستند اوله رق وضع و تأسیس ایله مش  
اولدیغندرکه بر مسلمانك کمال دین و ایمانی علم و معارفده کی  
تکملنه کوره اولیور. حالبوکه ادیان سائر احبابی تحصیل  
معارف ایتدجه دینلرینی غیب ایدیورلر! .

بونکچوندرکه اهل اسلامه عارض اولان ضعف  
و انحطاطك ممالك اسلامیه به جهالتك و فساد اخلاقك  
دخولیه باشلادینی ثابت بولنیور .

بناءً علیه شرکك محتاج اصلاح اولدینی تاریخ شناسان  
طرفندن بیان اولندینی زمان ؛ اصلاحات مطلوبه نك  
تأسیسات غریبه یی تقلید ایله قابل استحصال اولمیوب

انجق نشرو تعمیم علوم و معارف ایلہ قابل و حاصل اولہ جنی .  
ادعا ایدلمشدی .

کذلک دین اسلامده دنیا فانی بیلدیرلمش ، زخارفه  
دنیویه دخی کریه و خسیس برشی اوله رق کوسترلمش ! .  
مع مافیہ بونلر ، امر مهم معاشی ، امر اهم معاده ترجیح  
ایتمک خصوصنه اشارت اولوب یوقسه اسباب مدنیت  
و معموریت اولان صنعت و معرفتک — دنیای باقی  
و ابدی بیلرک — درجات عالییه ایصالی ینه اصحاب  
و اربانه امر و توصیه بیورلمشدر .

دین اسلام هر طبع سلیمک قبول ایده جکی بر دین  
اولدینی جهته قریشک شدت عداوت و ممانعتی انک  
انتشارینه مانع اوله مدی .

دین اسلامک مزینته بحق واقف اوله بیلمش آدملرم  
دینی قبول ایتدیرمکده افندیمز هیچ برکفت و صعوبته  
مصادف اولما مشلردر ! . حتی مکده جناب فاروق اعظم  
افندیمز ، قبول اسلام ایتدیکی کون ابتداء حرکتی دینه  
اسلام علیهنده اولدینی حالد مزایای اسلامییه و قوف  
پیدا ایتدیکی دقیقه دن اعتباراً در حال قبول اسلامده  
بیوک برتهالک کوسترمشدی !

كذلك مدینه ده « اسید » ایله « معاذ » رضی الله تعالی عنهما حضر تلی دخی دین مبین علیهنده شدت کو صند ککری حالده حاصل ایتد ککری وقوف واطلاع سببیله شدتاری لیت و ملائمته مبدل اولوب کمال ادب ورغبتله قبول اسلام ایتملردی .

هیچ بر جبر و شدت یوغیکن دین ، کندی کنندینه انتشار ایدر و دین مبین ایله تشرف ایدنلر ، انجق کندی خواهش ورغبتلریله قبول ایدرلر و صوکره قریش طرفدن بر جوق اذیاته اوغرا دقلری حالده ینه ترك وطنی کوزه الیر لرلده ترك دین ایتملردی .

کفارک اذیات و تعدیاتنه نهایت ویرملک اوزره هیئت محترمه اسلامیه مکیمی تاریخ نبوتک اون اوچنجی سالنده ترك ایله مدینه یه نقل و هجرت ایتملردی . فقط نه اوراده نه بوراده دخی قبول ایتدیرملک ایچون هیچ بر کیمسه یه هیچ بر درلو جبر و شدت اراهه ایدلماش و انجق قبول دین خصوصی ایچون اولنان دعودته اجابت ، هر کسک رای و اختیارینه براغلمشدر .

بونکله برابر حد ذاتنده او دین مبینک حائز اولدینی عزیت ، کیمسه یی اجباره محل بر اقدن کنندیسینی قبول ایتدیرردی .

حتی زمان هجرتدن بر سنه اول تعمیم آداب دین  
ایچون محلی جماعت اسلامیه سندن وقوعبولان طلب  
واستدعا اوزرینه طرف اشرف رسالتپناهیدن وکالة  
مدینه یه کیدن « مصعب » حضرتلرینک دعوت ودلائله  
بنی عبدالاشهل قبیله سی هیج برکونا جبر وشدت اثری  
اولیه رق عموماً برکونده قبول دین اسلام ایتمشلردی !

مواخات ومخالصت ، آداب اسلامیه دن اولدیغندن  
مسلمانلر بیننده دین ، بررابطه اتفاق ، بر جهت اتحاد  
اولمش ، شورابطه ایسه دینده بولنانلرایچون فك وحلی  
غیر قابل صورته مواخات حصوله کتیرمشدر حتی بری  
مکده ، بری بعدالهجره مدینه منوره ده اولمق اوزره  
ایکی دفعه امر مواخات رسمی بیه اجرا بیورلمش و او  
مواخات فعلیه موجبنجه بین الاصحاب دفعاتله توارث دخی  
واقع اولمشدر .

دین مینک اقتضا ایتدیکی مواخات اتحادیه ایجابی  
اوله رق قبائل ، خارجه قارشی ید واحده کی یکوجود  
اولدقدن باشقه عصرلردنبری اقوام عرب بیننده حکم  
سورن اغتشاشات ، حسن ائتلافه انقلاب ایتمش وقان  
دعوالری دخی ارده محو اولوب هر کس اوندن اویله  
قانندن کچمشدر .



دين اسلام و شريعت غراي احمديه كبي اساسي متين  
اولان بر قانون عدالت احكامنه خاق دعوت اولنمسيدي  
نيجه عصر لر دنبري خلقده دوام ايدن اختلافات جنسيه  
و منافرات قوميه نك ارض طولوسي التون صرف ايدلسه  
واوبابده هر درلو فدا كار لقلر اجر اسنه تشبثده اولنسه  
ازالهي ممكن اوله ميه جني محققدي .

حالبوكه ظهور اسلام زمانلرنده هيئت اداره اسلاميه نك  
اركاني ، بر قاچ ذواتدن عبارت اولوب انلرده وطنلرنده محافظه  
حيات و حيثيتلرندن عاجز قالدقلى چون بالضروره مدينه  
اهالى سنك سايه حمايت و معاونتلى رينه هجرت و دخالت  
ايتمشلر كن دين مينمرك توصيه سي وجهله تاريخ نبوت  
احمديه دن اعتباراً حصوله باشلايان اتحاد اسلام سايه سنده  
اوتاريلخدن انجق جناب فاروقك اواخر خلافت عليه لرينه  
دكين كچمش اولان اوتوز التى سنه ظرفنده هيئت  
اسلاميه ، روم ، ايران كبي زمانك اك بيوك دولتلى ريني  
كولكده براقه جق بر دولت معظمه اولمش ، ممالك اسلاميه  
حدود چيندن محيط غربى يه دكين توسع ايتمشدر .  
مسلمانلرك ايام مذكوره ده كي حسن اتحادلرني اكر بر  
اوتوز التى سنه ده دوام ايدم بيلمش اولسيدي بريوزنده

تثلیثه قائل بر فرد آفریده قالمیق اوزره شوکره خاکدان  
 خلقی مسلمانلر طرفندن اداره واحده الته النمش وانزال  
 کتابدن مقصد الهی دخی استحصال ایدلمش اوله جفی محقق  
 ایدی .

دین اسلامک توصیه ایتدیکی موادک بریده عدالت  
 ایله استقامت ایدی . حتی عدالت ، فضائلک کلیسی واستقامت ،  
 کرامتک اعظمی اولمق اوزره کوسترلمشدر !  
 هیئت اسلامیته نک رایت اقبالی ایچون ماده الاصل  
 اعتلا ، عدالتدر . یالکز برعصر ظرفنده وجوده کلش  
 اولان شوهیئت معظمه آتش حرب خرابه زاری  
 اولمایوب بتون افرادی بردینه ، برمذبه تابع ، برلسان  
 ایله متکلم منتظم برهیئت عظیمه سیاسییه ایدی . اسلامک  
 سیف صارم سطوتی فتوحاته دوام ایدر ، عدالت اسلامیته  
 ممالک مفتوحه بی اداره ایدردی یعنی سطوت قاهره  
 اسلامیته ممالکی فتح وتسخیره ، عدالت باهره اسلامیته  
 دخی ممالکک حسن محافظه انتظامنه وحسن اداره سینه  
 متکفل بولنیور ایدی .

دین اسلام ، ممالک مفتوحه اهالیسنک عرضلرینی ،  
 مالوجانلرینی تأمین ایدر و عدالت اسلامیته انلری مرکز

اداره يه ايصنديرير، قویاً ربط ايله ردی. چونکه مربوطیت  
وتابعیتلرینک شروط شرعیه سی برکزه تحقق ایتدکدن  
صوکره اهالی مسلحه و غیر مسلحه سنه قارشى قتل عام  
کبی وحشت وممالک سائرتهك اوزمانکی اصول اداره لری  
اوزره حریتلرینی، عرضلرینی؛ اکه نازک حسیات مقدسه  
بشریه لرینی ایاق الله المق کبی عظیم جنایت اجرا ایتک  
اسلامده یوقدر . فتحدن یعنی ترک سلاح ایتدکدن  
صوکره عموم اهالی نظر شریعتده مساوات اوزره بولنور  
بناءً علیه ولات ومأمورین سائرته طرفلرندن حقلرنده  
لطف وراقته معامله اولنور ایدی .

دین اسلام، اوילה بر دین مبین، اخلاق اسلامیه  
اوילה بر خلق کزیندرکه اسلام علیهنده نه کندیلری حرکت،  
نده غیرلرینی اغرا ایتماک اوزره و قتيله عهد و پیمان  
ویردکاری حالده اخیراً نقض ايله اهل اسلامک وقعہ  
احزاب کبی اکه طار بر زماننده هیئت اسلامیه بی شدیداً  
تهدیده جرأت ایتدکلرندن طولایی علیهلرنده اعلان  
حربه ونهایت مسلحلرینک قتل واعد امنه حکم الله [۱]

---

[۱] امر بی قریظه نکه فصلنه طرفینجه بالانتخاب حکم تعیین  
اولنان « سعد بن معاذ » رضی الله تعالی عنه حضرتلرینک ویردیکی

صادر اولمش بولان بنی قریظه یهودیلرینک مدینه ده قتل  
اولندقلری زمان وقت ظهر حرارتنه تصادف ایستدیکندن  
مبعوث رحمة للعالمین اولان اوسلطان اقلیم رسالت  
افندیمز بنی قریظه نک یالکز قتل جزاسنه مستحق  
اولوب حرارت وجوع ایله عطش کی برایکنجی، اوچنجی  
عذابله استحقاقلری اولدیغنی بالیان مرقوملرک  
اعداملری خصوصنک سرین برهواده اجراسی ضمننده  
ایرتسی صباحه ترك وتأخیر ایدلمسنى : [ لاتجمعوا علیهم  
حر هذا اليوم والسلاح قیلوهم حتی یبردوا ] عباره سیله  
فرمان بیوردقدن فضله اسیرلرک اوکنه برقاج یوک خرما  
دخی صاچدیروب جوعلرینی دفع بیورمشدی !

حالبوکه اوزمانلرده دنیانک هرجهتلرنده سیماورویاده  
دکل بویله اسرا وافراد اعدا حقنده عالیجنابانه کریمانه  
معامله ! حتی عوام اهالی ورعایا حقنده فؤدالیزم جنایاتنک  
اجراسی رؤسا واولیای امور ایچون امورعادیه صره سنده  
ایدی !

قتل واعدام حکمی اوزرینه طرف اشرف رسالتیناهدن تصویب  
وامضا ضمننده حکم مشارالبه خطاباً شرفصادر اولان « لقد  
حکمت فیهم بحکم الله من فوق سبعة ارقعة » حدیث  
شریف اعتباریله !



مثلاً انجیل شریف، اساساً جبارمک تحت اسارتلرنده  
بولنان طوائفه کوندرلمش اولوب احکامی دخی صبر  
وسکونت یعنی حالت اسارتده چکیلان مظالم وتعدیاته  
قارشی استیصال مرضای ربانی ایچون ابراز صبروتحمل  
وهرخصوصده هر درلو تحریکات جسمانیه نک عبادتله  
تسکین ایدلمسی جهتلیخی توصیه دن عبارت بولندیغندن  
سوزره نلر، واساللرکی قرون وسطانک متغلبه کروهی  
منافع امت علیهنده کی حرکات وحشیانه لرندن طولای  
اهالیده حس ایدم جکلری غلیان وهیجانی احکام انجیله  
دعوتله تسکین ایدم بیله جکلردی .

عدالت اسلامیته نک بودرجه سی ترقی شوکت اسلامیته نک  
اسبابندن بری، بلکه برنجیسی اولمشدر .

ایشته اسلامیتک شوجهتله اقطار عالمه انتشارنده  
ومسلمانلرک برعصر ظرفنده اوله محبرالعقول برشان  
عظیم صاحبی اوله بیللملرنده کی تأثیر، دین مبین اسلامک  
حائز اولدینی مزایای فاخره مخصوصه نک تأثیریدر !

مع مافیه دین مبینک مؤسس عالیمی وقانون مقدس  
الهیته واسطه نشر وتعمیمی بولنان حضرت پیغمبر  
ذیشانک اوابده برچوق خصوصیت احوالی ده واردرکه

او خصوصیتلرک کسب و احرازى بر بشر دیگر ایچون  
 ممکن دکدر . فوق العاده صداقت ، امانت ، سخاوت  
 فوق العاده فراست ، زکات ، شجاعت و سائر خصایص  
 شریفه لرنده کی تخصصلری عموجه مسلم ! . لکن بر دقیقه  
 دهـا وار که انی انجق چشم خرده بین بصیرت ادراک  
 ایدر : مظفریات متـابعه رسالتپناهیلری هپ حکمت  
 مداراتله ممزوج ! اکثر اجراءات اکثر موفقیات جلیله لری .  
 مداراتک اثر اخیر نتاجیدر . !

مدارات ، او حضرت عالی همت ایچون بر مقدمه  
 الجیش مظفریت ایدی . « واغلظ ! » فرمان الهینک  
 شرفصدورینه دکین منافقین و اشدای اعدای دین مبین  
 ایله اولان معاشرات و معاملاتنده ممکن مرتبه مدارات  
 و مماشات صورتیله اداره مصلحت ایله مشدر !

اشبو فرمان الهینک شرفصدورندن اوللری شده  
 اصلا محل یوغیدی . زیرا قوه اسلامیه نک حسب البدایه  
 زمان ضعف و درماندگیسی اوزمانلر ایدی . اندن صوکره کی  
 کونلرده ایسه قوای عمومیه بالنسبه تزايد و تکمل ایتمش  
 اولدیغندن اقتضای حاله کوره هم رفق و ملایمت ، هم  
 بالعکس غلظت و شدت اراده و بعضاً مقتضای مصلحت

اوله رق رفق یرینه شدت ، شدت یرینه ملایمت دخی  
اجرا اولنه بیلیر ایدی .

مداراتک بودر جده حسن تأثیری اولمسیدی هیئت  
محترمه اسلامیه نک افکار و آثارینک علیهنده کی حرکات  
منافقانه سیله معروف بولان «عبدالله بن ابی بن سلول» کی  
مشاهیر منافقین ، سیف ساطع شریعتله در حال اعدام  
اولنه جقلردی .

«لینت خلق ارأه ایتک» مفهومه موضوع اولان  
مداراتک ضدی غلظت قلب ، خشونت کلام و سائره کی  
شیلر اولدینی اولا دوشونیلوب برده «ولو کنت فظاً  
غلیظ القلب لانفضوا» آیت کریمه سنک ضماً دلالت  
ایتدیکی حکمت بولتیقه ملاحظه ایدلیدیکی تقدیرده تماماً  
تظاهر ایدرکه افدیمز مداراته رعایت بیورمش اولمسیدی  
یعنی اجانبه قارشی وحشتی و دین مبین اسلامدن نفرتی  
موجب اوله جق لسان شدت قوللانش و بطش جبارانه ده  
بولنش اولمسیدی موفقیات معظمه سنه نوعاً ناقصان طریانی  
محققدی .

او حالده مداراتک حسن تأثیر کوسترمیه جکی بر زمان  
بیله کلمیه جکدر .

— ۴ —

ذات عالی رسالتنامه، صلی علیه الاله افندیز، ترك  
وطن ایتدکجه اجرات عظیمه سنه تشبده برکونامو فقیترینی  
مشاهده بیوره مامش لردی !

وقتا که مککی ترك ایدوب مدینه منوره بی تشریف  
و آرامگاه اتخاذ بیوردیلر تعمیم دین او غورنده حال  
ومصلحتک ایجاب آنجه که صلح و مسالمة، گاه حرب و مقابله  
طرزنده حرکت بیورمش و هر بر موفقیاتی او هجرت سنیه لر  
ینی تعقیباً رونمون اولمشدر .

دینی قبول ایتدکده کسه حقننده اوزمان جبرو شدت  
ارائه سی قابل اولمیدیغندن ابتداء هجرت سنیه ده مدینه یه  
جوار اولان بعض قبائل یهود، دین و اهل اسلام علیه ده  
بولناملری اوزرینه اولاعهده ربط ایدلمشدی که شوعهده،  
تجاوزی و تدافعی هر حرکته اهل اسلامی مشرکین مدینه نیک  
تعرضدن تأمین ایدیور دیمکدی .

اهل اسلام ایسه مدینه ده اسباب اسکان و استراحتلرینی  
استحصال ایتدکدن صوکره ینه ایجاب حال و مصلحت  
اوله رق مکه اهالیسنک تأدیب و تنکیله لزوم کورولمش  
وبدر اولی، بطن نخله، بدر کبری، قرده، احد و قایمی



کې دفعاتله علیهلرنده اعلان حرب و حرکت ایدلکدن  
و برخیلی شدتلی مقابله لرینه تصادف ده اولندقدن صوکره  
یدنجی سنه هجریده حدیبیه مصالحه سی نامیله معروف  
مصالحه عقد و اجرا ایدلمشدر . اشب و صلح ، اساساً حریت  
وجودان شرطی متضمن بناءً علیه — غایه سی اعتباریله —  
اهل مکه علیهنده برصاح اولدیغندن اوسایه ده اهل اسلام ،  
علناً ترویج حقیقت ایده بیلیمش و دین مبینک بلامانع همان  
سرعت انتشارینی تأمین ایله مشدر .

فخر کائنات افندیمر ، امت مرحومه سنک کرک دنیا به  
کرک اخرایه متعلق هر درلو حوایج و لوازم اجتماعیه لرینک  
تهوین حصوله مدار اوله جق برمسلك تعیین واسلامک  
هیئت اجتماعیه سنی مقدس ، ابدی الاحکام برقانون الهی  
اولان حضرت قرآنک حکم منینی اوزره تأسیس و تشکیل  
ایله مشدر .

لوازم اجتماعیه نك تهوین حصوله مداراتم اولوق اوزره  
تعیین بیوریلان مسلك ایسه مسلك شریف رسالت پناهیلر-  
یدرکه اوده انجق سنن سنیه محمدیه و سیر شریفه احمدیه لریدر .  
شومسلك شریفك دوام محافظه سنده اعتنا اولندیغی  
مدنجه هیئت اسلامیه ترقیده دائم ایدی . امر اعتناده

تساح کو سترلیدی اندن اعتباراً اسلامده انتظام ادارهیه  
خلل ککش، انحطاط اثری مشاهده اولمش وبری اوج  
اعلای تکمله ایصال ایچون ستمتزه توجه ایدن بشرای  
قدسی ادای غالبیت ده یاری یولده منع توقیف ایدلمشدر!..  
بنی امیه ایله بنی هاشم ارمه سنده زمان جهالتدن یقیه  
اولان منافرت وعداوتک دکل تجدیدینی! بایک بقاسنی و جملہ،  
صفین محاربه لری، کربلا وقعہ دلسوزی، امویلر ایله  
عباسیلرک یکدیگری علیهنده کی دیگر معاملاتنی کی هیئتک  
بقاسنی مخاطرهیه دوشورن دها برچوق حالاتدن هیچ  
برینک وقوعنی شرع عالی تجویز اتمیور ایدی.  
ایشته برچوق شانلی فتوحات و موفقیاتہ مقابلہ  
اسلامک برده بومثللو قانلی احوال ایله صحائف کتاب  
عالمده ستون شؤناتی لکله مسی بزم یعنی هیئت محترمه  
اسلامیه مزک برتمثال عال العال واجب الامتالی اولان ذات  
رسالت پناهیئک مسلك شریفندن عدول و انحراف اولنسی  
اثریدر. چونکه اونجی مکرم، بزه اسلامی ملت واحده  
طاتمشددر. اوحالده اختلاف و اغتشاش اولیه جقدی.  
دائماً اتحاد و اتفاق اوزره بولایلوب تفرقه طرفه قابو  
آچلمیه جقدی.

والحاصل : طريق هدايت ومدنيتى كوسترن سيد  
كائنات افديتز حضرتلرى، امت مرحومه سنى و —  
طوغرىسى دها شموللى اولق اوزره — بتون شو عالم  
حيات وبشرىنى اويله سالم ومستقيم بر طريق وتيق اوزره  
سمت هدايت وسعاده ومسلك لازم السلوك مدنيتيه  
اولقدر سوركللى بر صورتده سوق وارشاد بيور مشدر كه  
بوخصوص دين ومذهب نقطه نظرن بزه ضله ومخالف  
اولان بعض مدققين حكمانك بيله دنيانك نهايت دين  
اسلامى قبول ايده جكنى ادعا واعتراف ايتلرينه قدر تائير  
كوستر مشدر .

حكمانك اودعالرينك مرتبه ثبوتيه واصل اوله جنى  
مسئله سنه ايسه دين اسلامك، طبايعه ملايم كلييه جك هييج  
برجهتى اولماق وهر بر خصوصده مكارم ومعالي امته  
موضوع بولمق كى اساس متين اوزره مؤسس اولمى  
وافرادىنى بشرك ايسه دائما بومثللو معالى يه بالطبع مبال  
بولمىسى ماده لرى برهاندر .

اوت ! شاهدكروى مدنيتك روح انروحي مثابه سنده  
اولان اسلاميتك مزاياسنه مرور زمان، كثرت اختلاط  
سييلريله ملل متمدنه جه اطلاع حاصل اوله جق واشبو

اطلاع، نقاب عاجز تعصبی ده برابر ازاله ایدہ بیلدیکی  
تقدیرده دین مبین اسلام ایله تدین نقطه سی، انی ایسته  
اوزمان کمال سرعتله تعقیب ایدہ جکدرکه هند ده، بلاد  
افریقیه ده، بعض ممالک سائرہ اجنبیه ده اسلامک هیچ  
برجبر وتضییق اولمدینی حالده زمان حاضرده کی صورت  
انتشاری بوکا دلالت ایدیور .

مع مافیه دین اسلامک آتیا صورت تعمیم وانتشاری  
حقنده معاشر حکمانک فرضیاتندن خارج اسبابک خلق  
بیورلمیه جنی ده ادعا ایدیلہ من .

نه بختیار برامت، نه اقباللی برملتز که دینمزک درجه  
کماله واصل اولدیغنی جناب حق پیغمبریمزک لسان رسالتیه  
بزه تبشیر بیوردی !  
یوسف سعاد

۱۶ شعبان سنه ۱۳۱۷





بِسْمِ اللَّهِ الرَّحْمَنِ الرَّحِيمِ

## فصل سادس

ارغنجی منہ لہجہ و قباہی

کعب بن اشرفک قتل . غزوہ قردہ . ازدواج النبی باحفصہ  
بنت الفاروق . تزویج ام کلثوم . غزوہ احد . غزوہ حراء  
الاسد . ام المصائب . ولادت جناب حسن المجتبی .  
تحریم خمر

— ۱ —

{ کعب بن اشرفک قتل }

شهر ربیع الاولک اون در دنجی کیجہ سندہ — و علی روایہ  
شهر رمضانہ — واقع اولمشر :

کعب بن اشرف ، بر روایتہ کورہ اوس قبیلہ سی رئیس  
ایدی . روایت اخراہہ کورہ بنی طی ، یاخود بنی نضیر قبیلہ .  
سندن بر شاعر آتشر بان ایدی . ہر اوچ روایت دہ  
روایات مشہورہ دندر .

ذات عالی رسالتنہا ہیہ عداوت کافرانہ سندن  
طولابی کرک حضرت پیغمبر صلی اللہ تعالیٰ علیہ وسلم

افندیمز، کړك اهل اسلام علیهنده لسان شاعرانه  
ایله سوزسویله مکدن خالی قلماز، زنکین بر حریف ایدی.  
حتی کندی قبیله سی خلقندن قبول اسلامه مائل و  
مستعد کبی کوردیکی افرادی قتله قدر تهدید و اهل اسلامه  
عداوتی اولانلری احسانلره غرق ایله تشدید عداوته  
تشویق ایله ردی !

برارالق مرقوم کعبک تحت ریاستنده عقد انجمن  
مشورت ایتمش اولان کندی قبیله سی علماء یهودیه سی :  
« شرف قدومی توراتلرده مبشر، بناءً علیه اهل ازعاجه  
منتظر اولان نبی ذیشان آخر الزمان بودر » دیدکلرنده  
بورای، کندی افکار حسودانه سنه او یغون کلیان کعب  
لعین، حدت ایدمړك علماء مرقومه یه کیسه سماحتندن  
تعین و تخصیص ایله دیکی معاشاتی قطع ایله مش و اوسوز-  
لرندن دونوبده یاننده انلرك : « بزاولجه دوشونه مامشز.  
واقعا آخر زمانده بر پیغمبر کله جکدر . لکن بو ( محمد  
علیه السلام ) او پیغمبر دکلدرد ، دیه اظهار ندامت  
ایتدکلرینی کورنجه یه دکی عطیه لرینی ویرمامشدر .

لعینک سیات کافرانه سی یالکیز بونکله ده قلمدی 1  
بدرده قریش اردوسنک او غرادیغی هزیمته قارشی حرکات

حربیه به آرتق زره قدر مجالی قالماش ایکن بونک همان مکده  
کیدوب حتی هزیمت قریشیه حقنده مکده لیلرک اهل اسلام  
علیهنده افکارینی تهییج ایچون :

( طجنت رخی بدر لمهلك اهله )

( ولئیل بدر یستهل ویدمع )

( قتلت سرارة الناس حول حياضهم )

( لاتبعدوا ان الملوك تصرع )

یتلرینی حاوی نشاند مخصوصه سویله مک کی هم دلی،  
هم الی ایله ایله دیکی تحریکات، مشرکین قریشک بالآخره پک  
از زمانده جسارته کلوب اهل اسلام علیهنده ایاغه قالمسینه  
سبب اوله نیلمشدی .

اکامینی مرقومک ازاله وجودینه لزوم کورولمش  
وحننده فرمان قضا شرفصادر اولمش ایدی ! . ذات  
عالی پیغمبری، اصحاب کرامنه :

— « من لکعب ؟ یعنی کعبی کیم اولدیرر ؟ زیرا

او، الاهی ورسول الاهی انجندی ،

بیوردیلر . ملعونک همشیره زاده سی اولوب اوس قبيله سنک  
بنی عبدالاشهل عشرتندن اولجه قبول دین اسلام ایله مش  
بولنان ( محمد بن مسامة الانصاری ) رضی الله عنه حضر تلری  
ایاغه قاقوب زمین اجابتده دیدی :

— « یارسول الله ! انی اولدیردیکم مدن ممنون

اولور میسکمز ؟ »

بوجوابه طرف اشرف نبویدن محظوظیت اظهار اولنه رق :

— « اوت ! »

بیورلدی . اودخی محله سی طرفنه دونوب کیتدی .

وایشی برقاج کون کندی کندیینه مذاکره و ملاحظه ایده

طور دقدن صوکره ، کعب لعینک سود قرنداشی اولوب

« ابونائله » کتیه سیله مکنی بولنان « ساسکان ابن ام سلامه

بن وقش » نام صحابی غیرتوره اچدی . موافقت دخی الدی .

انک عقیبنده کوریلان لزوم اوزرینه بناء [ عباد بن

بشر بن وقش ، حرث بن اوس بن معاذ ، ابو عیسی بن جبیر ]

نام انصار کرام دخی اوایشده اتفاقه داخل اولدیلر .

مطلوب اولان اتفاق اولوجهله برکره حصوله کلنجه

متفقین ، حضور پر نور رسالت پناه یه کلوب :

— « یارسول الله ! بزاکا برشی دیملی یز ! انی برشیله

قاندیرملی یز ! فقط نه دیه لم ؟ »

بعده حضرت حبیب خدا افندیمز دخی :

— « آغزیکزه نه کلیرسه یعنی هر نه یی مناسب

کورورسه کز انی دیسکمز ! »

فرمانيله انلری افکارنده حر و تماماً مأذون بیوردی .  
 بومأذونیتی استحصال ایلدکدن صوکره « ابونائله » دن  
 بشقه اولان دیکر اوچ رفیقيله برابر اولدینی حالدله جناب  
 [ ابن مسلمه ] حضرتلری ، ارتق کعب لعینک سمتنه  
 طوغری کیتمشدر .

لعین اوصرده بنی نضیر خورمالقلاری ارمه سنده  
 برنخلستانده کندینه مخصوص برقلعه یاپدیرمش انده اقامت  
 ایدردی .

اول وقت که واروب لعینی بولدی . ابن مسلمه -  
 الانصاری حضرتلری اکا :

— « یا کعب ! بو آدم [ حضرت پیغمبر ] بزدن  
 صدقه ایسته یه رک بزی زورلادی . حالبوکه بزکندی  
 بیه جکمزى بيله زور بولیورزه شمدی سزه کلدک . سزدن  
 اودونج برشی الوب اکا ویره جکمز »

دیرکن کعب انک سوزینی برطور ممنونیتله کسه رک :  
 — « والله بن بیلیم که سزی اندن دها زیاده زور -  
 لایه جقدر او ! »

دیدى . محمد بن مسلمة الانصاری حضرتلری سوزنده  
 دوام ایتدی :

— « بزطوغریسی هر فصله اکاتباع اولمش بولندق .



مستقبلده حالتك نه يه منجر اوله جفتى هنوز بيله مديكمز  
ايچون ارتق براغه ميورز . باقم نه اوله جق ! . مراد  
ايتدك كه بزه بر ، ياخود ايكي بوك حنطه ويره سگنز ،  
بوسوزي ديكله يه طوران كعب :

— « اوت ! اما بكا رهن ويري كزده ! . »

ديجه هيئت متفقه ، صورتى :

— « رهن ايچون نه يي مراد ايدرسك ؟ »

اكا قارشى كعب :

— « قاريلري كزي ! ... »

ديه خبائت جبليه سنى اظهاره جسارت ايدنجه بريكيلر ديديلر :

— « ناصل اولورده قاريلري مزي سكا رهن ويرهلم ؟ »

سن عربك كوزليسك ! قاريلرايسه كوزلاره ذاتا ميل

ايدرلر .

اندن صوكره :

— « اويله ايسه اوغللري كزي ! . »

ديديسه ده :

— « اوغللري مزيده سكا ناصل رهين ويريلاه بيلير ؟ »

صوكره انلره عربلر ، بريوك حنطه يه رهن اولان ! ديه

سب ايدرلر كه اوده بزه عار عظيمدر ،

سوزيله برطرز مستغربانه ده جواب ويرمش اولان هيئت متفقہ،  
اوجوابلرينه :

— « فقط سکا سلا حليمزى ترهين ايده لم »

سوزيني علاوه ايتد کلام رنده رهن مذکور ارتق کعب طرفندن  
قرين قبول کورولديکندن جناب ابن مسلمہ حضرت تارينک  
هيئتى او وعد ايله دونوب کيرى کلدی. ديگر روايتہ کوره:  
رفقاسيله برابر اولدينى خالده کله مامش اولان ابونا ئله  
حضرت تارى انلردن صوکره کلوب کعبى بولدقده لعينه:

— « امان اى ابن اشرف ! بن سکا بر حاجت ايجون

کلام . سويله مسنى ايسترم . فقط . . . . » ديدى لعين :

— « سويله ! » ديمسيله ابونا ئله دخى :

— « کان قدوم هذا الرجل ] والمراد به محمد رسول الله[

علينا بلاء من البلاء . عادتنا العرب . ورمتنا عن قوس

واحدة وقطعت عنا السبل . حتى جاع العيال . وجهدت

الانفس . واصبحنا قد جهدنا وجهد عيالنا »

سوزيله عرض مرام ايدرکن کعب انک سوزينه قارشى :

— « والله يا ابن ام سلامه ! بونى سکا اولدينى

واوله جنى کي خبر ويريردم . ايش ينه بنم ديدیکم کي

اوله جق ! »

ديمشدر ! انک اوزرينه جناب ابونا ئله :

— « بن ایسترم که بزه بر مقدار ذخیره صاته سکز .

ارزواید رسه کز رهن دخی ویره بیلیرز »  
دیدی . کعب ایسه :

— « سز بکا قاریلریکزی یاخود اولادیکنزی رهن  
ویره . جکسکز ! » دیدیکندن ابونا لله :

— « دیمک که بزه حقارت ایتمکی مراد ایتدک .  
سن اجمل العرب بسک . بزسکا قادینلریمزی ناصل رهن  
ویره لم ؟ اوغللریمزی ده ناصل رهن ویره لم . بریاخود  
ایکی یوک حنطه یه رهن ویریلا ! دیه صوکره چاغیرلمز لر می ؟ »  
جوانی ویردکن صوکره دوام ایدهرک :

— « فقط باشقه درلو مثلاً سلاح کی برشیی رهن ویره لم »  
تمه سنی ده علاوه ایله دیکی ائنده ایدی که او خصوصده  
کعبک ده موافقتی حاصل اولمش بولندیغندن او شرطله  
ابونا لله حضرتلری دونوب رفقا سنک یانه گلش و انلره  
« سلا حلیریکزی حضور رسول الله کتیریکنز ! »

دیه امر و تنبیه ایله مشدر .

بعده هیئت متفقہ ، بر موجب امر و تنبیه سلا حلیله  
برابر اولدینی حالدہ نزد جلیل رسالت پناهیده طوپا لاندیلر .  
اره لرندہ جریان ایدن مذاکره نک ختامی متعاقب قالقوب  
کعبک اولدینی سمتہ طوغری حرکت ایتدیلر .

اشبو حر کتده ذات عالی پیغمبری ، انلرله برابر  
اوله رق « بقیع الغرقد » نام محله د کین مشی و حرکت  
بیور مشلردر .

زمان مفارقت هایونلر ندهده انلری اولاسمت  
مقصوده طوضری بالتوجیه [ انطلقوا علی اسم الله ! ] دیه  
عزم و حرکت امر و تنبییه ایلد کدن و [ اللهم اعنهم ! ]  
دعاسنی ده بیوردق دن صوکره کندیلری ایریلوب سعادتخانه  
نبویلرینه کلشدر . ایشته ایشلرک بو صورتله وقوعه  
کلدیکی زمان ، مهتابلی بر کیجه ایدی .

وقتا که کعبک قلعه سنه واردیلر . « ابن مسلمة الانصاری »  
رضی عنه الباری حضرتلری و علی روایة « ابونائله » :  
— « یا کعب ! »

دیه دیه یو کسک سسله باغیره رق لعینی او یاندر مق ایسته .  
مش کعب دخی اوسسی ایشتمشدی . بناءً علیه طیشاری به  
چیقماق اوزره حاضر لایوب ایاغه قالقدیفی زمان زوجه سی  
اکا دیدی :

— « بو ساعتده نریمه چیقه یورسک ؟ »  
او دخی :

— « نه وار ! ابن مسلمة ایله قرن داشم ابونائله در ،  
جوانخی ویرمشده روجه سی :

— « اسمع صوتا كأنه يقطر منه الدم ،  
 ديه ايشك ايجنده وجوديني عقلاً حس ايتديكي  
 شر وشأمتی خاطره کتيرمک ايتديکی حالدہ سوزی  
 مفید اوله مدی !

بریکی طرفدهده جناب ابن مسلمة الانصاری حضر تلی  
 رفقاسنه .

— « کعب ، بزم یانمزه کلديکی زمان بن انک صاحنه  
 یاپشیرم . بنم صاحنه محکم یاپشوبده بر اشارتمی کوردیککنز  
 انده سزده قیلنجلیکنزله شدیداً اوروب اولدیریکنز ! »  
 تنبیهاتی ویرمشدی !

کعب ایسه ، قلعه سندن اینوب البسه سیله متوشع  
 اولدینی حالدہ انلرک یانسه کلدی . اوستنی ، البسه سنی  
 کوزل قوقولرله تعطیر ایتمشدی . ابن مسلمة الانصاری  
 حضر تلی اوزمان :

— « یا کعب ! شمدی سنده کی قوقو کی کوزل هیچ  
 بر قوقو عمر مده طویماشم ! »

دیه رک لعینک قو لتوغنی اولا قابارتدقده لعین :  
 — « اوله اوله جقیا ! نساء عربک اجمل واعطری

قوینمده یاتیور .



جوابی ویرمکله ابن مسلمه حضرتلری :  
 — « باشکزده کی کوزل قوقوی قوقلامق ایچون بکا  
 مساعده ایدرمیسکز ؟ »  
 دیمش اوده :  
 — « بك اعلا . »

مساعده سنی ویرمش اولغله جناب ابن مسلمه ایستدیکی  
 قدر قوقلادقن فضله رفقا-نی دخی برر برقوقلاتمشدر .  
 دها صوکره « بر دها قوقلایهیم » دین ابن مسلمه ،  
 تکرار مظهر مساعده اولنجه قوقلایه جق بروضه ساده  
 دلانده یاناشوب صاچی محکم دسته لیه رک رفقاسنه :  
 — « اقتلوا عدو الله ! » .

دیه امر ایتمش انلر دخی اوستنه صاعقه بلا کی اینوب  
 لعینی اولدیرمشلردر .

حین قتله هیئت مذکور نك اللرنده کی قیلنجلر  
 یکدیگرینی رد و قرع ایدره رک حرث بن اوش حضرتلری  
 یاره لنمش و اتمام قتله بردنبره موفقیت حصوله کلامشدی .  
 « محمد بن مسلمه » حضرتلری دیرکه :

— « ایشه او زمان یانمه بولندیردیغم کوچوک  
 قیلنج عقمه کلدی . چیقاردم . اوجنی لعینک کوبکندن

قارننه صوقوب اشاغییه طوغری شدتله باصدیردم .  
 قارننی تاقاصیغنه قدر کس دیروب یاردم . لعین ، اوپله بر صیحه  
 چیقاردی که قلعه نك بتون اهلایسی اویانوب فزع اشارتی  
 اولان نار استغانه نی همان یاقشردی ! » .

لعینك صیحه سنی او کیجه بنی حارثه یهودیلرندن  
 « ابن سینه » نام بر یهودی بنام ایشیده رك نار استغانه یاقش و :  
 « انی لاجد ریح دم مسفوح بیثرب ! » دیه اظهار تحزن  
 وتوجع ایتشدی ! . حالبوکه محل وقعه ایله ابن سینه نك  
 اولدینی محلك بر فرسخ مسافه اره سی وار ایدی !!

امر مطلوب قتل بر کره اتمام ایدلدکن صوکره هیئت  
 کیرییه طوغری فراراً عودت ایتدی . اولابنی امیه یه ،  
 بعده بنی قریظه یه وصوکره « بغاث » نام محلمره اوغرایوب  
 « حرة العریض » ، کلدی .

مجروح « حرث بن اوس » ك یاره سندن شدتلیجه  
 قان اقمده اولسی کندیسنی خیلی درمانسز براقدیغندن  
 « حرة العریض » محلدن او حضرت ، مدینه یه دکن  
 فوق الاعناق کتیرلدی . « بقیع الغرقده » محله کلدیلر .  
 امر مظفریته دلالت ایتك اوزره اوراده صوت بلند ایله  
 تکبیر کتیرمکه باشلا دیلر . رسول اکرم افندیمز ایسه  
 او ساعتده صلاة قیام الیلده ایدی . تکبیرك امر مظفریته

دلالتنه در حال انتقال بیورده رق کند یاری ده هان اولدقلری  
یردنبری تکبیره مشغول اولدیلر .

جناب حرث ، حضور پر نو رسالتپناهی به کتیرلدیکی  
زمان افندیمر ، دهان شریفارندن ریق ستاره بریق عالیلریله  
انک یاره سی اوزرینه نفخ بیوردقلری ساعتده الم جراحت  
سکوتتذیر اولمشدر !

بو وقعه نك عقیب وقوعنده ایدی اصحاب کرامدن  
« محیصه بن مسعود » رضی الله تعالی عنه حضر تلی ،  
طرف اشرف رسالتپناهیدن قتلنه مأمور بیوریلان یهود بنی  
حارثه دن « ابن سنینه » یی اولدیردی . حالبوکه جناب  
محیصه نك بیوک برادری « حویصه بن مسعود » ، مقتول  
سرقوم ایله حلیف و متعاهد اولدیغندن محیصه یی :

— « ای عدوالله ! سن ابن سنینه یی قتل ایتدك !  
والله قارنكده اولان شحومك بیله انك مالندندر ،  
دیه توبیخ ایتدكدن صوکره ضربه ده باشلامقله محیصه  
اكا خطاباً :

— « انی قتله بنی مأمور ایدن ذات عالیشان ، سنی  
دخی قتله مأمور ایتسه سنی دخی قتل ایدردم ! »  
دیمشدر .

بوسوزایسه حویصه نك دقت و تعجبی استلزام ایدر ك :

— « دیمك كه شمدي محمد [ علیه الصلوة والسلام ] بنی

قتل ایله سنی مأمورایتسه بنی قتل ایده جكسك »

دیر كن محیصه ده :

— « اوت قتل ایدرم ! » جوا بنی ویردیکندن حویصه :

— « والله بر دین كه انكچون محبتلی ایکی قرنداش لر

یكدیكرینی قتل ایدر . دین عجیبدر » دیوب همان قبول

اسلام ایله مشدی كه محاوره مذکوریه متضمن اوله رق

محیصه شو :

یلوم ابن امی لوا مرت بقتله	لطبقت ذفراه بابیض قاضب
حسام كلون الملح اخلص مقله	متی ماتصوبه فلیس بكاذب
وماسرنی انی قتلنك طائماً	ولوان لی مابین بصری ومارب
بیترینی نظم وانشاد ایتمشدر .	

— ۲ —

### — غزوه قرده —

قریش تجارینك اولدنبری کیدوب کلمكده اولدقلری

شام یولی بدر وقعه سندن صوكره مخاطره یه دوشدیکندن

مكه تاجرلری عراق یولیه طولا شه رق شامه کیتمه

باشلامشلردی !

ایشته او ، یکی یولده « صفوان بن امیه » ایله  
 « خویطب بن عبدالعزی » یاخود « ابو سفیان » ک نظارت  
 محافظانه سی تحتده بر قافله نک یوله چیقارلیدی و « ذات -  
 القرده » نام محله دکین کیتدکلرنده اندن کچمکه یول بوله -  
 مدقلری مسموع و معلوم عالی اولغله رسول اکرم  
 افدیمز یوز نفر سواری بی معیتته ویره رک [ زید بن حارثه ]  
 رضی الله عنه حضرتلرینی او قافله نک علیهنده همان سوق  
 ایله مشدر .

زید حضرتلرینک سریه سنیه قوماندانلغنه تعیین  
 بیورلمسندگی حکمت ، علیهنه حرکت ایتدیکی اوحوالینک  
 احوالنه وقوف واطلاعی ایدی ! .

اولوقت که نجد دیارنده [ ذات القرده ] نام صویک  
 باشنه واردی قافله بی بأذن الله تعالی اله کچیره بیلدیکندن  
 سحر و قی اوزرینه بغته یوریوب کافه اموالی المش  
 وحتی بکر بن وائل قبیله سندن « فرات بن حبان » نام  
 رهبرلرینی دخی سیر و اغتنام ایتمشدر .

او وقعه ده مال غنیمتدن بیت المال ایچون ایبردقلری  
 خمس مالاک قیمتی یکرمی بیک درهمه بالغ اولمشدی .



— ۳ —

### — از دواج النبی با حفصه —

حضرت عثمان علیه رضوان الرحمان افندیمنز حضرت تلرینک  
 همسر عالیکهرلری « رقیه بنت النبی » صلی الله تعالی علیه  
 وسلم افندیمنز حضرت تلرینک وقوع و فواترله مجرد قالدقلری  
 زمان ، حضرت عمر الفاروق رضی الله تعالی عنه حضرت تلر-  
 ینک دامادی « خنیس بن حذافه بن قیس بن عدی بن  
 سعد بن سهم بن عمرو القرشی السهمی » نک و فاتنده  
 طول قالمش بولنان کریمه مکرمه لری حضرت « حفصه »  
 رضی الله عنهای اکا و یرمه بی پدری جناب عمر الفاروق  
 ارزو بیوروب حضرت عثمان افندیمنز دخی نیت موافقتلری  
 اظهار بیورمش اولدقلری حالد بالآخره موافقت یتندن  
 واز یکمکله بوندن طولای الفاروق حضرت تلری براز  
 مغبر الخاطر اوله قالمش وحتی بو بایده کی تأثراتی تا ذات  
 عالی رسالتنهای یه عرض ایتمکدن کندیلری بردرلو  
 کیری الهامشاردی .

الفاروق حضرت تلرینک بو اغبرار و تأسفلری دفع  
 و تعدیل ایچون رسول مکرم افندیمنز ، حفصه رضی الله

عنہائی کندی ذات ہایون احمدیلرینہ تزویج ایله فاروق  
مشار الہی قائم بدرک شرف عالیہاسیلہ دلشاد بیور مشلردی .

— ۵ —

### — تزویج ام کلثوم —

بدر مظفریت عظیمہ سنی تبشیر ایچون مدینہ یہ کلان  
مژده جیلرک یوم مواصلت لرنده حضرت عثمان علیہ رضوان  
المنان افندی مژک زوجہ مطهرہ لری « رقیہ بنت النبی »  
صلی اللہ تعالیٰ علیہ وسلم حضرت تلیری فوت اولدیغندن  
افندی مژ ، ایکنجی کریمہ مکرملری « ام کلثوم » رضی  
عنہا رب الحی القیوم حضرت تلیری جناب عثمان بن عفان  
حضرت تلیرینہ تزویج بیور مشلردر . ام کلثوم حضرت تلیری ،  
اولجه « عتیبه ابن ابی لہب » ک زوجہ سی ایدی .  
رسالتیناہ افندی مژک مکده بولتدقلری اتنادہ حق ہایون نرنده  
قریش طرفندن روا کوریلان مظالمہ عتیبه دخی اشتراک  
ابتدی کیچون مکافاة شام یولتده « زرقاء » نام مرحلہده  
برارسلانک پنجه سنده هلاک اولوب اندن کنیدیسی  
طول قالمشدی .

صحابی مشارالہک ، بری برینی متعاقب ایکی کریمہ

مكرمه نبوى ايله اولان ازدواجى ، « ذى النورين » لقب  
عاليه سيله تلقیب اولمىسه سبب اولمشدر !

— ۵ —

### — غزوة احد —

اشبو غزوة مشهوره نك شهرشوال يدنجى چهارشنبه  
كوننده وفوعه كلديكى حقهده تاريخ ، معلومات  
ويرر كن ديوركه :

اهل مكه ده تداركات — ابو سفيانك نظارتى  
التنده اوله رق سوق اولنان قافله . ساحل طريقه  
كلوب مكه يه سالماً واصل اولمش ، لكن قافله اموال  
تجاره سینه حصه دار بولنان افراد ورؤساي قريشك  
اكثري — سيوف اسلاميه ايله تلف اولق اوزره —  
اوزمان بدرده بولمش ايدى .

قافله مذكوره ، اللى بيك التون سرمايه لى وبيك  
حوه بوكى مال ايدى . مكه يه اتناى موصلتمده حصه دار .  
برندن اكثر ك بدرده بولمىسى حسيبله حامل اولديغى  
الموال موجوده سى — مؤخرأ بين الشركا تقسيم ايدملك

اوزره اوزمان ملتجه بردار شورى اعتبار اولنان -  
داراندوده حفظ وتوقيف اولندى .

قريشك بدرده اوغرا ديفى هزيمت سبيله بقيه السيو -  
فك پريشان برحاله مكهيه وصولنده « صفوان بن اميه »  
ايله « عكرمه بن ابو جهل » كې باباسى تلف ايدلمش  
ياخود « عبدالله بن ربيع » كې قرنداشى مقتول اولمش  
اولان اشخاص ، مشركين قريشك بدرده ايجديكى  
زهرا به هزيمتك اچيسنى هيئت اسلاميه تاثير ايتدير مك  
فكريله اوزمان قريشك رياست عموميه سى عهده سنده  
تقرر ايتمش بولنان ابو سفيانك يانته كيدوب :

« محمد [ عليه الصلوة والسلام ] رؤسامزى ، اشراقزى ،  
اولديردى . خواص وعوامى ، اك سو كلى ، اك قريب  
خصمندن آييره رق بيكس بر اقدى . تدبير اودر كه بزده  
قافله نك تمتى ايله ياردم اولنه ! تا كه او تمتع سايه سنده  
بزده عسكر طوپا لايوب اوندن انتقام المش اوله لم ! » ديديلر  
ابو سفيان ده بو تدبيرى بكنمش ديمك اولديغندن در حال  
موافقت ايتمشدر ! .

بناءً عليه اموالده حصه دار بولنان افراددن ميدانده  
حاضر اولانلرى ده اقناع وارضا ايتدكدن سوكره ماللىرى

صانديردى . قافلهك سرمايه سى بر مثلنى كار ايدىرك  
موجود مال يوز بيك التونه بالغ اولمشدى .

ايشته او ، اللى بيك التون كار وتمتعدن يالكىز  
يكرمى بش بيك التونى اله آلوب هيئت محترمه اسلاميه  
عليهنده عرباندى بر بيوك قوه عسكرىه ترتيبه باشلادى .  
لىكن بدرده قتل ايدلمش اولان اشراف ورؤساي

قريشك مرثيه لريني سويله يرك ناسك حرب حقنده كى  
افكار وحسياتنى تحريك وتهيج ايجون دىلى سويلر  
برقاچ ذوانك ايشه صرف همت ايله ملرينه لزوم وار  
ايدى ! بو خدمت مهمه نك عهد سندن كلك اوزره [مسافع ،  
عمرو بن العاص ، هبيرة ابن ابي وهب ، ابن الربيع ،  
ابوعزة الجمحي ] نام كيمسه لرده انتخاب اولنه رق قبائل  
ايچنه كوندردى .

« مسافع » ايله « عمرو » و « هبيرة » ام القرى

جوارنده كى قبائلى تحريكه مأمور ايدىلر . « ابن الربيع »  
ايله « ابوعزة » ده باشقه يره كيتدىلر .

« ابوعزة » كرچه بدر غزوه سنده اسير اولوب

فيا بعد اهل اسلام عليهنه ديل اوزاتماق شرطيله مجاناً  
اطلاق اولمش اولديغندن بويله نقض عهده تعلق ايدىرك  
مأمورىتى قبولده بر كره تردد كو سترمش ايسه ده صفوانك

ايرامنه قارشى طايانه ميوب كيتمش وراست كلديكى  
هر يانه : « اهل اسلام غدريله هر خانه سندن برواويلاي  
مصيبت ، برصداي فلاكت ايشيديلان مكه ده كي قومشو .  
لريكنزك حقوق جوارلرينه حرمتكز يوقيدر ؟ » ديه  
باغيره باغيره الندن ديلندن كلديكى مرتبه ده ناسي تحريكه  
غيرت ايتمشدر .

ايشته كرك خطباء مرقومه نك تشويقات و تحريكاتي ،  
كرك رؤساء قريشك باشقه درلو ايله دكلري تهديد اتي  
سايه سنده [ احابيش ] ديه معروف اولان « بني مصطلق ،  
بني هون بن حزيمة ، بني حارث بن عبدمناف » قبائلندن  
ايكي بيك قدر عسكر ترتيب ايديله بيلمشدر .

بونلردن باشقه كرك مكه دن ، كرك سائر يرلردن  
اولان ظهورات ايله برابر موجود عسكر اوچييك نفره  
بالغ اولدى كه ايجلرندن يدي يوز نفرى رهلى ، ايكيموز  
نفرى ده اتلى اولديغى كي اردونك اوچييك ده دوه سى  
وار ايدى .

سر عسكر بولنان ابوسفيانك « هند » نامنده كي  
زوجه سى ده ياننده ايدى . مرقومه هند ، بدرده قتل  
ايديلان پدرى « عتبه » ايله برادرى « وليد » ك انتقامنى  
ايشته بوسفر المق ايجون عسكرى تشجيع ايدىور ايدى .



عكرمه ابن ابى جهلك زوجہ سى و حارث بن هشامك  
 قیزی اولان « ام حكيم » حارث بن هشامك زوجہ سى  
 و وليد بن مغيرة نك قیزی « فاطمه » ، صفوان بن امية نك  
 زوجہ سى و مسعود ثقفينك قیزی « برزه » ، عمرو بن  
 عاصك زوجہ سى و شعبة السهمينك قیزی « ریطه » ، طلحه  
 ابن ابى طلحه نك زوجہ سى و سعدك قیزی « سلافه » و « عمره  
 بنت علقمه بن كنانه » نام نسوان ده قوجه لريله برابر  
 اردوده بولنيورلردى . كذلك علمداران عاليشعاران  
 يغبريدن جناب « مصعب بن عمير » رضى الله تعالى عنه  
 حضر تلرينك برادري اولان « ابو عزيز بن عمرو » ك  
 والده سى « خناس » دخى اوغلى ابو عزيز ايله برابر  
 اوله رق قریش اردوسنده ايدى . دف جالمق و عسكرى  
 اهل اسلام عليهنده غيرته كتيره جك اشعار او قومق اوزره  
 دها اون بش قدر قادين ده محفلر ايله معركه يه طوضرى  
 كليور ايدى .

عباس بن عبدالمطلب ، بدرده فلاكته و برچوق خساراته  
 او ضراد يغبندن بحثله عذر كوسترمك كيرى قالمش اوله . قدن  
 فضله قریشك شو حركتنه . دائر اعطاء معلومات صره سنده  
 يازدينى مكتوبى اوج كونده مدينه يه يتشدير مك شرطيله

بنی غفاردن ساعی مخصوص واسطه سبیلہ ذات پاک  
احمدی بہ کوند رمشدر .

ساعی ، یولدہ « قباء » قریہ سندہ حضرت پیغمبری  
بولہ رق مکتوبی تقدیم ایدنجہ رسول اکرم افندیمز  
حضر تلری ، مکتوبی « ابی بن کعب » رضی اللہ تعالیٰ  
عنه حضر تلرینہ او قودوب ایشی اکلا دقدن صو کرہ مادہ نک  
کتمنی مشار الیہہ تنبیہ بیوردی .

بعده قبا قریہ سی اشراقندن و کبار انصار کرامدن  
« سعد بن الربیع » رضی اللہ عنه حضر تلرینک خانہ سنی  
تشریف وانکله صورت محرمانہ بو کیفیتی مذا کرہ  
ایتدیکنک عقینده مدینہ منورہ بہ عودت بیوروب قریش  
اردوسنک احوال عسکر یہ سنی تجسس و تحقیق ایچون  
« حباب بن المنذر » رضی اللہ تعالیٰ عنه حضر تلرینی مأموراً  
کوندردی .

لکن اشبو مسئلہ ، قباده سعد بن الربیع حضر تلریلہ  
صورت محرمانہ قونوشیلورکن صحابی مشار الیہک  
زوجہ سی هر نصلسه مذا کرہ بی دیکله مش اولدیغندن قریش  
اردوسنک منزلی اولان « ذوالحلیفہ » یهودیلرینک تخم  
اراجینی مدینہ بہ طاغتمغه باشلاملرندن مقدم مدینہ نک  
ایچی شوحوادث ایله طولمشدی .

امرتجسسہ مأمور بولنان صحابی، مشارالیہ مدینہ  
برقوناق بعد مسافہ سی اولان «عریض» نام محلہ دکن  
قریش عسکرینک اچیلدیغنی کورمشدی . جناب جنابک  
شومشہوداتی عباسک تحریراتندہ کی حوادث حربیہ نک  
صحتی تأیید ایلہدی !.

قریش اردوسی مدینہ طوغری یوریوب کلیر  
ایکن — والدہ ماجدہ حضرت رسالتناهی جناب آمنہ نک  
بین الحرمین مرقد مبارک لرنی حاوی بولنان «ابواء» نام  
منزلہ ایردیکی زمان ابوسفیانک زوجہ سی «ہند بنت عتبہ»  
[شاید اردومن مغلوب اولورایسہ ہربراعضاسی بزدن  
براسیرہ دکشمک اوزرہ آمنہ نک قبرینی اچہلمدہ کمیکلرنی  
چیقاروب یانمزہ آہلم !] دیدیکی واشبو فکرنده اصرار  
دخی کوستردیکی خالدہ عقانی باشندہ طاشیان بعض رؤساء  
قریش : «صوکرہ محمدیلر، بزم موتالریمزک کمیکلرنی دہ  
چیقاریرلر» دیہ انی اوفکرك اجراسندن منع ایلہ مشلردر  
ہجرت سنیہ محمدیہ نک اوچنجی سنہ سی شہر شوال  
یدنجی چہارشنبہ کونندہ ایدی کہ قریش عسکری یتشوب  
جبل احد یانندہ کی «عینین» نام طاغک اتکنہ نصب  
خیام ایتدی . و پنجشنبہ، جمعہ کونلری اورادہ قالدی !  
مذاکرہ — جمعہ کیجہ سی ذات عالی رسالتناهی

رؤیالرنده : « بر طاقم صغیرلرک بوغازلندیغنی، ذوالفقار نام قیلنجلرینک اوجنده برکدیک حاصل اولدیغنی ومبارک ارقه لرینه محکم برززه کیوب دست شریفلرینی اوزرهک یاقه سنه صوقدیغنی، کورمش وصباحلین بورؤیای صالحه رسالتپناهیلرینی اصحاب کرامنه نقل ایدرکن : « بوغازلنان صغیرلرک، اصحاب کرامدن شهید اوله جق ذواتک وقوع شهادتنه قیلنجلرینک اوجنده کی کدیک ده اهل بیت رسول اللهین برینک شهادتنه اشارت ومحکم زره ده مدینه دیمکدر » دیه تعبیر ایله دکلیرینی متعاقب :

— « شو حاله کوره مدینه ایچنده طور وکز! دشمن ایجری یه هجوم ایتک ایسترسه تدافعی وتحفظی حرب ایدیکز! » بیورمشلردی!.

اصحاب کرامدن بعض ذوات بوصورتی مناسب کوردیکندن باشقه منافق مشهور « عبدالله بن ابی بن سلول » دخی نفاق عظیمیله برابرینه :

— « یارسول الله! زمان جاهلیته بر دشمن ظهور ایدوب ده نه وقت که مدینه دن خروج برله انک قارشینه چیقارسه ق مغلوب اولور ایدک. نه وقت که مدینه ده تحصن

ایدوب شمدی بیوردیغکزک عینی اوزره تدافعی حرب  
ایدرسهک غالب کلیر، قازانیر ایدک ،  
دیه بورأیده بولنمشدر .

فی الواقع مدینهده اهل اسلامک تدافعی حرکات  
حربییه سی هر حالده موافق حال و مصلحت ایدی . زیرا  
مدینه منوره نك هر طرفی ابنیه و دیوار لرله محاط و یکیدلری  
استحکامات منتظمه ایله مسدود و محفوظ اولدیغندن هیئت  
حاضره سی برقلعه متینه حکمنده، بردرع قوی مثابه سنده  
ایدی .

بناءً علیه افراد عسا کر مسلمین از برمدت مدینهده  
ثبات ایله دکلری و بوضورتله قریش عسکری اهل اسلامک  
مدینهدن خروجنه انتظار ایده قالدقلری حالده عربان  
عسکرینک، هر درلو حرکات و متانتنه قنور عارض اوله رق  
برچوق افرادک صاوشوب کیده جکنده احتمال قویده  
وار ایدی .

بالفرض مدینهیه هجوم ایتدکلری تقدیرده دخی  
استحکامات دنبری تدافعی مقابله و مقاومت ممکن ایدی .  
هرایکی صورتده قریش اردوسنک قوای عسکریه سینه  
ضعف کتیره جک بر حرکتده بولنلمش اولوب او حالده  
ایجاب ایدرسه تدافعی حالندن تجاویزی به بغتة

تبدیل حرکت ده ایدیه بیلیر ومظفریتی قازانمق ایچون  
قولایاق اله النمش ده اولورایدی .

لکن بدرغزو وسنده بولنمیان شیجعان اصحاب، غزوات  
بدرک نائل اولدینی اجر ومثوباتی، شهیدانک ده واصل  
اولدینی درجات عالیاتی رسول اکرم صلی الله تعالی علیه  
وسلم افندیمز حضر تلرندن ایشتمکه غزو ده بولنوب  
احراز درجه شهادت ایده مدکرینه متأسفاً :

— « یارسول الله ! بزاللهدن بویله برکونی ایستردک  
بزی طیشاری یه چیقار ! اعدامزله کوکس کوکسه بوغاز  
بوغازه کلوب حرب ایدلم »

دیدکاری صروده دیگر بعض اصحاب ده :

— « اکر تجاوزی حرکاتمز کورولمزسه اعدای دین  
بزم ضعفمز، جبانتمزه حکم ایدره، شیاریر »

سوزینی درمیان ایدره حرکت تجاوزیه بی تدافعی اوزرینه  
ترجیح ایتشدیر .

حتی « نعمان بن مالک الانصاری » رضی عنه الباری  
حضر تلری دخی تجاوزی حرکتی پک زیاده سیه التزام  
ایتدیکندن درکه کندینی ضبط ایدمه یه رک ذات رسول الله  
خطاباً :



— « یارسول الله ! لا تخر منی الجنة ! فوالذی بعثک

بالحق لا تدخل الجنة ! »

دیه قسم ایتمکه اکا جواباً ذات عالی رسالت پناہینک

— « اشهد ان لا اله الا الله وانی لا افر من الزحف،

سوزیلہ مقابلہ بیورمسی، حرکات تجاوزیہ بی — هیچ  
ایستہ میرک — اختیارہ ارتق لزوم و مجبوریت حاصل  
ایتمشدر .

اللهک قوتلی برارسلانی، ہیئت محترمه اسلامیه نک

شدتلی بر قهرمانی بولنان حضرت حمزہ رضی اللہ عنہ افندیز  
ایسہ مدینہ دہ تحصن برلہ صورت مدافعانہ دہ حرب  
ایتمسنی کندی شجاعت قهرمانانہ و جلالت دشمن  
شکناہ سنہ بردر لویا قشدر مدیغدن همان چیقوب دشمن  
اوزرینہ هجوم ایتک ایستردی .

حتی بو ارزوسنی حضور پر نور رسالت پناہیدہ اظهار

ایدہ رک :

— « یارسول الله ! سکا کتاب کریم انزال بیوران

حضرت ذوالجلال حقیچون یمین ایدرم کہ خارج مدینہ بیہ  
چیقوب کفار ایلہ روبرو محاربه و مقانہ ایتدجکہ اغزیمہ  
برلقمه قویمہ جغم ! »

دیه قسم ایتشدی .

ایشته بعض اصحابك بويله حرکت تجاوزیه بی التزام  
ایتمی اوزرینه رسول اکرم صلی الله تعالی علیه وسلم  
افندیمز حضرتلری دخی میدانده حرب ایدلسنه ناخواه  
وناچار قرار ویرمرك :

— « صبر و ثبات ایدر سه کز بوکرده جناب حق سزم  
نصرت احسان ایدر ،  
بیوردیلر .

حالبوکه عبدالله بن ابی ، مدینه ده متحصناً تدافعی  
حربی التزام ایدوب او یله جه اعطای رأی ایله دیکی حلام  
رأی و مطالعه سنك علیهنده حرکت بیورلمش اولدیغندن  
طولایی کوسمشدی !

او کون جمعه نمازی خطبه سنده رسالتیناه افندیمز  
فضائل جهاد حقنده بر مقدار بیانات مخصوصه ده بولندی .  
صلات عصری جماعتله ادا بیوردقن صوکره ابوبکر  
الصديق ايله عمر الفاروق رضی الله تعالی عنهما حضرتلری  
معیت جلیله همایونلرنده بولندیفی حلامه حجره مطهره  
سعادتلرینه کیردی .

افراد عسکرینه نك كرك حین حفرده ، كرك وقت  
سفرده اك مهم وظیفه اساسیه سی . حرکات جرییده

سر عسكرك هردرلو او امرينه اطاعت ايتمك ورأى  
وتدبيرينه زره قدر مخالفت كوسترمامكدر. امر بويله ايكن  
فخر كائنات عليه افضل الصلوة واكمل التحيات افنديمز  
حضر تلرينك تدافعى حرب وحركتى تنسيب بيورد قلرينه  
قارشى بعض ناسك انى تجاوزى حركته مجبور ايتلمرى  
چك بيوك برخطا ايدى .

بناءً عليه اوس قبيله سنك رئيسى بولنان وذات على  
رسالت پناهينك باطل سوز سويله ميوب [وما ينطق عن الهوى]  
سمرق قانيسنه دائماً مظهر يتله مؤيد بولنديغنى بيلان «سعد بن  
معاذ» ايله «اسيد بن حضير» رضى الله تعالى عنهما  
حضر تلرى، تجاوزى فكرينى التزام ايدن ديكر اصحاب  
گرامه خطا :

— «سز رسول اللهى، ايسه مديكى حالده طيشارى  
چيقمغه مجبور ايتديكز! ايشى انجق كندى رأى هاپونلرينه  
براقتاليديكز . زيرا كنديلرينه وحى الهى كليوز . ايشك  
اقتضاسنى او، سزدن دها ايوبيليور »  
عنه توييخ آميز لاقرديلرايدنجه انلرده عقلمرينى باشلرينه  
حوشيرد كدن صوكره ايتدكلرينه پشيمان اولديلر ! .

حرکت هاپون — حتى اولوقت كه رسول اكرم افنديمز

حضرت تلی، بری بری اوستنده « ذات الفضول »، « فضه »،  
نامنده کی ایکی درع قوی بی لابس و مبارک قیلنجلرینی ده  
حامل اولدقلری حالدہ حجرہ مطہرہ سعادتلرندن طیشاری یه  
چیقدی . اسید ایله سعد حضرت تلرینک بعض تویسخاتنه  
قارشی متنبه اولان اصحاب کرام :

— « یارسول الله ! بزخطا ایتدک . سنک امرهایونلکه  
مخالفت ایتیز مراد عالیکنز هر نه ایسه او اولسون ! »  
سوزیله تصحیح افکار ایتمکه مسارعت ایتدیلر سده  
اوزمان — ینه او اصحابک ابرامی ایله — سلاحلارنمش  
اولدیغندن جوابده :

— « بر پیغمبرکه سلاحلارنوب چیقہ امرالهی ظهور  
ایتمدکجه آرتق دونه من ! »

بیوردقدن صوکره « سكب » نامنده کی فرس هایونلرینه  
ببندی . واردوی هایونلرینی الوب احد طاغی سمته  
طوغری خارج مدینه یه حرکت بیوردی .

مدینه منوره محافظلارنه اوزمان و عبد الله ابن ام مکتوم .  
رضی الله تعالی عنه حضرت تلی قائم مقام براغلمشور .

بیک نفر موجودی بولنان اردوی هایون اوچ فرقه

لوائیه بی حاوی ایدی که برنجی مهاجرین فرقه سنک  
 سنجاغنی « مصعب بن عمیر و ده؛ ایکنجی اوس فرقه سنک  
 سنجاغنی ( اسید بن حنظل ) ده . اوچنجی خزرج قبیله سنک  
 سنجاغنی « حباب ابن المنذر ، حضر تکرند ایدی .  
 بوافراد اسلامیه دن یالکزیوز نفری زرهللی ، ایکسی ده  
 آتلی ایدی آتلیلرک بری ذات عالی رسالتپناهی ، دیکری ده  
 « ابورده ، حضر تکرلی ایدی !

اثناء حرکتده « سعد بن معاذ » ایله « سعد بن عبادہ » [ ۱ ]  
 رضی الله تعالی عنهما حضر تکرلی زرهللی اولدقلری حالده  
 ذات عالی پیغمبرینک اوکلرند یورورلردی .  
 مدینه نیک احده بعد مسافه سی بر ساعتدن ده ازا یکن  
 اردوی هایون ؛ اوکون احده قدر وارمیوب یاری یولد .  
 « شیخین » نام محله کیجه له مشدر .

افراد عسا کر اسلامیه دن « اسامه بن زید ، عبدالله بن  
 عمر ، زید بن ثابت ، ابوسعید الخدری ، رافع بن خدیج ، سمره  
 بن الجندب » کبی هنوز حزب و ضربه اقتدار ی اولمدیغی  
 کرک سنا ، کرک شخصاً معلوم و متحقق اولان کوچوک  
 چو ققار اشته بو محله کوی به اعاده ایدلک اوزره امر  
 مخصوص رسالتپناهی شرف صدور بیور مشدر .

[ ۱ ] معاذ : میمک و عبادہ : عینک ضمه لرله در .

انجق « رافع بن خدیج » حضرت تلرینک تیرانداز لکده کی  
مهارتی بیان اولندیغندن انک برابر بولنمسی طرف عالی  
پیغمبریدن تجویز بیورلدی .

« سمره بن الجندب » دخی، رافعک مهارتنه بناء  
معیت سنیه حضرت رسالتپناهیده کی عساکر اسلامیه  
اره سنده قالدیغنی کورونجه : « بن ده دونم الارافع ایله  
کورس طوترز » ادعاسنده بولندیغندن شرفتمعلق بیوریلان  
اراده جلیله رسالتپناهی اوزرینه کورس طوتدیلسمره نک  
رافع اوزرینه غلبه سی سببله تیرانداز لکده کی مهارتی تحقق  
ایله دیکندن هریکی سنک ده عسکرده بولنمسنه مساعدده  
بیورلدی .

اوکیجه « محمد بن مسلمة الانصاری » علیه رضوان  
الباری حضرت تلری الی نفر عسکر اسلام ایله برابر  
اردوی هایونک اطرافنی طولاشوب کوزتمک اوزره  
قره قوله چیقمش و « ذکوان بن عبدالقیس » رضی الله  
تعالی عنه حضرت تلری دخی اردوی سعادتک ایچنده  
کزوب خیمه علیه رسالتپناهی بی محافظه مأموریتنی ایفا  
ایتمکده بولنمشدی .

قریش اردوسی طرفندن ده « عکر مه بن ابی جهل »  
برفرقه عسکریه ایله قاره قوله چیقارلمشدی .



رجعت منافقین — کیجه نك ثلث اخیری كلنجه یعنی

سجرو قتی اولنجه رسول مکرم افندیمنز « شیخین » موقعندن  
قالقوب جانب احده طوغری حرکت بیورمقده ایکن  
رئیس المنافقین « عبدالله ابن ابی بن سلول » ، بردن  
بره طوره رق :

— « ای قوم ! بیلمیورز که بو آدم نره یه کیدیور !  
بزم کبی کار آزموده لرك سوزلرینی دیکله میورده کنجلرك  
رأی وتدبیر یله عمل ایدیور . بیلکنز که بن بوندن ایلری یه  
کیتیمیه جکم دونیورم »

دیدکن صوکره مدینه یه متوجهاً رجعتیه باشالامقده  
برابرنده دها اوچیوز نفر اتباعی ده دونمش ، حریفك  
بو رجعت منافقانه سی خزر جیلردن « بنی حارثه » طاه  
ثقه سیله اوسیلردن « بنی سلمه » عشیرتی ده ترددده  
دوشورمشدر .

روایات سائر یه کوره : اردوی همایون ، احده  
واروب هر درلو ترتیبات عسکریه اجرا ایدلکدن  
صوکره بر خصوصده منافق مشهور « ابن ابی » ک  
رأی وافیکارینه مخالفت بیورلمش اولمقدن انفعال ایدن

ملعون ، ذات عالی نبوی ایچون : « اطاع الولدان  
وعصانی ! » دیه دها باشقه بر طاقم ترهات بد خوا -  
هانده بولنهرق کویا حصافت عسکریه سنجه مسلم بیلدیکی  
درایت منافقانه سنه اعتماد بیورلمدیغندن طولایی اوچیوز  
قدر اتباعی الوب احده صفوف اسلامیه میانندنبری  
مدینه عودت وایشته او صورتله اردوی هایون افراد  
عسکریه سنه هزیمت دوشورمکی قصد ایتمشدر !

برکت ویرسون که هدایت الهیه ، او ایکی طائفه یی  
فرقه مخذوله منافقینک خط حرکت منافقانه سنه ایاق  
باصدیر تیموب اردوی هایونده الیقویدی .

صبحا وقتی اولنجه « شوط » دینیان محله صلات  
صبح جماعتله قیلندی . صبح نمازینک جماعتله اداسندن  
صوکره حرب و جهاده تشویق ضمننده رسول مکرم  
افندیمز ، مواجهه اصحاب کرامده بر نطق بلیغ ایراد  
بیورمش ونطق شریفلرینی : [ انه قد نقت فی روعی  
الروح الامین . انه لن تموت نفس حتی تستوفی اقصى  
رزقها لاینقص منه شیء وان ابطأ عنها . فاتقوا الله ربکم  
واجملوا فی طاب الرزق . لایحمانکم استبطاؤه ان طلبوه  
بمعصية الله . والمؤمن کالرأس من الجسد . اذا اشتکی تداعی

عليه سائر جسده والسلام عليكم ] عبارة شریفه سیله آتام  
بیورمشلردر .

ثناء عزیزیمده بر دبه جگده تصادف بیوریلان فرقه  
اجنبیه نك کیملر اولدینی طرف اشرف نبویدن صورلدقده  
« عبدالله بن ابی بن سلول » مامونك حلیفلرندن بر طاقم  
یهودیلردن عبارت بولدینی خبر ویرلمسی اوزرینه انلره  
دین اسلام عرض اولمش ولكن قبول ایتدکلرندن  
حضرت پیغمبر صلی علیه رب البرافندیمر : [ انا لانسعین  
بمن ليس على ديننا ] بیوره رق فرقه مذکوریه یی اردوی  
سعادتلرندن طرد وتبعید ایتمشدر .

تلاقی صفین — منافقك رجعتندن صوکره عساکر

اسلامیه یدیوز نفردن عبارت قالدینی حالد واروب  
احد طاغنك اتکنده غدوة الوادی یه اینهرك مدینه یه قارشی  
صف باغلایه طوردی .

وسط اردوی سعادتده ذات سامی حضرت احمدی —  
کالقمربین النجوم — طور دیلر . « ابو عبیده عامر بن عبدالله  
الجراح » ایله « سعد بن ابی وقاص » رضی الله تعالی عنهما  
حضر تلی طلیعه یه ، « مقداد بن عمرو » رضی الله عنه  
حضر تلی ساقه یه مأمور اولدقلری کبی « عکاشه بن

محسن الاسدی « رضی الله عنه حضرتلری میمنه یه » ابو مسلمه بن عبدالاسد « رضی الله تعالی عنه حضرتلری میسر یه قوماندان تعیین بیورلدیلر .

قریش اردوسی ده « عینین » نام جبلک کنارنده اردوی هایونک قارشیسنده برچوراق یرده ایدی .

قریشک علمدارلق مأموریتی اوتهدنبری « عبدالدار بن قصی » اولادینه مخصوص اولدیغندن بوکرده یته عبدالدار اولادندن « طلحه بن ابی طلحه » ، علمدار ایدی .

تیر انداز فرقه سنک ریاستی « عبدالله بن ربیعہ » ده ، میمنه قوماندانلی « خالد بن الولید » ده ، میسر قوماندانلی ده « عکرمه بن ابی جهل » ده ایدی . « صفوان بن امیه » ایله « عمرو بن العاص » دخی سواری برر فرقه عسکریه اوزرینه قوماندان اولدقلری کبی جمله سی ده سپهسالار قریش ابو سفیانک امارت واسارت عسکریه سی التنده ایدیلر ! .

اردوی هایونک صول طرفنده قالان « عینین » طاغنده دشمن سواریسنک مرور وهجومنه مستعد کوریلان بر وادینک محافظه سنه ، ذات عالی پیغمبری

« عبدالله بن جبیر بن النعمان » رضی عنه الرحمن  
 حضر تلرینک ریاستی التندہ اولہ رق الی تیرانداز نفرینی مأمور  
 بیورہ رق : « لاتبر حوا ان رأیتونا ظہرنا علیہم فلا تبر حوا وان  
 رأیتوہم ظہروا علینا فلا تعینونا ! » تنبیہات مخصوصہ -  
 سیلہ او کذرکاهہ کوندردی .

ترتیبات — ایکی اردو یکدیگرینک قارشوسنہ کچمش ،  
 حربہ حاضر ومنتظر طور یور ایدی .

رسول اکرم صلی اللہ تعالیٰ علیہ وسلم افندیمر  
 حضر تلری اردوی ہایونلرنجہ ہردلو ترتیبات عسکریہ یی  
 دوزلدوب باقدقن صوکرہ دست شریفلرینہ بر قیلنج  
 الدی . کہ او قیلنچک اوزرنده « قورقاقلقدہ عار ، ایلری  
 کیتمکدہ شرف وافتخار واردر . حالبوکہ آدم قورقاقلنی  
 ایلہ قدردن قورتیلہ مز ! » معناسنی افادہ ایدن :

فی الجبن عار وفی الاقبال مکرمہ  
 والمرء بالجبن لا ینجو من القدر

بیت حکیمانہ سی محرر ایدی . بعدہ عسا کر اسلامیہ بہ  
 خطاباً :

— « حقنى ايفا ايتمك شرطيله شو قيلنجى كيم الير ؟ »  
بيورديلر . اصحاب كرامدن بعض ذوات :

— « بز اليرز يارسول الله ! »

ديديلر سوده يك التفات بيورلميوب انجق او اولكى سوزىنى  
تكرار لاديلر .

نهايت شجعان انصار دن مشهور « ابود جانه سماك  
بن حرث » رضى الله تعالى عنه :

— « يارسول الله ! بو قيلنجك حقى ندر ؟ »

ديه صوردى : [حقى اكيلوب بوكيلنجيه دكين دشمنه  
اورمقدر ] جوابى الديغنى متعاقب ايشته او شرطى قبول  
ايدن ابو دجانه حضرتلرينه قيلنجى ويرمشدر .

بهادر مشاراليه قيلنجى الدقن صوكره باشنه —  
نشانه موت وشهادت اولان — قيرمزي وعلى روايه  
صارى بر صارغى صاره رق ايكي اردو اره سنده كفاره  
قارشى مفتخرانه كز نمكه وغريب بر طاقم نمايش جلادانه  
كو سترمكه باشلامشدى .

فيخر كائنات عليه افضل الصلوة واكمل التحيات  
اقتديمز ، او فدائي نامدارك اويله كز يشنه باقهرق :



— « شو یورویش بر یورویشدز که بویله بر زمانده  
مقبول وباشقه زمانده مغضوب الهی اولور »  
بیوردیلر .

ابتداء قتال — ایشته بوضرده ایدی بنی ظفر  
قبیله سندن « ابوالغیداق » کنیه سیله مکنی « قزمان » [۱] نام  
بر منافق مرتد طرفندن باب حرب و قتال اچیلمشدر :  
مرقوم قزمان ، رسول اکرم صلی الله تعالی علیه  
وسلم افندیمر حضرتلری اردوی هایونلریله برابر احده  
حرکت بیوردینی زمان مدینه ده قالدنجه نسوانک انی  
لوم واستهزا ایتمی کویا ناموسنه طوقانمغله همان اردوی  
سعاده قاتلمش والایلری به کچهرک حربه مهیا اوله قالمشدی .  
استطراد

قزمانک احده کی جهادینی جناب « واقدی » روایت  
ایتمشدر . فقط جهادینک احده دکل بلکه خیبر غزوه -  
سنده اولدینی حقنده کی روایت ده اچوقدر .

علامه قسطلانی علیه الرحمه حضرتلری دخی  
« خیبر » ده اولدیغنی التزام ایدن طرفده بولیمور . حتی  
جناب واقدینک : « ان قزمان تخلف عن المسلمین يوم  
[۱] قزمان : قافک ضمی زاء معجمه نک سکونیه در .

احد . فغيره النساء » عبارہ سنك عليہندہ علامۃ مشاراليہ :  
 « لكن قوله يوم احدٍ خالف فيه . وهو لا يحتاج به اذا  
 انقرد فكيف اذا خالف . نعم في حديث ابى يعلى الموصلى  
 تعيين يوم احد . لكنه مما وقع الاختلاف فيه على الراوى »  
 بيوربورلر .

انہی

كذلك بعثت عليه محمد بن جوق زمان مقدم حضرت  
 نبى ذیشان آخر الزمانك شرف قدوم عاليلىرىنى بعض كتب  
 سماويہدن استخراجاً خبر ويرمشكن اثناء ظهور محمد بن  
 وياخود هجرت عليه احمد بن لرى زمانندہ حسدنندن  
 طولاي كفر وضلالات يولنى اختياره جرئت ايده رك  
 اللى قدر اتباعى ايله برابر مدينه دن قاجوب مكده  
 كفار قريشه قارىشمش اولان « ابو عامر فاسق » ،  
 بوغزوہ ترتيبائى صرہ سندہ : « بن ميدان محاربہدہ قومہ  
 راست كلير ايسہم جملہ سنك اهل اسلام عليہندہ بكا تابع  
 اولہ جقلىرىنى بيليورم » سوزينى قریش قارشيسندہ لسان تمدحلہ  
 سويلر طورور ايدى .

حالبو کہ ذات على رسالتندہ اوکافرى « ابو عامر  
 فاسق » ديه تلقیب ايله مش اولديغندن قومى دکلده کندى  
 اوغلنك بيله قبول ايتمك احتمالى يوغيدى .

ایسته او امید ایله فاسق مرقوم ، اوس قبیله‌سنه  
مقابل اولان عربان اره‌سنه کلوب « بن ابو عامر ! »  
سوزیله ندا ایله‌دیکی ایشیدلده اوس قبیله‌سی « بره  
فاسق حریف ! » دیه اکا سب و دشنام ایتدکن باشقه  
کندیسنه کوستریلان تهدید اوزرینه جانی بیوک برته‌لکه .  
دن قورناروب قاچدی .

ابو عامر . کندی قوم و عشیرتندن هیچ اومادینی  
بویله بر معامله شیدیه‌ی کورونجه « بن قومک ایچندن  
چیقه‌لی انلرک افکاری . اخلاق بوزولمش ! » دیه  
اوسیلرله خربه باشلادی .

اوس قبیله‌سی بهادرلری ده ابو عامر فاسقی طاشلره ،  
اوقلره طوتدیلر . اوستنه طاشلری ، اوقلری یاغمور کبی  
یاغدیدیلر .

ابو عامر ، اسلام بهادرلرندن کوردیکی تهدیدات  
جلادانه‌یه مقاومت ایدمه‌یه‌رک فراره مجبور اولدقن  
باشقه اونک فرارینی « کورن » هوازن ، قبیله‌سی ده  
اورکوب کری‌یه دوندی .

مبارزه — بونلر بومشاجرده ایکن قریش علمدا .

ری « طلحه بن ابی طلحه » ، « ارطاة بن شر حیل » ایله ،  
میدان مبارزه یه کیره رک :

— « ای محمد اصحابی ! سزک قیلنج کیزله بزم  
کیده جکمز جهنم ، بزم قیلنجمزله سزک کیده جککزی  
جنت اولدیغنی سویلیورسکزی . هانی بزم قیلنجمزه جنته کیتمک  
ایستیان ، کندی قیلنجی ایله بنی جهنمه کوندرن یوقی ؟ »  
دیه باغیردقده حمزه وعلی رضی الله تعالی عنهما  
حضر تلی میدان مبارزه یه اتلقلرینک عقینده « ارطاة »  
حمزه نك « طلحه » دخی علینک سیف جلادت ایله جهنمه  
کیتمشدر .

طلحه مجروحاً دوشرکن عورت یری اچیلدیغندن  
کورمش اولماق ایچون حضرت علی کرم الله وجهه  
افندیمز ، یوزینی باشقه طرفه چویردکارینی کورن ذات  
اشرف پیمبری ، اخیراً اکا :

— « یا علی ! طلحه دوشرکن یوزیکی نیچون باشقه  
طرفه دوندیردیکز ؟ »

دیه صورمش علی دخی :

— « اچیلان عورت محله باقغه حیا ایله دم »

جوانی ویرمشدی .

طلحه میدان مبارزیه کیرد یکی زمان برادری «عثمان  
بن ابی طلحه» نک انه علمی تسلیم ایتمشدی .  
طلحه دن صوکره حضرت حمزه نوبی :

ان علی اهل اللواء حقا

ان تخضب الصعدة وتندقا

دیه طوران یکی علمداره اولاشدیره رق ایتدی یکی بر حمله -  
ده علمدار مرقومك بر قولنی کسد کدن فضله اوموزندن  
بری بلنه قدر یاروب اشاغی به ایندیرمش بناء علیه  
علمی ده الندن دوشورمش اولدیغندن همان «ابو سعید  
بن ابی طلحه» علمدار اولمش . فقط انی ده تاخنجره سندن  
( سعد بن ابی وقاص ) رضی الله تعالی عنه حضرتلری  
اوق ایله اورب اعدام ایتدی کندن یرینه ( نافع ) یاخود  
( مسافع بن طلحه بن ابی طلحه ) کچدی کی حالد  
( عاصم بن ثابت ابن ابی احاق ) رضی الله تعالی عنه  
حضرتلرینک اوقبله . مقتولا دوشمشدر .

اندن صوکرده علمی ( حارث بن طلحه بن ابی  
طلحه ) قایدیسه ده انی ده ( عاصم ) حضرتلری ایکنجی  
بر اوق ایله دوشورمشدی !.

بعده عمی ( کلاب بن ابی طلحه بن عبیدالله ) سنجاب  
غنی قالیدرینگی حالده ( زبیر بن العوام ) رضی الله تعالی عنه  
حضرتلری انی بر حملهده اولیدردی .

صوکره ( جلاس بن طایحه ابی طلحه بن عبیدالله )  
الدی . اوده ( طایحه بن عبیدالله ) رضی الله تعالی عنه  
حضرتلرینک النده مقتول اولدی .

خلاصه کلام : عبدالدار اولادنن یدی نفر بابا  
اوغل ، برادر ، عموجه سنجاغک التنده علمدارلق  
مأموریتی نامنه فداء هلاک اولدی .

بونلردن صوکره ( شریح بن قارظ ) علمداراولدی .  
اوده اصحاب کرامدن برینک الندن کیتدی

ارتق عبدالدار اولادنن علمدارلق ایدهجک کسه  
قالدیغندن انلرک کوله لرندن ( صواب ) نام شخص  
سنجاغنی قالیدردی .

لکن اوده بر روایت کوره ( سعد بن ابی وقاص )  
یاخود ( علی بن ابی طالب ) وعلی روایتی اخری منافق  
حرتد ( قزمان ) نک بر حمله سیله جهنمه کیتدی .

غریب دکیسدرکه قزمانک اسمی اولجه نزد سامی  
نبویده ذکر اولندقبجه رسول مکرم صلی الله تعالی علیه



وسلم افديمز حضرتلری انك حقنده : [ اهل جهنمدر ! ]  
بیورورلردی ! .

عالبوکه قزمان بوکره پک مردانه ، جلادانه حرب  
ایتمش وحتی مشرکیندن یدی نفری بیله اولدیرمشدی ! .  
لکن نهایتده کنديسی ده الیغی جریحه دن متأثراً  
میدانه دوشه قالدی . او یله تهلکه لی ! برحاله قزمانه  
تصادف ایدن ( قتاده بن نعمان ) رضی الله تعالی عنه  
حضرتلری اکا :

— ( هنيئاً لك يا قزمان ! یعنی شهادت رتبه سی مبارک  
اولسون قزمان ! )  
دیمکله قزمان جوابده :

— ( بنم امل شهادت دکلدی ! دین اسلامک محـ  
فظه سی خصوصی ده اصلاً خاطر وخیاله کلامشدر .  
انجق نه یاپدم ایسه قریش طائفه سنک مدینه خرماقلرینه  
ضررلری طوقانماسون دیه یاپدم !! )

دیمش وحياتندن مأیوس قالنجه قیلنجنک قبضه سی  
طرفنی بره ، اوجنی ده کوبکنه طایایوب انک اوزرینه  
کندينی قویورمقله قیلنج ، قارننه کیروب صرتمدن چیقمش  
وحياتنه ایشته اولوجهله خط ختامی چکمشدر .

بونی بویله ( اکتیم بن ابی الجون ) رضی اللہ عنہ  
 حضرت تیری کورمشدی . کلوب ذات سامی رسالتپناهی به  
 دیدی :

— ( بن شهادت ایدرم که سن رسول اللهسک ! )

حضرت نبی ذیشان افندیمز دخی :

— ( نه او ؟ )

بیوردقلرینی متعاقب ( اکتیم بن ابی الجون ) مشهوداتی  
 حکایه ایله مشدر .

ایشته بونک عقینده فخر عالم افندیمز :

— ( ان الرجل لیعمل بعمل اهل الجنة فیما یبدو

للناس وانه من اهل النار ویعمل بعمل اهل النار فیما یبدو

للناس وهو من اهل الجنة )

بیوردیلر .

بو غزوه ده ابتدا احراز رنبه شهادت ایدن ذات ،

( ابو جابر بن عمرو بن حرام ) رضی اللہ تعالی عنه

حضرت تلیدر . بعده قیز قرنداشک زوجی بولنان ( عمرو

بن جموح ) حضرت تلیدرکه محاربه یه کله جکی اثناده :

( یارب ! نبی کری یه کوندرمه ! ) دیه جناب حقدن

شهادت ایسته مشدی . تیر دعاسی هدف اجابته اصابت

ایده رک اوغلی ( خالاد بن عمرو ) ایله برابر شهید  
اولمشلردر . رضوان الله تعالی علیهم اجمعین !

ابو عامر فاسقک اوغلی ( خظله ) رضی الله تعالی  
عنه حضرتلری که ( عبدالله بن ابی بن سلول ) نام  
منافقک قیز قرنداشی ( جمیله ) بی تزوج ایتمش هنوز  
بر کیجه لک یکی کوه کی ایدی باباسی مرتد ، قائم برادری  
منافق اولدینی حالده کندیس دی دین مبین اسلام اوغو -  
رنده قداء جان ایده جک بهادرلردن اولدیغندن صفوف  
اعدابه طالب سپهسالار عسکر مشرکین اولان ابوسفیانک  
اوزرینه یورودی . لکن ( شداد بن اوس ) نام مشرک  
یتشوب جناب خظله یه شهادتیه شهادتی ایچیردی !

صفدر شهیر ( ابو دجانه ) رضی الله تعالی عنه  
حضرتلری قیامتچی شرط معلوم ایله الوب باشنه معهود  
صارغی پی ده ساردقدن وبر مدتده دشمنه قارش اوضاع  
جلادانه کوستردکن صوکره اوکنه کلان افراد مشر -  
کینی بیچهرک صفوف اعدابه طالمش کیتمشدی .  
حتی صفلرک اوتنه کی طرفه بیله کینجه ابو سفیانک زوجاسی  
( هند ) ک اولدینی نقطه یه وارمشدی .

هندایسه دیکر مغنیه لوله برابر صفلک کری طرفنده  
 دف جالار و افراد مشرکینک حرب حقنده کی شوق  
 وغیرتنی تحریک ایدمک اشعار او قومقله مشغول بولنور  
 ایکن ابودجانه حضرتلرینک برسیف مسلول اولدیغی  
 حالده اوزرینه یتشدیکنی کورونجه شاشیردی، لکن  
 هندی او یله بر مخاطرمدن قورتارمق ایچون هیچ برکیمسه  
 ابودجانه حضرتلرینک یاننه کلمکه جرئت ایدمدی !

ابودجانه حضرتلری ذهینده : ( حضرت پیغمبر  
 ذیشانک احسان بیوردیغی سیف شریفه یالکز قالمش  
 برقادینک قاننی بولاشدیرمق لایق اولمز ) کی ظهورایدن  
 بعض ملاحظاته مبنی هنده طوقانمدن کری یه دوندی !  
 ترصد = حضرت حمزه رضی الله تعالی عنه اقدیمز

حملة و هجوم ایله دیکی طرفده کروه مشرکین سوروا یله  
 قاچار هیبتلی برعضنفرشدت اثر اولدیغندن افراد مشرکینک  
 اوکونکی اخص آمال مشرکانه سی جناب حمزه نك ازاله  
 وجودینه ظفریاب اولمقدن عبارت ایکن یاننه وارلمسی  
 مستحیل بولندیغیچون اوزاقدن اوروب ده دوشوره  
 بیلیمک چاره سنی ارامغه باشلا دیلردی .

حتی مشار الیهک بدر غزوه سنده قتل ایله دیکی

(طعیمه) نك برادرزاده سی (جیر بن مطعم)، حبشستان  
اصولی اوزره حربہ اندازلقده ماهر بولن (وحشی  
بن الحرب الحبشی) [۱] نامنده کی کوله سنه :  
— (۱) کر بوکون حمزه بی اولدیره بیلورایسه ک آزاد

(اول !)

دیمش، (هندبنت عتبه) دخی وحشی یه اوبابده پک  
چوق مکافاتلری وعد ایتیش اولوق حسبیلله وحشی  
مروقوم، برطاش ارقه سنده پوصویه، کمین ترصده یاتهرق  
جناب حمزه بی کوزتمکه باشلامشدی !

ابتداء هزیمت = محاربه ده شدت، قریش

اردو سنده هزیمت ینه رونما اولمشدی. حتی صفوف اعدانک  
کیری طرفنده دف چالان هند فرقه سی تشمیر ساق  
هزیمت ایدهرک واویلا ی فلاکت ومصیبتی عیوقه طوغری  
چیقاره چیقاره طاغلره قرار ایتمه، مجاهدین عساکر  
اسلامیه دخی قریش عسکرینک میدانده بر اقدقلری  
اموالی یاغما یاغمه باشلامشدی . . . . . محاربه نك بو آنده  
کسب ایلدیکی صورت، امهال واهاله اصلا مساعد اولیه جق

[۱] وحشی، فرط عشرته مبتلا بر شارب الخمر ایدی. زمان

خلافت صدیقیه ده مقام خلافتی تهدید ایدن مسیلمه بی ده اولدیرمش  
و آخر عمرنده افراط ایله ایچدیکی خمرک تاثیر یله فوت اولمشدر !

قدر مهم ایدی. حالبوکه « عینین » طاغنده کی یکیددن دشمن.  
 سوارینک عسا کر اسلامیہ علیهنه هجومی منعه مأمور  
 اولان حضرت عبداللہ بن جبیرک تیرانداز فرقه سی اوپله نازک بر  
 زمانده وظیفه مأموریتلرنجه سهو و خطا ایدہ رک انلرک  
 اشبوسہولری بحکمتہ تعالی اردوی اسلامک انہزامنہ سبب  
 اولمشدر. بونلر عسا کر اسلامیہ نک غنیمت المعہ  
 باشلادیغنی کوردکلری اندہ همان بری برینہ خطاباً :  
 — « ارقداشلریمز غالب اولدی. دشمن بوزولدی .

نیہ طور یوسکمز ؟ ای جماعت ! غنیمت !  
 دیدکدن صوکرہ یغما کرلک ارزوسیلہ نقطه مأموریتلرینی  
 ترک ایدوب میدان محاربه ده کی رفقا سنک یانلرینہ قاحچہ  
 باشلامشلر ! اوزسان فرقه مذکورہ نک رئیس بولنان.  
 « عبداللہ بن جبیر » رضی اللہ تعالی عنہ حضرتلری انلرہ :  
 — « سزی بورایہ مأموراً کوندرن رسول اللہک  
 امرینی اونوتدیکرمزی ؟

دیہ نفرات مرقومہ بی غنیمت طمعندن شدیداً نہی ایتدیکی  
 حالده سوزینی دیکلده میوب انحق : [برازده غنیمت آلم]  
 جوابی آلمشدر!...

جناب « عبداللہ بن جبیر ابن النعمان » رضی اللہ تعالی



عنه حضرتلری، محافظه سنه مأمور بیورلدقلری نقطه مهمه ده انجق یدی سکز نفر ارقداشیلہ برابر قالمشدی .

حالبوکه قریش اردوسنک میمنه سنه قوماندان بولنان « خالد بن الولید »، معیتندہ کی سواریلرلہ ایشته اومهم نقطه دنبری اردوی هایونک صول جناحی اوزرینه هجوم ایتہی برقاج دفعہ لر تصور ایتمشکن نقطه نک مخصوص محافظلرلہ مجهز بولندیغنی کورہ رک نیتی اجرا ایتمکہ موفق اولہ مامشدی . بودفعہ محافظین فرقہ سنک طاغیلدیغنی کورہ رک همان سرعت فوق العادہ ایلہ اومهم نقطه دنبری اردوی هایونک اوزرینه ایکی یوز الی نفر اتباعیلہ شدتلی بر هجوم ایتمش ونقطه نک امر محافظہ سنده ثابت قالان عبداللہ بن جبیر حضرتلرینی ورفقاسنی اورادہ شہید ایلہ یوب نقطہ یی طوتمشدور .

کچیدی بر کرہ ضبط ایتدکدن صوکرہ اردوی هایونک صول قولندنبری طولاشوب ارقہ طرفدن ایتدیکی هجوم ایلہ عساکر اسلامیه یی بردنبرہ شاشیردہ رق بیوک برترقرہ احدانہ موفق اولہ بیلدی !

اهل اسلام غالب ومظفر اولمشکن دفعہ ایش برعکس

دوشدی مظفریت اسلامیہ در حال ہزیمت و مغلوبیتہ  
دوندی !

ایستہ او — خالد فرقه سنک شدتلی هجومی —  
انسانسندہ ایدی کہ حضرت حمزہ رضی اللہ تعالیٰ عنہ  
حضرت تلی، اوکنہ کلان مشرکینی ارسالان کبی پارچہ۔  
لامقدہ ایکن «سباع بن عبدالعزی» نام بہادر، اکا  
قارشی طور دی !

شہادت حمزہ = لکن اللہک قورقونج ارسالانی،

عادی برسباعی نہ اکلار ایدی ؟ حمزہ براوروشده سباعی  
دویرہ رک ایشنی بتیردکن صوکرہ باشقہ طرفہ طوغری  
قیزغین ارسالان کبی پرناپ ایدرکن درکین ترصد اولان  
وحشی معهود، پوصودن صیچرایوب آتدینغی حربہ ایلہ  
بہادرنامدار مشارالیہی رتبہ عالیہ شہادتہ ایردیرمشدر.

اوزمان مشارالیہ ۵۹ یاشندہ ایدی . رب ارض عنہ

سیدالشہدای مشارالہک ہم شیرہ زادہ سی بولنان  
«عبداللہ بن جحش» رضی اللہ تعالیٰ عنہ حضرت تلی دہ ایشتہ  
اوصرہ دہ «ابوالحکم ابن الاخنس الثقفی» نک الندن شہید  
اولدینغی کبی مہاجریندن «شماس بن عثمان» رضی اللہ تعالیٰ  
عنہ حضرت تلی دہ رتبہ رفیعہ شہادتہ ایرمشدر .

نسوان قریشک وحشتلری = وحشی برارالق  
 شهید سید جناب حمزه نک قارنی یاروب چیقاردیغی جکرینی  
 هنده کتیردی !

هند، وحشینک ابراز ایله دیکی بوغیرت وحشیانه سندن  
 صورت فوق العاده ده محظوظ اولغله برابر شهید مشارالیهک  
 مبارک جکرلرینی اغزینه آتهرق چکنه دکن صوکره  
 اوستنده کی باشنده کی حلیاتی ویاننده بولندیردیغی باشقه  
 اشیاسنی شکرانه وحشت اولق اوزره قاتل مرقوم  
 وحشییه ویرمش بوندن فضله مکیه عودتنده دیکر کونا  
 مکافات نیتنده بولندیردیغی وعد و بو خدمتندن طولایی  
 عمری اولدقجه منتدار و متشکره اوله جغنی نظماً بیان  
 ایله مشدر :

( نحن جزینا کم بیوم بدر )

( والحرب بعد الحرب ذات سحر )

( ما کان عن عتبه لی من صبر )

( ولا خی و عمه و بکر )

( شفیت نفسی وقضیت نذری )

( شفیت وحشی غلیل صدری )

( فشكر وحشى على عمرى )

( حتى ترم اعظمى فى قبرى )

حیرت اسلامیه = خالده اوصورتله اولان هجومی

اوزرینه عساكر اسلامیه بیوک بر بوزغونلق دوشدی :

خالده ارقه طرفدنبری هجوم ایتمکده اولدینی حالده

کیفیتدن ینخر بولنان اهل اسلامک مسامع دقتنه :

[ اخراکم ! یعنی ارقه کزه باقیکنز ای جماعت ! ] دیه برسس

کیردیکندن اردوی هایون خلقنه غریب بر حیرت عارضه سی

کلدی !.

ایلری یه سکرتمش اولان فرقه اسلامیه، تلاش ایله

کری یه دوندی . واه که ارقه ده راست کلدکلی اهل

اسلام ارقداشاری دشمن ظنیله اوزرلرینه هجوم ایتدیلر !

ا کرچه اثناء محاربه ده یکدیگری طانیق ایچون

( اولدیر ! اولدیر ! ) مغسانه اولان ( امت، امت ! ) [ ۱ ]

تعبیری اولجه ینلرنده وضع ایتشدیلر . لکن شاشقینلق

ایله اوتعبیر دخی اونودیلهرق دوستی دشمندن فرق ایده من

درجه سنه کلدکلرندن همان بری برینی قیرمغه باشلادیلر .

حملات و ضربات اسلامیه یه طایانه میوب بوزولمش

اولان مشرکین عسکری؛ طویلانه رق اهل اسلام عسکری  
اوزرینه هجوم ابتدی !

حتی ( هند بنت عتبہ ) نک طاغلوہ قاجش اولان فرقه  
سی بیله مشرکینک بویله غلبه سی کورو لمکه باشلا دینی زمان  
طاغلردن اینه رک دفلرینی چالار و :

( نحن بنات طارق )

( نمشی علی التمارق )

( ان تقبلوا نعائق )

( او تدبروا نفارق )

( فراق غیر وامق )

کبی هیجان آمیز رجزو اشعار او قور ایدی !

ایشته بوقار غشه لقده اهل اسلامدن بعض ذوات  
ینه اهل اسلام عسکری الندن تلف و مجروح اولمشدر !!  
از جمله کبار اصحاب کرامدن ( حذیفه ) رضی الله

تعالی عنه حضرت تلرینک [ حسیل ] اسمیله مسمی بولنان پدر  
عالیکهر لری ( یمان العبسی ) رضی الله تعالی عنه حضرت تلری ده  
بوصره ده شهید اولمشدر. مثلاً : [ اخراکم ] نداسی  
اوزرینه کمال خلجان ایله کری دو نمش اولان فرقه اسلامیه،  
کریده کی اهل اسلامی گروه مشرکیندن ظن ایده رک

حتى انك اول ( حذيفه ) ايله باباسى ( يمان ) حضرتلرينه  
راست كلكلرى حالد قارغشلق اره سنده كيم اولدقلرينى  
تشخيصه وقت قالمديغندن همان اوروب اولديرمكه  
باشلا دقلرنده جناب حذيفه :

— ( اى عباد الله ! بوبنم بابامدر ! )

ديه باغيرمش واووقته دكين مشاراليهك ايشى بىترلديكندن  
شهيد مشاراليه، كنديسنى اولديرمش اولان مجاهدين مسلمينه  
يالكز: ( يغفر الله لكم ! ) ديه بيلمشدر ! ( ابن سعد ) طبقاتنده  
يمان حضرتلرينك ( عتبه بن مسعود ) رضى الله عنهنك  
الندن شهيد اولديغنى بيان ايتمشدر .

مشاراليه ( يمان ) ايله ( ثابت بن قيس ) رضى الله تعالى عنه  
حضرتلرى مهاجمات حربيه ياراميه جقلرى معلوم برر  
بيرفانى اولملرى حسيله سهسالار انبيا عليه افضل الصلوة  
واكمل التحايا افنديمز، اثناء حركت هايونلرنده انلرك  
نسوان وصيبانى محافظه مأموريتيله مدينه يه عودتلرينى  
ايسته مشدى .

لكن هر ايكيسى ده رتبه شهاده ايرمك ايجون  
برلكده كلكلرينى ارزو ايله دكلرندن اوباده كى استدعالرينه



طرف عالی پیغمبریدن مساعده بیورمش وهرایکسی ده  
برلکده اوکون برمراد اولمشدر .

اعداء دین، بوجهله مسلمین علیهنده بیوک  
برفرستی اله کچیرنجه آرتق تا ذات عالی رسالتنهاییه  
طوغری هجوم ایتکه باشلایه رق حضرت فخرکائناتک  
یاننده کی جمعیت اسلامیه نک اوزرینه طاشلری، اوقلری  
یاغمورکی یاغیدردقلرندن محافظین اسلامیه طاغیلدی .

مجروحیت پیغمبری — ایسته اوساعتده ایدی که کبار  
اصحاب کرمدن ( سعد ابن ابی وقاص ) رضی الله تعالی عنه  
حضر تلرینک برادری ( عتبه ابن ابی وقاص ) نام  
مشرك ، اتدینی برطاش ایله ، حضرت پیغمبر افندیمرک  
مبارک الت دوداقلرینی یاردی . والت چکه لرینک صاغ  
طرفنده کی رباعیه دیشلرینی دخی قیردی !

لکن عتبه لعینک بووقعده نبی ذیشان حقنده اجرا  
ایله دیکی اوها تندن صوکره ذریتی علی العموم رباعیه یمندن  
محرم اولمشدر ! الجزء من جنس العمل !

( عبدالله بن قیئة الحارث ) نام لعینک آتدینی طاش  
دخی افندیمرک یا ناقلرینی یارمله دقدن باشقه درع شریف

نبوینک، وجنه شریفه یی سترایدن قسمدن ایکی حلقه یی  
 قیروب یارەنک ایچنه طوغری باتیرمش ایدی .  
 ذات مرحمتسمات رسالتپناهی، کندی مبارک قانلری  
 طوبراغه طاملا یوبده اندن طولای قومه عذاب اینسون  
 دیه یارەلرندن اقان قانلری دست شریفلریله سیلوب هوایه  
 طوغری آثار و :

— ( یارب ! قوم جاهلدر . سن انلره هدایت ایت ! )  
 دعاسنی ایدردی !

غریبدرکه جریحه شریفه لرندن سیلوبده مبارک  
 اللریله هوایه طوغری آتدینی قان طاملالری، بردهایره  
 دوشمزدی !

#### استطراد

حضرت جبریل علیه السلامک، طرف اشرف ربانیدن  
 کندی طبیعت ملکیه سنه بخش بیورلمش اولان سرعت  
 برقیه سنه نسبتله دهها باشقه سرعت فوق العاده ایله نزول  
 و صعود ایتدیکی روایت کوره برق اچدفعه وقوعه ککشدرکه  
 بریسیده ایشته بووقعه الیمدر .  
 حتی اودرجه سرعتله که قان طمله سی وجوده مسعود

نبویدن انفسك ايدوب ده ارضه طوغری سقوطه باشلا دینی  
انده مقامندن حرکت ایدن جبریل علیه السلام، هنوز  
قان طمله لری، یره واصل اولمزدن اقدم یتشمش، قانك  
یره طاملامسنة محل بر اقامشدر !

شایدکه یره طاملا سیدی مکه یا خود عربستان خلقنه  
بر بیوک بالا کله جك، یا خود بتون کره ارض اوزرنده  
بردهایشیلک کورولمیه جکدی .

دیگر دفعه لردن بری جناب یوسف علیه السلامك  
چاه کنعانه، ابراهیم علیه السلامك نارنمروده القا ایدلدکری  
کونلرده در .

لکن حضرت جبریلک نزول و صعودی حرکاتنده  
کم و کیف مسافه نسبتنک موجود اولوب اولمادیغنده کی  
حقیقت پك ده قابل ادراك دینلمز او انجق علم محیطربانیده در .  
انسی

( ابن شهاب ) نام ملعونك، بازوی شریف حضرت  
نبوی بی اوقایله یاره لدینی روایتی ده بعضی آثارده کورلمشدر .  
مبارك یا ناقلرینك یاره لدینی و رباعیه یمنالرینك ده  
قیرلدینی زماندن صوکره استعید بالله [ لیس لك من الامر  
شیء . . . . . الى قوله فانهم ظالمون ] آیت کریمه سنك

شرف نزول نه د کین هر صباح نمازی رکعت اخیر هسی رکوعنده  
( سمع الله لمن حمد ) دید کدن صو کره سجده یه کیتمزدن  
مقدم حضرت پیغمبر :

— ( اللهم العن صفوان بن امیه و سهیل بن عمرو و  
الحرث بن هشام ! )

دیه بد دعا بیور و رلردی .

او قارشلق اره سنده ایدی مشرکیندن برفرقه، ذات  
اشرف نبوینک اوزرینه هیجوم ایتدی . لیکن طرف عالی  
پیغمبریدن مامور آحضرت علی کرم الله تعالی وجهه افندیمز ،  
اوفر قیه قارشی چیقوب خذله مر قومه نک رئیس ( هشام  
بن امیه الخزومی ) نی قتل ایتمش رفقاسنی ده فرار و رجعت  
مجبور ایله مشدر .

ایشته بومقاتله ده جناب علی کرم الله وجهه حضر تلرینک  
قیلنجی قیرلدیغندن حضرت نبی ذیشان افندیمز ، « ذوالفقار »  
نام سیف شریفی اکا و یرمش و اوغازی نامدار ، ذوالفقاری  
ایشلتمکده کوستردیکی جلادته بناء طرف ذیشرف  
نبویدن : « لافتی الاعلی و لاسیف الا ذوالفقار » ستایش جلیله  
مظهرده اولمشدر .

فرقه مذکور ه نک اولوجهله رجعت قهقریه سنی

کورن باشقه بر فرقه‌دها هجوم ایتدیسده انک دخی رئیس  
بولنان ( عمرو بن عبدالله الجمحی ) بی جناب علی اولدیرمکه  
اقلرده مخدولاً دوئمشدر .

بعده باشقه بر فرقه‌نک هجومنده بهادر مشار الیه ،  
او فرقه‌نک ده رئیس ( بشر بن مالک ) ی قتل ایتدیکندن  
دیگر لری صاوشوب قاچمشدر .

ام عماره‌نک جلادتى = بواننده ( ام عماره ) نامیه  
معروفه اولان ( نسیبه ) رضی الله تعالی عنها حضرت لری  
— که مازن بن نجار اولاندن کعبک قیزی وانصار کرامدن  
( زید بن عاصم ) رضی الله تعالی عنه حضرت لرینک زوجه .  
سیدر — میدان محاربه‌یه چیقوب ، رسول ذیشان اوزرینه  
هجوم کوسترن خذله مشرکینه قارشى بیوک مدافعه‌لر  
ایتمش وجناب علی کرم الله وجهه افندیمزه اوبابده مظاهرت  
مخصوصه مردانده بولنمشدر .

مشار الیهانک او کونکی شجاعت وجلادت مردانه‌سی  
هروجهله تحسین وتقدير بیورلمشدی .

حتی رسول اکرم صلی الله تعالی علیه وسلم افندیمزک  
اوزرینه او یله هجوم ایدن فدائی مشرک‌لردن برینک ایاغنی

قیلنج ایله کسوب حریفی آتندن اشانی دوشوردکن  
صوکره اولدیرمشدی ،

لکن کندیسیده برقاچ یرندن یاره لندیغندن قانلری  
آقار حالبوکه ینه جریحه لرینی هیج صایمقسزین بی پروا  
حمله ایدر وقوجه سیله برابر اوغللرینی حربه تشجیع  
ودشمن نه طرفدن هجومه باش کوستر اایسه همان زوجی ایله  
اوغللری برابر یتشوب دفع و تنکیل اعدایه اقدام ایدردی .  
بناءً علی ذلک حضرت پیغمبر انلرک حقنهد:

— ( یارب ! بوتلری بکا جنتده رفیق ایت ! )  
دیه او کون دعا بیور مشدر .

بوصرمده ملعون ( عبدالله بن قیثة الحارث ) ، ( بکا محمد  
[ علیه الصلوة والسلام ] ی کوستریکز ! یا او ، یابن ) ،  
دیه نبی اکرمک اوزرینه هجوم ایتشدی . جناب  
( نسبییه ) رضی الله تعالی عنها ، ابن قیثه ملعونه قارش  
چیقه رقاکا اوچ دفعه قیلنج اوردیسه ده بری بری اوزرندم  
ایکی قات زره کیمش اولان حریفک وجودینه قیلنجی  
ایشله دهمدی . لعین اایسه حضرت ( نسبییه ) نی او موزندن  
یاره لدی ! نسبییه حضرتلرینک مدافعه جنکا ورانه سنی  
قیلنج ایله بر طرف ایده بیلمش اولنجه اولاً راست کتیردیکی



علمدار نبوی (مصعب بن عمیر) رضی اللہ عنہ حضرت تلمیذی  
 — رسول مکرم افندیمز ظنیله — شهید ایتمدر . زیرا  
 علمدار مشارالیه، زرهنی کیدیکی زمان شخصاً فخر عالم  
 افندیمزه پک زیاده سیله بکزرردی !

جناب مصعبك وقوع شهادتندن صوکره لواء شریفی  
 حضرت نبی ذیشان افندیمز علییه تسلیم بیوردی .

اراجیف وسوء تأثیراتی = ابن قیئه لعین، جناب  
 مصعبی شهید ایله دکن صوکره دونوب ابوسفیانك نزدینه  
 واردرق اکا :

— ( بن محمد [ علیه الصلوة والسلام ] ی اولدیردم ) .  
 دیمش بناءً علیه حوادث، عسکر ایچنده قولرا کبی یاییله  
 قالمشدی .

بعض آثار تاریخیه، وقعه نك بوراسنی بیان ایدر کن  
 دیورکه :

( ابن قیئه، طاش اتدقندن صوکره برارالق یاناشه رق  
 ذات جلیل الصفات رسالتپناهینك بوکرلرندن قیلنج ایله  
 شدتله اوردینی حاله مبارک وجود مسعود هایونلرینی  
 ستر ایدن ایکی قاتلی زرهك منع ومقاومته قارشى چوق  
 کسديره مامش ایکن آتندن اشاغییه دوشوره بیلدیکنندن  
 همان آتی آلوب کروم مکروه مشرکینه قارشى دقندن صوکره

( ای قوم بن محمدی اولدیردم . ایشته آتی ده ! ) نهیق ملعننتی  
چیقارمشدر

تاریخک بوبایدہ کی بیانانہندہ نظر واردر . دین مبین  
اسلامک محافظہ سی اوغورندہ شہدایہ شہادتہ تشنہ اولان  
اصحاب کرامک شمشیر جلادتلرینک منسل بولندیغی بویله  
یرغزوہده مرکوب سعادت مصحوب پیغمبری بولنان آتی  
ابن قیئہ نک عنوة الہ کچیروب کیدہ بیلیم سی مستبعد کورینور !  
روایتہ کورہ ابلیس علیہ اللعنه دخی ، طاغ اوزرندنبری  
یوکسک سس ایله :

— د محمد [ علیہ الصلوۃ والسلام ] قتل ایدلدی !

دیہ باغیرمشدی . کړک او منحووس حوادث ، کړک او حوادثی  
مؤید دیمک بولنان بوسس اهل اسلامده تعریفہ  
کمزدرجہده بیوک برتأثیر حاصل ایدہ رک شاشقیقلق  
وقار شقیقلغہ سبب اولدی . افراد اسلامیهده جرئت  
وجسارت قیرلدی . هرکس یأس وملاالته دوشدی .

کروه مشرکینده ایسه عکسنہ تأثیر حاصل اولدی .  
کفار ، جسارته کلہ رک او حضرتک اوزرینہ هجوم برله  
یاننده کی عسکری طاغیتمقدہ وهر طرفندن احاطہ حملہ  
وتجاوز کوسترمکده ایدی .

سطحی نظر اولان کوزلر ، ذات عالیصفات رسا .

لتپناهی بی او زمان یک بیوک بر تهله که ایچنده قالمش  
کورورلردی !

حتی او قدر بیوک مخاطرمده قالدیلردی که بشر قوه  
مدافعه سیله حفظی ارتق دائرة امکندن خارج قالمش  
اولدیغندن حضرت جبرائیل ایله میکائیل علیهما السلام ،  
او زمان صورت بشرده کورینوب رسالتپناه افندیمنزی  
محافظهده سائر محافظین و مجاهدین اسلامیه مشارکت  
ومظاهرت ایتدکلی و او ائنده نبی ذیشانک اوفاجق  
بر طاق طاشلری الوب اعداءدین اوزرینه آتمغله دشمنده اندن  
رعب حصوله کلدیکی روایاتنددر .

اهل اسلام ایسه رسول ذیشانی کورمه مدکلرندن  
باشقه قتل اولندیغی حوادثی ده ایشتدکلرندن ارتق  
شاشیردیله ! نه یاپه جقلرینی ، نه یایمق ده لازم کلدیکنی  
بیلمدیلر . جمله سی ده پریشان وحیران بر حالده قالدیلر !

حضرت علی کرم الله وجهه ، دیرایمش :  
جناب روح جسم کائنات علیه افضل الصلوة والتحیات  
حضرتلری ، بر اراق کوزومک اوکندن غائب اولدی .  
بن بیوک بر حزن و حیرته دوشدم . بلکه شهید اولدی !  
دیه شهدانک اراسنده ارادم . اندهده بوله مدم . صوکره  
دیدم که : ( اشجع المرسلین افندیمنزک کفاردن فراری

احتمالی یوقدر مکرکه حق تعالی بزه غضب ایدوب انی  
 حضرت عیسیٰ علیہ السلام کبی سمایه رفع بیورمش اوله!  
 او حالده بنم ایچون کفار ایله مقاتله ایتمکدن خیرلیسی  
 یوقدر ( دهرک قیلنجی چکوب مشرکین عسکری اوزرینه  
 یورودم. قیلنجمدن قورقان افراد عسا کر مشرکینک  
 ایکی طرفه اچیلیمسی اوزرینه کوردم که اول فریدالانبیاء  
 حضرتلری وسط عسکر اعداده پا بر جای ثبات وشجاء  
 عت اولمش طور یور! . اکلادم که جناب حافظ حقیقی،  
 حبیب اکرمی ملائکه کرامی ایله حفظ وحمایه بیورمشدر!  
 حضرت عثمان ذی النورین رضی الله تعالی عنه ،  
 انصار کرامدن ( سعد ، عقبه ) نامنده ایکی صحابی ایله  
 برابر اولدیفی حالده : ( مادام که او حضرت نبی ذیشان  
 قتل اولنمش بزده باشمزک چاره سنه باقم ) دیه اوزاقلره  
 طوغری قاجمشدی . وقعه دن اوچ کون صوکره کلدیله .  
 حضرت پیغمبر اوزمان انلره خطاباً :  
 — ( لقد ذهبتم فیها عریضة )

بیوردی .

( سعد بن عثمان ) کبی دیگر بعض اهل اسلامده  
 دونوب مدینه منوره یه قدر کلمشردی .

باشقه بر فرقه اسلامیه ده بری برینه :

— ( کاشکی عبدالله بن ابی بن سلول شمعی حاضر

اولسیدی ده ابو سفیان بن زم ایچون امان ایستیه ایدی )  
دیدیکی کبی منافقین کروهندن برطاقم دخی :

— ( محمد [ علیه الصلوٰۃ والسلام ] اکر حق پیغمبر

اولسیدی قتل اولتماز ایدی . او حالدہ سزده اسکی دین  
واخوانکزه دونکز ! )

دیمکه قدر جرئت ایتمشدرکه حضرت نبی ذیشانی هم ( رسول الله )  
هم ده ( بعید عن الهلاک ) اولمق اوزره اعتقاد  
ایتمش اولدقلرینی اظهرا ایدنلری رد ایدهرک نبی ذیشانک  
انجق رسول الله اولدیغنی حق تعالی استعید بالله [ وما محمد  
الارسل قد خلت من قبله الرسل . افان مات او قتل انقلبتم علی  
اعقابکم ومن ینقلب علی عقبیه فلن یضر الله شیئاً وسیجزی  
الله الشاکرین ] آیت کریمه سنی انزال بیورمشدر .

اهل اسلامک بو هزیمت باعث الیکدورتی  
انساننده ( انس بن مالک ) رضی الله تعالی عنه حضرت تلرینک  
عم بزر کوارلری ( انس بن نضر ) حضرت تلری مجاهدین  
اسلامیه نک منہزملرینه خطاباً :

— ( ای جماعت مسلمین ! محمد [ علیه الصلوٰۃ

والسلام ] قتل اولندیسه رب وخالقی حی لایموتدر .

او کیمک علیهنده حرب و قتال ایتدیسسه سزده انک  
علیهنده ایدیکز ! دین مین اوغورنده حائز مرتبه شهادت  
اوله رق اوکا ملاقاتی ایسته مز میسکز ؟ )

دیهرک منہزمین اسلامیه یی حربہ تشویق ایتدکن وبعده  
( اللهم انی اعتذر الیک مما یقول هؤلاء و ابرأ الیک مما جاء  
به هؤلاء ) دیدکن صوکره کندیسیده همان صفلر  
اراسنه طالب ایتدیکی مقالهده سکساندن فضله قیلنج ،  
سونکو ، اوق یارملریله شخصی طانیله میه جق درجه سنه  
کاندکن صوکره نهایت احراز رتبه شهادت ایتشدرد .  
رضی الله تعالی عنه !

رسول اکرم صلی الله تعالی علیه وسلم افندیمز ایسه  
حربک اک قورقونج ، اک بحرانی اولان بویله زمانلرنده بیله  
یرندن هیج قیملد انما مشلردی !

مهاجر کبار اصحاب کرامدن « ابو بکر الصدیق ،  
عمر الفاروق ، علی المرتضی ، عبدالرحمن بن عوف ،  
سعد بن ابی وقاص ، زبیر بن العوام ، طلحه بن عبیدالله ،  
ابو عبیده بن الجراح ، مقداد » و انصار کرامدنده  
« ابو دجانه ، حباب ابن المنذر ، عاصم بن ثابت ، حارث  
بن الصمه ، سهل بن حنیف ، سعد بن معاذ ، اسید بن  
حضیر ، سعد بن عبادہ ، محمد بن مسلمہ » رضوان الله



تعالی علیهم اجمعین حضراتی حول شریف رسول اللہ  
 پروانہ کی دونوب طولاشوب محافظہ دہ غیرت کو ستریورلر دی .  
 اصحاب کرامدن « کعب بن مالک الخزرجی » رضی اللہ  
 عنہ حضرت تلی قارشیدہ رسول اللہی کوردیکندہ مسروریت  
 و ممنونیتدن طولای بی اختیار :

— ( یا معشر المسلمین ! هذا رسول الله ! )

دیہ فریاد ایدہ رک اطرافدہ کی دیگر اصحاب کرامی دہ  
 کیفیتدن خبردار ایتدیکنک عقیندہ اوملجاً عالم ذات  
 رسالتک زیر سایہ سعادتلرنده اوتوز نفر بر جماعت  
 اسلامیہ همان مجتمع اولمش واصحاب سائرده برر برر  
 طولانغہ باشلامشدی .

امداد — ( زیاد بن السکن ) رضی اللہ تعالیٰ عنہ

حضرت تلی انصار کرامدن اون درت نفر فدائی یکیتلرله  
 برابر کلوب حضور عالی نبویدہ اثبات وجود ایتدی .  
 مشرکیندن کیمی حالا رسول ذیشان اوزرینہ طاش ،  
 اوق اتار ، کیمی دہ ضوموز طوبی کی جمعیتلی برفرقه  
 اولوب هجوم کوستر ایدی .

( ابو دجانہ ) رضی اللہ تعالیٰ عنہ حضرت تلی ، نبی

محترمک اوزرینہ قاپانوب اعدانک طاش ، اوق کی

کلان هر درلو مرمیاننه قارشى سپر طورپور ایدی .  
 چوق برندن جریحه دار اولمشدی .  
 كذلك طلحه رضى الله تعالى عنه حضرت تلى ده بعينه  
 ( ابو دجانه ) حضرت تلى کبی کنديسنی حضرت رسول  
 محترمه سپر طوتديغندن برشدلى ضربه ايله الى ياره لنوب  
 مؤخرآ چولاق قالمشدى . [ ۱ ]

( سعد بن ابى وقاص ) رضى الله تعالى عنه حضرت تلى  
 - تير انداز لکده کی مهارت فوق العاده سی ايله مشهور  
 اولديغندن - نزد سامی رسالتپناهیدن آریلیوب كفاره  
 اوق آتهرق مدافعه ومحافظه ایدردی .  
 حتى اوکون جناب سعد حضرت تلىنك دشمن یوزینه  
 بيك اوق اتديغی آنکچون طرف عالی پیغمبریدن :  
 [ ارم یا سعد ! فدک ابی وامی ] دعاى عالی نویسنه  
 مظهر بیورلديغی مشهوردر !

او صرمده مشرکیندن بر فرقه نك شدتلى هجومی  
 واقع اولمغله حضرت نبی مکرم افنديمز ، حاضر بولنان  
 اصحاب کرامنه :

[ ۱ ] خلافت ، جناب علی به توجه ايتديکی زمان امتك  
 ايچندن الكاول حضرت طلحه اخذ يد بيعت ايتمش ومشاراليهك  
 چولاق اولديغی حالده امریعتی ابتدا اجرا ايتسی بعض طرفدن  
 قال خير عد ايدلامشدى ! .

— ( بونلره کیم قارشى چيقه جق ؟ )

بيورديلر. ( زياد بن السکن ) حضرتلرى ، اكا جوابده :

— ( بن يا رسول الله ! )

ديدکدن صوکره فدائى رفقاسيله برابر همان ميدان

مدافعه يه چيقوب جمله سى شهادت رتبه سنى احراز

ايدنجه يه دکن غزا ايتمشلردر. رضوان الله تعالى عليهم اجمعين !

( زياد بن السکن ) حضرتلرينک مجروحاً يره

دوشديکى زمان امرعلى پيغمبرى ايله يرنندن قالديريلوب

حضور پرنور نبوى يه کتيرلمشدى .

رسول اکرم صلى الله تعالى عليه وسلم حضرتلرى ،

اوغازى نامدارى قوجاغنه الدى . صوکه نفسده وجه

ياک تاب ناک احمدى يه باقه باقه تسليم روح ايتمک شرف

عاليهاستنى احراز ايتديرمک کي حقنده بيوک برالتفات

فوق العاده يي ابزال بيوردى !

( وهب بن قابوس مزنى ) رضى الله عنه حضرتلرى ،

برادر زاده سى ( حارث بن عقب ) حضرتلرى ايله برابر -

وقعه دن تماماً يخبر اولدينى حالده انجق - رسول مکرم

افنديمى زيارت شرف بيمثالنى احراز فکرى ايله جبل

مزينه دن مدينه منوره يه کلش ايکن حضرت نبى ذیشانک

جانب احده عزيمتلرندن خبر الديقده همان مدينه دن

چینقوب اردوی همایونه التحاق ایتمش فقط او التحاق  
زمانی زمان هزیمت اسلامییه مصادف اولغله مجاهدین  
اسلامیه نك دین مبین اسلام محافظه سی اوغورنده کی  
غیرت لرینه اشتراك ایتمش اولمق اوزره کندیسنی درحال  
میدان حربه اتمش و دین اسلام اوغورنده ایلله مردانه  
بر حرب ده ایتمشدرکه صحابی مشارالیه ک اوکون ابراز  
ایله دیکی غیرت بهادرانه وشجاعت جنکاورانه سی طرفین  
عسکرینه جداً ولهرس اولمشدر .

حتی ایکی دفعه رسول اکرمک اوزرینه هجوم ایدن  
فرقه مشرکینه قارشی چینقوب دفع بلا ایتمشدی .

بونلردن صوکره بر اوچنچی فرقه هجوم ایدرکن  
حضرت نبی ذیشان ، اصحاب کرامنه :

— « یا بونلره کیم قارشی چیقار ؟ »

بیوردیلر . جناب ابن قابوس حضرت تلی :

— ( بن یا رسول الله ! )

جوانی ویرمکه رسول مکرم صلی الله علیه وسلم افندیمنز  
انک - وقوع شهادتی و - اخلاصندن طولای کنیدی  
محظوظیتنی بللی ایدرک :

— ( یا وهب ! قالق وجنت ایلله مبشر اول ! )

فرمان عالیشاننی ویرمش ، جناب وهبک اخص آمال

خالصانه سی انجق حضور بیغمبریده رتبه رفیعہ شہادت  
احراز ایتمکن عبارت اولدیغندن همان ممنوناً آتیہ رق  
او فرقی یی ینہ دفع ایتمکه موفق اولمشده بود دفعه  
کندیسی ده آرادیغی شہادت رتبه عالیہ سنی بولمش و بر  
مراد اولمشدر . یارب ارض عنه !

بعده نبی محترم افندیمز ، او شهید سعید نامدارک  
جنارہ سنی نزد ہمایونلرینہ جلب ایتدیرہ رک روحنہ سلام  
ودعالر ایتدیکی صرہده :

— ( بن سندن خوشنودم یا وہب ! )

بیوردی ! حضرت عمر الفاروق رضی اللہ تعالیٰ عنہ  
حضرت تبری ، انکیچون : ( وہب بن قابوس کبی فوت اولمہ یی  
جانمہ منت بیلیرم ) دیردی .

مخیریقلک فداکارلغی — مدینہ اہالی یہودیہ .

سندن ( مخیریق ) : ہم زنکین ، ہمہ عالم و فاضل بر  
ذات ایدی .

مخیریق ، حضرت نبی محترم افندیمزک نبی اخر الزمان  
اولدیغہ اینامش ایدی . لیکن بردنبرہ اظہار اسلام  
ایتمکن — منافقین و متعصبین یہودہ فارشی — حذر  
ایتمکه مجبور اولیور ایدی .

حتى احد كوني ديكر رؤساء يهوده خطاب ايدرك  
ديمشدى كه :

— ( كتب سماويهك بياناته كوره بوكون احده  
حرب وغزا ايدن ذات شريفك نبى ذیشان اخرا الزمان  
اولدینى آزاده اشتباهدر . او حالده اكا معاونت دخى  
اوزریمزه فرضدر )  
رؤسا ، جوابلرنده :

— ( بوكون يوم سبتدر . بر ايشده بولنه ميه جغز .  
محاربه ميه ناصل كیدهلم ؟ )

دیدکلرندن مخیریق او جوابه قارشى :  
— ( او ذات شريفك شریعت اسلامیه سی ، يوم  
سبتده ایش کورمامک شریعت یهودیه سنی چوقدن فسخ  
ونسخ ایتمشدر ! قالیکز کیدهلم یاردم ایدهلم )  
دیدیکی حالده سوزینی دیکله ده مامشدر .

حالبوکه کندیسى طورمغه بر درلو صبر و تحمل  
ایده مدیکه چون اعلان اسلام ایدرک برازی منافق ،  
برازی ده اصل یهود اولمق اوزره برقاج کشی ده برابرنده  
بولندینی حالده قالقوب احده کلدی ! عسا کر اسلامیهك  
فنا حالده متحیر قالدینی زمان ایدی !

اهل اسلامك اویله حیرت ومغلوبیتنى کورن بنی



اسرائیل ایسه — او هزیمته قارشى — یهوده یره  
جان ایله جو مردلک ایدهمیه جکلرینی بداهه  
اکلاتدقلرندن حضرت مخیریق ، حضورعالی پیغمبرییه  
کیدوب اولاً کلمه منجیه شهادتی زیور زبان صدق و مخا-  
لصت ایتدکدن صوکره :

— ( یارسول الله ! بو کون سزه معاونه ایدم جک  
اولدیغم محاربه ده کرییه دونمامک عزم قویسنده بولنیورم  
شایدکه شهید اولور ایسه بتون مال و مالکم سزکدر .  
الله سزه ناصل امر ایدرسه مالم حقنده او یله جه معامله  
ایدیکز ! )

دیه وصیت ایتدی . [ ۱ ]

جناب مخیریق ، او کون دیدیکی وجه اوزره شهادت  
مرتبه سنی احرازه موفق اولمشدر . یارب ارض عنه !  
بناءً علیه حقنده رسول اکرم صلی الله علیه وسلم  
افندیمز : ( مخیریق ، ملت یهودک خیرایسیدر ) بیوردیلر .

ینه بو صره لرده ( عثمان بن مغیره المخزومی ) سواری  
اولدینی حالده حضرت رسول مکرمک اوزرینه طوغری

[ ۱ ] وصیتلری موجبجه بتون اموالی جناب رسول الله  
انتقال ایتمش ، او دخی غزادن مدینه منوره به عودت هابونلرنده  
کاملاً تصدق بیورمشدر .

هجوم ایدرکن اولجه ابو عامر فاسقک ، اهل اسلامی  
ایچنه دوشورمک ایچون قازدینی قویویه دوشمشدر .  
( حارث بن الصمه ) رضی الله تعالی عنه حضر تلری در سال  
یتشهرك ملعون حریفی اوراده اولدیردی . حارث ،  
مقتولنك آتيله سلا حارینی المقده ایکن ( عبید بن عامری )  
عثمانك امدادینه قوشه رق جناب حارثك اوموزینی یاره -  
له مش ( ابو دجانه ) رضی الله تعالی عنه حضر تلری دخی  
بری طرفدن یتشهرك عبیدی مقتولا یره دوشورمشدر .

فدالك ابی = مشرکین اردوسنك ماهر تیر انداز -

لرندن ( حبان بن العرقه ) [ ۱ ] ایله ( مالک بن زهیر ) ، یقین  
یرده بر طاش ارقه سنه یاتوب اتدقلری اوقلریله اصحاب  
کرامی ازعاج اتمکده ایدیلر .

حتی رسول اکرم صلی الله تعالی علیه وسلم افندیمرک  
آزادلیلرندن ( ام ایمن ) رضی الله تعالی عنها حضر تلری ،  
غزوات اسلامیه یه صو کتیریر ، و مجروحلرک جریحه لرینه  
باقمقی کندینه مهم بر وظیفه ایدنمش بولنور ایکن مرقوم  
( حبان ) ک آتدینی اوق ، از قالدی مشارالیه یه اصابت  
ایدیور ایدی .

[ ۱ ] حبان : حاء مهمله نك کسری ، بانك تشدیدله وعرقه :

عین و قافک فتحه لرلی ، رانك کسریله در .

اويله بر اوقه فدا اولمغه مشارالها ايجون همان روق  
قالديني حالده قورتولديغني كورن حضرت رسالتپناه ،  
تير انداز شهيري جناب ( سعد بن ابى وقاص ) رضى الله  
تعالى عنه حضرت تيرينك انه براوق ويرمك اكا :  
— ( ات يا سعد ! الله تعالى راست كتيره ! )

بيوردقدن صوكره سعد ، اوقنى همان آتمش وبأذن الله  
اصابت دمايله ديكنندن حبان لعين ، فى الحال هلاك اولمشدر .  
ديكرى ( مالك بن زهير ) دخى اهل اسلام اوزرينه  
اوق اتقى اوزره باشنى ييلان كبي طاشك ارقه سندنبرى  
چيقاروب اوزاديركن حضرت سعد ، اكاده بر اوق  
عشق ايتديكنندن مالك ، باشندن اوريله رق مقتولا  
دوريله قالمشدر .

اثر شجاعت تير اندازانه سى يالكز بوكا منحصر  
اولميان حضرت ( سعد بن ابى وقاص ) رضى الله تعالى  
عنه افنديمرك دشمن يوزينه بيك اوق اتدينى وبناء عليه  
طرف علىٰ يغميريدن :

— ( ارم يا سعد ! فداك ابى وامى )

خطاب مستطاب عاليه سنه مظهر بيورلدينى مشهوردر .  
ايشته اعداء دين هر هانكي بر طرفدن هجوم  
ايتديسه اهل اسلامدن بر طاقم غيرتلى فداييلرك مقاومت .

بهادرانه وصولت صفدرانه لرینه قارشی هجوملری ، محو  
اسلام اوغورنده کی افکاری تمامیله اجرایه موفقیت حاصل  
ایتمک درجه سنه وارمقدن کیری قالدی .

بناءً علیه اهل اسلامی ایستدکاری کبی محو ایده -  
میجکلرینی اکلا دقلری سبیلله شدت بازار حرب و قتال بران  
سکونتپذیر اولمغه ارتق میل ایتشدی . مع مافیه اصحاب  
کرام ، هر حالده بویله مخاطره لی یرده طور مه یی جائز  
و مناسب کوره مدیکندن رسول اکرم ایله برابر واروب  
جبل احدک اتکنده مأمن کوردکاری یرده طور دیلر .

قتل ابی بن خلف = رؤساء قریشدن واشدء

اعداء دین مبین اسلامدن ( ابی بن خلف [ ۱ ] )  
شدت عداوتیه مله معروف اولدیغندن ذات عالی نبوی  
بوکره اصحاب کرامنه :

— ( ابی بن خلفدن امین دکل شایدکه هجوم ایدم جک  
اولور ایسه بنی خبردار ایدیکز ! )  
حذیه تنبیه بیورمشدی !

ایشته او صروده اییک :

[ ۱ ] ابی : همزه نك ضمی ، بلك فتحی ایله اسم مصفردر .

— ( یا محمد [ علیه الصلوة والسلام ] شمدی یا سن

بنی اولدیره جکسک یا بن سنی اولدیره حکم )

دیه باغیره باغیره رسول مکرم صلی الله تعالی علیه وسلم  
افدیمز حضر تارینه طوغری طولی دیزکین هجوم ایتدیکی  
کورلمکه حاضر بولسان اصحاب کزین حضراتی ملعون  
حریفی قارشولامق ارزوسنده بولندیلرسده :

— طوقانمیکز ! برار دها یافلا نسون ! )

اراده سنی پیغمبریسی شرفصدور ایتدیکندن ضروری  
توقف ایده قالدیلر .

لکن او وقتنه قدر لعین . براز دها یاقلاشمش  
اولدیغندن نبی محترم افدیمز ، مبارک اللربنه ( حارث بن  
صمه ) نک همان حربه سنی الوب مرقومک طرفنه طوغری  
آتمش وقابورغه کمیکنی قیرمشدر . ای ، او زمان اتندن  
اشاغی به دوشمشدی !

ای ، قومنک یاننده :

— ( محمد [ علیه الصلوة والسلام ] بنی اولدیردی )

دیه باغیرمقده اولدیغنه مبنی سیریسنک اولدین ییره باقمش  
بولنان ابو سفیان ، اکا :

— ( سنی قورقیله حق درجه ده نهلمکه لی صورتده

جریحه دار کور میورم . بونجه تلاش نه ! بره سی وار  
ایسه ده یارم سی یوقدر )

دیه تسلیت ویرمک ایسته مش اولدینی حالدی ابی بن خلف :  
— ( محمد [ علیه الصلوة والسلام ] مکده ایکن

کندیسنه برکون سنی اولدیره حکم دیمشدم . اوده بکا  
ان شاء الله بن سنی اولدیره حکم دیه جواب ویرمشدی .  
ارتق او بنی اولدیردی . حربی سنی یدم بو حربی ضربی .  
سنک تأثیرندن خلاص بنم ایچون ممکن دکلدر )

دیمش وفی الواقع مکیه کیدرکن یولده و [ سرف ] نام  
منزله اوکوزکی باغیره باغیره متأثر آ هلاک اولمشدر .

دعاء نبوی = مبارک وجه شریفه نبویه بی —

اندینی طاش ایله — جرح ایدن « عبدالله بن قیثه الحارث »  
نام مشرک ملعون حقنده نبی ذیشان علیه صلوة الرحمن  
افدیمز حضرتلری : [ ائمه الله = یعنی : الله سنی خور  
وحقیر ایتسون ] دیه بد دعا بیورمشلردی .

لعین مرقوم ، مکیه عودت ایتدکن بر قاجکون  
صوکره بر طاغده او یقویه یاتمشدی . لکن اورادم  
کندیسنه مسلط اولان یبانی بر طاغ کچیمی بوینوزلریله  
سوسه سوسه حریفک قارنی بیرته رق جکرینی پارچه پارچه  
طاغیدیندن ابن قیثه هلاک اولمشدر .



کذلك نبی ذیشان افندیمرک مبارک رباعیه یمنالربنی  
قیرن « عتبه بن ابی وقاص » حقنمه دخی : [ بیانی تکمیل  
ایتمسون ] دیه بددعای نبوی شرفصادر اولمش ایدی .  
بعدالمعاوده سنه سی ایچنده عتبه هم مشرک اولدینی  
حاله عازم راه بنس القرار اولوب کیتمشدر .

رسول مکرم صلی الله تعالی علیه وسلم افندیمر  
حضرتلری ؛ احد اتکنده اتخاذا ایدیلان مأمن یرده  
بر قاق اصحاب کرامیلله بروجہ مذکور طوبلاندقلری  
صرده براز اولجه بعض اطرافده صاقلانمش اولان اهل  
اسلام منہزملری ده اوسر وسنبستان رسالتک یایگاه  
عالیرینه طوغری آب روان کبی آقوب کلدیلمر .

او ائناده حضرت علی کرم الله وجهه ، زرهنگ  
طاشی ایله صو کتیروب ذات عالی رسالتپناهی به —  
جریحه نبویه ده کی قانلرینی ییقاتدقن صوکره — آبدست  
دخی الدیرمشدر . لکن اقتدارسنزلقلرندن طولایی  
رسول اکرم افندیمر وقت ظهر نمازینی قاعدآ ادا  
بیورملریله اصحاب کرام دخی قاعدآ آداء صلات ایتدیلمر .  
مبارک وجنه شریفه احمدیه به باتمش اولان ایکی  
حلقه یی « ابو عبیده عامر بن عبدالله الجراح » رضی الله  
تعالی عنه حضرتلری اولک دیشلریله چکهرک چیقاردی .

حتی چیقاریر کن کندیسنک اولایکی دیشی ده دوشه مشدی !  
 ابو عبیده حضرتلرینک اوصورتله حلقه لری چیقار -  
 دینی اناده حلقه نك چیق دینی یرندن بوشانوب اقان  
 قانی ابوسعید الخدرینک باباسی « مالک بن سنان الخدری »  
 رضی الله تعالی عنه حضرتلری امدیکندن حقنده مشکوة  
 صدر شریف رسالتدن : [ من مس دمی دمه لم تصبه  
 النار ] بشارت عظماسی بارقه نثار طلوع وظهور اولمشدره  
 رضوان الله تعالی عایهم !

موت ذات رسالتپناهی یه دائر نشر اولنان اراجیفه  
 مدینهیه واصل اولمقله ( فاطمة الزهراء ) رضی الله تعالی  
 عنها حضرتلری همان اغلایه اغلایه احده قدر کلمشدی .  
 او زمان جریحه نبویه دن اقان قانلرک سیلانی هنوز  
 کسلما مشدی . حضرت فاطمه ، بر حصیر پارچه سنی  
 یاقه رق کولنی یاره لرک اوزرینه باصمقله قان ؛ اقمقدن در حال  
 کسبلدی .

بر روایت کوره جناب فاطمة الزهراء حضرتلری  
 کلامش ، بلکه کلان ، - کریمه مکرمه محمدیه نك تعدیل  
 کدورتی ضمنتده بر فداکارلق ابراز ایتمش اولمسی  
 نیتله - خبر موت رسول اللهی تحقیق ایتک اوزره نبی  
 دیناردن بر قادی ن ایدی . لکن بوروایتک ضعیفی آشکاردره

(هند بنت عتبہ) ایله سائر نسوان قریش، میدانی  
 خالی بولنجه شهدانک بورونلرینی، قولاقلرینی کسدکدن  
 باشقه انلردن بیله زیکلر، کردنلقلر ترتیب ایدهرک کویا  
 بوصورتله اهل اسلامه حقارت اجرا ایتمش اولدیلر !

ابو سفیان، احد اتکنده یکی پیدا اولمقده کوردیکی  
 جمعیت اسلامیه بی طاغیتمق نتیله بر فرقه  
 مشرکین ایله باشقه یولدن انلرک اوست طرفنه چیقوب  
 بلاء سماوی کبی اشاغییه طوغری هجوم ایتک ایستدیکی  
 منظور ویاخود مسموع همایون جناب پیغمبری اولمقده  
 طرف اشرف نبویدن : [ یارب ! ارتق اورایه چیقما -  
 سونار ! ] دیه نیاز ایدلمش اولمقده دعاء نبوی مستجاب  
 اولدیغندن ابو سفیانک فرقه سی او باده کی افکارینی  
 اجرایه موفق اوله مامش یعنی هر تقدیر چه لادیسده طاغه  
 طوغری یوقاری چیقماغه بردرلو امکان بوله مامشدر !

ختم حرب = ایشته حضرت پیغمبر صلی علیه

رب البر اقدیمزک تأثیر دعاء عالیله ارتق نائره حرب  
 و قتال سکونتپذیر اولمشدی .

لکن رسول مکر مک صاغ اولوب اولمدیغنده ابو

سفیانتک شبهه سی قالدیغندن حقیقت حاله مطمع اولمق  
ایچون اوچ کره :

— ( ایچکزده محمد [ علیه الصلوة والسلام ]

وارمی )

دیه باغیردینی حالده اوزمان طرف ذیشرف نبویدن :

— ( صوصکنز ! جواب ویرمیکنز ! )

امر همایونی ویرلمش اولدیغندن جواب آله مامش تکرار  
اوچ دفعه :

— ( یا ایچکزده ابن ابی قحافه [ ابو بکر الصدیق ]

وارمی ؟ )

دیه ندا ایتشدرد. فقطینه سس چیقمدیغندن اوچ دفعه ده :

— ( یا عمر بن الخطاب وارمی ؟ )

دیدکدن صوکره یته جواب آله مینجه ارتق دیگر اصحاب  
کرامی صورمغه لزوم کورمدی ! .

زیرا دین مبین اسلامک قیام ودوامنه انلرک برر  
سبب محض اولدقلرینی یقیناً بیلدیکنندن باشقه لرینی  
صورمق کندیسنجه لازم دکلدی .

ابوسفیان، هیچ بر جواب آله مامشدی. دونوب قومنه :

— ( اکر صاغ اولسیدیلر البته جواب ویریرلردی .

اوچی ده فوت اولمش . ارتق ایشده بیتمش ! . )

دیدى . عمر الفاروق رضى الله تعالى عنه حضرتلى ،  
طایانه مدی . دیدى که :

— ( اى اللهمك دشمنی ! یالان سویلیورسك  
صایدیغك ذواتك هپسى ده صاغدر . الله سنى رزیل  
ایتمك ایچون هر اوجنى ده صاقلایور . برکون انلر سنك  
حقكدن كله جكلردر )

ابو سفیان اوزمان ؛ بوکا :

— ( محاربه ، نوبته در . بوکون بدر کونه بدل )  
دیه جواب ویردیکندن حضرت عمر الفاروق رضى الله  
تعالى عنه افندیمز :

— ( اوت اما مزیت حربیه ده مساوی دکلز . زیرا  
بزم مقتوللریمز جنتده ، سزك مقتوللریکز جهنمده در )  
دیمش ابوسفیان دخی عمرک اوجوابنه ، مقابل :

— ( عالی اول هبل ! عزیز اول هبل ! ) [ ۱ ]

سوزیله هبل نام بتلرینه عرض تشکر ایتشدرد !  
مکر ابو سفیان ، احد وقعه سنده سفری تصمیم  
وتصور ایتدیکی زمان هبلک یاننه کیتمش ، و ( کیده -  
یممی ؟ یوقسه کیتمیه یممی ؟ ) دیه قرعه اتدیغی حالد

[ ۱ ] هبل : هانك ضمی ، بانك فتحی ابله اسم صنمدر .

( اوت کیت ! ) طرفی چیقمش اولدیغندن مظفریتی هبلک  
اشارتندن بیلهرک اکا تشکر ایتشدرد !

بعده حضرت عمر الفاروق رضی الله تعالی عنه  
افندیمز ، امر عالی رسالتیناهی ایله [ الله اجل واعلی ]  
دیدیکندن مقابلنده ابو سفیان ده :

— ( بزم عزامز وارده سزک عزیکزیوقدر )

دیه عزی دیدکلری بتلریله اظهار فخر و مباهات ایتدی .  
اکا قارشى [ ۱ ] حضرت فاروق طرفندن :

— ( الله بزم مولا مزرر . سزک مولا کز یوقدر )  
جواب صوابی سردوبیان ایدلدى بونی ایشیدن ابوسفیان  
غایت صمیمانه بر وضعده اوله رق عمری دعوت ایتدی :  
— ( بری کل یا عمر ! )

جناب عمر الفاروق رضی الله عنه افندیمز دخی  
رسول مکرم حضرتلرندن اذن الهرق براز ایلهری یه  
واردی ابوسفیان ، دیدی که :

— « یا عمر ! الله ایچون طوغری سویله ! بز محمد  
[ علیه الصلوة والسلام ] ی قتل ایتدکمی ؟ »  
جناب فاروق رضی الله تعالی عنده ده :

[ ۱ ] عزی : عینک ضمی ، زاء مشددده نك فنجی ایله  
اسم صمندر .



— « یوق واللہ رسول اکرم ، شمدی سنک  
دیدیکک سوزلری ایشیدیور ! »

جوابی ویردی ، ابوسفیان دخی ، بوکا قارشى :

— « بن سکا ابن قمیئہ دن زیادہ اینانیرم »

دیدکدن صوکرہ قومى طرفہ طوغرى کیری دونوب کیتدی !  
لکئن دونه جکی زمان :

— « کلہ جک سنہ سزکلہ بدرده کوروشہلم »

دیدیکندن رسول اکرم صلی اللہ تعالیٰ علیہ وسلم افندیمر  
حضرتلرینک تعلیمی ایله جناب فاروق افندیمرده [ ان  
شاء اللہ ] جوابی ویرمشدی ! .

فرق مشرکین ، بو درجہ ده غالب ومظفر کلشکن  
جناب حق ، انلرک قلبلرینه خوف ورعب براقدیغندن  
ایدی که همان محاربه دن کلیاً فراغت ایتدکدن باشقه کیجه  
اولنجہ جملہ سی ده مکہ یه دونوب رجعت قہقریه ایله  
رجعت ایتدیئر .

سعد بن الربیع — او ائنادہ حضرت نبی ذیشان :

— « عجبا سعد بن الربیع ، نه حالده در ؟ شهدا

اره سندہ میدر ؟ یوقسه مجروحین ایچنده میدر ؟ اکا  
طوغرى اون ایکی قارغی ایله هجوم ایدلدیکنی کوردم ! »

بيورد قدن صوكره ارامق ايچون حضرت « محمد بن مسلمه »  
 رضى الله تعالى عنه حضرتلرينى كوندردى .  
 او حضرت دخى شهدانك اولدينى محله واروب  
 برقاج دفعه :

— « ياسعد ابن الربيع ! »

ديه ندا ايتديكى حالده سس چيقمامش ايكن [ رسول الله  
 بنى سكا كوندردى ياسعد ! نه حالده سكا ؟ ] دىنجه  
 ضعيف بر سسله :

— « بن شهدا اره سنده يم ! »

جوابنك كلديكنى ايشتديكندن او سمته كيدوب ابن  
 ربيع حضرتلرينى شهدا اره سنده كوردى كه : قيانچ ،  
 قارغى ، اوق ايله جسنك هر طرفى دليك دليك اولمش !  
 حالت نزعده ! .

ايشته اويله بر حالده شانلى ابن الربيع ، كوزلرينى  
 آچهرق قارشيسنده ديكيلان « ابن مسلمه » حضرتلرينه :  
 — « رسول الله بندن سلام سويله ! ودى كه :  
 بن جنتك قوقوسنى طويه يورم ! . قومكه دخى بندن  
 سلام سويله دكن صوكره دى كه : كيرپكلريكنز  
 قيملاندنجه پيغمبريكنزه اخلاص خصوصنده عندالله  
 معذور اوله مزسكز »

دیدیکنک عقینده روح پرفتوحارینی تسلیم ایتمشدر .  
 « سعد ابن الربیع » حضرتلری ، عقبهده رسول  
 اکرمه بیعت ایدن کبار اصحاب کرامدن اولوب  
 « اسعد بن زرارہ » حضرتلرندن صوکره انصار کرامک  
 اعظم واشرفی ایدی . یارب ارض عنه !

تأسف — بعده رسول اکرم صلی الله تعالی علیه  
 وسلم حضرتلری شهدایی معاینه بیورور ایکن عم مبا -  
 رکلری جناب حمزه رضی الله عنه حضرتلرینی بورونی ،  
 قولاقلری کسلیمش ، قارنی یارلمش ، جسمی یاره یاره  
 ایدلمش برحالدہ بولدیلر . اندن طولایی اول قدر  
 متأسف ، اول قدر محزون ومکدر اولدیلر که سیدالانام  
 علیه الصلوۃ والسلام افندیمز حضرتلرینک هیچ برزمانده  
 بو مرتبه متأثر اولدینی کورولمامشدی .

حتی روایتہ کوره جناب حمزه یی او هیئتده کورونجه  
 کمال تأثیرله برابر :

— « آه اکر حمزه نک همشیره سی راضی اوله جق  
 اولسیدی حمزه یی دفن ایتمکسزین شو هیئتله براغهرق  
 وجودینی قوشلره ، سباعه ، حشراتہ یدیریردم . تاکه  
 روز حشر وجزاده کمال قدرت الهیہ سنی اظهار ایچون

اونی جانورلرک قرنندن ، قوشلرک قورصاقلرندن چيقا -  
 روب ناصل حشر ايتديکني کفار کوره !  
 بيوردقلري مرويدر .

اول وقت حضرت جبريل امين نازل اوله رق سما -  
 واتده [ حضرت حمزه ، اللهک ورسول اللهک ارسلائي ! ]  
 ديه يازلمش اولديغني خبر ويرمشدر .

شهيد مشاراليهک همشيره سي « صفيه بنت عبدالمطلب »  
 رضی الله تعالی عنها ، قرنداشي حمزه يه باقمق اوزره مدينه دن  
 احده کلشدي .

لکن حمزه نك وجود عاليسي ، همشيره کي فلاکت  
 احواله هرکس دن زياده اجيه جق اولان بر اقبايه  
 کوستريله بيله جک درجه سندن خارج بر صورت وحشيا -  
 نه ده قيبلمش اولديغندن همشيره سي اني کوروب ده  
 قورقماقم ومتاثر اولماقم ايجون حضرت نبي محترم افنديمز ،  
 زبير بن العوام حضرتلرينه خطاباً :

— « يا زبير ! والدهک صفيه بي منع ايت ! تا که  
 حمزه نك جريحه لريني کوروب ده جزع ايتسون ! »  
 بيورملريله حضرت صفيه اکا مقابل :

— « قرنداشمه نه ايدلديکني ايشتمدم . لکن

اوده حق تعالى نك رضاء شريفی او غورنده چوق  
بر شی دكلدر »

دیدیکندن طرف عالی رسالتپناهیدن ینه زیره :

— « یا زیر ! براق باقسون ! »

بیورولمش صفیه دخی باقرق قرنداشیچون استغفار  
ایله مشدر .

غریبدرکه اوکون صباحلین « عبدالله بن جحش »  
ایله تیر انداز شهیر « سعد ابن ابی وقاص » رضی الله  
تعالی عنهما حضرتلری ، بر کناره چکیلوب دعا ایله -  
دکلری صروده « سعد ابن ابی وقاص » رضی الله تعالی  
عنه : [ یارب ! بر بیوک دشمن اوزرینه راست کلوب  
حرب ایدیم وغالب دخی اولهیم ] دیدیکی کبی « عبدالله  
بن جحش » حضرتلری ده اکا آمین او قودقدن صوکره :  
[ یارب ! بن ده بر بیوک دشمنه راست کلوب حرب  
ایدیم . نهایت شهید دخی اولهیم . بورونم ، قولاقلم  
کیلسون ! تا که روز جزاده سن بکا : بورونک ،  
قولاقلرک زده کیلیدی ؟ دینجه بن ده : یارب ! سنک  
ورسولکک یولنده کیلیدی دیهیم ] دیه دعا ایتشدی .  
بوکره شهدای معاینه صرودنده جناب سعد »

عبدالله بن جحشی او ایستدیکي وجه اوزره بورونی ،  
 قولاقلری کسپامش کورونجه تعجب ایدم قالمشدر !  
 انصار کرامدن « ابو جابر » رضی الله تعالی عنه  
 حضرت تلرینک وجودلری دخی اول قدر بر صورت  
 وحشیانه ده پارچه پارچه قیلمشدی که کیم اولدینی یالکنز  
 پارمقلرندن کوچ حال ایله بیلمه بیلدی .

حضرت نبی محترم افندیمز ، شهدایی حال وهیتلری  
 اوزره دفن ایتدیردکن باشقه زمان حیاتلرنده بینلرنده  
 الفت وانسیت موجود اولان شهدایی ایکسی ، اوچی  
 بر قبرده وضع ودفن ایتدیردی .

مثلا حضرت حمزه ابله مشارالیهک همشیره زاده سی ،  
 « عبدالله بن جحش » ، ایکسی بر یرده ؛ كذلك « ابو  
 جابر » ایله قیز قرداشنک زوجی « عمرو بن جموح » و  
 « خارجه بن زید » اوچی بر قبره قونلدیلر . رضوان الله  
 تعالی علیهم اجمعین .

بو محاربه ده کی تلفات مشرکین ، یکرمی ایله اوتوز  
 ارمسند بر مقدار اولدینی حالد شهدانک مقداری -  
 بش التیسی مهاجریندن متباقیسی هپ انصار کرامدن  
 اوله رق - یتمش نفر ایدی . بونلردن باشقه اهل اسلامک  
 بر چوق جریحه داری ده موجود ایدی .



حتی « قتاده بن نعمان » رضی عنه الرحمن حضرت تلو .  
 ینک بر کوزی ، محاربه نك اك بخرانلی بر زماننده  
 چیقارلمش ایدی . قتاده ، کوزی آوجنده اولدینی حالد  
 حضور پر نور رسالته کلدی . فقط کلیشی دعاء برء وعافیت  
 استدعا ایدر بوضع اوزره ایدی ! . افندیمز :

— « یا قتاده ! ایسترسهك یرینه قویه یم . ایسترسهك  
 طور سوزده حق تعالی جنتده کوزیکی سهکا اعاده  
 ایتسون ! »  
 دیمکله قتاده اكا :

— یا رسول الله ! بن حب نساء ایله مألوفم . نسوان .  
 بکا صوکره کور حریف دیر لر »

جوانی ویردیکندن طبیب نسخه کبرای ناسوت  
 اولان حبیب ذیشان خدا افندیمز ، انی مبارك اللریله  
 الوب یرینه قویدقدن صوکره : [ اللهم اكسه جمالاً ]  
 دیه حقنده برئه وعافیتله دعا بیورمش ، اوده اسکیسندن  
 دها صاعلام بر صورتده ایولشمش اولمغله حضرت قتاده ،  
 بالاخره « ذوالعین » دیه تلقیب ایدلمشدی .

صحابه مشارالیهدن مرویدرکه او ، کوزه اونندن او یله  
 بردها آغری کلامشدر !

مؤخرًا مشارالیه قتاده حضرت تلرینک اوغلی ویا

او غلنك اوغلى ، خلفای امویہ دن « عمر بن عبدالعزیز » ك  
حضورینہ كیرد كنده جناب خلیفہ اكا :  
— « سن كیمسك ؟ یا فتی ! »

دیہ صورمش اوده اشبو وقعة غریبه بی تلمیح ایدہ رك :  
انا ابن الذی سالت علی الخلد عینه  
فردت بکف المصطفی احسن الرد  
فعاذت کما كانت لا حسن حالها  
فیا حسنہا عیاً ویا حسنہا اید

دیہ صورت شاعرانده جواب ویرمش بعدہ خلیفہ  
حضر تلی دخی زمان سعادتك حمات اسلامیه سنی یاد  
وتحظر کبی بعض حسیات مشتاقانیه معروض قاله رق :  
— « بمثل هذا فلیتوسل الینا المتوسلون ! »  
دیمشدی !

ایشته بو درجه یه واران هزیمت اسلامیه ، هضم  
وکظمی مشکل بلاء سماوی صورنده عسا کر اسلامیه یه  
من طرف الله ویراش بر تربیه مغنوبه اولدی .  
زیرا افراد عسکریه ایچون هیج بر سر عسکرک  
امور عسکریده ایشنه قاریشقم قطعاً جائز دکلکن  
وجودلری مستقبلمده کی فتوحات عظیمه یه مرهون اولان  
جمعیت عسکریه افرادندن ، سر عسکرلرینک رأی وتد-

بیرینه مداخله ایتمه جرئت ایتمش بولنانلرک - معظمت  
امور آتیهدده هر حالده بصیرتلی واطاعتلی بولنملری  
شمیدن اهون بر صورتده اخطار ایدلمش اولمق اوزره -  
تربیه لرینه لزوم طبیعی حاصل اولمش دیمکدی .

مثلا منام هایون رسالتپناهیده - حقیقتک عینی اولمق  
اوزره - بر درع قوی اوله رق مشاهده بیوردقلری  
مدینه منوره ده طوروبده تدافعی حربی تصمیم ایتمش  
اولان رسول اکرم صلی الله تعالی علیه وسلم افندیمز  
حضرتلرینی تجاوزی حرب وحرکته مجبور ایتملری پک  
بیوک بر خطا اولمغله آتیا ظهوری موعود اولان  
حادثات حربیه ایچون آرا ووامر علیه نبویه قارش  
امثالی غفلدن ابتاه حاصل ایدلمش اولمق حکمتی اسا -  
سنه مبتنی بولنان شو صورتله تربیه ، اسلام علیهنده کی  
اک شدتلی مضرات سیاسیه یی رفع ومنعه خادم بر مخطرده  
سماویه دیمک اولدینی شبهه سز ایدی .

نبی ذیشان افندیمز حضرتلری ، تعبیه جیشده پک  
فوق العاده بر مهارت مخصوصه ایله صفوف عساکر اسلامیه یی  
ترتیب و تعبیه ایله مش و او ترتیب منتظمک محسناتندن  
اوله رق بدایت امرده بردفعه بیله عساکر اعدا بوزولمش

و طرف اهل اسلامدن مظفريت قازانلمش ايكن ركبان  
اعدانك هجومنى منع ايده جك نقطه ده ديگيلان تير انداز  
فرقه اسلاميه سنك ، امر على نبوى به مخالفتله نقطه لرندن  
آيرلملى مظفريتك يكي دن غيب ايدلمسنه واعداده قالان  
هزيمتك بو دفعه اهل اسلامه توجه ايتمسنه سبب اولوب  
كيتمشدر ! كه هنكام محاربه ده مأمور اولدينى بر نقطه ي  
ترك ايتك ، بر عسكر ايچون نه قدر بيوك جنايت اولديغنه  
شو وقعه برهان اوله بيلور .

شهاداي دفن ايتدير دكن صوكره فيخر عالم صلى الله  
تعالى عليه وسلم افنديمى حضرتلى ، مبارك وجه شريفلى  
برخون وقلب پاك تاب ناك هايونلى محزون اولدينى  
حاله دونوب مدينه منوره يه كلدى .

مدينه ده شهدانك اولاد و عياللى و اقرباسى ،  
تأثر اتندن اغلادجه كروه مكروه منافقين ممنوناً كولرلردى !  
حتى احد يولنده « شيخين » موقعدنبرى اتباعيله  
برابر كرى يه دونوب بعض افرادى عزيمت ايله عودت  
اره سنده متردد براقش اولان مشهور رئيس المنافقين « عبدالله  
بن ابى بن سلول » لعين ، بعض اتباعنه خطاباً :

— « اكر سز نم امريمى طوتميد يكنز محاربه ده

حالكز ناصل اولور ایدی ؟ او کیدنلر ده بکا اطاعت  
ایدوب ده قاله ایدیلر قتل اولمز لردی ! «  
دیه نفاقی بسبتون اظهار ایتدیکندن حقنده استعین  
بالله [ الذين قالوا لا خوانهم وقعدوا لو اطاعونا ما قتلوا .  
قل فادرؤا عن انفسکم الموت ان کنتم صادقین ] آیت  
کریمه سی نازل اولمشدی .

اهل اسلامک بومغلویتتی کورن یهود طوائفی ده  
عهدلرینی نقض ایدوب یوز چویر دیلر !  
اهل اسلام ایچنده او آنه دکیں معلوم اولمیان  
منافقینی میدانه چیقارمقده اشبو هزیمتک برباشقه  
فائده سی ده کورولمشدر !

بناءً علیه اوندن او یله دین و اهل اسلامه دوست  
ودشمن اولانلر تمامیه بللی اولدی !

۷

### — غزوه جمراء الاسد —

قریش اردوسی ، احد مظفریتدن صوکره یوزلرینی  
مکه یه چویره رک کیدرکن « عکر مه ابن ابی جهل » یولده  
سائر رؤسای قریشه خطاباً :

— « نه ایش کوردیکز باقیم ! بویه بر بیولک

غالبیتہ مظهر اولمشکن محمدیلری یتیرمدن کری یہ دونہ -  
 بیلدیگز . انلرینہ طوپلانیرلرده اوزرلریمزه کلیرلر .  
 ایوسی بوکه دونوب مدینہ کیدہلم دہ انلری کوکندن محو  
 ایدوب کچہلم . »

دیمش وبوکا مقابل اوله رق « صفوان بن امیه » ده :  
 — « شایدکہ اوس وخزرج قبیله لرندن احده  
 حرب ایتیمان آدملر ، تلف اولان اقربالرینک انتقامنی  
 الملق ایچون حدت ایدوبده بزم علیهمزده حرکت ایدر -  
 لرسه ایش ، بر عکس اولور . شان مظفریت بزده ایکن  
 یرلریمزه کیدہلم »

سوزیلہ عکرمه نك رأینی جرح وابطال ایله مش « ابو  
 سفیان » ایسه بوایکیسنک رأیی بیننده متحیر و متردد  
 اولدینی حالدہ « روجاء » مرحله سنه واردقدن صوکره  
 الآن دوام ایدن مجادله و مناقشه حربیه ، عکرمه نك  
 رأینک ترویج و قبولی ایله نتیجه پذیر اوله رق تکرار مدینہ  
 اوزرینه حرکت صورتی قرارگیر اولمشدی ! .

حالبوکه انلرک یولده کی او مناقشاتنی دوام ایدرکن  
 یانلرنده بولنه رق سوزلرینی دیکله مش اولان ، « عبدالله  
 بن عمرالمزنی » ، اوکیجه نك فرداسی صباح نمازی وقتندن



اول مدينه يه كلوب كافه مسموعاتي رسول ذيشانه افاده ايتشدی .

بعده رسول اکرم افندیمز دخی ایکی مستشار مؤتمنی « ابو بکر الصدیق » ایلہ « عمر الفاروق » رضی اللہ تعالیٰ عنہما حضرت تلرینی نزد همایونلرینہ همان جلب برله « ابن عمر المزنی » نک افاداتی انلره سویله یه رک استشاره بیورمشلر . جناب شیخین دخی احد محاربه سنده اهل اسلامه توجه ایتمش اولان هزیمتدن طولایی مسلمینک ضعیف دوشمدیکنی کوسترمک ایچون همان چیقوب تعقیباته باشلانمی صورتی مناسب کوردیلر . رسول اکرم صلی اللہ تعالیٰ علیہ وسلم افندیمز حضرت تلری صباح نمازینی مسجد شریفلرنده جماعتله ادا بیوردقندن صوکره اصحاب کرامنی دعوت ایتمک اوزره بلال رضی اللہ تعالیٰ عنہ حضرت تلرینی ندایه مأمور بیوردی . او منادی شهر تشعار دخی :

— « دونکی کون احد حربنده بولنان غزات کرام ، شمدی بوراده حاضر اولسون ! دشمنک ارقه سنه دوشیله جکدر »

دیه ندا ایتدی ، عقیب نداده مجروحینه وارنجیه قدر كافه

اصحاب کرام همان حاضر اولدی . مجروحین دخی جریحه -  
لرینی صاروب کلدیله !

حضرت پیغمبر : مدینه منوره امور محافظه سی  
قائم مقامی « عبدالله ابن ام مکتوم » واردوی  
همایون علمدارلق مأموریتی ده حضرت علی کرم الله  
تعالی وجهه افتدیمزه ویرمک التیوز اوتوز قدر احد  
غازیلرله برابر صباح نمازندن صوکره همان ایرکنجه  
مدینه دن سواری اولدینی حالده « حمراء الاسد » نام  
محله واردی .

حمراء الاسد محلی ایسه مدینه یه سکر میل مسا -  
فه سی بعید و مدینه دن « ذوالحلیفه » نام محله کیدن  
یولک صول طرفنده بر یرک اسمیدر حضرت سیدکائنات  
علیه افضل الصلوة واکمل التحیات افتدیمزاردوی همایونلرینی  
بودفعه اوراده قوروب اوطوردی .

ابو معبد خزاعینک اوغلی « معبد » کندینک بر  
مصلحت ذاتیه سیچون مکیه کیدرکن اردوگاه نبوی یه  
اوغرادقن باشقه حضور عالی رسالتپناهی یه ده کله رک  
احده اصحاب کرامندن بعضنک مصاب اولسندن طو -  
لانی رسول اکرمه راسمه تعزیتی ایفا ایتدکن صوکره  
قالقوب مکیه طوغری یولنه دوام ایتشدی .

معبد ، قريش اردوسنك معسكرى بولنان «روحاء»  
 دن بچر كن «ابوسفیان» ايله كوروشديكى صروده ابو  
 سفیان اهل اسلام عسكرندن اوتري اكا :  
 — «كريده نه كوردك ؟»

ديه صورمش اوده :

— «محمد [عليه الصلوة والسلام] ؛ ايله بر بيوك  
 اردو ايله مدينه دن چيقمشده سزه كليوركه عمرمده  
 او قدر بيوك بر جمعيت عسكريه كورمدم . دونكي محـا-  
 ربه ده كريده [مدينه ده] قالمش اولانلرده بوكون حركت  
 ايتمشدر . سنك ايجون بك حدتلى ، شدتلى كورينورلر !  
 جوابنى ويرديكنى ايشيدن ابوسفیان بر طرز مستغربانه ده :  
 — «سن نه سويليورسك ؟ اهل اسلام عسكرنده  
 حر كته مجال قالدیمی ؟»

دينجه معبد اكا :

— «اوراسنى بيلم . انلر شمدى هر حالده حمراء  
 الاسده كلديلر . سز بورادن قالمندن انلك اتلرينك  
 آنلرينى كوره جكسكز !»

جوابنى ويريركن «صفوان ابن اميه» ده :

— «كورديكمزى ؟ ايسته بنم ديديكم شى چيقدى !

هايدى صاوشه لم»

دیه رأینده طبیعی اصرار کو ستردیکندن ترددی شدتلی  
برخوف و خشیتہ منقلب اولان ابوسفیان ، همان اردوسنی  
قالدیروب مکہیہ طوغری قاجمشدر .

معبد . اوزمان هنوز داخل دائرہ دین اسلام اولمق  
شرفیلہ تشرف ایتمامشدیسهده اهل اسلام طرفداری  
اولدیغندن قریش اردوسنی بو صورتله قورقودوب  
صاوشدیردقدن باشقه کیفیتی ده مخصوص بر آدم واسطه سیله  
حضرت نبی ذیشانہ عرض و اخبار ایتمشدی !

بو سفردہ قریش اردوسندن کرییه قالمش اولان  
شاعر هاجی « ابو غرة الجمحی » ایله بنی امیه دن  
« معاویه بن مغیره » نام ایکی شخص اهل اسلام  
النه دوشمشدر .

ابو غرة ، ذاتاً اهل اسلامه عداوتی ، دین مبین  
واهل اسلام علیهنده کی شدت لسان شاعرانه سی یعنی  
هجویاتی ایله معلوم ومبرهن بر حریف یاوه کو اولوب  
حتی « فیما بعد اهل و دین اسلام علیهنده بولنماق  
شرطیله بدر اسارتنده » مجاناً اطلاق بیورلمش ایکن  
بو دفعه قریشک ترتیبات و تجهیزات عسکریه سنجه ابراز  
معاونت حمیت پرورانه ! فکریله عربانی حربہ تشویق  
بولنده کی غیرتی ایله عهد و شرطنی نقض و فسخ ایتمش

دیمک اولدیغدن ارتق - اقدام و همت شاعرانه - سنک  
مکافاتی ! اولمق اوزره - ازاله و جودینه بین الاسلام  
لزوم قطعی تحقق اتمشدی .

شاعر ، وار قوت فصاحت و بلاغتتی اغزینه و دیلنک  
اوجنه و یرره رک بر چوق بلیغ سوزلر سوزیله مش و او  
صورتله یقه نی قولای قورتارمق ایسته مش ایسه ده لسان  
فصیحک قورتارم بیله جکی حددن ده ها اوتیه کنه دینی  
سیئات سابقه شاعرانه سیله اتوب کچیر مش اولدیغدن  
سوزلرینک هیچ تأثیری بیله اولمیه رق هر ایکسی ده قتل  
و اعدام ایدلایلر .

حضرت رسول خدا افندیمر ، اردوگاه سعادت لرنده  
اوج و علی روایه بش کون توقف بیوردقدن صوکره  
جمعه کونی اردوی همایونلریله برابر مدینه منوره یه عودت  
بیورمشلردر .

۸

— ام المساکین —

و

( زینب بنت خزیمه رضی الله عنها )

شهداء احدثن « عبدالله بن جحش » رضی الله تعالی

عنه حضرت تریزک زوجہ سی « زینب بنت خزیمہ بن الحارث » رضی اللہ تعالیٰ عنہا بی رسول اللہ صلی اللہ تعالیٰ علیہ وسلم افندیز ، نکاحا ملشدرد . مشارالہا ، احدثہ زوجتک وقوع شہادتیلہ طول قلمشدی .

کندیسنک دائما فقرا ومساکینی اطعام واقدارہ چالیشیر خیر پرور بر قادیں اولمی ، طرف اشرف رسالتپناہیدن [ ام المساکین ] کنیہ سیلہ مکنیہ بیورلمسنہ سبب اولمشدی .

لکن زمان ازدواجدن بر ایکی ای صوکرہ وفات ایتشدرد . رضی اللہ تعالیٰ عنہا !

۹

### — ولادت جناب حسن المجتبیٰ —

بو ائنادہ جناب حسن المجتبیٰ بن علی المرتضیٰ کرم اللہ تعالیٰ وجہہما حضرت تری فاطمۃ الزہراء رضی اللہ تعالیٰ عنہا حضرت تریندن تولد ایتدیسهده هانکی آیدہ تولد ایتدیکی مختلفدر . بعض تواریخ ، رمضان شریف اواسطندہ بعضی ده شوالده تولد لری یازیورلر سدهده هر حالده اوچنجی سال هجری نبویده تولد لری متفقدرد .

مشارالہک صورت وقوع ولادت لری بحثی صحیفہ



رضویه دن نقلاً « حدیقه السعداء » ده بسط و بیان  
ایدن جناب فضولینک مقالہ سی بروجہ آتی خلاصہ  
درج اولم شدرد :

« اسماء بنت عمیس » ، زمان ولادت حضرت مجتبی -  
ده قابلہ وظیفہ سنی ایفا ایتمکده ایدی . اول کاشن ولا -  
یتک حدیقه عفتندہ نشو و نما بولوب فضای وجودہ  
کلدیکنی ایشیدن رسول ذیشان افندمز حضرت فطمہ -  
نک خانہ سنی تشریف برلہ مولود مکرمنی کورمکہ اولان  
خواهش رسالتناہیلرینی اظهار بیورمش - قابلہ  
بولسان - « اسماء » دخی او حضرت مجتبی نی کهربائی  
بر یز ایله صار دقدن صوکرہ کتیروب رسول اکرم افندمزہ  
تقدیم ایتک ایستہ مشدر فقط نبی ذیشان :

— « یا اسماء ! سکا دیمدمی کہ اولادیمہ صاری  
خرقه صارمه ! »

بیوردقلرندن کافوری رنگ بر باشقه خرقہ صاروب بعدہ  
تقدیم ایتشدرد .

حضرت پیغمبر : او مولود نجیبک نہ اسم ایله  
تسمیہ ایدلمسی مناسب اولہ جغنی جناب علی کرم الله وجهہ دن  
سؤال بیوردیلر اوده :

— « یا رسول الله ! اولادیمی تسمیہ ده سزہ تقدم

ایتم . لیکن مساعده علیه کز اولور ایسه « حرب » یاخود  
« حمزه » دیه تسمیه ایدرم »

دیش بوکا جوابده رسول اکرم افندی مزده :

— « حکم خدا هر شیدن مقدمدر »

بیورورکن جبرائیل علیه السلام نازل اوله رق :

— « یا رسول الله ! علی سکا ، موسایه هارون منزله -

سمندهدر . جناب علینک اوغلنی ، هارونک اوغلنک

حسن اولان اسمیله تسمیه ایت ! »

دیدیکندن او اسم شریف ایله تسمیه ایدلمشدر .

۱۰

### — ❖ تحریم خمر ❖ —

شرب خمرک زمان تحریمنی بعض توارخ ، تاریخ  
هجرت نبویهک دردنجی سمنه سمنده اولوق اوزره  
کوستریور ایسهده اکثریت — ایشته بو — سنه ثالثهده  
اولمقدهدر .

خمر حقنده ایکی درلونهی الهی ، وقوع بولمشدر .  
بری : حالت سکرده نمازه شروع اولنماسی حقندهکی  
استعین بالله [ یا ایها الذین امنوا لاتقربوا الصلوة وانتم سکاری  
حتى تعلموا ما تقولون . . . ] آیت کریمهسی !

دیگری : مطلقاً شرب خمری نهی و تحریم حقند  
استعین بالله [ یا ایها الذین امنوا انما الخمر والمیسر والانصاب  
والازلام رجس من عمل الشیطان فاجتنبوه لعلکم  
تفلحون ] آیت کریمه سی !

دفعه اولیده نازل اولان آیت کریمه نیک سبب نزولنده  
ایکی وجه اوزره روایت وارد :

برنجی روایت : کبار اصحاب کرامدن « عبدالرحمن  
بن عوف » رضی الله تعالی عنه حضرتلری ، بر بیوجک  
ضیافت ترتیب و اوضیافته افاضل اصحابدن بر جمعیتی  
دعوت ایدمک اکل طعام و شرب خمردن صوکره  
حاصل اولان سکر حالیه قلوب اقشام نمازینی جماعه  
ادایه باشلادقلرنده مقتدرلی بولنان ذاتک نمازده اوقو .  
دینی « قل یا ایها الکافرون » سوره شریفه سنی [ . . .  
اعبد ما تعبدون ولا انتم عابدون ما عبد ] دیه پک فاحش  
غلط اوله رق اوقومسیدر .

بو آیت کریمه نیک نزولندن صوکره شرب خمره  
اشتهاسی اولانلر ، کوندوز . ایچمیوب انجق صالات  
عشایی ادادن صوکره ایچرده اویقویه اوپله یاتارلردی  
صبح اولنجهیه دکین ده سکر حالی کچردی . سکاری اوله رق  
بمازه شروع ایتمه محل قلماز ایدی .

بو حال ، اصحاب کرام بیننده برمدت دوام آیت دیسه ده  
جناب عمر الفاروق رضی الله تعالی عنه حضرت قرینک -  
روایتہ کورہ - بالآخرہ : « اللهم ! ان الخمر تضر  
بالعقول والاموال . فانزل امرک فیہا » دیہ دعا بیوردقلری  
کیجہ نک ص - باخندہ قمارک و شرب خمرک مطلقاً تحریمی  
حقندہ کی آیت کریمہ نازل اولمشدر .

ایکنجی روایت - شرب خمرک حرام اولمدینی  
زمانلردہ بعض اصحاب کرام دخی خمری ایچہرک  
سکارا اولدقلری خالدہ کلیر حضرت فخر کائنات علیہ  
افضل الصلوٰۃ والتسلیمات افندیملزہ برابر طوروب  
نماز قیلار اولدقلرندن حق تعالی ؛ شرب خمر و قمار  
سورۃ المائدہ ده کی او آیت کریمہ بی انزال ایله کلیاً و مطلقاً  
نہی و تحریم بیورمشدر .



## فصل سابع

### دردنجی سنه هجریه و ذابعی

وقعه بئر معونه . سفیان هذیلنک قتل . بمث الرجیع .  
غزوه بنی نضیر . سلام ابن ابی الحقیقک قتل . غزوه ذات  
الرقاع . ولادت حسین . ام سلمه . بدر منبری

۱

### ○ وقعه بئر معونه ○

روایتہ کورہ غزوه احددن درت ویاخود بش ماہ  
صوکرہ یعنی دردنجی سنه هجریہ اوائلندہ صفردہ ایدی  
برکون « عامر بن صعصعه » قبیلہ سندن و مشایخ نجددن  
« ابو براء » کنیہ سسیلہ مکنی [ عامر بن مالک بن جعفر  
ملاعب الاسنہ » نام کیمسہ مدینہ منورہ بہ بعض ہدایای  
امیرانہ ایلہ کلہ رک حامل اولدیفی ہدایاسنی ذات عالی رسا -  
لتپناہی بہ عرض و تقدیم ایتشدی .

لیکن طرف اشرف پیغمبریدن قبولہ رغبت کوستریلہ -  
میوب انحقق : « قبول دین اسلام ایتدیکنک خالدہ



هدیه کی قبول ایتم « دیه نجدی \* مرقوم دین مین اسلامه  
دعوت بیورلدیغی صرهدده اکا قارشى عامر ، جوابده :  
— « بن ده قبول ایدرم . فقط نجد حوالیسنه  
اصحابکدن برقاج ذوات کوندردلیکی حالدده حوالی  
نجدیه ده کی عربلر شرف اسلام ایله مشرف اولدجقلر »  
سوزینی درمیان ایتمکله حضرت پیغمبر :

— « انی اخاف علیهم اهل نجد = قورقرم که اصحابم  
حقننده غدیری روا کوزمک ایستلر »  
دیه اظهار تردد بیورلدیغی متعاقب عامر دخی :  
— « نجدده کلدکارنده بنم عهد وامانم الله کیرمش  
اولورلر انلره کیمسه برشی یاپه ماز »  
سوزیله تأمینات ویرمشدی .

ایشته بونک اوزرینه اهل نجدده تعالیم قرآن کریم  
ایچون اعظام انصار کرامدن [ منذر بن عمرو الساعدی ]  
رضی الله تعالی عنه حضرت تدرینک ریاستی التندده  
یتمش — وعلى رواية قرق — نفر قراء کرامدن مرکب  
بر هیئت مخصوصه یی او تاریخده نجدده اعزام بیوردی که  
ویس هیئت بولنان جناب منذرک التندده « ابو براء » ک

برادر زاده سی « عامر بن الطفیل » [ ۱ ] نامه خطاباً  
برده مکتوب هایون نبوی وار ایدی .

هیئت محترمه مذکوره ایچنده عتقای صدیقیه دن  
« عامر بن فهیره » رضی الله تعالی عنه حضرتلری دخی  
موجود ایدی .

هیئت ، « مطلب سلیمی » نامنده کی رهبرلریله قالقوب  
مدینه منوره یه درت قوناق مسافه اوزاق بولنان « بئرمعونه »  
نام محله واردی .

او محله جناب « منذر » نامه هایونی « انس بن  
مالک » رضی الله عنه حضرتلرینک دایسی [ حرام بن  
ملحان ] رضی عنه الرحمن حضرتلرینک الیله عامر بن  
الطفیله کوندردی .

ملعون عامر ایسه نامه هایونی او قویوب نه یازلدیغنی  
اکلامق عادتیه رعایت ایتمدن عونیه سندن برینه ایما ایله  
امر ایدهرک جناب « حرام » حضرتلرینی همان اوروب

[ ۱ ] بوادی اداره اسلامییه مدائن کندی اداره سنده  
قالق یاخود افندیزدن صوکره خلافت کندیسنه ترک وتوجیه  
اولئق شرطلری قبول ایدلدیکی تقدیرده غطفان عسکریه  
محاربه یه قیام ایده جکئی مرقوم بیان ایدهرک رسالتناه افندیزه  
شدید التهید برنوطه ویرمشدی ! .

اولدیرتدیرمك دنائت وحشیانه سنی ارتکاب ایتدکدن  
باشقه کریده کی هیئت مبعوثة قرا علمینده دخی هجوم ایتمك  
ایچون کندی قوم و قبیله سی بولنان « بنی عامر » ی اولای  
دعوت ایتدیکی حالدہ عامریلر :

— « بز ابو برانك اهل اسلامه قارشى یابدیغی عهد

وامانى بوزمه میز »

حیده اجابتدن امتناع ایتمکله باشقه قبیله لره امر اجمعه مجبور قاله رق  
حوکره بنی سلیمدن « عصیه ، رعل ، ذکوان » قبیله لرینی  
طوپالایوب بئر معونه یه کیتمش واو هیئت قرایه بغته  
هجوم و جمله سنی شهید ایتمشدر :

جناب « حرام » ك بری طوپال اولمق اوزره ایکی ده  
رفیقی وار ایدی . طوپال اولان بنی دینار بن نجاردن  
« کعب بن زید » ، دیکری ده « منذر بن محمد » ایدی .  
رضی الله تعالی عنهما .

حرام ، نامه همایون پیغمبری بی تسلیم ایتمك اوزره  
عامر بن طفیلک اولدیغی سمته طوغری کیدرکن ایکی  
رفیقه :

— « سزبندن پك اوزاق طور میگز ! بن طوغریدن  
طوغری یه بنی عامره کیدرم . اکر بکا امان ویریرلرسه

سزده يانمه كليكنز ! والا ديكر ارقداشليمزه طوغرى  
قاجيكنز !  
ديه تنيه ايتمشدى .

« حرام » ، بنى عامره واردى . انلره ديدى :  
— « طرف رسول الله دن رسالتله مأمورم . بكا امان  
ويريرميسكنز . تاكه رسالتمى ايفاوتبليغ ايدميم ،  
اوزمان انك ارقه طرفندن كيزليجه بر آدم — وعلى رواية  
ابن الطفيل لعين — ياننه صوقوله رق سونكوي شدتله طيامش  
واوشدته قارشى جناب « حرام » اولاً [ الله اكبر فزت ] ديه رك  
بعده سونكو ياره سندن دو كي لان قانلرينى اليه ، آوجيله  
طوتوب باشنه يوزينه سورد كدن صوكرده [ ورب الكعبة ]  
سويله شدر بو سوز ايله حرام ، رتبه شهادته واصل  
اولوب فوز ونجوات بولديغنى دشمنلره قارشى مع القسم  
بيان ايدور ايدى ! .

ايكى رفيقلىر ، انك اوغرا دينى حالى كورونجه  
قورتلمق ايجون همان دونوب رفقاسنه طوغرى  
قاجه يي ايتديلر .

لكن اياغى صاغلام اولان « منذر بن محمد » رضى الله  
عنه حضرتلى كفارلندن قورتيله مدى . طوپال اولان .

« کعب بن زید » ایسه هر نعلسه خلاص بولوب برطاغ  
دیه سنده قالدی ! . .

ابن الطفیل، ایکی صحابی، نامداری او یله برحاله قویوب  
کچد کدن صوکره هیچ طور مدن هیئت مبعوثه بی ده عموماً  
شهید ایتدی !!

انجق ایچلرنده « عمرو ابن امیه الضمری » رضی الله  
تعالی عنه حضرتلری ایله دیگر بر صحابه اوزمان دوه -  
لری طاعده اوتلاده طور دقلری جهته مقاتله میداننده  
بولنمقدن مصون قالمشار .

وقعه دن صوکره موقع قتاله طوغری دونوب ده  
وقوعاته آگاه اولدقلرنده جناب « عمرو ابن امیه »  
حضرتلرینه رفیقی :  
— « نه یابه لم ؟ »

دیه صورمش عمرو دخی :

— « وقوعاتی همان رسول الله عرض ایده لم »

جوانی ویرمکله او بری .

— « ارتق بن منذر بن عمروک شهید اولدینی

یردن ایریلوب ده صاغ دونمکی ایسته مم »

دیمسیله برابر همان سل سیف ایدهرک اعدا ایله

مقاتله به کیریشمش ونهایت احراز مرتبه شهادت دخی  
ایتمشدر .

شهید مشارالیهک احراز شهادت ایله دیکنه مقابل  
قبول اسارت ایتمش اولان « عمرو » ، کندیسنگ « بنی  
مضر » دن اولدیغنی ابن طفیل به بیلدیرنجه « عامری » لرده  
ذاتاً بنی مضر نسلاندن اولدقلری حسیبله بیلرنده کی  
قربت نسبیله رعایه ملعون ابن طفیل ، جناب عمروی  
سالماً آزاد ایتمشدر .

هیئت مبعوثة محترمه نك عموماً شهید و « ابن امیه »  
حضرتلرینك ده اسیر دوشوب ده انك ابن طفیل طرفندن  
مظهر امان ایدلیدی ائنده لعین اکا :  
— « رفیققلریکی طانیرمیسنگ ؟ »

دیمش اوده :

— « نعم طانیرم »

دیه جواب ویرمش اولمغله ابن طفیل ، معینه او حضرتنی  
الوب شهدایی برابرکز مشلر . کز لرکن انلرکیم اولدقلرینی  
ملعون عامر ابن الطفیل صورده یور ایدی .

عتقای صدیقیه دن « عامر بن فهیره » رضی الله  
تعالی عنه حضرتلرینه راست کلدکلرنده ابن طفیل ،  
شهید مشارالیهک جسدینه اشارتله :



— « بو کیمدر ؟ »

دیه سوروب عمرودن :

— « عامر بن فهیره »

جوانی الدی . انک اوزرینه ابن الطفیل :

— « یا او ، قتل ایدلدکن صوکره بن انک هوایه

قالدیریلوبده بعده ینه یره ایندیرلدیکنی کوردم . حتی

انکله ارض اراسندنبری افق سمایی کوردم »

دیمشدی !

حضرت رسول اکرم صلی الله تعالی علیه وسلم

افندیمر حضرتلری بو وقعه فجیعهدن خبردار اولدقده

صورت فوق العاده متأثر اوله رق : « بو ایش ، ابو

برانک ایشیدر . بن ایسته میهرک انک ابرامیه جواز

ویرمش باشلامشدم » سوزیله اظهار ندامت وتأسف

بیوردیلر .

حتی اصحاب الرجیع ایله بو وقعه نک خبرینی برکیجه ده

المش اولملری حسبله تأثر فوق العاده لرندن طولانی

ذات همایونلرینه شدتلی برحما عارض اولمش وطرف عالی

پیغمبریدن او حمایه خطاباً :

— « کیت ! رعل ، ذکوان ، عصیه [ ۱ ] کبی  
اللهه ورسول الله عصیان ایدنلره ! . »  
دیه امر دخی بیورلمشدی .

ابو براء عامر ایسه حضرت نبی ذیشان افندیمنزک  
بو درجدهده متأسفانه و متأثرانه بر کلامده بولندقلرینی  
ایشتمکله اندن کندیسنه بر تأثر حاصل اوله رق کدرندن  
قوت اولمشدر .

لکن عهد و امانک اولوجهله حکمسز قالمش  
اولمسندن طولای عادت صرب اوزره کندی خاندانک  
ناموسی لکه لنمشدر .

حتی اوغلی « ربیعہ بن ابی براء عامر » ، بو وفاسز-  
لق لکه سنی عمزاده سی ابن طفیل لعینک قانیله ییقایوب  
تمیزله مک اوزره ملعونک اعدامنه بر وقت تشبث  
بیله ایتمشدی .

حضرت نبی محترم افندیمنز ، ابن طفیلک اشبو  
اهانتندن طولای کندیسنه بد دما ایتدکدن باشقه بر آی  
قدر مدت هر صباح [ عصیه ، رعل ، ذکوان ] قبیلہ -

[ ۱ ] رعل : رانک کسری عینک سکونیلہ ، و ذکوان :  
ذال معجمه ناک فتحی کافک سکونیلہ وعصیه : عینک ضمی یاء  
مشده ناک فتحی ایله در .

لرینه ده بد دعا ایتمش اولدیغندن ارمدن چوق زمان  
 کچمکسزین « عامر بن طفیل » — « عامر بن صعصعه نك »  
 قیز قرنداشی مره نك زوجہ سی « سلول بنت ذهل  
 بن شیبان » ك خانه سنده — چیقاردیغی یومورجہ دن  
 [ ۱ ] وقبائل مذکورہ نك ده یدی یوز مقدار افرادی  
 طاعون و وباء ، قحط و غلاء و حما کبی بایات تاثیر یله هلاک  
 اولمشدر . عامر ك چیقاردیغی طاعون ، قولانك دینده  
 بیوك بر [ غده ] شیش ایدی ! .

— ۲ —

### — سفيان هذلي نك قتل —

دين و اهل اسلام عليهنده شديداً حرکت ايدنلرك  
 بری ده « سفيان بن عبدالله بن نبيح الهذلي » ایدی .  
 حتی بر اراق اهل اسلام عليهنده حرکت ایچون بعض  
 تداركات کورمکده ایدوکی مسموع عالی جناب رسالتنا .

[ ۱ ] عامر بن طفيلك اونبرنجی سنه هجري ده وقوع  
 وقایق روایات تاریخیه دندر . لکن قبائل مرقومه ایچنده  
 اولوجهله حکمفرما اولمش بولنان شو حادثه نك هانکی تاریخده  
 ایدوکنی تعیین ایدر هیچ بر اثره تصادف ایله دیکمی در خاطر  
 ایدمورم .

هی اولمغله مرقومك قتلنه اصحاب كرامدن ( عبدالله بن انيس ) [ ۱ ] رضى الله تعالى عنه حضرتلرني مأموراً عرفت مقابله سنده محل اقامتي بولنان « نخله » ياخود « صرنه » يه اسرا بيورمشلردى كه مشاراليهك مدينه دن شو صورتله انفكاكى شهر محرم بشنيجي كونده ايدى !  
 حين حركت وانفكا كنده افنديمز ، بعض وصاياه بولنمشلردر ديديلر كه :

— « يا عبدالله ! سفيان ، عادت عرب اوزره نسبكن سوال ايدرسه خزاعه دن اولديغكى سويله ! »  
 عبدالله :

— « يا رسول الله ! بن اني بيلوب ده تشخيص ايدهم !  
 ناصل قتل ايدم بيلهيم ؟ »

ديدى . افنديمز جواب ويرديلر :  
 — « علامتي شوكه : سن اني كورديكك زمان هيتندن قورقارسك ! »

عبدالله ايسه كيمسه دن قورقاز ايدى . غايله جسور برذات ايدى . دير ايدى كه :

[ كيتدم . بر اقشام وقتيجغزنده اچلرينه توجه

[ ۱ ] انيس : همزه نك ضمى ، نونك فتحي ، يانك سكو .  
 نيلاه اسم مصفردر .

ایتدم . وقت صلاة حلول ایتدی . بنی بیایرلر دیه نماز  
قیلمقدن قورقوب انجق ماشیاً ایما ایله قیلدم . بعده بر  
راعیه یه راست کلدیم . دیدم که :

— « سن کیمک چوبانیسک ؟ »

راعیه جواب ویردی :

— « سفیان بن عبداللهک ! »

— « سفیان شمدی نرده ؟ »

— « ایشته کلیور ! »

زمان کچماشمدی . عصاسنه طایانه طایانه چیقه کلدی .  
بن انی کوردیکم زمان شدت هیتی سبیلله خوفدن  
کندیمی هم تقاطر عرق یاخود تقاطر بول ایدر همده  
دیتیر بر حالدده بولاشدم ! سلام ویردی . نسبدن ده  
صوردی . بن :

— « خزاعه دنم [ دیگر قوله کوره ] فی الاصل

جهینه دنم شمدی خزاعه یه دخيلم

دیدم . بعده سوزمده دوام ایتدم :

— جئت لاتصرك واكثرک واکون معک »

بز بویله قونوشیورایدک . سفیان ، سود کتیرمسنی راعیه سنه

امر ایتدی . راعیه ، سودی کتوروب بکا ویردی .

بنده براز مص ایدوب سفیانه ویردم . سفیان ، همان

دوه کبی ایچمکه باشلادی . بورونی سودک کوپوکنده  
یاخود قایماغنده نهان اولور اولمز قیلنجله بویینی اوروب  
کله سنی دوشوردم !  
قول آخرده :

سفیان ایله موانست و اظهار مخالفتدن صوکره صحبت  
ایده رک بر مقدار مشی و حرکت ایتدم . حتی مرقوم  
صحبتدن محظوظ دخی اولدی . صوکره بن کویا  
ایاغمک دیکندن اینجندیکی بهانه سیله تأخره باشلادم .  
او ایسه : « الحق یا اخا جهینه ! » دیه التحاق واتصالمه  
ابرام ایدردی . بنده تدریج ایله کیری قالیورایدم اوده بنی  
کیری برامغه باشلامشدی . ایشته او یله برحالدن بالاستفا-  
ده همان ارقه سندنبری بویینی قیلنجمله اوروب طاغه  
قاجدم بر مغاره ده کیزلندم .

مرقومک عشیرتی بنی شدتله تعقیب و تحری ایدیور-  
لردی . معقبردن بری کلدی النده بر طاغارجق ایله  
نعلینی وار ایدی . مغارمک قاپوسی اوکنه قریب اوطو-  
روب بول ایله دی . باب غارده بر عنکبوت - معجزه  
مخصوصه احمدیه دن اولمق اوزره - نسج بیوت ایتمشدی .  
او آدمده بو حالتی کورونجه داخل غاری تحری یه لزوم



کورمدن کیری به دوندی . فقط . دوزرکن ط-ا غار جفی  
ایله نعلنی اونودوب براقدی . بن هان انلری الدم .  
یوله دوشدم . کیجه یول الیر . کوندوز صاقلانیر ایدم .  
مدینه یه یتشدم رسول ذیشان افندیمره مسجد شریفلرنده  
ملاقی اولدم . بنی کوردکلرنده : [ افلاح الوجه ] بیوردیلر .  
بنده : [ وجهک یا رسول الله ! ] دیدکدن صوکره ماهو  
الواقعی عرض واعلام ایتدم .

موفقیتی تقدیر ضمننده بکا برعصا احسان و :  
— « تخصر بهذه یا ابن انیس فی الجنة ! فان المتخصرین  
فی الجنة قليل »

دیه فرمان بیوردیلر [ صحابی مشارالیه ، مدینه منوره دن انفکا کندن اون  
سکز کون صوکره محرم یکر می اوچنجی جمعه ایرته می  
کونی معاودت و مواصلت ایتشدی .

۶

— بعث الرجیع —

شهر صفرده ایدی که مکه مکرمه ایله مدینه منوره  
اره سنده کی عربلرک [ بنی هون ] قبيله سندن متفرع

عضل ، [ ۱ ] قاره - عشرتارندن برقاج شخص -  
ابو سفيانك تحريكات وتسويلاقي تاثيريله - حضور  
رسول الله كلوب :

— « يا رسول الله ! بزده دين اسلامي قبول ايتمش  
كيمسه لر واردر . ليكن آداب اسلاميه بي لايقيه  
بيلمورلر . اصحابكدن برقاج ذاتي كوندرسه كده انلره  
تعليم ايتسه ! »

ديملري اوزرينه رسول مكرم صلى الله تعالى عليه وسلم  
افنديمز اصحاب كراملرندن [ عاصم بن ثابت ابن ابي اقلح ]  
رضي الله تعالى عنه حضرتلرينك رياستي التنده « مرند  
ابن ابي مرند الغنوي ، خالد ابن ابي بكير الليثي ، خبيب  
بن عدي ، زيد بن الدثنه [ ۲ ] ، عبدالله بن طارق ،  
معتب بن عبيد البلوي » رضوان الله تعالى عليهم اجمعين  
حضراتندن مركب بر جماعت اسلاميه بي عشائر مذكو -  
ره نك ايجريلرينه طوغري بعث بيورمشدي .

وقته كه جمعيت مذكوره اسلاميه مكه مكرمه ايله

[ ۱ ] عضل : فتحتين ايله قبيله اسميدر .

[ ۲ ] خبيب : خاء معجمه نك ضمي بانك فتحي بانك سكو -

نيله اسم مصغر در . دثنه : دالك فتحي ثاء مثلثه نك كسريله در .

عسفان اره سنده « رجيع » نامنده کي قويويه يا خود [ هده =  
 هدأة ] ( ۱ ) نام موضعه مواصلت ايتدی . مواصلت  
 مذ کوره دن خبردار اولان عضل ، قاره قبيله لری سفيان بن عبد الله  
 بن نبيح الهذلي نك انتقامني اهل اسلام دن المق اوزره  
 « بنی هذیل » دن بر طاقم ايله بالاتفاق يوز كشي اولد قارى  
 حالده « رجيع » محلنده هيئت مبعوثيه قارشى كلوب -  
 جماعت مذ كوره بي همان عموماً اخذ وتوقيف ايتمي  
 ايسته مشلردر :

فرقة مشرکين ، هيئتك قونديغي بر منزله كوريان  
 خورما چكر دكندن استدلالاً ايز واسطه سيله يتشديلر !  
 لكن جناب عاصمك فرقه سي ، كيفيتدن خبرداد  
 اولنجه طاغده بر پناه محكم اتخاذايدهرك انده تحصن  
 ايتمشدر .

او زمانه دكين تحصنكا هليز نك هر طرفي قوشاتمش  
 اولان كفار ، هيئت متحصنه يه :

— « بزه تسليم اولانلر جانلرندن اميندرلر »

خبريني كوندر مشهده عاصم ، اكا مقابل اوله رق :

( ۱ ) هدأة : فتحات ايله وده : هانك ودال مشدده نك  
 فتحه لريله اسندر .

— « بن کافر لرہ تسلیم اولہ نم »

دید بدن و :

— « یارب ! بن جہد و جہادم ایلہ سنک دینکی  
حمایہ ایتدم . سن دخی بنم لجمی ایادی کفارہ دوشمکدن  
حمایہ ونیکی نزدن خبردار ایت ! »  
دیہ دعا بیوردقدن صوکرہ صورت شدیدہ مدافعہ  
قالقشوب نہایت شہید اولمشدر .

رتبہ شہادتق احرازده « خالد » ایلہ « مرشد » دخی  
مشارالیمہ پیراولدیلر . رضوان اللہ تعالیٰ علیہم اجمعین !  
دیگر رفقا ایسہ ارتق دست اسارتہ کچمکہ بالضرورہ  
مجبور قالہرق یرلرندبری کفارہ طوغری ایندیلر .  
حالبوکہ استیمان ایدنلرہ امنیت ویرمش اولان کفارہ  
مسلمینک دہاچین نزولارندہ اللرنده کی یایلرینک اوتارینی  
چوزہ رک انلرہ اللرینی صیقی صیقیہ باغلامشدر .

ایشته او درلو امانک صورت مشکلاتی کورمش  
اولانلرک ایچندہ غیرتلی « عبداللہ بن طارق » حضرتلری  
امانہ قارشئ الارک اویلہ بر صورت شدیدہ وقاہرہ دمہ  
باغلانندیغنه تعریضاً : « ایشته بزم اولکی غدر ! . »  
دبسیلہ برابر ککندینی تسلیم ایتمکدن ارتق امتناع

ایستدیکندن کفارک انی تسلیم نفسه مجبور ایتمک حقنده کی  
هر درلو جهد واقدماتی ثمره سز قالدیغیچون.  
مشارالیهی اوراده اوروب همان شهید ایتمش لر در !  
رضی الله تعالی عنه !

« طبقات ابن سعد » ک بیاننه کوره :

بقیة النبال اولان هراوچ صحابی صمیم صیقی باغلانوب  
مکه یه کتیریلیرورلر . ایدی « مرالظهران » . مواصلت  
اولندیغی صروده ایچلرندن باغنی چوزه بیلمش اولان  
« عبدالله بن طارق » حضرتلری همان قیامتچی چکهرک  
فراره باشلادیغندن کفار ، مشارالیهی طاش ایله شهید  
ایتمش لر در . قبرمنوری ، « مرالظهران » ددر .

« خیب » ایله « زید بن الدثنه » رضی الله تعالی عنهما ،  
حضرتلری ایسه مکه یه کتیریلوب انده صاتلدیلر .

بدر غزوه سنده خیب طرفندن باباسی قتل ایدلمش  
بولنان « حرث بن عامر بن نوفل » ک اوغلاری ؛ کویا  
مقتول بابالرینک انتقامنی الیور امیدیه « عقبه بن الحرث »  
نام لعین ، خیب حضرتلرینی الوب شهید ایتدی .

فقط حافظ دمیاطینک بومه سئله یه اعتراض ایدهرک :

— « خیب بن عدینک بدرده حرث بن عامری

قتل ایتدیکنی اهل مغازیدن هیچ بری ذکر ایتماشدر .  
 انجق حرث بن عامری قتل ایدن ، خیب بن اساف  
 ایدوکنی خیب بن اساف ایسه خزر جدن اولوب خیب  
 بن عدینک اوسدن بولندیغنی ذکر ایدر لر »

دیدیکنی علامه عینی عمدة القاریلرنده یازمشدر .  
 دیگر روایت کوره مشارالیهی الوبده شهید ایدن  
 عقبه دکل ! بلکه « حجیر یاخود حجر بن کعب » یاخود  
 « حجیر بن ابی اهاب التیمی » نام مشرک ایدی .

« زید بن الدثنه » حضرتلرینی ده « صفوان بن  
 امیه » صاتون الهرق کولهسی نسطاس الیه شهید  
 ایتمشدر . رضی الله تعالی عنه !

جناب خیب ، حرثک اوغللری یاننده بر مدت  
 زنجیر بند بر حالد قالمشدی . مشرکین قریش عندده  
 رعایتی لازم کلان اشهر حرم چیقوبده مشارالیهک  
 قتلنده بأس قلمدیغنی تسلیم ایدلدیکی زمان قوم مرقوم ،  
 انک قتلچون بریده طویلاندی .

او وقت خیب مغدور ؛ استحداد ایچون عقبه نك  
 همشیره سی « زینب بنت حرث » دن بر اوستره استعاره  
 ایتدی . مرقومه ، آخرلره حکایه ایدردی :

« فافل بولندیغ بر زمان چوجغم قوشه رق زنجیر

بند طوران خبیہ کتدی . خیب انی الوب دیزینک  
 اوستنه اوطورتدی . بر الندهده اوستره طور یورایدی .  
 جانندن امیدینی کسمش اسیر ، انه کچن صوکه  
 فرصتده بیوک بر انتقام اولق اوزره چوجنی بوغازلر  
 دیه صورت فوق العادهده قورقدم . حالبوکه بنم بوخو -  
 فی خیب سزمش اولدیغندن ایدی که بکا : « چوجنی  
 اولدیرر دیه می قورقیورسین ؟ قورقه ان شاء الله بن انی .  
 یاعم ! » دیدی . عمرمده خیبیدن ده خیرلی بر اسیری  
 کورمدم . حتی زنجیر ایلہ باغلی طوروب حرکتہ مجالی  
 اولمدینی حالده انک اوطوردینی یرده تازہ صالقم اوزوم  
 یدیکنی کوردم . او ائنادہ ایسه مکده ذاتاً اوزوم یوغیدی .  
 بوده اکا طرف الہیدن ویرلمش بر رزق ایدی «  
 خیب ، قتل اولتمق ایچون حرم کعبدن تنعیمہ  
 کتیرلکده مشرکینہ خطاباً :

— « بنی براز قویورسه کزده ایکی رکعت نماز

قیلیرسه کز »

دیمکله کندیسنه مساعدہ ویریلہرک نمازینی قیلمش وبعده :  
 — « آہ اگر حقمده اولومدن قورقدی ده مدت

حیات افتراض ایدیور دیه ظن ایتیمہ جک اولسیدیکز  
 نمازیمی دها زیادہ اوزادیرایدم »



دید کدن و کفار حقننده ده « اللهم احصهم عدداً واقتلهم  
بدداً ولا تبق منهم احداً » ديه دعا بيورد قدن صوكره :

لقد جمع الاحزاب حولي والبوا  
قبائلهم واستجمعوا كل مجمع  
وقد قربوا ابنائهم ونسائهم  
وقربت من جذع طويل ممزوع  
وكلهم يبدى العداوة جاهداً  
على لاني في وثاق بمضيع  
الى الله اشكوا غربتي بعد كربتي  
وما جمع الاحزاب لي عند مصرعي  
فذا العرش صبرني على ما اصابني  
فقد بضعوا لحمي وقد ضل مطمعي  
وقد عرضوا بالكفر والموت دونه  
وقد ذرفت عيناى من غير مدمع  
وما بي حذار الموت اني لميت  
ولكن حذارى حر نار تلفع  
فاست ببيد للعدو تخشعا  
ولا جزعاً انى الى الله مرجعى  
فاست ابالى حين اقبل مسلماً  
على اى جنب كان لله مصرعى

وذلك في ذات الاله وان يشأ

يبارك على اوصال شلوع ممزوع

نشيد شهيدانه سيله بعض حسياتي اظهار ايتمش  
واني متعاقب ( اوسر وعه ) [ ۱ ] كنيه سيله مكني عقبه  
بن حرث ، يانا شوب مشار اليه شهيد ايتمشدر .

حضرت خبيب ، نمازيني ادا ايله دكن صوكره  
حاضر اولان مكليلك يوزينه بر باقدي ! لكن انلري  
كيمي انه طاش المش ، كيمي ده خبيب عاينده شمات  
لسانيه ايله مشغول كوردى . باقديغتك سبني بيان ضمننده  
صوكره ديدى كه :

— « والله يارب ! قارشيمده انحق دشمن يوزيني  
كوربورم . رسولكه بندن سلام كتيره جك بر فرد  
يوقدر . يارب ! سن ، رسولكه واصحابنه بندن سلام  
تبليغ بيور ! »

مرويدر كه حضرت نبي محترم افنديمز ، مدينه  
منورده منبر اوزرنده هم اوساعته خبيك سلامنى آلوب  
رد بيور مشردى !

قتل ويا صلب اولنه جقلرك ايكيشر ركعت نماز

[ ۱ ] سر وعه : سينك كسرى ، رانك سكونى واو  
وعينك فتحه ليله در .

قیلملری ، شهید سعید مشارالیهن قالمش بر عادت  
مستحسنه در .

« عاصم بن ثابت » رضی الله تعالی عنه حضرتلمری ،  
[ سلافه بنت سعید ] نامنده مکه مشرکه لرندن بر قارینک  
« مسافح ، حارث بن طلحه بن ابی طلحه » نامنده ایکی  
اوغلنی احده - و علی قول بدرده - اولدیرمش بناء  
علیه مرقوم ایکی مقتوللرک اناسی سلافده : [ عاصمک  
قفا کیکیله شراب ایچرم ! ] دیه قسم ایتمشدی .

بوکره جناب عاصمک رجیع حوالیسندنده شهید  
ایدلدیکنی ایشتمش اولان مزبوره سلافه ؛ بنی هذیله  
آدم کوندره رک حضرت عاصمک قفاسنی الیرمق ایستدی .  
واو خصوصده بر چوق اموالده وعد ایله دی . لکن  
انی حفظ وحمایه ایچون آری نوغندن اوله رق طرف  
حقدن کوندرلمش اولان بعض مخلوقاتک مدافعات حافظا -  
نه لرینه قارشنی یاننه بیله واريله مدیغندن قفای المق انلر  
ایچون ممکن اولماشدر !

حضرت شهیدک طرف حقدن شو صورتله حمایه  
بیورلمسی ، بالاخره « حمی الدبر [ ۱ ] » لقبیه تلقیب  
ایدلمسنه سبب اولمشدر .

[ ۱ ] دبر : دالک فتحی بانک سکونیه در .

بعث الرجیع وقعه سنك عقیبنده ایدی رجیع حوا .  
 لیسى اهالیسنی تنکیل ایتک اوزره افندیمر ، شهر  
 ربیع الاولده ایکی یوز نفر اهل اسلام ایله برابرمدینه .  
 دن حرکت ایله مشدی . فقط اهالی مرقومه نك مرعوباً  
 طاغله قاجسندن طولایی ملاقات ممکن اوله میهرق عودت  
 ایدلمشدر .

۴

### — غزوة بنی نضیر — [ ۲ ]

بنی نضیر ، ملل یهودیه دن و یثرب حوالیسندنه قبل .  
 الهجره تقریباً [ ۲۳۴۰ ] ده توطن ایتمش اولان فرق  
 اسرائیلیه دن بریوک قبیله در .  
 محل ومسکنلری مدینه منوره یه ایکی میل بعد  
 مسافده بر ناحیه اولوب محکم حصارلری ، مکمل سلاحلری  
 وار ایدی .

اهل اسلام علیهنده بولنماق اوزره ذات عالی  
 رسالتنهای ایله اولجه معاهده ایله دکلری واو حضرتک  
 بدر غزوه سننده کی مظفریت جلیله لرندن صوکره :  
 « کتب سماویده موعود ومبشر اولان نبی ذیشان آخر

[ ۲ ] نضیر : کبیر وزنده در .

الزمان بو ذاتدر ، دیمکده باش-الادقلى حالد هیت  
اسلامیه علیهنده مشرکین قریش و منافقین مدینه ایله -  
گاه خفی وگاه جلی - مخبره دنده خالی قالمالردی .

هله احد هزیمت اسلامیه سندن صوکره افکار  
واطوار یهودیانه لرینی بستیون دکشدرمش اولدقلندر -  
که - او درلو معاهده نك بنی عامره شمولندن هنوز  
خبردار اولمزدن مقدم - اصحاب کزیندن « عمرو ابن  
امیه الضمری ، حضرتلری بئر معونه فلاکتک اجیسنی  
جیق-ارمق فکریله برارالق اله کچیردیکی فرصتدن  
بالاستفاده بنی عامردن ایکی آدمی سهواً قتل ایستیکندن  
انلرک دیت شرعیه لرینی ورته سنه ویردیروب او صورتله  
احقاق بالحق ایله مأمور اولان صاحب عدل وشریعت  
افدیمر حضرتلری ، اشبو فعل قتل حادثه سی اوزرینه  
جناب عمروه خطاباً :

— « یا عمرو ! سن بو باده خطا ایتش اولدک .  
انلر بزم عهد وامننر الته کیرمشدیلر . شمدی انلره  
دیت شرعیه ویرمک لازم کلیور »

بیوردقن صوکره اصحاب کرامندن « ابو بکر الصدیق ،  
عمر الفاروق ، علی ، زبیر ، طلحه ، سعد بن معاذ ،

اسید بن حنظل ، سعد بن عبادہ ، رضوان اللہ تعالیٰ علیہم اجمعین حضراتیلہ برابر اولدینی خالدہ او مسئله ایچون شهر ربیع الاولده بر جمعه ایرتہسی کونی کیدوب بنی نصیرک « زمرہ » نامنده کی قریه سی اھالیسنہ مسافر اولمش ومبارک ظہر شریفقرینی بر دیوارہ طایاہرق استراحت بیورمشلردی .

خونہ یهود ایسہ حضرت نبی ذیشانک دیوارہ متصل بر وضعیب مستریخانہده بولندقرینی کوردکلری اندہ : « ایشته تام فرصت بو فرصتدر . خانہک طامنندن بری اوزرینہ قوجہ برطاش دوشوروب محمد [ علیہ الصلوۃ والسلام ] ی ایزہلم ، فکرینی اجرا ضمنندہ مذاکرہ کیریشدیلر !

« عمرو بن جعاش بن کعب [ ۱ ] » نامنده برلعین حریف ، بوفیجیع خدمت مشؤمہنک اجراسنی تعہد ایتمشدی !

لکن ہجرت علیہ نبویہنک وقوعی حسیلہ کرک اھل کتابدن اولان یهوددن ، کرک مشرکین عربدن بر چوق افراد وجماعاتک پیغمبر مستبشر اولدیغنه تماماً [ ۱ ] جعاش : جیمک کمری وتخفیف حاممہملہ ایلہدر .

ایناندقلری او حضرت خاتم الانبیاء ایمان ایتمه باشلا -  
 دقلرندن طولایی نظر دقتی اچیلمش وایمانه تقربده  
 ایله مش بولندیفی حالده یهودیلرک اهل و دین اسلام  
 علیهنده کی شدت افکارینه قارشی حزم و احتیاطدن قور -  
 تیه میان « سلام بن مشکم » ، مجلس مذاکره افرادی  
 ارسنده بولنه رق او زمانه دکی نبوت ورسالت احمدیه  
 حقنده یهودیلره مدافعه سویله دیکی سوزلرینی نه اوراده  
 تکرار ایتدکن صوکره :

— « توراتلرک دلالات مبشرانه سنجه نبوت ورسا -  
 لتنده ارتق شبهه محمل قالمیان بو ذات شریف علیهنده  
 هر نه درلو فساد ترتیب ایتسه کز هر نه صورتله حرکت  
 ایتسه کز هپ بهوده در . زیرا الله تعالی حضرتلری  
 فسادکنزی سمادن اکا بیلدیره جک ؛ کندیسنه هیچ بر  
 ضرر طوقانمیوب امورنده موفق اوله جق ، انک فیوضا -  
 تیه دنیالر طوله جقدر . »  
 دیمشدر .

فی الواقع جبریل امینک اخباری ایله ذات عالی  
 رسالتپناهی بو خیانت یهودیه دن خبردار اوله رق یرندن  
 همان قالقوب مدینه منوره یه طوغری حرکت بیوردیلر .



او زمان انك معيت همايونلرنده بولمئش اولان اصحاب  
 كرام حضراتی ، بدايت امرده او حضرت رسول خدا -  
 نك مثلاً دفع ضرورت بشریه ایچون تباعد ايله ديكنه  
 وبر كیزلی محله چكیلدیکنه ذاهب اولمشلر سده نهایت  
 مدینه به عودت عزم عاليسنده بولندقلرینی اكلاملريله  
 اصحاب دخی عودتده او حضرتی تعقیب ایتمشلردی !  
 معاودت علیه نبویه دن صوكره « ابن مشكم » ايله  
 بنی نضیر یهودیلری ارمسند او بابده کی مباحثه و مناظره  
 دها زیاده مشئت اوله رق یهودیلرک افكارینه قارشی  
 « کتب توراتیه ايله مبشر اولان پیغمبر مستبشر اخر الزمان  
 البتہ بوذات عالیشاندر » دیه ابن مشكم طرفدن صورت  
 مصرانده ادعا ایدلمکله یهودیلر :  
 — « مادام که اویله در محمد [ علیه الصلوة والسلام ]  
 ايله بر مباحثه ایدلم . حق پیغمبر اولدینی او مباحثه نتیجه  
 سنده ثابت اولور ایسه همزده ایمان کتیره لم »  
 دیه حضور عالی رسالتناهی به مخصوص ایلچیلر کوندره رک :  
 — « کندیلری ده معین بر یرده علمای اصحابدن  
 اوتوز نفر ايله کلسونلر . بزده کندی علما مزدن اوتوز  
 آدم کوندره لم مباحثه دینه به کیریشلسون ! اکر صدق  
 نبوتلری ثابت و متحقق اولور ایسه همزده ایمان ایدلم »

تکلیفده بولسدقلرندن کیفیت نزد عالی نبویده قبول  
بیورلمش ایکن یهودیلر جایه رق تکلیف مذکوری برار  
تعديل ايله :

— « خیر ! اوتوزر آدم دکل : طرفیندن میدان  
مباحثه یالکیز اوچر آدم چیقارلسون ! »  
دیدیلر .

حضرت نبی ذیشان علیه صلوة الرحمن افسدیمز  
بونیده قبول ایدهرک اصحاب کرامندن یالکیز اوچ ذات  
ایله برابر تعیین اولنان محلی تشریف بیوردیلر . یهود  
طرفندن ده اوچ آدم کلهرک اچیلان باب مباحثه و منا-  
ظرده یهودیلرک تماماً ملزم و مبهوت قالدقلری صروده  
بر یهودی قادینی - که معیت جلیله احمدیده بولنان  
اوچ اصحاب کرامدن « محمد بن مسلمه » حضرت تلرینک  
همشیره سی ایدی - کمال تلاش ايله کلوب قرنداشنه :

— « بو یهودیلرک افکاری مباحثه و قبول اسلام  
دکل : بلکه رسول الله سوء قصددر . حتی اشته کریدن  
جمعیته کلیورلر ! »

دیدیکنک عقبنده کی مشهودات او خبری تأیید و تصدیق  
ایتدیکندن رسول خدا اصحاب کرامیله برابر کندیلرینی

خیانت یهودیه دن قورتار مشلردی . که ایشته بو وقعده دن صوکره  
حضرت پیغمبر ، بنی نضیر یهودیلرینه خطاباً : [ اخرجوا  
من بلدی ! ولا تسألونی بها ! وقد هممت بما هممت به من  
القدر . وقد اجلتکم عشراً . فمن رؤی بعد ذلك فقط  
ضربت عنقه ] دیه محمد بن مسلمة الانصاری رضی عنه  
الباری حضرتلری واسطه سیله خبر کوندره رک اون کونه  
دکین انلرک ترک دار و دیار ایتملرینی شدیداً امر  
وتکلیف ایتشدور .

بو خبر وتکلیف اوزرینه یهودیلر دخی همان ترک وطن  
ایچون حاضر لایمغه باشلامشلردی ... رئیس المنافقین  
« عبدالله بن ابی بن سلول » - وعلى رواية « حي بن  
اخطب [ ۱ ] » - بنی نضیره :

— « چیقما یکنز ! بز سزه معاونت ایدرز . بنی  
قریظه یهودیلر یله برابر معاهد ومتفقکنز اولان بنی غطفان  
قبیله سیدخی طبعی امداد ایدرلر ! »  
دیه کیزلی سوز ویردیکندن یهودیلر ده ترک دیار حقننده کی  
موافقت نیتندن صرف نظر ایدهرک :

[ ۱ ] حی : جاء مهملة نك ضمی یای اولانك فتحی یاء  
ثانیه نك تشدید یله اسم مصغر در !

— ( بز وطنمزدن چي قميز ! نه ياپار ايسه كياپ ! )  
جوابي ويرديلر. انك اوزرينه ( سلام بن مشكم ) نام  
كي ميسه ، ( حي ابن اخطب ) ه غايت صميمي براخطار  
خيرخواهانده بولندي :

— ( والله يا حي ! ابن ابيك سكا ديديكي لاقردى  
باطلدر . او ، سنى ورطه هلاكه دوشورمك استيور . )  
سلام ، وخامت انجامي بيلديريكي حالده لعين حي ، عداوت  
كفرانه سنى عنودانه بروضعده بللى ايدهرك :  
— ( نأبى الاعداء محمد والاقتاله )  
جوابي ويرمكله سلام اكا :

— ( فهو والله جلاؤنا من ارضنا وذهاب اموالنا  
وشرفنا وسبي زرارينا مع قتل مقاتلينا )  
تيشير اليميله مقابله ايتمشدى .

ايسته او صروده جناب سيدكائنات افنديمز ، احباب  
كرامنى طويلايوب مسجد شريفقرنده امامت مأموريته  
[ عبدالله ابن ام مكتوم ] رضى الله تعالى عنه حضرت تلرينى معين  
ولواء شريفى ده جناب على كرم الله وجهه حضرت تلرينه  
اعطا بيوردقدن صوكره شهر ربيع الاولده اردوى سعا .  
دتلريه كيدوب بنى نصيرى تحت محاصره يه الدى .

علامه قسطلانی ، وقعه‌نک غزوۀ بدردن الی ماه  
 صوکره وقوعه کلدیکنی یازیور . لیکن « محمد بن اسحق » ،  
 دردنجی سنه هجریه صفرنده اولمق اوزره کوسترمشدر!  
 اردوی هایون جناب رسالتیناهینک بنی نضیر حوا -  
 لیسنه مواصلاتی صرہ سنده یهودیلرک اک مشهور تیر  
 اندازلرندن « عزول » نام لعینک آتدیغی اوق خیمه  
 سعادتہ واصل اولدیغندن همان سایبان سعادتک محلی  
 دکشدیرلمشدی .

مرقومک ، شجاعتنه اغتراراً کیجه بر خدعه حریه  
 اجراسی فکرنده بولمسنه محل بر اقامق اوزره شیر خدا  
 حضرت علی المرتضی اقدسیمز ، بعد الغروب اردو کام  
 اسلامدن ایریلوب قلعه‌نک مهم بر گذرکاهنده اختفا  
 ولعینک محتمل اولان هجوم وتجاوزینی منع تصوریله  
 ترصد ایده قالمش ایکن جناب مرتضی نک عین تصویری  
 اوزره مرقومک بر قاج ارقداشلرله برابر کلیمکده اولدیغی  
 کوردرک همان اوزرلرینه هجوم ولعینک قفاسنی قطع برله  
 حضور پر نور رسالتیناهییه عرض وتقدیم ایتدیکی مرویدر .  
 امر محاربه او درجه‌یه کلدیکی زمان « عبدالله بن  
 ابی بن سلول » اهل اسلام علیهنده یهودیلره معاونت

ضمننده ايشه علناً مداخله جرت ايدمهديكي كبي متفق  
ومعاهد كوردكلى بنى قريظه يهوديلريله بنى غطفاندن.  
ده امداد كلمينجه هر يردن مأیوس قالان بنى نضير ، التى  
كونلك شدتلى بر محاصرميه وطاش ، اوق اتمق كبي  
بر چوق تضديقات عسكريه قارشى مقاومت مجال بوله .  
ميه رق نهايت « اسلحه دن باشقه هر درلو اموالندن دوه .  
لرينه يوكله ده بيلدكلى قدر اموال واشيايى الوب  
ترك دار وديار ايتلمى ، شرطيله مساعده وامان  
ايسته مشلردر .

حضرت نبى ذیشان دخی بو درلو شيئه راضى اوله .  
رق احسان امان بيورملرندن بالاستفاده بر خانه خلقى  
يالکيز بر دوه يوكى المق اوزره همان انى يوز دوه يه  
يوكله ده بيلدكلى قدر اموال واشيايى الدقن صوكره  
كيمى ارض فلسطيندن « اريحا » يه ، كيمى دمشق دن  
« اذرحات » ديارلرينه قدر چكيلوب كيتدى .

انجق « سلام ابن ابى الحقيق » ايله « حى بن اخطب » ك  
عائله سى خيبر يهوديلرينه التحاق ايتمشدى . ايجلرندن  
دين مبین اسلامى قبول ايدنلر ايسه « سفیان بن عمير  
بن وهب » ايله « سعد بن وهب » نامنده ايكي كشيدن  
عبارتدر .

بنی نصیرک بر چوق اشیا سی مثلاً ، الی عدد درع ،  
الی عدد دمیر طاس ، او جیوز قرق عدد قیانج ، کی  
شیری ید اغتنام اسلامه کچدی .

حین مقاتله ده طرف اشرف رسالت پناهیدن شرف صادر  
اولان اراده سذیه موجب بنی نصیرک نخلسه تاننده کی  
خورما اغاج لر کسلسمدر . قطع نخیلک امر ایفاسنه  
اصحاب کرامدن « ابولیلی المازنی » ایله « عبدالله بن  
سلام » رضی الله تعالی عنهما حضرتلری مأمورایدیلر .

جناب ابولیلی ، نخیلک ال قیمتلی جنسلرینی کسمش  
عبدالله بن سلام ایسه بامعکس ال فنالرینی کسوب  
ایولرینی ابقا ایتش اولدیغندن بالآخره وقوع بولان  
استیضاحه ابولیلی :

— « نخیلک ایولرینی کسدم تا که کفار بنی نصیره  
چوق تأثیری اوله ! »

عبدالله دخی :

— بیلدم که اهل اسلامه قاله جق ! خر مالر ایسه  
انفس اموال بنی نصیر اولغله فنالرینی کسوب ایولرینی  
بر اقدم ! »

جوانی ویرمشدی .



هر ایکی صحابیؑ مشارالیهک ایسه شو صورتله اولان  
جد واجتهادلرینک مقرون صواب اولدیغنی حق تعالی:  
« ماقطعتم من لینة اوتر کتموها قائمة علی اصولها  
فبأذن الله » آیت کریمه سیه بیلدیرمشدر .

مع مافیه نخلستان مذکورک « بویه » اسملی  
موضعه بولندیغنی وقطع دکل ، احراق ایدلدیکنی روایت  
ایندن ده اولمشدر . حتی احراق مذکوره شاعرعالیؑ نبوی  
جناب حسان رضی عنه الرحمن افدیمر :

• وهان علی سرة بنی لوی

حریق بالبویرة مستطیر

کفتار شاعرانه سیه اشارت ایتمش واکا عمزاده نبوی  
ابوسفیان بن الحرث بن عبدالمطلب دخی :

ادام الله ذلك من صنیع

و حرق فی نواحیها السعیر

ستعلم اینا منها بنزه

وتعلم ای ارضینا تضیر

قطعه سیه جواب ویرشدی !

فقط احراق مذکورک محل وقوعی و بیت محررک  
موردی طائف غزوه سی زمانی ایدوکنی وافندیمرک  
طائف نیتیه حین حرکت هایونلرنده « اوطاس » نام

مخلدن مرورلرنده مالک بن عوفک منظور عالی اولوب  
احراقی فرمان بیوریلان قصرینک یاغمی اولدغنی امام  
زهریدن نقلاً سیر الکبیر یازمشدرکه صحیحی ده بلکه بو  
اولق لازم کلیر !

مهاجرینک امر تعیشلرینی کندی اوزولرینه المش  
اولان انصار کرامک پک بیوک بر یوک التنده اولدقلرینه  
هر زمان هرکسدن زیاده دقت بیورن رسول اکرم  
صلی الله تعالی علیه وسلم افندیمز ؛ انصار کرامک او  
درلو یوکلرینی تخفیف فکر عالیهله بو سفرکی اموال  
غنائمی بالکز مهاجرینه تقسیم اتمهی ارزو ایدرک  
انصار کرامه خطاباً :


— « اکر ایسترسه کز ینه اولکی کبی مهاجرین ،  
مالکزده حصه دار بولمق اوزره بوغنائمی جمله کزه  
تقسیم ایدیم . ایسترسه کز کندی اموالکز منحصرأ  
سزک اولق اوزره بوغنائمی بالکز مهاجرلره ویریم ،  
بیوردیلر . انصار کرام ایسه :

— « یارسول الله ؟ بو غنائمی مهاجرلره تقسیم  
بیوریکز ؟ بزم ماللریمزدن ده ایستدیککز مقداری الوب  
انلره ویریکز ؟ »

دیه عنونیتله جواب موافقت ویرد کلرندن اکا قارشى حضرت. ابى بکر الصديق رضى الله تعالى عنه حضرتلری یرندن قالقوب انصار کرام حضرتانک مهاجرین حقنده ابراز بیوردقلری سماحت فوق العاده لرندن طولایى کندیلرینه علناً بیان تشکر ایتمشدر .

ایشته او زمان انصارک مدح و ثنایى حقنده ( کندى . احتیاجلری اولسه بيله نفسلری اوزرینه مهاجرینی ترجیح وایتارایدلر ) معنای منیفى افاده ایدن : [ ویؤثرون على انفسهم ولو كان بهم خصاصة ] آیت کریمه سی نازل اولمشدر .

بناءً علیه غنایم ، یالکز مهاجرینه ترک و تقسیم ایدلدى . فقط بنی نضیریه و دیلری رؤساسندن ( سلام ابن ابى حقیق ) ک مشهور قیلنجی انصار کرامدن ( سعد بن معاذ ) رضى الله تعالى عنه حضرتلرینه احسان بیوردیلدی . کبی انصاردن بهادر مشهور ( ابو دجانہ سماک بن حرث ) ایله ( سهیل بن حنیف و حارث بن الصمه ) رضى الله تعالى عنهم حضرتانک فقر و احتیاجلرینه بناءً انلرهم غنایمدن بر مقدار ایرلدى .

سلام ابن ابی الحقیقک قتل  [ ۱ ]

(ابورافع) کنیه سیله مکنی اولان مرقوم ، خیر  
یهودی لری ارمسند و قع حیثیتله و اهل اسلامه شدت  
عداوتیه معروف ایدی . سلام ، صدر اسلامده بنی  
نضیر میاننده متمکن ایکن انلرک مدینه جوارندن طرد  
واجلا اولندقلری زمان یهود خیبره التحاق ایدرک  
خیبرک جهت شمالیه سند و [ عنزه ] نام محله ساکن  
اولشدی .

وقتاکه اوس قبیله سی بهادرلری رضاء  
شریف حضرت رسالتپناه اوغورنده کعب ابن  
اشرف کبی بر دشمن دینک ازاله وجودینه موفق  
اولدی او سیلره هر حالده رقیب کچنان خزر ج قبیله  
مشهوره سی دخی اکا مقابل بر خدمت ابرازیله نظر  
رسول اللهده قریت کسب ایتملرینی فریضه ذمت مخالفت  
بیله رک حرینی قتل ایچون ذات عالی رسالتپناهیدن

[ ۱ ] سلام : سینک فتحی ، لامک تشدیدله و حقیق: ناء  
مهمله نک ضعی ، قافک فتحی ، یانک سکونیه در .

استيدان ايتملردر . حضرت پيغمبرده مساعده بيور .  
 مشدى . بعده [ عبدالله بن عتيك بن قيس بن الاسود  
 بن مسلمه ] ايله [ عبدالله بن عتبہ ابو قيس الذكوانى ]  
 رضى الله تعالى عنهما انصار كرامدن وخزرجيلردن  
 معيتلرنده « مسعود بن سنان الاسلمى ، عبدالله انيس  
 الجهنى ، ابو قتاده الحرث بن ربى ، خزاعى بن الاسود  
 بن الخزاعى » نام درت نفر اصحاب كرام بولنديغى حالده  
 خيبر قلعه سنه **كيدوب كونشك** غروبي زمانى محل  
 مقصوده مواصلت ايتديلر . اشبو وقعه ، بر روايته  
 كوره تاريخ هجرتك التنجى سنه سى رمضانده ايدى .  
 عقيب وقعه قتل كعب ابن اشرفده واقع اولمقده روايت  
 ديكردر . لكن علمنده حركت اولنان سلامك يهود بنى  
 نصيردن ايكن انلرك اول الحشر اجلالرى زماننده  
 خيبره التحاق ايتمش بولنديغنه وبنى نصير وقعه سى ده  
 قول مشهوره كوره دردنجى سنه هجرىه سنده وقوعه  
 كلديكنه نظراً قتل سلام وقعه سنك دخى ترتيبجه قتل  
 كعب بن اشرفى دكل وقعه بنى نصير بحثى تعقيب ايتسى  
 لازم كلير .

جناب عبدالله رضى الله عنه حضرتلرى اولار فقا .  
 سنى كيزلدكن وبعده دربان كنديسنى فرق وتشخيص

ایده من دینله جک قدر قیافتنی ده تبدیل ایله دکن سوکره  
قلعه قابوسندن ایجری به کیرمشدر :

ابو رافع لعینک حصنی قابوسنه یاقین کلدیکی زمان  
اقشام اولمش وقابو دخی همان کلیدلنک اوزره برحاله  
بولنمشدی . عبدالله او زمان رفقاسنه :

— « سز شوراده برازطور و کز ! بن ایلری به کیده یم ده

باقه لم کیره بیلیر می یم ؟ »

دیه رک آیرلدی . حالبوکه او زمان قلعه نك کلیدی همان  
قابویه اورولق اوزره ایدی .

دیگر روایت کوره قلعه اهالیسندن برینک اشکی  
او اقشام کلامش اولغسله انی ارامق ایچون قنیدیل الده  
اولدینی حالدیه یشاری به چیقمش اولان کیمسه لر ،  
قنیدیلک ضیاسنه قارشلی تشخص ایدر قورقوسیلله  
عبدالله ، کندی البسه سیله اوستنی باشنی اورتوب حاجت  
بشریه سنی دفع ایدر کبی بوضعیت اوزره یرم او طور مشندی .  
اشک بولنوب ده قابودن ایجری به سوق اولنور  
ایکن بواب :

— « کیرم جک اولان کیرسون ! قابوی کلیدیه جغم ،

دیه ندا ایتمش اولدیغندن بوده برتقریب غریب ایله ایجری به  
صوقوله رق برکوشه به کیزلندی .

اولوقت ابو رافع لعینک ندماسی برمدت قوتوشدیلر  
کیجه دن بر مقدار زمانده کجدی . بعده ابورافعک مجلس  
مصاحبتنده کیلر طاعیلدی .

عبدالله حضرتلری کوردی که ابو رافعک یاننجه  
کیمسه قالمدی . اورته لقدمه کی سسلرده کسیدلی ! .  
ایشته هرکسک او صورتله یاتاغنه یانوب کیجه دخی  
وحشت وظلمتنی اولانجه قوتیله یایدیغی ائناده جناب  
عبدالله ، قاپویه یاناشه رق کلیدی اچدی . تاکه اهل قلعه  
وقعه دن خبردار اولسه لر قولایلقله فرار ممکن اوله !  
بعده ابو رافعک کوشکی طرفه دوندی . نردباندن  
بری یوقاری چیقدی . ملعون ایسه کندینه مخصوص برغرفه ده  
ایدی . غرفه نك ایچریسی ده قارا کلک ایدی .

بناءً علیه ملعون سلاّمک زده یاتدیغی بیله مدیکی  
کبی اکلامق ایچون قنديل استعمالی ده مستحیل اولدیغندن  
چار ناچار چاغیرمقدن باشقه قولایلق بوله میان عبدالله :  
— « یا ابا رافع ! »

دیه سسلند کده خشیتر ایچنده اویانمش اولان لعین ،  
حیرتله :

— کیم او ؟ »

دمش واوله بر جوابک ورودینه منتظر طوران



عبدالله ده قیلنجنی سسك چیقدیغی یره اورمق اوزره  
قصد ایتدیکی حالدیه صیحه ایدن ملعونك وجودینه راست  
کتیره مامشدر .

ایشك ارتق کسب ایتدیکی صورت واهمیتیه  
قارشى خدعه و دسیسه یه مراجعت لزوم اشدی تحقق  
ایتمش دیمك ایدی . آنکچون عبدالله ، سسنى بر طرز  
مددکارانه تبدیل وکویا ابورافعك عونہ سندن بری یتشوب  
قاپودن کیرمشه تشبیه ایدهرك لعینى شویله چاغیردی :  
— « نه اولدی یا ابارافع ! »

لعین ده :

— « الا اعجبك لامك الویل ! بریسی کیردی . بکا  
قیلنج ایله اوردی »  
دیر ایکن سوزده کی سسندن بالاستفاده بردها قیلنج  
چال دیسه دینه راست کتیره مدیکنی متعاقب لعینك زوجه سی  
قالقهرق باغیرمشدر .

عبدالله ایسه قیلنجی اوزمان صرتی اوستی یاتمده  
بولنان لعینك قارنه طوتوب شدتله باصدیرمش وقیلنج  
اشاغی یه طوغری اینرکن کمیک چتیردیله ده چیقارمش  
اولدیغنه باقهرق ارتق تمامیه اولدیره بیلدیکنه یقین حاصل  
ایتدکن صوکره قاجغه نیتلنمشدی .

بناءً علیه نردباندهری اشاغی به طوغری تلاش ایله  
 اینیورایدی . لکن نردباندن اینرکن یره قدر ایندی ظنیه  
 ایاغنی یا کلس باصدیغندن دوشوب بریایغی اغیرجه اینجمنش  
 یاخود عضو ساقی کلیاً قیرلمشدر .

مع مافیه رفقاسنه کلوب انلره :

— « چاڭ کیدیکز ! رسول الله مرده ایدیکز ! »

دیدى .

لکن کندیسی ملعونك هر حالده خبر هلاکنى  
 ایشیدوب بعده کیتمک اوزره کیجه اوراده قالدى .  
 او زمانکه خروسلر اوتتمکه باشلادی . برینک طام اوستنه  
 چیقهرق موت ابی رافعی اعلان ضممنده نداء النعی مصیبت  
 الیدردیغنی ایشتمدکن صوکره همان دونوب کمال حظ  
 وامنتله حضور رسول الله گلشدر .

ایشته بو صورتله اوس قبیله سی بهادرلرینک کعب  
 وقعه سنده کوستردکلری فداکارلغه مقابل خزرچ دلا -  
 ورلری دخی رضاء پیغمبری اوغورنده شو مهم ایشی  
 بحق مجرمشلردر . رضوان الله تعالی علیهم اجمعین !

— ۶ —

## — غزوة ذات الرقاع —

بر اراق نجده آل غطفاندن بنی ثعلبه نك مدينه  
منوره اوزرينه حرکت قصديله تجهيزات عسكريه ده  
بولنديغی مسموع عالی نبوی اولغله مدينه محافظه سنه  
داماد مکرملری عثمان ذی النورین رضی الله تعالی عنه  
حضر تلرینی قائم مقام بر اقدقدن صوکره شهر جمادی الا-  
ولی - وعلى رواية شهر ربيع الاول - ده فخر عالم  
صلی الله تعالی علیه وسلم افنديمز حضرتلری اردوی  
هایونلریله دیار نجده حرکت بیوروب غطفان قبائلی  
اراضیسندن مدينه یه ایکی کونلک مسافه سی بعید و  
« بنی فزاره ، بنی اشجع ، بنی انمار ، دن قیس طوائفک  
مسکنی بولنان « شذخ ، یاخود « ذات الرقاع ، نام وادی یه  
دکین کیتدیکی حالدده اهای نجددن قیام وحرکت حاضره-  
لنمش اوله رق تصادف اولنان بر جماعت عسکریه نك  
طاغلره طوغری فراراً قاجمسی سببيله حرب وقوع  
بولقسزین عودت ایدلمشدر .

اشبو غزوه ده عساکراسلامیه ، هجوم اعدادن امین

اوله ميه رقيکديکريني تخويف ايله ديکندن حضرت نبي محترم  
افنديمز ، صلات الحوفي ادا بيورديلر .

« جابر بن عبدالله » رضی الله عنه حضرت تلو رندن نقل

اولنورکه :

— « اثناء معاودت نبويه ده حرارت هوانك

بك مشتداولدينى زمان عسكر اسلام ، « عضاه » [۱] نام  
اگاجى چوق بروادى يه كلش واستظلال ايجون انده نزول  
دخى ايدوب اويقويه ياتمشدى .

سيدكائنات افنديمز دخى منزل اتخاذا بيوردقلىرى بر

« سمره » اگاجى دالنه سيف شريفلىرىنى اصره رق اويقويه  
ياتمشلردى .

هرکس ايشته بو وجه اوزره اويقوده ايکن اره دن

براز مدت کچنجه حضرت رسول اکرم افنديمز چاغى -

ديلر . بز کيتدك . انك نزد شريفلرنده « غورث بن

الحارث » اسمنده وعلى روايه « دشور بن الحارث » نامنده

بر اعراپينك اوطوردیغنى دخى کوردك !

رسول اکرم صلى الله تعالى عليه وسلم افنديمز ،

اعرابى مرقومه اشارتله بيورديلرکه :

[ ۱ ] عضاه : عينك كسرى . ضاد معجمه نك تخفيفيله

اسم شجر در .

— « شو اعرابی ، بن اویقوده ایکن کلوب قلنجی  
 چیقاردی . او یاندم اعرابی بی یانمده یالین قیلنج کوردم .  
 بکا : « سنی بندن شمدی کیم منع ایدر » دیه صوردی .  
 بنده : [ الله ! ] دیه جواب ویریرکن حضرت جبریل  
 همان اعرابینک کوکسنه طوقاندی . انک عقیبنده قیلنج  
 اعرابینک الندن دوشدی . بن الیه قیلنجی الوب صوکره  
 اکا دیدم که : « سنی بندن کیم منع ایدر » . بو سؤاله  
 اعرابی : « هیچ کسه منع ایتمز » جوابی ویردی ! . . .  
 سید الانام افندیمز او اعرابی یه عقاب دکل :  
 بلکه لطف ایله معامله بیورد قلرندن - واقدی کی  
 بعضک روایتنه کوره - اعرابی همان قبول دین مبین اسلام  
 ایله دکن فضله دونوب بلده سنه کیتدکن صوکره چوق  
 کیمسه لرك قبول اسلاملرینه ده سبب اولمشدر .

۷

## ❦ ولادت حسین ❦

رضی الله تعالی عنه

شهر شعبان شریفک اون بشنجی - وعلی روایه اون  
 اوچنجی - صالی کونی جناب [ حسین ] بن علی المرتضی  
 رضی الله تعالی عنهما حضرتلری « فاطمة الزهراء »

رضی الله تعالی عنها حضرت تلیزندن تولد ایدرک شرفیختش  
مهد وجود اولشدر .



## — ❖ ام سلمه ❖ —

رضی الله عنها

بنی مخزومدن ( ابی امیه ) کنیه سیله مکنی ( سهیل )  
بن مغیره بن عبدالله ( ک قیزی و ) ابو سلمه بن عبداللا -  
سد ) حضرت تلیزینک زوجہ سی بولنان ( ام سلمه هند )  
رضی الله تعالی عنها حضرت تلیز ، زوجنک وقعة احدثه  
الدینی جریحہ دن متأثراً فوت اولسیله طول قالمش -  
قرق درت یاشنده - بر قادین ایدی .

بو صرہده انی رسول اکرم افندیمنز کندی نفس  
هایونلرینه شهر شوالده تزویج بیورہرق امہات مؤمنین  
عدادینہ ادخال بیورمشلردر .

مشارالہا ، بدایت ظهور اسلام زمانلرنده مکہ دن  
حبشه ہجرت ایدن مسلمین ارہ سنده زوجی « ابو سلمه »  
حضرت تلیزله برابر ہجرت ایتمش مؤخرآدہ ینہ مکہ  
عودت ایتمشدی .

۹

❖ بدر صغری ❖

احد وقعه سنده ابو سفیان ، عمر الفاروق رضی الله تعالی عنه حضرت تلرینه خطاباً :

— « کله جک سینه بدرده سزکله کوروشه لم »

دیمش حضرت عمر الفاروق دخی :

— « ان شاء الله »

جوانی ویرمشدی .

وقت موعودی کلنجه ابو سفیان ، مکهدن عسکريله برابر چیتقوب بدره کلمک اوزره ایکن « مرالظهران » ناحیه سنده [ مجنه ] نام محله تشدیکنده قابنه طرف حقدن خوف ورعب القا اولندیغندن ایدی که همان او محلدن رجعت ایتمه بی تصور ایتشدی :

اوصره ده نعم التصادف قیلندن اوله رق یوله راست کتیردیکی « نعیم بن مسعود اشجی » نام کیمسه بی اعزازاً یاننه الوب اکا :

— « یا نعیم ؟ بن احدده محمد [ علیه الصلوة

والسلام ] وعد ایتشدم که اشته بوکون بدره کیدوب اوراده مسلمانلرله کوروشه لم . حالبوکه بوسنه ، سنه الجذب



[ ۱ ] در . بزم میوه و سودك كثرته موجود بواندینى  
 سنه ياراشير . باشقه زمانلرده حرب ايتمه قدرتمن  
 اولماز . انكچون رجعتى تصور ايدورم . ليكن محمد  
 [ عليه الصلوة والسلام ] چيقسهده بن چيقمسهده محمدلرك  
 قریش عليهنده كى جرئى آرتحق ؟ شو حالده سن كيت  
 مدینه يده انلرى قورقوت ! اكر موفق اولور ايسهك  
 غيرت و خدمتكه مكافاة سكا اون دوه وار ،  
 دینجه نعيم ، عين توصیه يى الندى كلديكى قدر اجرا ايتك  
 نيتله همان قلوب مدینه يه دوندى .

بر روايته كوره :

ابو سفیان ، « نعيم بن مسعود الاشجعی » يى دكلز  
 بلکه مدینه يه كلير بر طاقم اتلى كيمسه لرى كوروب انلره  
 عين وجه اوزره بيان حال ايتدكندن صوكرم بر دوه  
 يوكى اوزوم وعد ايتمش وايضاى وعدهده « سهيل بن عمرو »  
 كفيل اولمشدر .

نعيم بن مسعود الاشجعیك مدینه يه وصولندم  
 مسلمينى ، بدر ايجون بعض تجهيزات و ترتيبات عمكريه  
 ايله مشغول كوروب دیدى كه :

[ ۱ ] قحط و غلاسنه سى ! ديمكدر .

— « ابو سفیان کبی رؤسای قریش سزك انچون  
 عسکر طوپلادی . انلر ، یاقین دیاریکزه قدر اچیلوب  
 کلدیلرده سزك چوق کیمسه لریکزی قیردیلر . اکر سز  
 انلره یاقین کیدرسه کزبتون بتون قیریلیرسسکز . هیچ  
 بریکزی صاغ براقازلر ؟ )

بو تسویلات ، بعض افراد اسلامیه نك قلبنده باشقه  
 درلو تأثیر حاصل ایله دیکندن افراد اصحاب کرامك  
 وقوعات قلبیه لرندن خبردار اولان او راز آشنای دقایق  
 احوال قلوب :

— ( والذی نفس محمدبیده لا خرجن الیه م وحدی .  
 ولولم یخرج معی احد )

دیه یمین وقسم بیوردقدن صوکره خواص اصحاب  
 کراملرندن — یالکز اونی سواری اوله رق روایتیه  
 کوره — بیک بشیوز قدر ذوات ایله برابر چیقدیلر . که  
 اشبو حرکت هایون ؛ غرۀ ذی القعدده واقع اولمشدر .  
 لیکن استعید بالله [ الذین قال لهم الناس ان الناس قد  
 جمعوا . . . . ] آیت کریمه سنك تفسیرنده اولوقتکی  
 حرکت هایون نبویده رسول مکرم افندیملزه برابر  
 اوله رق بدر صغرایه کیدن افراد عسکریه نك یالکز  
 یتمش نفردن عبارت اولدیغنده بتون کتب تفاسیر  
 متحدالمقال بولنیورلر .

بو مقدار قليل ايسه او زمانكى مصلحتك ايجاب  
 ايتديكى اهميته كوره براز بعيد اولسه كر كدر . چونكه  
 احد غزات كرامى ىدى يوز كسور نفر دن عبارت ايكن  
 اوج بيك شو قدرى حاوى اولان مشركين اردوسنه  
 مغلوب اولمشدى . بناءً عليه ايجاب مصلحت احد عساكر  
 اسلاميه سندن دها از بر هيئت ايله دكل بلكه دها كثر تلى ،  
 دها جمعيتلى بر اردو ايله برابر قارشى چيقيمق ايدى .  
 او حالده آثار تاريخيه نك بياناته اعتبار ايدمرك غزات بدر  
 صفرانك يمش دكل : بيك در تيوز ويا بيك بشيوز اولديغنه  
 قائل اوله بيلورز .

زمان حر كترلر نده مدينه منوره محافظه قائم مقاملغنه  
 ( عبدالله بن رواحه ) رضى الله تعالى عنه حضر تلى رنى تعيين  
 ايدوب لواء شريفى ده جناب على المارتضى كرم الله وجهه  
 حضر تلى رنه وير مشدر .

حالبوكه ابو سفيان ، اردوى هايونك بو حر كتندن  
 خبردار اولديغندن قور قوسندن همان دونوب مكه يه قاچدى .  
 قريشك قوت وصولت اسلاميه دن احترازاً بالامصادمه  
 او صورتله مكه يه قاچمى كندى اعتبارينه طوقامش ،  
 لكن اهل اسلامه شان وشرف وير مشدر .

## — فصل ثامن —

### بشجی منہ لہجریہ و قابعی

زینب بنت جحش . نزول آیت حجاب ، غزوہ دومہ  
الجنادل ، غزوہ بنی مصطلق . غزوہ خندق ، یا غزوہ احزاب .  
غزوہ بنی قریظہ ، اعشی الباہلی

۱

### { زینب بنت جحش }

رضی اللہ عنہا

مشارالہا ، عمہ علیہ احمدیہ « امیمہ بنت عبدالمطلب »  
دن متولدہ در . برارالق کنندیسنی افراد قریشدن  
بریبی ایستمکله قبول ویاردی حقنہ کی مطالعہ لرینی  
او کر نمک ایچون ہم شیرہ سی « حمہ » بی فخر کائنات افندیمرہ  
کوندردی .

جریان ایدن مشاوزہ نتیجہ سندنہ زینبی اکا دکل  
بلکہ « زید بن حارثہ » رضی اللہ تعالیٰ عنہ حضرت تلرینہ  
مناسب کوردیکندن طولانی ویرمک تصور عالیلرندہ  
بولندقلرینی اکلایان « حمہ » حدتہ :

— « عمہ کزک قیزی کولہ کزہ ویرہ جکسک کزہا ! »

دید کدن صوکره کلوب جواب رسول اللهی زینبه تبلیغ  
ایتمش ، ( زینب ) دخی - کنديسنه زیدی مناسب کوره -  
مديکنه بناء - غضب وحدت ايتديکچون متعاقباً  
حقنمه توبیخ وتادیبی متضمن استعید بالله [ وما کان  
لمؤمن ولا مؤمنة اذا قضی الله ورسوله امرأ . . . ] آیت  
کریمه سی انزال بیورلمغله توبیه مجبور اوله رق :

— ( یا رسول الله ! مناسب کوردیکه کزی یاپیکز ! )  
دیه اظهار موافقت ایلمش رسول اکرمده انی جناب  
زیده تزویج بیورمشدر .

حضرت زینب رضی الله تعالی عنہا نک مؤخر آزیددن  
مفارقیتله عدتی منقضیه اولنجه استعید بالله [ فلما قضی  
زیدمنها وطراً زوجها کها . . . ] آیت کریمه سی نازل اوله -  
رق حضرت رسول کبریا شهر محرمده بالتزوج اکا  
دخول بیورمشدر .

ازدواجنک محضاً بر امر الهی ایله وقوعه کلمش  
اولسنه استناداً حضرت زینب رضی الله عنها زوجات سائر  
نبویه قارشى :

— ( سزی اولیا کز تزویج ایتدیلر . بنی ایسه ریم یدی

قات سہاواتک اوستندبری تزویج بیوردی )  
 دیہ اظہار فضل و افتخار ایدردی .

۲

## — آیت حجاب و تسترک نزولی —

زینب بنت جحش رضی اللہ تعالیٰ عنہا حضرت تلیرنک  
 یوم ولیمہ سندہ عموماً نسوان اسلامک تحجب و تسترلی  
 حقندہ کی آیت کریمہ نازل اولشدر .

( انس بن مالک ) رضی اللہ تعالیٰ عنہ حضرت تلیرنندن  
 منقولدرکہ ولیمہ مذکورہ ایچون حاضرلنش اولان طعامہ  
 دعوت اولتان اصحاب کرام طاقم طاقم نوبتہ الہ ییوب  
 کیدرلردی ! . دعوتلی اصحاب کرامدن اوچ نفر، طعامدن  
 صوکرہ دارالعروسدہ اطالہ مکث ایدہرک قالدیلر .  
 کیتملرینی انلرہ ضمناً اخطار اولمق اوزرہ رسول اکرم  
 افندیمر ، طیشاری بہ چیقدی . نزد هایونلرنندہ انس  
 حضرت تلیردہ موجود ایدی . حضرت عائشہ رضی اللہ  
 تعالیٰ عنہانک اوطہسی قاپوسنہ دکیں کلدکدن صوکرہ اصحاب  
 ثلثہ نک چیققدقاری امیدیلہ کیری بہ دونہرک دارالعروسک قاپوسنہ  
 قدر کلدی . لیکن ہنوز چیقمدقارینی اکلامقلہ تکراردونوب

اولکی واردینی محله دکن یورومش وعزیمت وعودت  
خصوصی اوج دفعه تکرر ایتمشدر .

صوکی عودتنده اصحاب ثلثه نك چیق دقلرینی کور -  
مکله در حال ستر و حجاب امر بیورمش وعقیبنده استعید  
بالله [ یا ایها الذین امنوا لاتدخلوا بیوت النبی الا ان يؤذن  
لکم . . . . . ] آیت کریمه سی نازل اولمشدر .

آیت کریمه نك نزولیه امهات مؤمنین حجاب ارقه سنده  
قالدینی زمان آبا و ابناء کبی اقارب :

— ( یا رسول الله ! بز دخی دیکر لر کبی انلره حجاب

طیشاریسندن تمکلم می ایده جکنز ؟ )

دیملریله جناب حق : ( لاجناح علیهن فی آباءهن ولا ... )  
آیت کریمه سنی انزال ایله انلره مساعدده بیورمشدر .

جناب فاروق اعظم حضرتلرینک رأی عالیء فارو -  
قانه لرنده کی اصابت محقه سی دلائل واضحه سننددر که اشبو  
حجاب مسئله سنی ، آیتک نزولندن اولجه دفعاتله التزام و حتی  
ذات رسالتپناه یه دخی عرض واعلام ایتمشدی .

ینه انس بن مالک رضی الله عنه حضرتلرندن نقل  
اولنور که عمر الفاروق رضی الله تعالی عنه حضرتلری :  
( اوج شیده ربکم اراده علیه سنه توافق ایتمش اولدم )  
دیدی : ( یا رسول الله ! لوا تخذت من مقام ابراهیم



مصلی ) دیدم . ربمده ( واخلدوا من مقام ابراهیم مصلی )  
 آیت کریمه سنی انزال بیوردی . ( یا رسول الله ! یدخل  
 علی نساءک البر والفاجر فلوا مرتهن ان یحتجبن )  
 دیدم . آیت حجاب نازل اولدی . زوجات طاهرات  
 نبویه ، غیرتده اجتماع ایتدیکی زمان حق همایون رسالتینا .  
 هیده : ( عسی ربه ان یرده ان یدله ازواجاً خیرا  
 منکن ) دیمشدم . جناب حق ده عین وجهله انزال آیت  
 بیوردی .

۳

### — غزوة دومة الجندل —

دومة الجندل ، مدینه یه اون بش ، دمشق شامه بش  
 منزل مسافده اوزاق برقیودر اکا نسیبتله بلده یده  
 ( دومة الجندل ) دینله یور .

بعض اهالیسی ابناء سبیلله تعرض ایتیمکه جرئت  
 ایتیمکه اولدقلری مسموع عالی جناب پیغمبری اولدقدده  
 هم اشقیاء مرقومه یی تأدیب : همده شام طریق تجا .  
 رتنی تأمین ایتیمک اوزره حضرت رسول اکرم صلی الله  
 و تعالی علیه سلم افندیمز ، بیک نفر اهل اسلام بهادری

ایله برابر اولدینی حالده مدینه منوره دن شهر ربیع الاول  
یکرمی بشنده حرکت بیوردیار .

سمت مقصوده موصلت لرینه همان آذرب شی قالدینی  
یرده کی اهلینک تصادف اولنان حیوانات سوریلری  
اغتنام ایدلدی . چوبانلر ، حرکت اسلامیه دن خبر  
الدقلری زمان ترک خدمتله فرار ایتمش اولدقلرندن  
قورتیلدیلر .

روایت کوره اردوی هایون اوراده ایکی کون آرام  
ایتمش ایدی . بنی ناجیه ایله بنی فزاره نك « عین بن  
حصین » نام رئیس لری ، بلده لرنده حسب الموسم چایر  
بولمندیغندن بحمله حیواناتی مدینه منوره جوار لرینه  
دکین سوروب اوتارمغه - بعض قیود ایله مقید  
ومشروط اولمق اوزره - مساعده احساسی ذات رسالتینا -  
هیدن استدعا اتمکله اکا اولوجهله مساعده ویرلمشدر .

اندن صوکره ( دومة الجندل ) بلده سنه حرکت بیورلدی  
ایسده کافه اهلینک طاغیلوب میدانده کیمسه قالماش  
اولمی حسبیه حرب و قتال وقوعه کلدی .

آدملرندن اله کچیریلوب ده قبول دین اسلام خصوصی  
کندیسنه امر و تکلیف بیوریلان یالکز بر نفر آدم ،  
همان شرف دین اسلام ایله مشرف اولدی .

ذات عالیٰ رسالتپناهی ، اردوی همايونلریله برابر  
 او بلدهده برقاج کون اقامت بیوردقدن باشقه بعض  
 مفرزه عسکریه بی اطرافه جیقاردینی حالده کیمسه  
 بولنه مینجه بلا قتال مدینه یه عودت بیورلمشدر .  
 اردوی همايونك مدینه منوره یه مواصلتی ، ربیع الآخر  
 یکر میسنده ایدی .

ع

## — غزوة بنی مصطلق —

یا

{ غزوة مریسیع }

بنی مصطلق ، خزاعه قبیله سی عشارندن برعشیرت  
 اولدینی کبی « مریسیع » ده [ ۱ ] خزاعه دیارنده  
 قدید ناحیه سنده او عشیرته مخصوص بر صویك اسمیدر .  
 که فرعه برکونلك فرعهده مدینه یه اوتوز ایکی ساعت  
 مسافهده اوزاق برمحلدر .

خزاعیلردن « بنی مصطلق » عشیرتک رئیس « حرث بن  
 ابی ضرار » نام شخصک ، اهل اسلام علیهنده کرک کنندی

[ ۱ ] مریسیع : میمک ضعی ، رانک فتیحی ، یانک سکونی  
 سینک کسریله یای ثانیه نک وعینک سکونلریله اسم مصفردر !

عشیرتندن ، كرك كندینه قریب عشار سائر دن عسکر  
طویلامقده اولدینی مسموع عالی نبوی اولمغله افندیمز ،  
روایت کوره اولاً تحقیق ماده ضمننده « بریده بن  
الحصیب » حضرتلرینی مأموراً اوجانبه کوندرمشدی .  
فقط تحقیق واقع مسموعاتك صحتنی تأیید ایتدیکندن  
مدینه منورده ( ابوذر الغفاری ) رضی الله تعالی عنه  
حضرتلرینی بالاستخلاف شهر شعبانك ایکیمی یا اوچنده  
بیک نفر عساكر اسلامیه ایله برابر حرکت بیوردیلر .  
لکن بوغزوئه نك سنه سادسه هجریه ده وقوعبولدینی ده  
روایت دیکردر .

اردوی هایونده یالکیز اون نفر آتلی بولندی کی  
زوجات طاهرات نبویه دن ( عائشه ) رضی الله تعالی عنها  
حضرتلری ده معیت علیه احمدیه ده بولنیورایدی .  
کروه مکروه منسافقینندن ده برچوق افراد ، اردویه  
قاتامشدی . حتی روایت کوره هیچ بروقده عساكر اسلامیه  
ایله برابر بو قدر منافقك حرکت ایله دیکمی یوغیدی .

سردار قلمرو رسالت افندیمزك بیوك براردو  
ایله مدینه دن حرکت هایونلری خزاعیلرجه مسموع  
اولدقده ( حرث بن ابی ضرار ) ك باشندکی جمعیت اشقیا ،

مهابت اسلاميه قارشى بيوك برخوف وخشيتہ معروض  
قالدقن باشقه ياننده عشار سائرہ دن مجتمع اولان عربان  
ايسه اوخشيتہ هيچ تحمل ايدہ ميہ رك طاغلمشدى .

« حرث بن ابى ضرار » ك خشيتہ دوچار اولان  
عسكرى اسكى قوت وانتظامى غيب ايدہ رك بوزوق  
دوزن بر صورتہ اوتہ دہ بريده قالدقنندن « مريسيع »  
صوينده مراكب عسكريہ لرني صولار طورولر كن اردوى  
همايون اوزرلرينہ بغتہ كلوب چاتدى .

رسول اكرم صلى الله تعالى عليه وسلم افنديمزا انلرہ  
اولاً « دين اسلامى قبول ايدنلر ، جان وماللدن  
اميندلر » ديه قبول اسلام خصوصى تڪليف ايتديكى  
حالده ديكلہ دہ ميوب بلکہ مقاومت ومقابله تشبثاتنى كور .  
ديكندن همان طرفينجه اوق ايله حرب وقتاله كيريشلمك  
لازم كلش حضرت پيغمبر عساكر اسلاميه ي صف  
صف ترتيب ولواء مهاجرينى ابو بكر الصديق ؛ لواء  
انصارى سعد بن عبادہ رضى الله تعالى عنهما حضرتلرينہ  
تسليم بيوردقن صوكرہ اردويي هيئت مرتبه سيلہ دشمن  
اوزرينہ يوروتمشدر بنى مصطلق عسكرى ايسه او صورتلہ  
اولان هجوم اسلامه طيانه ميوب اون نفر تلفات  
ويرہ رك بوزولدى .

عسا کر اسلامیہ طرفندن یدیوز قدر اسیر وبش  
بیک قویون ایله اون - وعلی روایة ایکی - بیک دوه  
اله کچیرلدی .

اسرا میاننده « حرث بن ابی ضرار » ک ( جویریہ )  
نامنده کی قیزی ده بولنه رق ( ثابت بن قیس ) ک حصه سنه  
دوشمش اوده انی بدله ربط ایتشد .

فخر عالم صلی الله تعالی علیه وسلم افندیمز حضرتلری  
بدلی ثابت حضرتلرینه ویره رک ( جویریہ ) بی الوب آزاد  
ایله دکن صوکره کندیلرینه تزویج بیوردیلر . که اوزمان  
( جویریہ ) یکر می یاشنده ایدی .

( جویریہ ) رضی الله تعالی عنها حضرتلرینک او  
صورتله امهات مؤمنین عدادینه التحاق شرف عالمبها -  
سنه مظهر اولسی اوزرینه نزدنده اسیر بولنان کافه  
اصحاب کرام :

— ( رسول الله اکبر اقباسی ناصل اسیر اولمی ؟ )  
دیه اللرنده کی اسرای آزاد ایتشلردر .  
زمان معاودت اسلامیده یولده مهاجریندن و ( بنی  
لیث ) قبیله سندن ( هشام بن صبابه ) بی ، انصار کرامدن  
و ( عباده بن صامت ) حضرتلرینک متعلقاتندن بری  
طرفندن دشمن ظنیله قتل ایدلمشدی .

ینه او اثناده ایدی که جناب ( عمر الفاروق ) رضی -  
 الله تعالی عنه حضرت تلرینک اجیری ( جهجاه بن سعید  
 الغفاری ) ایله حلیف عبدالله، ابن ابی بولنان ( سنان بن وبر  
 الجهنی ) ارمه سنده وقوعه کلان بر منازعه اوزرینه -  
 اسلام عاینهده کی حسیات منافقانه سی هر زمان خارجه  
 تاثیر کو سترمکدن خالی قاله میان - منافق مشهور ( عبدالله  
 بن ابی بن سلول ) :

— ( شو مهاجرلره باقیکنز که هم بزم سایه مزده  
 کچینیورلر همده بزم حقارت ایدیورلر . ارتق انلره  
 برشی ویرمیکز . تا که طاغیلوب کیتسونلر ! هله بر کره  
 مدینه یه کیده لمده عزیز اولانلر البته ذلیل اولانلری قوغوب  
 چیقاره بیلیر ! )  
 سوزیله ، مدینه یه واریر ایسه اهل اسلامی اورادن  
 طردا یدوب چیقاره جنی معناسنی قصد ایتمش اولدقدن  
 صوکره :

— ( شو چکیلان حقارتلر ، هپ سزک ایشلریکنزک  
 جزاسیدر . بلده لریکنزی مهاجرلره ویردیکز . مالکنزی  
 انلره تقسیم ایتدیکز . بونلره اکر برشی ویرمیه جک  
 اولسه کنز هیچ بریسی ایچمزدده یاشایه من . هپسیده .  
 چکیلوب کیدر )



ترهات منافقانه سنی ده اسکی سوزلرینه علاوه ایتشدرد .  
 منافق لعینک بو ترهاتی ، اصحاب کرامدن ومها -  
 جریندن ( زید بن ارقم ) رضی الله تعالی عنه حضرتلری  
 ایشیدوب متأثر اولمش بولمغله کلوب مسموعاتی حضرت  
 رسول اکرمه بتمامها افاده ایلهدیکندن اوزمان حضور پرنو  
 رسالتپناهیده حاضر بالمجلس بولنان جناب عمر الفاروق  
 رضی الله تعالی عنه حضرتلری :

— ( یارسول الله ! عبدالله بن بشیره امر بیور . کهاو  
 منافقی شمدی اولدیرسون ! )

دیدیکی حالدہ سید کائنات علیه افضل الصلوة واکمل  
 التحیات افندیمر حضرتلری ابن سلوک ظاهراً اسلام  
 اولدیغنه باقهرق اکا مساعده ویرمدی .

عبدالله بن ابی بن سلول لعینک اوغلی واصحاب  
 کرامدن ( عبدالله ) رضی الله تعالی عنه حضرتلری ،  
 باباسنک ترهات منافقانه سنی ایشدکده حضور سامی  
 رسالتپناهی یه کلوب :

— ( یارسول الله ! بابامک قتلنی مراد بیوریورسه کنز  
 امر بیورده شمدی کیدوب باشنی کسهیم )  
 دیدیکی حالدہ حضرت پیغمبر صلی علیه رب البر ، اکاده مسا -

عده ويرميه رك بلكه خير ايله دعا وباباسنه ضرر وقوعنى  
تجويز اتميه جكنى جواباً افاده بيورديلر .

اثناء معاودتده مدينه منوره يه مواصلت اولندينى  
زمان مشاراليه ( عبدالله ) رضى الله عنه حضرتلى :

— ( اكر اللهك ورسولك عزتى اقرار اتمسهك

والله شوقيلنجمله بويىكى اوره جفم )

ديه باباسى ( عبدالله ابن ابى ) يى مدينه يه دخولن شديدآ

منع اتمشدى . منافق ، اوغلك او تهديدنى ( ويحك

افاعل انت ) سوزيله صايمايه يى ايستدى ! لكن ، جناب

عبداللهك سوزنده كى جديته قارشى عزت الهيه واحمد .

يه يى اقراردن باشقه بر طريق اسلم اولمديغنه اينانديغند .

ندرکه ( اشهد ان العزة لله ولرسوله وللمؤمنين ) ديه رك

نسلیم كيفيت ايله دكدن صوكره دخول مدينه يه موفق

اوله بيلمشدر .

بناءً عليه حضرت رسول اكرم ، غيرتلى عبدالله

حضرتلى بچون : ( جزاك الله عن رسوله وعن المؤمنين

خيراً ) دعاسنى بيورديلر .

مدينه يه تقرب ايله دكلرى زمان آتيليرى دوشو .

ره جك قدر شدتلى بر روزكارك اسمى اوزرينه

رسول كبريا :

— « ايشته بوكون نفاقى عظيم اولان بر منافق مدينه ده  
فوت اولدى »

ديه روزكارك او آنده كي هوبى موت منافقه دليل اولديغه  
اشارت بيور مشاردى

مكر اوكون عظماء يهودنى قينقا عدن ( زيد بن رفاعه )  
نام منافق فوت اولمشدى !

اردوى هايون، عودت ايتديكى زمان غره رمضان  
شريفده مدينه يه مواصلت ايتمش اولديغه كوره مدت  
سفر يكرمى يدى ، يكرمى سكز كون اولمق لازم كلير .

يولده — وعلى روايه بنى نجار ديارنده — سهوا  
قتل ايدلمش اولان ( هشام بن صبابه الكنانى ) نك  
( مقيس ) نامنده كي مشرك — ومكده مقيم — برادرى ،  
مواصلت اسلاميه دن صوكره مدينه منوره يه كلهرك  
قبول اسلام ايتمكه برابر طلب ديت ضمننده رسول الله  
افنديمزه بئ شكوى دخی ايله ديكنشدن يا قاتلك ميدانه  
چيقارلمسى ويا ديتك طرفلر فلرندن تسويه ايدلمسى  
خصوصى تبليغ ايتم اوزره بنى فهردن بر ذاتى مقيسه  
ترفيق ايدهرك هرايكيسنى بنى نجاره كوندرمش ايدى .

بنی نجار، قاتلی اظهاره امکان بوله مدیغندن امر عالی  
رسالتیناهی اوزره مقتولک دیتی اولمق اوزره مقیمه یوز  
حوه ویرمشلر !

مقیس ایسه دیتی الوب مدینه منوره یه متوجه آیوله  
چیققدن صوکره شیطان ، انک ضمیر پر تقصیرینه  
( برادر یکک دیتی اوله رق بر قاج شی ایله اکتفا اتمک کلک  
سکا عاردر . یانکده کی آدمی اولدیر ! کهنسی نفسه مقابل  
اولدیرمش اولورسک ) وسوسه لرینی طولدیرمغله بولدینی  
قرصندن بالاستفاده همان برطاش اوروب رفیقنی اولدیرمش  
والدینی دوملری :

قتلت به فہراً و حملت عقله  
سراة بنی النجار ارباب قارع  
وادرکت ناری واضطجعت موسداً  
و کنت الی الاصنام اول راجع

کی بعض اشعار او قویه او قویه مکیه طوغری سوق و ایصال  
ایده رک کندیسینی ده مرتد اولمشدر .  
فتح مکه سنه سنه دمی هدر ایدیلان مشرکیندن بری ده  
مصر قوم مقیس ایدی .

## ✽ غزوہ خندق ✽

یا

{ غزوہ احزاب }

بو غزہ ، شہر شوالدہ وقوعہ گلش ومدتی دہ یکر می  
کوندن زیادہ دوام وامتداد ایلہ مشدر .

نقض عہد ایلہ دکارندن طولای بنی نضیر ایلہ بنی  
قینقاع یہودی لیرینک مدینہ دن طرد وتبعید ایدلماری  
حمیت یہودیہ سنی او یاندرمش اولان ویہودی لیرک اہل  
اسلامہ ورسول کبریایہ بر ابو الجہل عداوتی دیمک  
بولٹان « حی بن اخطب » ، « کنانہ بن ابی الربیع »  
کبی بر طاقم رؤساء یہودی ایلہ بر لکدہ مکہ یہ کیدہ رک  
اشراف مشرکین قریشہ :

— « سزکلہ متفق اولور ایسہک اہل اسلامی محو

واستیصال ایدہ بیلہ جکز »

دیہ مسلمین علمیندہ بعض شدت کوسترمش ، اشراف  
مرقومہ دخی ذاتاً دشمن اولدیغندن او خصوصہ اتفاق  
حصولنہ پک چاپک موفقیت حاصل اولدقن صوکرہ حی ،  
اورادن دیار نجدہ کیتمش و اہالیسنی اتفاقہ دعوت برلہ انلردن

« بنی غطفان ، بنی سلیم » کبی بعض قبائل وعشائری  
دائرة اتفاقه ادخال ایدم بیلمشدر .

ایشته بو موفقیت اوزرینه قریش واکا متفق بولنان  
اتباعی ، تجهیزات عسکریه به باشلامق اوزره دارالندوده  
عقد لواء مشورت ایدوب حضرت رسول کبریا ایله محام  
ربه ومقاتله به عموماً قرار ویردکاری زمان ابو سفیانک  
ریاست قوماندانسی التنده - اوچیوزی آتلی اولمق  
اوزره - قریش واتباعی بولنان احایشدن وبنی کنا -  
نه دن كذلك اهل تهامه دن درتیک عسکر طوبلانمشدر .  
که اشبو عسکرک بیک بشینوز رأس دوه سی ده موجود  
وعلمداری روایت کوره « عثمان بن ابی طلحه » ایدی ! .  
اولوقت که قریش اردوسی هان متهی حرکت برحال  
سفرده اولدینی کورولدی بنی خزاعه دن بری مکه دن  
دورت کیجده کنه دینسی مدینه منوره به یتشدیروب کیفیتی  
حبیب خدایه تبلیغ واعلام ایتشدی .

حضرت پیغمبر ، درحال اعیان وارکان امتی جمع  
ایده رک مسئله ی زمین مشاوره ومذاکره به وضع بیور -  
دیور . هرکس بو بابده کی مطالعه سنی بیان ایدیور ایدی .  
سلمان فارسی رضی الله عنه حضرت تبری دخی اوزمان مجلس  
مذاکره حاضر ایدی . رأی ومطالعه سنی بیان ایتدی .  
دیدى که :

— ( یا رسول الله ! بز فارس اقلیمنده سواری بر  
 دشمن عسکرینک هجوم و تجاوزندن قورقدیغمز زمان  
 اطرافمه خندق قازارایدک . دشمن سواری عسکری ده  
 خندقدن کچه مزدی . بزده امین اولورایدک )  
 رسول اکرم صلی الله تعالی علیه وسلم افندیمز حضرت تلی  
 انک اشبو رأینی بکندیکنندن هان موقع تطبیق  
 واجرایه قونلمق یعنی اطراف مدینه خندقله قوشادلق اوزره  
 مدینه منوره ده قازمه کوره کبی تقدیر آلات و ادوات حفریه  
 وار ایسه هپسینی طویللا تمشدر ..

### استطراد

و

{ سلمان رضی عنه الرحمن }

سلمان فارسی حضرت تلی ، سید کائنات علیه افضل  
 الصلوة و اکمل التحیات افندیمزک خواص خدامندن و کبار  
 اصحاب کرامندن بر ذاتدر .  
 کندهیسی ایران بلادینک ( نیشابور ) شهری مجو -  
 سیلرندن ( فیروز ) نامنده بر آدم ایکن بر اراق تنصر  
 ایدهرک دیار شامه کلش اوراده علوم دینییه تحصیل  
 ایتدکن صوکره ( موصل ، نصیبین ، اموریه )



طرفلرینه طوغری کیتمش ، او ائنده ایسه فخر هر د  
 وجهان عایه صلواة الرحمن افندیملک پیام رسالتلرینی  
 اک صوک یاننده بولندیغی بر راهبدن ایشتمش ونجی  
 دیشان آخر الزمانک ده ( محل هجرتی عربستانده بین  
 الحرتین خورمالقلی بر یردر . صدقه قبول ایتمز . هدیه  
 آلیر . مبارک ظهر شریف-لرنده بین الکتفین خاتم نبوتی  
 بولنه جقدر ) طرزنده بعض اوصاف شریفه رسالتپنا-  
 هیلرینی ده المش بولمغله بنی کلبدن بر کروه نصرانی ایله  
 همان رفیق اوله رق مدینه منوره یه گمشدر :

فقط خائن رفقاسی ، سلمانی طوتوب (وادی  
 القری ) ده بر یهودی یه صاتمیلرله آلان یهودی ( بنی  
 قریظه ) دن ایکنجی بر یهودی یه صاتمیش اوده جناب  
 سلمانی مدینه یه کتیرمشدر .

سلمان ، مدینه یه اولوجهله کلش اولدقدن صوکره  
 بر زمان حضور عالی رسالتپناهی یه کلوب حالتی عرض  
 و بیان ایدهرک رقتی کتایته ربط ایتدیردی . انک او  
 صورتله کتایته کلمش اولسی اوزرینه بدلنی ذات عالی  
 رسالتپناهی ، صاحبنه اعطا ایدهرک سلمانی آزاد بیوردیلر  
 بناء علیه فارسی مشارالیه ایشته بووجه اوزره موالی

گرام جناب پیغمبری صرہ سنہ کچمک شرفی احراز  
ایله مشدر .

علامہ قسطلانی حضرت تلوینک بیانہ کورہ بدل مکا -  
تبہ سی [ قرق التون بدل ایله برابر اوچیوز عدد خورما  
فیدہ سنی دیکمک خدمت بدنیہ سی ] ایدی !  
اودرلو بدل ایله کتابتی کسلد کدن صوکرہ رسول  
ذیشان افندیمز، اصحاب کرامنه خطاباً :

— « سلمان قرنداش کزہ معاونت ایدی کز ! »  
بیور مقلہ هرکس کیمی اون بش فیدہ، کیمی دها فضالہ  
ویا اکسک ویرہ رک مجموعی تام اوچیوز فیدہ یہ بالغ اولنجہ  
جناب سلمان، طرف ذیشرف پیغمبریدن :

— « یا سلمان ! سن کیتده بونلر نردہ دیکیلہ جک  
ایسه یرلرینی قاز ! لکن قاز مق ایشی بترسه بکا خبر ویرده  
فیدہ لری کندی المله دیکه جکم »

امروفرما هایونیلہ مأمور بیورلمش اولدیغندن اکا  
کورہ حرکت ایدوب ایشی اتمام ایتد کدن صوکرہ  
بر موجب امروفرمان خبر ویرمش وبعده رسول ذیشان  
افندیمز دخی او اوچیوز فیدہ دن ایکی یوز طقسان طقوز  
عددی کندی مبارک دست شریف لریله غرس بیورمشلر  
بر عدد دینی ده جناب فاروق، دیکمشلردی . بوده معجز اتندندرکه

مغروسات پیغمبری همان اوسنه میوم ویردیکی خالد فاروق  
 دیکدیکی نخله قورومشدی . رسالتناه افندی . فاروق  
 قورومش نخله سی سوکوب یرینه بردیگری ینه یدعلیه  
 لریله دیکدیلر . نخله لرك غرس ایدلیدیکی متعاقب طاق  
 یورطه سی قدر برالتون قطعه سی جیب هایون  
 رسالتناهیدن سلمانہ احسان بیورلدی . سلمان دخی  
 اواتونله دینی تأدیه وتسویه ایتشد .

جناب سلمانك اوچوز الی سنه یاشادینی سروی  
 و آثاردہ مذکورایسده عمرینك اکیوزاللی سنه اولدینی  
 روایتی بالنسبه صحتہ قریب کوریلہ بیلر . عیسیٰ علیہ السلامک  
 وصیسنه ادراك ایتدیکی دخی روایت اخراذر ! تاریخ  
 وفاتی بعدالہجرہ سنہ [ ۳۶ ]  
 انتہی

رسول کبریا افندیمر ایله متفق و معاهد بولنان بنی  
 قریظه یهودیلرینك الارنده کی او مثللو ادوات و آلات  
 امر حفرده قوللانلق اوزره النمش و حضرت پیغمبر  
 اهل اسلام ایله برابر خارج مدینه یه چیقوب خندق  
 حفره باشلاشمدر . خندق ایسه عمقی اون؛ عرضی قرق  
 زراع اولق اوزره ترتیب ایدلمش ایدی .  
 ذات عالی رسالتناهی، اهل اسلامی حفر خندقه تشویق

ایچون بالذات ظهر شریفاریله طوپراق طاشیر ومبارک  
الریله حفره چالیشیر ایدی .

بناءً علیه عمله اسلامیة، فرط مرتبه دقت واهتمام  
اوزره سعی واقدام ایدرلردی . هله جناب سلمان فارسی  
رضی الله تعالی عنه حضر تلی، غایت قوتلی، وبویله معظمت  
اموربدنیده خدمته الیشق اولدیغندن اون آدمک کوره .  
جکی ایشی یالکز کندیسی کورور ایدی .

حتی بوندن طولاییدرکه انصار کرام، قوتلی سلمان  
حضر تلیله افتخار ایتک اوزره :

— « سلمان بزدندر »

دیدکلرندن مهاجرین کرام دخی عین وجهله :

— « خیر ! سلمان سزدن دکل بزدندر »

دیرایکن هرایکی طرفه قارشی ذات عالی نبوی طرف  
اشرفلرندن ده :

— « سلمان بزدندر »

تلطیف سعادت ردیف رسالتنهایسی ابدال بیورلمغله  
کیفیه شاعر :

لقدرقی سلمان بعدرقه

منزلة شامحة البنیان

وکیف لاوالمصطفی قدعده

من اهل بيته العظيم الشأن

قطعة دلنشینى ايله اشارت ایتمشدر .

ایشته خندق بو صورتله حفر اولنور . ایکن سید  
کائنات علیه افضل الصلوة والتحيات افندیمر حضرتلرندن  
پک چوق معجزات غریبه ظهور ایتمشدر :

از جمله انصار کرامدن « نعمان بن بشیر بن سعد »  
رضی الله تعالی عنه حضرتلرینک والده سی ، دایسی  
« عبدالله بن رواحه » ايله زوجی « بشیر » رضی الله تعالی  
عنهما حضرتلرینه قیزینک النده اوله رق بر مقدار خرما  
کوندرمشدی .

قیز، النده خرما اولدیغی حالده کچرکن رسول ذیشان  
کوروب :

— « خرمایی بورایه کتیر ! »

دیه قیزجغزی چاغیردی . قیز دخی خرمایی کتیروب  
اونی کریمک مبارک ایکی آوجی ایچنه قویدی . لیکن  
آوج طولمدی .

انک اوزرینه رسول اکرم افندیمر، بریز کتیرده رک  
خرمایی او، بیزک اوستنه قویوب یایدقن صوکره خندقده  
ایشله یان اهل اسلامی خرما یمکه اصحاب کرامدن بری  
واسطه سیله دعوت بیوردی .

اصحاب ده طاقم طاقم كلهرك بيز اوستنده كي خرمادن  
طويونجه يه قدر يديلر . اصحاب يدكجه خرما زياده لشوب  
بيزك اطرافندن طاشار دو كيلير ایدی ! .

جناب خير البريه عليه وعلى صاحبه افضل الاثنية  
والتحية افنديمز، آج اولدقلري سببه بنساء صلب كريملري  
بو كيلوب ده كنديلرينك ايشدن كيري قالماملريچون مبارك  
بطن شريفارينه طاش باغلي اولديني حالد طوپراق طاشيه  
طورورلردی . انصار كرامدن جناب « جابر بن عبدالله »  
رضي الله تعالى عنه حضرتلري، اونبي محترم صلى الله تعالى  
عليه وسلم افنديمز حضرتلرينه خطاباً :

— « يارسول الله ! بكا اوه قدر كيمكه اذن وير ! »  
ديمكله مظهر اذن عالي رسالتپناهي اوله رق خانه سنه كيتمش  
وزوجه سي « سهيله » ياخود « سهيمه بنت مسعود ابن  
اوس الظفريه الانصاريه » يه :

— « رسول الله آج كوردم . انك آج طورديغني  
كورمكه تحمل ايدمدم . سنده يينه جك برشي وارمي ؟ »  
ديه صورمش سهيله ده :

— « اوت برمقدار ايله برده ضعيف قوزيچغمز وار »  
جوانبي ويرد كدن صوكره قوزويي ذبح وارپه سني ده  
طحن ايدوب بعده جابر لحمي چولمك ايچنه، چولمكي ده

اوج طاش اوستنده آتسه وضع وارپه اوننی ده خیر یایدیرم رق  
چولمکده کی صو همان قاینامغه باشلار ایکن دونوب جانب  
جلیل جناب رسالتناهی یه گلشدی .

باشقه برروایته نظرا قوزوی کسوب لحنی ایردقدن  
صو کره ارپه اوننی هنوز خیر یایدیرمدن گلشدی .

بردیگر روایته کوره ده قوزوی جابر دکل زوجہ سی  
سہیلہ کسمشدی . حتی سہیلہ نلک قوزی یی نوجہلہ کسیدیکنی  
کورن ایکی چوجغندن بری ، دیکرینہ : « آنام قوزوی  
ناصل کسمش ؟ سکا کوسترہیم می » دیہ برادرندن  
آلدیغی « کوستر ! » جواب موافقتی اوزرینہ همان انی  
قزغانک یانہ یاتوروب بوغازلامشدر . لکن چوجغنک  
بوغازندن قان فیشقیرمقدہ اولدیغنی سہیلہ کورمکله برابر  
همان صیحه ایتمکک باشلادیغندن النده بچاق بولنمش اولان  
چوجق ، صبی مذبوحک اوستندن اتلایوب قاجق اوزرہ  
ایکن موازنہ حرکتی غائب ایدہرک قاینار قزغانہ دوشمش  
درحال ہلاکدہ اولمشدر .

بعده سہیلہ ، ہر ایکی چوجغنی قالدیردی . برر بزہ  
بورویہرک برکوشہیہ صاقلادقدن صو کرہ رسول اللہ  
افندیمز ایچون حاضر لامقدہ اولدیغنی طعام الضیافہ  
قیدینہ دوشدی .



وقتا که حضرت جابر ، نزد عالی نبوی به کلدی ذات  
رسالتپناهی به کیزلیجه اوله رق :

— « یارسول الله! شویله بویله بر مقدار طعامجغزمن  
وار بیوریکز کیدهلم . یانکزه ایکی یالوج ارقداش ده  
الیکز ! »

دیدى . حضرت پیغمبر ایسه : « طعامکک مقداری ناصل »  
دیه صورهرق مقداری اوکر نمکله « کثیرطیب » بیوردى . و :  
— « کیت سهیله به سهویله ! بن اویکزه واروب  
طعامی کورونجه به دکین چولمکی آتشدن ایندیرمسون !  
اکمکی ده تنوردن چیقارمسون ! » و علی روایة « اریه اونى  
بن کلدکجه خیر یاممسون ! »

امیرینی ویره رک انی خانه سنه کوندردى !  
بعده موجود عمله اسلامیه به خطا بآده :

— « بیوریکز جابرک خانه سنه ! »

دیه ندا ایتدیردى !

تمام بیک نفر بولنان اهل خندق ایله برابر اولدقلری  
حاله حضرت نبی ذیشان افندیمن واروب جابرک خانه سنه  
ایندى .

لکن حضرت جابر رضی الله عنه افندیمن ، حاضرلیه  
بیلدیکی طعام الضیافه نک قلت وعدم کفایتیله برابر اوجاعت

كثيره نك كلديكنى كوروب شاشيردى . لكن نه يابسون !  
 اترق چاره يوق ايدى ! جمعيت تماميله كلشدى ! حتى حيرت  
 واضطراب فوق العاده لرندن طولاي زوجسه سى سهيله يه ;  
 — « ايواه يمكمز يتميه جك ! رسول الله بتون اصحابيله  
 برابر اولديغى حالده كلدى »

جديد يکندن سهيله :

— « او ، سكا طعامك كميتهن صورديمي ؟ »

سؤالنده بولنوب جابردن :

« اوت صوردى ! »

جوابنى المقله :

— اويله ايسه الله ورسول الله ، ايشى دها ايو بيلير .

بىر طعاممىز كميتهنى كنديسنه خبر ويردك »

حديه اوندن اويله هيچ تلاش كوسترمامشدر .

حضرت نبى محترم ، كافه اهل خندق اصحابيله برابر

اوله رق جابر ك خانه سنه سايه انداز غز واجلال اولد قلرندن

جابه .

— « يا جابر ! جناب الله طرفندن بو خانه كرك توسيع

ايدلمسنى ايسترميسكز ؟ »

ميوروب جابردن « اوت ! » جوابنى الديلر . بعده اولاً ايكي

حيزى اوستنه او طوره رق دعا ايتمكه باشلاديلر .

صاحب خانه جابر ، روایت ایتمشدر که دعاء نبوی  
ساعتتده خانەنك طاوانی یوکسلمش ! درت دیواری دخی  
طیشاریلره طوغری چیقهرق بنا کینیشلمشدر ! .

بعده مبارك دست شریفلرینی طعام اوزرینه وضع  
برله دعا بیوردی . وصوکره اصحاب کرامنه :

— « ایجری کیریکنز ! لکن پک ده غابه لقله کیرمایکنز !  
یعنی آزار ، آزار کیریکنز »

بیوردیلر .

آریه اوننک خیر ایدلمسندن مقدم مواصات همایونك  
وقوعنی روایت ایدنلرك آثار تاریخیه سی ده حضرت نبی محترم  
افندیمنك اولاً خیره ، بعده چولمكك ایچنده کی صویه  
توکوروب صوکره برکتله دعا بیوردقلری طرزنده  
کورولمکده در .

تناول طعام امر بیوردی . حضرت جابر ، اوزمان  
اصحاب کرامی سفره باشنه اونر اونر سوق ایدردی .  
اصحاب کرام دخی تماماً طعام ایدرک یالکنز ذات عالی  
رسالتپناهی ایله جابر قالدیلر . رسول اکرم حضرتلری  
جابر بیوردیلر که :

— « کتیر ! چوجقلری ! سن بن انلر برابر یمک

یه جکنز »

جابر دخی کتیرمک اوزره طیشاری به چیقدی .  
سهیله چوجقلرک اویومقده اولدینی جوابی ویرمکه  
جابر، جوابی عین افاده اوزره افندیمره تبایغ ایتدی .  
لکن حضرت رسول اکرم صلی الله تعالی علیه وسلم  
افندیمر :

— « والله ایکی چوجقلر برابر اولمینه یمک یم »  
دیه قسم ایتدیکندن جابر چوجقلری المق ایچون تکرار  
سهیله نك زردینه کیتدی . سهیله دخی ارتق مجبور  
قاله رق : « فدونك وایا هم ! » دیدکن صوکره  
چوجقلرک اوستنده کی اورتوی قالدیرنجه هرایکی چوجغک  
ده اورتو التنده متعاق بر وضعده اوینایه طور دقلرینی  
کورمش وهر ایکسینی ده یرندن قالدیره رق حضور پر نور  
رسالتپناهی یه کوندرمشدر !!

بعدالطعام ایکی چوجغک باشنه اوکون کلش اولان  
وقوعاتی حضرت جابر خبر ویرمکه جابر هم متحیر ،  
هم ده متشکر اولمشدر .

ذات عالی نبوینك اولاً تناول بیوروب بعده  
اصحاب کرامك اکا تبعاً سفره یه اوطوردقلری روایتی -  
ده واردر !

معجزات باهرات جناب محمدیه دندرکه بر مقدار اربه

اتمکله بر ضعیف قویو تجزیدن عبارت اولان طعامی بیک  
کشی بیتیره مدی !

حتی طعامک بقیه سی ده قالمغه حضرت رسول اکرم  
صلی الله علیه وسلم افندیمز سهیله یه :

— « یا سهیله ! سن شوبقیه الطعامی اکل ایت :  
وایسترسه ک اهدا دخی ایت ! »  
بیور مشلردر .

بوده معجزات باهرات جناب رسالتنهایند و که  
حضرت سلمانک بولندی طاقک حصه سنه اصابت ایدق  
قسمدن بر یرده بیاض بر قو حه مان قیا حیقمشمدی  
طاقم افرادی ، بر چوق اوغراشد قلی حالد طانی  
یرندن طرح و اخراج بر درلو موفق اوله مشلر . نهایت  
« عمرو بن عوف » رضی الله تعالی عنہک اشارتی اوزرینه  
سلمان ، حضور پر نور پیغمبری یه کیده رک کیفیتی عرض  
ایتدیکندن حضرت پیغمبر کلدی . سلمانک الله کی  
کولونکی الوب خندقه ایندی . وظهر شریفلرینی خندق  
بر کنارینه طاییه رق « بسم الله . . . . » دیمکه برابر هات  
طاشه اوردی . طاشک ثلثی قوپارتدی ! . .

بو برنجی اورو شده کولونک ایله طاشک یکدیگرینه  
اولان شدت تماس و تصادمندن بر شراره پارلایوبه

طاشك جهت یمانیه سنه طوغری صیچرا دی . رسول ذیشان  
علیه صلوٰۃ الرحمن افندیمر :

— ( الله اکبر . بکا یمنک مفتاحلری ویرلدی .  
والله بن شمدی اولدیغم یردن بری صنعانک قاپولرینی  
کور یورم )

بیوردیلر . کولونکی بعد البسمله قاییه بردها اوروب نصفی  
قوبارمش وعین وجهله بر شراره دها بلاد رومیه وشامیه  
جهته طوغری صیچرامش بولمغله :

— ( الله اکبر . بکا شامک مفتاحلری ویرلدی .  
والله بن بوساعته شامک قیرمزی کوشکلرینی کور یورم )  
بیوردقدن صوکره قاییه براوچنجی دها اوردیلر .  
طاش ، کثیباً مهیلاً محو اولدی . کذلک ضربه نالته ده  
بلاد ایرانیه جانبه طوغری صیچرایان شراره نک صخره دن  
ظهورینی متعاقب افندیمر :

— ( الله اکبر . بکا فارس اقلیمک مفتاحلری  
ویرلدی . والله بن بوانده حیره نک کوشکلرینی ، مدائن  
کمرانی کوره یورم )  
بیورمشدر ! . .

اشبو تبشیرات جلیله نبویه نک مشکات صدر

شریف رسالتدن ظهور و تجلی ایتدیکی ائناده نزد ساهی  
حضرت پیغمبریده حاضر بولنوب بشارت عظیمه مذکو -  
رهی دیکله مش اولان جناب سلمان :

— ( طوغری سویله دك یار سول الله ! صفتلری سنك

بیوردیغك کیدر )

دیملکه رسالتپناه افندیمز دخی :

— ( هذه فتوح یفتحها الله بعدی یا سلمان ! )

بیوردیلر . ایشته بونك اوزرینه کروه مکروه منافقیندن

( معتب بن قشیر ) نام شخص لعینك بولندیغی طائفه ،

اهل خندقه خطاباً :

— ( مدائن کسرایی وقصور حیره یی مدینه دن بری

کور یورم دیه سزه خبر ویروب ده برطاقم خیالات

وتصورات باطله یی وعد ایدن محمد [ علیه الصلوة

والسلام ] ك شو سوزلرندن تعجب ایتزمیسکمز ؟

حالبوکه سز اعدا کزه قارشى تجاوزدن وانلرله مردانه

مبارزه دن عاجز اولدیغکمز ایچون اطراف کزه خندق بيله

قازوب طور یورسکمز )

دیملکه قدر جرئت ایتشلردر !

معاملات حفریه ، برروایته کوره التی کون ، دیگر



روایتہ کورہ ایکی ہفتہ روایت اخرایہ نظراً برآی  
ظرفندہ ختام بولدی .

قریش اردوسی ( مرالظہران ) نام محلہ کلدیکی  
زمان نجددن - بنی فزارہ قبیلہ سی شیخی ( عینہ بن  
حصین بن حذیفہ بن بدر ) کہ قومانداسی التمدہ اولہرق -  
کلان بنی غطفان قبائلی عسکری ایلہ ملاقات ایتشدرد .  
بنی مرہ قبیلہ سی شیخی ( حارث بن عوف بن ابی  
حارثہ ) نام شخص دخی عسا کر غطفانیہ نک ایچندہ ایلری  
ککش امیرلردن ایدی .

ینہ او محلہ عسا کر نجدیہ دن بنی سلیم ، بنی اشجع ،  
بنی اسد بنی فزارہ ، بنی مرہ قبائلی عسکرلری دە  
( سفیان بن عبد شمس ، مسعر بن رجیلہ بن نویرہ بن  
طریف ، طلحہ بن خویلد ، عینہ ، حارث بن عوف ) کہ  
ریاستلری التمدہ اولہرق قریش اردوسنہ التحاق  
ایتدیلرکہ عمومک مجموعی اون وعلی روایتہ اون ایکی  
بیک نفرہ بالغ ایدی .

ابو سفیان ، ایشته او بیوک اردوسیله مدینہ منورہ  
اوزرینہ طوغری یورودی . شو ترتیب اوزرہ کہ :  
( عین بن حصین ) ایلہ ( حارث بن عوف ) کہ اللارندہ کی  
عسا کر نجدیہ ، مدینہ منورہ نک جهت شرقیہ سندن

بری کلوب جبل احد طرفندن ( ذنب نعمی ) نام  
محلہ ایندی .

ابو سفیانک قومانداسی التتده بولسان قریش  
وبنی کنانه ، احابیش ، اهل تہامہ عسکری دہ جہت  
غربہ سندن کلدی .

جناب قافلہ سالار انبیا علیہ صلوات رب الاعلی  
حضرتلری دخی عسا کر اسلامیہ ایلہ برابر خارج مدینہ یہ  
چیقوب ( سلع ) نام طاغہ ارقہ ویرہ رک دشمنہ قارش  
طوردی .

موجود عسا کر اسلامیہ ایسہ یالکیز اوچ بیک ؛  
آتلیسی دہ اوتوز التی نفر دن عبارت اولوب مهاجرین  
فرقہ سنک منجاغی ( زید بن حارثہ ) دہ انصارک منجاغی ( سعد  
بن عبادہ ) رضی اللہ تعالی عنہما حضرتلرندہ ایدی .  
مشرکین اردوسی ، همان بر حملہ دہ اهل اسلامی  
محو و مضمحل ایتک نیتیلہ دہشتلی بر صورتدہ هجوم  
ایتدی .

حالبوکہ اویلہ بر طرز مدہ شدہ هجوم ایدہ کلیر ایکن  
اوکلرینہ قیامت بر خندق عظیمک چیقویور دیکنی کوردکاری  
کبی متحیر طورہ قالدیلر !  
خندق دن کچیلہ جک بریر بولمق ایچون اوتہ یہ ، بری یہ

قوشدیلر لکن کچمکه امکان بوله مدیلر . هر نه طرفدن سکر تدیلر ایسه اهل اسلام طرفدن اوق و طاش کبی بعض مرمیات ایله شدتلی مدافعاته تصادف ایلدکلرندن نهایت بالضروره محاربه ده وعسا کر اسلامییه محاصره الته المغه و طرف اهل اسلامندن ده مقابله مر دانه ده کیرشیلدی .

ایشته اهل اسلامک بویله الزیاده تلاشلی ، و مشغول بولندیغی برصره ده ایدی که اولجه معاهده ایتمش بولنان بنی قریظه یهودیلرینک نقض عهد ایله دکلری ایشیدلمشدر : « حی بن اخطب ، ملعون بنی قریظه یی اغوا ایچون « کعب بن اسد » لک یاننه کیتدیکی زمان قدوم حییدن خبردار اولان کعب ، قاپوسنی قاپایوب حی لعینی قبول ایتمامکله حی :

— « آج قاپویی یا کعب ! »

دیه باغیرمش کعب دخی جوابده :

— « ای حی ! سن مشئوم بر آدمسک بن عهد ایتدم .

محمد [ علیه الصلوة والسلام ] ایله اره مرزده کی عهدی

نقض ایدمم »

دیمش حی ایسه :

— « هله آج ! قونوشه جنم »

اصرارنده بولنديغي حالده ينه :

— « يوق آجه م »

جوابنى المغله :

— « والله ايجرى كير رسم اضافه اطعام طعامه مجبور

اولمق قورقوسيله اچيورسك »

ديديكندن كعب ، ارتق قايوي آچغه مجبور اولمشدر .

اره لرنده جريان ايدن محاوره نك بدايتنده :

— « ويحك يا كعب ! جئتك بعز الدهر وبحر طام .

جئتك بقریش على قادتها و ساداتها حتى انزلتهم بمجتمع الاسيال

من دومة . و بغطفان على قادتها و ساداتها حتى انزلتهم بذنب نعمى

الى جانب احد . قد عاهدوني و عاهدوني ان لا يبرحوا حتى

يستأصلوا محمداً و من معه »

و اديلرنده كزن ملعون حي ، كعبدن :

— « جئتني والله بذل الدهر و بجام قدير ق ماؤه

و يرعد و يبرق ليس فيه شيء . دعنى و محمدا و ماانا عليه . فانى

لم ارم من محمد الا صدقاً و وفاء »

مقابله سنى كوردىكى حالده دره دن دپه دن بحث ايدهر ك

نهایت « اكر محمد يلى استيصال ايدمه مدن قریش مكه يه

رجعت ايدوب ده محمد يارك عليهم كزه قيام ايتلمري احتمالي  
 خاطر يکزه کليور ايسه امر استيصال اتمام ايدلمد کجه عودت  
 ايتاملرينه مدار اولمق اوزره عظماء قريشدن یتمش دانه سني  
 سزه رهن ويردير یرم « عهد وثيقي ويرمش اوصورتله  
 کعبک افکاريني تشويش وتسميم ايدهرک عهديني نقض  
 ايتدير مشدر. شو محاوره نك زمان جرياننده » نعيم بن مسعود  
 اشجعي « دخي اومجلاسه حاضر ایدی .

نقض عهد مسئله سندن باشقه برده حتی اهل اسلام  
 خند قدحده محافظه ايله مشغول بولنور ايکن کيجه لين بنی  
 قريظه يهود يار ينيك کلوب مدينه موره ني باصه جقاري  
 حوادثي شيوع بولديغندن اشبو حوادث بين الاسلام موجب  
 اندیشه اولمش وپک مهم برکيفيت کورونمشدر .

زيرارئيس بنی قريظه بولسان « کعب بن اسد » ايله  
 اولجه معااهده ايدلمش اولمق حسييله اوطرفدن امنيت کامله  
 مأمول اولنيور ایدی .

ليکن امنيت بوصورتله برکزه منسلب اولنجه مسموعاتي  
 تحقيقاته مأموراً کوندريلان ذاتلرک تحقيقاتنده «حي بن اخطب»  
 لعينک کلوب کعب بن اسد ايله ملاقات ايتديکی وآنک

تسمیم واغواسیله بنی قریظه نك دخی حقیقه نقض  
عهد ایله دیکي اگلاشلدی ! .

بنی قریظه ایسه ذاتاً قبائل مشهوره دن « اوس »  
قبیله سنك عهد وامانی التنده بولمغله رؤسای اوسیه دن  
« سعد بن معاذ ، سعد بن عبادہ ، عبد الله بن رواحه ،  
خوات بن جیر » رضوان الله تعالى علیهم اجمعین حضراتی  
بنی قریظه حصارینه بارادۀ سنیۀ جناب رسالتناهی  
عزیمت ایدرك نقض عهدك عواقبی بتون افراد و قبائل  
یهود حقنده موجب خیر اولماق اوزره مهم واهمیتی نسبتنده ده  
وخیم بر نتیجه ویره جكنی بیان ایله نصیحت ایتمش ولكن  
یهودیلر ، نصایح واقعه دن متنصح و متأثر اوله میهرق بلکه  
نقض عهد ایله دكارینی بتون بتون اظهار و حتی رسول  
ذیشان افندیمز علیهنده تفوهاته ده جرئت ایتمشلردر .

سفراء مشار الیهم حضراتنك زمان عزیمتلرنده  
رسول اکرم صلی الله تعالى علیه وسلم افندیمز انلره :  
— « باقیکنز اکر ایشتمدیکمز صحیح ایسه کیفیتی

کندی اکلایه بیله جکم بر اشارت ویالحن مخصوص ایله بکا  
افهام والاصراحةً اعلام ایدیکنز »

دیه امر بیور مشلردر ! یهودیلر ك رسول کبریا علیهنده کی  
اشبو جرئت بدزبانانه لرینی . کوروب پك زیاده سیله

متأثرو متأذى اولمش بولنان جناب «سعد بن معاذ» رضى الله تعالى عنه حضرت تارى: « بنى قريظه يهودياري له حرب ايتمدكه الله تعالى بنم جانمى المسون ! » ديه دعا ايتمدى .

اصلاح بنى قريظه مأمور هيئت سفارت ، ايشى بولنه قويمغه موفق اوله مامقميزين عودت ايتدى .  
وكيفيتى اعلام ضمننده بر موجب امر وتنبيه حضرت پيغمبرى لحن مخصوص اجراسنه مراجعتله :

— « عضل والقارة احذر . . . . الخ . »

تعبيرات مخصوصه سيله مسئله يى رسول اكرمه عرض وافهام ايتشار واكا قارشى رسول مكرم صلى الله تعالى عليه وسلم « حسبنا الله ونعم الوكيل » ديدكدن صوكره :  
— « سزه مرده اى جماعت مسلمين ! بوايشك

صوكى خيرليدر »

بيور مشلردر ! مع فيه نسوان وصبيان اسلاميه ، يهوديلرك مطمح نظر تجاوز خواهانه سى بولنان مدينه منوره ايچنده يالكيز اولمغله بنى قريظه نك نقض عهد ايديشنه قارشى انلرك او حالده براغلمسى مناسب كوريله مديكندن كيجه لرى مدينه شهرينى محافظه ايچون ذات رسالتپناهى «زيد بن حارثه» رضى الله تعالى عنه حضرت تارينى اوچيوز



نفر و « سلمه بن اسلم » رضی الله تعالی عنه حضرت تلرینی ده  
ایکی یوز نفر عسکرله کوندردی .

کندیلری ده کریده قالان عساکر اسلامیه ایله برابر  
صباحلره قدر خندق خطنی محافظه ایله دکن باشقه  
صورت مطلوبه ده قازیله میه رق قالمش اولان برنقطه ،  
دشمن طرفدن کیجه کذرکاه اتخاذا ایدلمک ملحوظ  
بولندیغندن حضرت پیغمبر ایشته اونقطه یی بالذات  
بکله لرلردی ،

کروه مکروه منافقین ایسه اوله برحاله یکدیگری نه :

— « اولاد و عیالمزی کریده بر اغوب ده بوراده

سفالت ایله بکله یه طور مامن عقللی ایشی دکادر )

دیه رک برطام سبک مغز اعتقاد اولان افرادی وسوسه یه  
طوتمقده اولدقلرندن خارج مدینه ده خانه سی بولنانلرک  
بنی سلمه بنی حارثه کی بعضی پیشگاه عالی نبوی یه کلوب  
— ( یارسول الله ! بزم خانه لریمز مستحکم دکل .

بنی قریظه نك ملحوظ اولان هجومنه قارشى پك تهاكمه ده ! )  
دیه کویا اولاد و عیال لرینی محافظه بهانه سیله خندق دن صاوشوب  
کیتمه یی ارزو و طرف عالی پیغمبریدن — اوصورتله —  
رخصت استدعا ایتدیلر .

برده مدت محاصره اون بش کون قدر امتداد ایله دیکی

حالده غالبیت یا مغلوبیت کبی بر نتیجه یوز کو ستره مدیکدن  
عسا کر اسلامیه به فتور کلمش و بر طرفدن حکمنی شدته  
یوروتن قحط غلادخی ایجه اشتداد ایدرک اوصاندرمش  
ایدی .

ایشته بوکبی احوال اسف انکیزی فرصت اتخاذایدن  
ابن ابی مثلوه بعض منافقین :

— « محمد [ علیه الصلوة والسلام ] بزه قیاصره  
و اکا سره کوشکلرینی و فتوحات عراقیه یی وعدایده یور.  
بز ایسه شمدی خندق ایچنده محبوس قالدق . بر آدیم بیه  
آته میورز او یله قصور قیاصره یی وعدایده جکنه بوکون  
امتنی شو بلیه دن قور تارسه یا ! »  
دیمکه باشلادیلر .

حتی « اوس بن قیظی » نامنده کی منافق دخی کثرت  
عسا کر قریش جهتنه ایما ایله برابر عسا کر اسلامیه دن  
بعض ذواته :

— « یا اهل یثرب ! سزک ایچون بوراسی شایان اقامت  
بریر دکلدر . مدینه ده کی منزللریکزه رجعت ایدیکز ،  
دیه هزیمت اسلامیه حقنده کی خواهش منافقانه سنی اظهار  
ایتمکدن کندی نی کبری اله مامشدر ! »  
اوانشاده سید کائنات علیه افضل الصلوة و اکمل

التحيات افنديمز حضرتلری ، برارالق غطفان و بنی  
 فزاره قبائلی رئیس لری « عینیه » و « حارث » ایله خفياً  
 مخبره ایدوب مدینه ده خرما محصولک برثانی انلره ویرملک .  
 اوزره رجعت موافقتلرینی المشدی . بودرلو مصالحه باینده هنوز  
 وحی الهی شرفظهور ایتدیکندن کیفیتی یالکز اصحاب  
 مجاس مذاکره و مشاوره سنه وضع وحواله بیوردیلر .  
 لکن رؤسای انصار کرامدن « سعد بن معاذ » رضی الله  
 تعالی عنه حضرتلرینک عدم موافقتی اوزرینه در دست  
 تنظیم اولان مصالحه نامه یرتیلوب اتملشد .

حالبوکه طوائف عربان ، بویه مدت مدیده محاصرات  
 عسکریه الیشق اولیوب بلکه یالکز مصادمات  
 سیفیه ورمحیه کبی چندیانه بر صورتده یکدیگریله چارپشدقن .  
 صوکره یا غالب یا مغلوب هر نه اولور ایسه اولسون بر  
 نتیجه ویروب طاغیلرلردی .

بو دفعه هر درلو مشهودات و مسموعاتک عکسینه  
 اوله رق اوکلرینه چیقان قیامت خندق ، دهاطوغریسی  
 جزیره العربده هنوز امثالی کورلماش ، ایشیدلماش بر  
 بیوک سد حائل ، دشمن عسکرینی هفته لرجه حبس و توقیف  
 ایتمش و نهایت ده تماماً اوصان دیروب رجعت مجبور ایله مشدی .  
 علی الخصوص قیش موسمی اولدیغندن بر طرفدن .

افراد عسکریه صوغو قدن متأربو لنمقدمه دیگر طرفدن وسائط  
نقایه لری هم صوغو قدن هم ده علفسز لکدن تلف  
اوله کیتمکده ایدی .

اومدته خندقك منع و حیلولتی سببیه طرفینجه  
مصادمه سیفیه وقوعه کلامش ایکن برکون « عامر بن لونی »  
قبیله سندن « عمرو بن عبدود عامری » نام جنکاور شهیر ایله  
برابر « عکرمه بن ابی الجهل الخزومی » هبیره بن ابی وهب ،  
نوفل بن عبدالله بن مغیره ، ضراب بن الخطاب ، مرداث بن  
محارب « نام جندیلر ، آتلیرینی زیاده زور لایه رق خندقك  
بر طاریرندن آتلا دوب میدانه کردیلر . برروایتیه کوره  
« نوفل بن عبدالله الخزومی » خندقدن بری طرفه کچه مامش  
بلکه کچمک اوزره آتئی دپوب زور لادیغنده آت ایله برابر  
خندقك دروننه دوشمش وانك اوزرینه یتیشان جناب  
علی المرتضانك سیف صارم سطوتی ، اکا زهرا به موت  
هلاکی ایچیر مشدر .

« ابوسفیان » ایله « خالد بن الولید » دخی بونلره ارقه  
اولق فکریله برفرقة مشرکین ایله برابر خندقك کنارینه  
دکین کلدکلری حالد بری کچه میهرک اوتیه کی کنارده سیرجی  
کی طورده قالمشدر .

عمرو بن عبدود العامری ، اوزمان طقسان یاشندو

بر پیر سالخورده ایدی . بك چوق وقایع حربیه ده  
بولمش ویا لکنز بر باشنه نیجه فرق عسکریه نی اوروب  
طاغتمش سنی کچکین، شخصی پیشکین، بر بهادر نامدار،  
بر سلا حشور شهرت شعار ایدی . ایشته بویله اولدینی  
ایچون کافه قبائل عرب، انی بر بلوک سواری عسکرینه  
بدل عدایدردی .

عمر و، خندقدن آتلا نیجه رفقا سنندن براز ایلری یه  
کلوب مبارز ایستدی . حضرت علی کرم الله وجهه افندیمز :  
— « یارسول الله ! مبارزه یه بن چیقہ جغم »  
دیمکله ذات عالی رسالتناهی، اکا :

— « سن او طور یا علی ! کلان عمرودر ! »  
بیوردیلر . اهل اسلام طرفندن هنوز کیمسه میدان مبارزه یه  
کیر مامشدی .  
قیلنجنه اعتمادی زیاده اولان عمرو، ایسه اهل اسلامه  
میدان اوقویه رق تکرار :

— « ایچکیزده مبارزه ایدہ جک اریوقی؟ هانی سزک  
موتالریکزه وعدایله دیگکیز جنت نرده قالدی »  
دیمش و بونک اوزرینه علی المرتضی افندیمز ایاغه  
قالقوب مبارزه ایتک ایستدیسده رسول اکرم مساعده  
بیورما نیجه میدان مبارزه یی بك کنیش کورمکه باشلامش  
حساب ایلہ یان عمرو بن عبدود :

— « ارميداننه چيقه جق يوقى ؟ »

سوزيله اهل اسلامه قارشى تااوست پرده دن باغير مشدر .  
 كافر عمروك او حر كات واطوارينى كوروب آراتق  
 صوك درجه ده حدت ايتمش بولنان حضرت على ، همان :  
 — « عمروده اولسه چيقارم يار رسول الله ! »

ديه يرندن قالقديغندن ذات على نبوى ، كندى درع  
 شريفلرينى ا كساو « ذوالفقار » نام قلنجلريله ده انى  
 تجهيز و تقايد بيوردقدن صوكره :

— « يارب ! عمم عبيده بدرده ، حمزه احدثه شهيد  
 اولدى . يانمده بربرادرزاده م على قالدى . سن انى محافظه  
 بيورده بنى يالكز براقه ! »  
 ديه حقنده دعا ايتدى .

شيرصولتسمير حضرت رسول كبريا جناب على المرتضا  
 افنديمز پياده اولديغى حالده ميدان مبارزه يه آتلادى . .  
 « عمرو بن عبدود » طوغرى كيدوب اكا اول امرده  
 على وجه الشرعى قبول دين مابين اسلامى تكليف ايتدى .  
 لكن ملعون عمرو ، برقهقهه سخره آميزايله كوله رك :  
 — « بودرلو آغيز ايله هيچ بر كيمسه نك قارشيمه  
 چيقه جنى خاطريمه بيله گلزدى . سن كيمسك ؟ سويله ! »  
 ديه صورمش اول حضرت ده :

— « علی بن ابی طالب »

جوانی و یردیکنی متعاقب عمرو :

— « عملریک اره سنده میدان مبارزه به چیه جق

ار یوقی ؟ آ برادر زاده ! سن دها چوجقسک . بن سنک

پدرکله چوق زمان قرن داش کبی کچدم . شمدی سنک

قانی دوکمک بکا کوچ کلیور »

دیمکله حضرت علی دخی :

— « طوغری اما بن سنک قانی دوکمکله محظوظ

اولیورم . لیکن سن ده بنم کبی پیاده اولمیسک »

دیمشدر .

بوسوز عمروک حمیت جاهلیه سنه طوقاندیغندن پک

زیاده سیه حدت ایدمرک همان آتندن ایندرک حضرت

علی افندیمرک اوزرینه هجوم برله قیلنجی شدید آحواله ایتدی .

اکا قارشی شیر خدا دخی النده کی قالقانی سپر طوتدی .

ملعون عمرو ، کمال حدت و شدتله قیلنجی اویله بر قوتده

حواله ایتشدی که حضرت علی کرم الله وجهه افندیمرک سپر

طوتدی قالقانی ایکی پارچه ایتش و باشلرینی برا زیاره له مشدر

اندن صوکره حمیه نوبتی جناب علی به کلمشدی . علی ،

عمروه خطاباً :

— « سن بکا یالکیز اولدیغک حالد مبارزه ایتمک



اوزره بومیدانه گیر مدکی ایدک؟ او کتیر دیکک ارقد اشلرک  
کیملردر؟

دیر ایکن عمرو :

— « یوق ! هانی ؟ »

دیه کبری به طوغری باقمش علی دخی انک اوالنفاتندن  
بالاستفاده همان ایکی ایاغنه قیلنج اوروب حریفی دویره رک  
اولدیر مشدر !

عمروک مقتولاً یره دوشمسی اوزرینه جنکاور شهیر  
جناب رسول کبریا حضرت علی المرتضا افندیمز «الله اکبر»  
دیمش وانی ایشیدن کافه اصحاب کرام ده بر آغیزدن «الله اکبر»  
دیه تکبیر ده علی به تابع اولمش واشبو تکبیر صداء دهشت  
اداسی دشمن اردوسنه پک مدهش بر غلغله رعب وهزیمتک  
دوشمسنده تأثیر مخصوص حصوله کتیر مشدر .

عمرو دن صوکره «نوفل بن عبدالله الخزومی» را کبامیدان  
مبارزه به صوقیله رق ارایستدی . لیکن «زبیر بن العوام»  
رضی عنه السلام حضرت تلی انی اویله بر اوروب اولدیردی  
نکه نوفل، یوقاریدن اشاغی به طوغری ایکی پارچه اولدقدن  
باشقه التنده کی اکریم ده کسبله قالمشدر .

انکچون جناب «زبیر» رضی الله تعالی عنه حضرت تلی :

— « سنك قلنجك كې قلنج كورمدهك »

ديانلره :

— « انى ياپان قىلنج دكل . بيله كدر »

ديه جواب ويريرايدى .

بوندن سوكردهده عمرالفاروق رضى الله تعالى عنه  
حضرتلى، ميدان مبارزهده طوران برادري « ضرار بن  
الخطاب » اوزرينه هجوم ايتديكندن على ايله زير رضى الله  
تعالى عنهما حضرتلى ده « عكرمه، هيره، مرداث » نام  
كسه لك اوزرينه هجوم ايدوب هر دىنى ده همان كرى به  
طوغرى رجعت وار دولرينه التحاقه مجبور ايتديلر .  
عكرمه بن ابى الجهل اوزمان جان قورقوسيله قاجوب  
كيدر كن مزارغنى دوشوره لك يولده براقش اولغله اندن  
طولاي شاعر شهير حضرت حسان رضى الله تعالى عنه  
عكرمه بى يك فنا هجو ايتمشدر .

« عمرو بن عبدود » ك اوشجاعت جنكاورانه سى ايله  
برابر ينه موفق اوله ميه رق يك كوچوك كوردىكى « على  
بن ابى طالب ! » الندى نهايت هلاك اولوب دوريله  
قالسى، عساكر صولت مائر اسلاميه بى ممنون وفرق مخذوله  
مشركىنى ده صورت فوق العاده ده مابوس ودلخون  
ايله ديكندى كه ابوسفیان :

« بزم ایچون خیرلی برایش یوق ! »

دیه خندق کنارندن اردوگاهنه کیتدی !

فرداسی مشرکین ، بنی قریظه یهودیلرله برابر هر طرفدن اهل اسلامی احاطه ایتدی . اقشاملره دکین اوق محاربه سی ده دوام ایتدیکندن عسا کر مسلمین کوز آچغه بيله وقت بوله مدی .

اقشام اولوب ده دشمنک براز چکامسی اوزرینه اهل اسلام بر مقدار نفس اله بیلدی . لیکن :

« دشمن یارین ده بویه هر طرفدن شدتلی هجوم

وتضیق کوسترمه جک اولور ایسه حاملز نه اولور . »

دیه مسلمین خیلی تلاش و اندیشه ایتدی .

حالبوکه جناب الله ، خلاص مسلمینک اسبابی تهیه

ایتمشدی :

اولجه ایمان ایتدیکی حالدده اسلامی هنوز اظهار

ایده مامش بولان « نعیم بن مسعود اشجعی غطفانی » ،

اوانتاده خندق کنارینه کلوب خط محافظلرینک اذنیله

بهری طرفه کچدی . و حضور پر نور نبویده کلمه شهادتی

زیور زبان صدق و مخالفت ایتدکدن صوکره دیدی که :

« یارسول الله ! قبائل صرب بنم اسلامی هنوز

بیلمزله. اکر امرایدرسه کز دین اسلامه خدمت  
ایده بیلیرم»

رسول اکرم صلی الله تعالی علیه وسلم اقدیمزده جوابده:  
— «محاربه برنوع خدعه در. سن ده بزم ایچون برحیله  
ایدیور!»

بیورمقله دهات عربدن بولنان جناب نعیم، دهاء سیاسی  
سایه سنده برایش کورمک اوزره بنی قریظه ناحیه سنه کیده رک  
انده «کعب بن اسد» ایله ملاقات ایتدی.

«کعب بن اسد» ک یاننده معتبران واحبباریهوددن  
برقاج کیمسه لرده بولندیغی حالده نعیم اکامحرجه اوله رق:  
— «ای اشراف بنی قریظه! سزی نقدر سودیکمی  
بیلیرسکمز. مجرد سزه اولان خلوص و محبتم ایچون برقاج  
کوندر حالکزی دوشونیور ایدم»  
کبی وادیلرده سوزسویلیوب یهودیلرک:

— «بزم سکا هر وجهله اعتماد و امنیتمز واردر. سویله  
باقلم»

دیه اظهار امنیت ایتدیکنه قارشى کوکسی کنیشلننان  
جناب نعیم:

— «بن ایشک شوراسنی هیچ نظر دقتدن اوزاق

طوتمیورم : مثلاً : قبائل قریش و بنی غطفان . محمدیلری  
استیصال ایتمک افکاریلہ بورالره قدر کلدیله . غیرت  
واقدا مده ایدہ یورلر . لیکن محمدیلرده مقاوامات ومدافعات  
مردانہده بولتمقدن هیچ کیری طور میورلر . حالبوکه  
ایشدن خیرلی برتیجه پک مأمول اولدیغندن قبائل  
عرب ، ارتق اوصانمغه باشلادی . پک صیقیلرلر سه سزی .  
یالکیز کندی باشکیزه براغوب قاچه جقلر . ایشته اوزمان  
حالکیز یماندر . محمدیلرک پنجه سنه دوشه جکسکیز .  
سزده ذاتاً نقض عهد ایتمش اولدیغکنز ایچون حدت  
ایدن محمدیلر ، سزی صاغ برامازلر . شو حالده حقکنزده  
تصور ایدہ بیلدیکم طریق اسلم ، قریش ایله بنی غطفاندن  
برطاقم اشرافی رهن اوله رق المکنزدر . تا که انلردخی  
ایشی بتیرمدکجه سزی میدانده محمدیلر پنجه سنه براغوبده  
کیتیمه لر !»

دیمش و حقیقت رنکیله ملون اوله رق کوستردیکی هر بر  
سوزینی یهودیلره تصدیق و قبول ایتدیرمکه موفقده  
اولشد .

بعده اورادن آریلان نعیم ، ابوسفیانک مجلس  
مذاکره سنهده کیده رک :

— « برشی ایشتم . لیکن بنم سویله دیکمی کیمسه یه

سويله ميكنز ! خبريكز وارمی ؟ بنی قریظه یهودیلری محمد  
 [ علیه الصلوة والسلام ] ایله اولان اسکی معاهده لرینی  
 بوزدقلرینه نادم اولدیلر . حتی انکله کیزلیجه یکی براتفاق  
 بیله یامشالر . نقض عهددن طولای ابراز ایتمش اولدقلری  
 جنایت عصیانیه لرینی عفوایتدیرمک اوزره قریش ایله بنی  
 غطفان اشرافندن رهن طریقله برطاقم رؤساومعتبرانی  
 سزدن الوبده اکاویرمکی دخی وعد ایتشلردر . شایدکه  
 سزدن بودرلو رهن المق ایستلرسه صاقین ویرمیکنز .  
 زیرا اشراف ورؤسایه یازیق اولور ،

سوزیله اشراف قریشیه ورؤساء غطفانیه یی برچوق  
 اوهام وشبهاته دوشوردی . ابوسفیان دخی بنی قریظه نك  
 بوبابده کی افکارینی آکلامق اوزره :

— « بزبورایه سزدن بعض رؤسانك تشویقیله  
 کلدك . سزایسه شمدی پك آغیرطاورانیورسکنز . بوراسی  
 عربلرجه اوزون مدت اوطوریله جق یردکلدر . افراد  
 ووسائل نقایه عسکریه مزكرك برودتدن ؛ كرك زادودخیره  
 سز لکدن قیریلوب کیتمکده . شو حالده یارین هپ برابر  
 برشدتلی هجوم ایده لم ده ایشه ایو کو تو بر نتیجه ویره لم »  
 دیه یهودیلره خبر کوندردی . انلرك ایسه :

— « یارین جمعه ایرته سیدر . برایشده بولنه میز .

اوبرکون برابر حرب ایدرز . لکن شوشر طله که بزه  
اشراف ورؤسا کزدن یتیم کشی بی رهن ویرمیسکنز .  
انلری حصار مزده توقیف ایدرزده سزدن امنیت کسب  
ایتمش اولورز ،

جوابی ویردکلرینه قارشی مشرکین اردوسنک ارکانی :  
« نعیمک بزه دیدیکی صحیح ایش ! » دیمش وانک اوزرینه :  
— « بززده نه رهن ویریرز نه ده سزدن امداد امید  
وانتظار ایدرز . ایسترسه کز بزمه برابر حرب ایدیکنز .  
ایسترسه کز ایتمیکنز ! ایتدیکنز حالد بزه مملکت مزه  
کیدرز . فقط سزده محمدیلرک پنجه سنه دوشر بلا کزی  
بولورسکنز »

دیه مقابله ایتیمش اولنجه بنی قریظه دخی « نعیمک بزه  
دیدیکی صحیح ایش ! » دیدکدن صوکره نقض عهد  
ایتدکلرندن طولای صحیحاً نادم اوله قالمشلردر .  
روایت دیگره کوره : « نعیم بن مسعود اشجعی »  
اوزمان هنوز اسلامی قبول ایتیمش دکلدی . کفر حالیه  
برابر حضور پر نور رسالت پناهی به کلوب دیدی که :  
— « یا محمد [ علیه الصلوٰة والسلام ] ! بنی قریظه سکا  
غدر و خیانت ایتدیلر . ابوسفیان طرفداری اولدیلر ! »



انك بوسوزی اوزرینه افندیز ، مسئله یی مهم  
براقق اوزره :

— « بلکه بزاملره اوله امرایتمشدر ! »

بیوردیلر . نعم ، اندن صوکره قریش اردوسنه طوغری  
کیتدی . نعمک حضور عالیدن آیلمسی اوزرینه حضرت  
عمر الفاروق رضی الله تعالی عنه افندیز :

— « یارسول الله ! نعم شمدی شوکلامکزی اشاعه

ایدر . خلق بیننده ده حاشا دهان شریفکزدن کذب صادر  
اولدینی شیوعبولورکه اوشیوع ، بزه یهودیلرک نقض عهد  
ایتملرندن ده آغیرکلیر . »

دیمکله اکا :

— « الحرب خدعة یاعمر ! »

جواب صوابی ویرلمشدی .

نعم ، قریش اردوسنه کیتدیکی زمان حی لعینک وعدی  
اوزره عظماء قریشدن یتمش نفری رهن طریقله طلب  
ایتمکه بنی قریظه طرفندن مأمور ومبعوث اولان آدمی  
محضر قریشده کوره رک ابوسفیانه دیدی که :

— « محمد [ علیه الصلوة والسلام ] ک قطعاً یالان

سویله مدیکنی بیایر میسک ؟ »

ابوسفیان جواب ویردی :

— « اوت بیلیرم ! »

نعیم، سوزینه دوام ایتدی :

— « بن شمدی اندن ایشتم که بنی قریظه نك ابوسفیانه

طرفدارلقلری بزم امریمزله در دیدی ! او حالده بونلرک

طلب رهن ایتلمی، اتفاق واقعه مبنیدر . سزدن یتیش

آدم اله جقلر ، اکا ویروب قتل ایتدیرم جکلر ! »

ابوسفیان بیوک برتلاش ایله :

— « دیمک که سن بونی اندن ایشتمک ! »

دیدی . نعیم اکا قارشى

— « اوت ایشتم ! »

دیه تأمین ایتدیکندن ابوسفیان :

— « لات وعزى حقیچون یمین ایدرم که ایش سنک

دیدیکک کیدر ! »

دیدکدن صوکره استمزاج ضمننده اوله رق :

— « ایش اوزادی . معاهده من اوزره یارین متفقاً

محمدیلر اوزرینه هجوم ایدلم . حاضر اولیکرز ! )

دیه قریظه یهودیلرینه برنوطه ویردی . اوکون ایسه یوم

جمعه ایدی . یهودیلر جواب ویردیلر :

— ( یارین یوم السبتدر . برایشده بولنه میز . یاریندن

صو کرده بزم سزکله متفقاً هجوم ایدہ بیلہ کلکمز ایچون  
مطلوبمز اولان یتش آدم رهنی المالی یز . المادقجه قلعه دن  
چیه میه جفز ! )

بنی قریظه ایله قریش اردوسی آره سنده حصوله ،  
باشلامش اولان رشتہ ارتباط و اتفاق شو صورتله بر کره  
قیریلانجه تفرق و اختلاف آنک یرینه قائم اولدیغندن اندن  
صو کره احزابده آثار انہزام مشاہده اولنمشدر .

بنی قریظه ، محمدیلر علیہ سده حرب و حرکتدن  
وقریشیلر ایله ده اتفاق و مناسبتدن کلیاً و از کچوب حصار لرینه  
قاپاندیلر . بیطرفلک صورتی کندیلر ایچون سلامتی بر مسلک  
بولدیلر !

ایشته عربان عسکر یله یهودیلر طوائفی آره سنده کی  
رابطہ اتفاق بو صورتله قیریلوب شدتی بر اختلاف و اختلال  
یوز کوستردی . انکچون او کوندن صو کره وقوعه کلان  
برقاچ کونلک محاصره ده قریش عسکری اسکی شدتی  
کوستره مامشدر .

نهایت بر چہار شنبہ کونی ایدی وقت ظہرایله وقت  
عصر آره سنده ذات عالی رسالتپناهی : « اللهم یا صریح  
المکروبین و یا مجیب المضطربین اکشف همی و غمی و کربی .  
فانک تری ما نزل بی و باصحابی ، دیه دعا بیورور ایکن مبارک

وجه شریف لرنده آثار سرور و بشاشت مشاهده اولندی .  
مکر اوزمان حضرت جبریل امین کلوب حق تعالی  
طرفندن روزکار و ملائکه ایله امداد بیوریله جغنی تبشیر  
ایتمش ایدی . رسول اکرم صلی الله تعالی علیه و سلم اقدیمز  
دخی اصحاب کرامنه « مژده !... » بیوردی .

وقت عصر ایله وقت صلوة غروب ارمه سنده صوغوق  
و شدتلی بر روزکار اسمکه باشلایه رق روزکارک شدت هبونی  
تأثیر یله یردن قالدان توزلری ، طوپراقلری مشرکینک  
یوزلرینه ، کوزلرینه آتوب یکدیگرینی فرق و تشخیص  
ایتمز درجه سنده دشمن معسکر نده بر قیامت فورتنه قوپدی  
روزکار اولقدر استداد ایتدی که اقشامکی ارزاق  
عسکریه اولوق اوزره قریش عسکرینک آتش اوستنه  
قویدقلری چولمکلری دویردی .

خیام بی انتظام عسکریه لرینی ده یردن سوکوب  
هوالرده اوچوردی . ایشته بودرلو حادثه سماویه یالکیز  
دشمن اردوسی معسکرینه مخصوص اولوب باشقه طرفلرده  
هیچ برشی یوغیدی . زیرا او فورتنه یالکیز اعداء دین  
مبین عسکرینی تهدید ایچون طرف اشرف حقندن  
کوندرلمشدی .

لکن عساکر اسلامیه نکه ده کیمی صوغوک ، کیمی ده

آچلغك تأثیريله طایاه میوب اطرافه طاغیلمش اولدیغندن  
رسول محترم اقدیمزك معیت سنیة رسالتپناهیلرندہ یالكز  
اوچیوز قدر عسکر قالمشدی .

دشمنك احوال عسكریه سندن برخبر کتیرمك اوزره  
اصحاب کرامدن ( حذیفه بن یمان ) رضی الله تعالی عنه  
حضر تلرینی اوکیجه فخر عالم اقدیمز، مشرکین اردوسی  
ایچنه اعزام بیورمشلردی !

جناب ( حذیفه ) قریش اردوسی ایچروسنه کیرنجہ  
کوردی که دشمن عسکری پک پریشان بر حال یأسده ،  
کندیلرینی بیله شاشیرمشلر ! فرارایله قرار، بیننده متردد  
ومتحیر قالمشلر !

ابوسفیان، بوضع نومیدانده :

— « ای ناس ! بوراسی بزم ایچون طوره جق،  
ا کلنه جک یردکل . انکله برابر بنی قریظه ایله ده اتقاقز  
بوزولدی . ارامزه شدتلی باختلاف دوشدی . آکلاشلدی که  
موفقیت بزده قالمیه جق ! ایشته بن کیده یورم . سزده  
کلیکنز ! »

دیه عسکرینه تنبیهات وتبلیغات مخصوصه اجرا ایله دکن  
صوکره دوه سینه بینوب مکه طرفنه کیتدی . اتباعی ده  
طریق رجعتده اکا پیرو اولدی .

هر طائفه نك رئيسى مثلا « طايحه بن خويلد الاسدى »  
 كى رؤسا، عشيرتى « يابى فلان ! هلموا الى ! » ديه  
 چاغير وكلوب ياننده طويلانانارده « النجاء النجاء »  
 سوزيله كنديلارنى يولنده تعقيب اتملرني تنبيه ايدمرك  
 همان يوله دوشرلردى !

مرويدرکه اوزمان دشمن عسکرينه رعب و خشيت  
 ويرمك اچون کوکدن بيك نفر ملائکه اينمشدى . حتى  
 دشمن اردوسنك اطرافنده تکبير صدالرى، سلاح  
 شاقيرديلرى ايشيديليور ايدى .

حذيفه رضى الله تعالى عنه حضرتلرى دونوب کليز  
 ايکن يوله کوزينه يکرمى قدر سوارى عسکرى کورينوب  
 : کا ۱

— « يا حذيفه ! دوستکه خبر ویرکه الله تعالى آنک  
 اعداسنى منهزم و پريشان اتمشدر )  
 ديدکلرى ده مرويدر .

تجسس مأموراً کوندريلان صحابىء مشاراليه، مشهودات  
 مسموعاتى نبى اکرمه عرض ايتدى . اکا قارشى رسول خدا  
 افنديمز حضرتلرى دخی طاتلى طاتلى تبسم بيورديلر .  
 مشرکين اردوسى رجعت ايدرکن ( عمرو بن العاص )  
 ايله ( خالد بن الوليد ) ايکى يوز نفر عسکرله دمدار تعيين

اواند قلرندن اردونك ارقه سی النجیه د کین انلر معسکرده  
ثبات ایتدیلر .

حالبوکه مشرکین طوائف عسکریه سی کیجه او یله بیک  
درلو خوف و هیجان ایله یالکیز جانلرینی قورتاروب  
قاچارلرکن اردوگاهلارنده برخیلی دخایر عسکریه و بعضی  
امتعۀ حربیه برافمش ایدیلر . فرداسی اهل اسلام انلری  
طویلا یوب اردگاه اسلامه کتیرمشدر .

روایتہ کوره بونلردن باشقه خرما یوکلای اوله رق یکر می  
رأس دوده اله کچیرلدی که ابوسفیان اودوه لری رؤساء  
یهود بنی نضیردن ( حی بن اخطب ) نام لعینه کوندرمش  
اوده خرما یوکلده رک انلری صاحبنه اعاده ایتمشدی  
عسنا کر اسلامیه ، مذکور دودلرک بعضی و جموله سی  
بولنان خرما لری ییوب دفع جوع ایتمش اولدیلر .

ایشته اردوی هایونده حکمنی بک شدتلی یوروتمش  
اولان قحط و غلا بلیه سی بوجهتله زائل وانک یرینه  
برکت دفعۀ قائم و حاصل اولمشدر .

رسول اکرم صلی الله تعالی علیه وسلم افندیمز بونلردن  
صوکره اصحاب کرامنه خطاباً :

— ( ارتق نوبت تجاوز سزه کلدی . قریش بوندلر .



یویه سزك اوزریكزه كاهك دكادر )

بیوردی !

بوغزوؤ احزابده تلفات مشرکین دوت وشهدادخی  
- ایکیسی اوس، اوچی خزر ج قبیله سندن اولمق اوزره -

یش نفر دن عبارتدر

انجق اعظم انصار کرامدن ( سعد بن معاذ ) رضی الله  
تعالی عنه حضرتلری، محاربته نك الك صوك دورلرنده  
( حبان بن العرقه ) نام تیراندازك آتدینی اوقدن قوی  
اغیرجه مجروح قالوب اخیراً جریحه مذکورمه نك تأثیریه  
شهیداً فوت اولمشدر . رضی الله تعالی عنه ! . فقط حبان  
مرقومك يوم احده سعد بن ابی وقاص حضرتلرینك  
رمی سهم شهادتیه تلف ایدله کی یازلمشدی .

ابوسفیان، اورجعت قهقریه سی ایله مکه یولنه  
دوشوبده ( جانمی ارتق منزل سلامته چیقاردم ) دیه  
ییه جك قدر قاچدقن صوکره :

( باسمك اللهم ! بن لاته، عزایه، اسافه، نائله، هبله  
یمین ایدرم که بر جمعیت عسکریه ایله سنك اوزریکه کلمکدن  
مقصد و مرادم، سنی استیصال ایتدکجه کیری دونامك  
ایدی . حالبوکه سن بزه قارشى چیقمه یی یاخود بزم سنکه  
علاقات ایتکلمکزی گریه کوردیکك ایچون عربلرجه

هنوز معلوم و مشهود اوليان برخندق ايشنه ياپشوب  
 كنديكى انكاه محافظه ايتدك . عربلر انجق قارغيلرينك  
 كولككسنى، قلنجلرينك حدتى بيايرلر . سن اوخندق  
 يالكز بزم قلنجلريمزدن قاجق اچون بپدك سنك اچون  
 بنبن احدكونى كې دها بركون واردر !

معناسنى افاده ايدن : ( باسمك اللهم ! فاني احلف  
 باللات والعزى واساف ونائله وهبل . لقدسريت اليك  
 في جمع وانا اريدان لاعود ابداحتى استأصلكم . فرأيتك  
 قدكرهت لقاءنا . واعصمت بالخذق بمكيدة ما كانت العرب  
 تعرفها وانما تعرف ظل رماحها . وسيوفها . وما فعلت  
 الا فراراً من سيوفنا ولقاءنا . ولك منى يوم كيوم احد )  
 مكتوبى ذات على رسالتپناهي كوندرديكندن حضرت  
 رسول مكرم افنديمزد ( بسم الله . . . محمد  
 رسول الله بن صخر بن حرب ! بكا مكتوبك كلدى .  
 الله تعالى سنى حماقتله مغرور ايتشدر . اما بزى  
 استيصال ايتك اوزره كلديكى وموفق اولمديجه  
 دونمامك عزمنده بولنديكى سويلديك شيلر اويله بر  
 ايشدركه من طرف الله سنك عليهكده وقوعبوله جق وجناب  
 الله حسن عاقبتى بزه احسان بيورمجددر . سنك اوزرينه

ده برکون کله جکدرکه ایشته او کونده بنم لات و عزای اساف  
ونائله بی هبل پارچه پارچه قیروب آندیغمی کوره جکسک !  
عباره سیله ترجمه ای دیلان :

— ( بسم الله الرحمن الرحيم من محمد رسول الله الى صخر  
بن حرب . قد اتاني كتابك وقديماً غرك بالله الغرور . اما  
ماذ كرت انك سرت الينا وانت تريد ان لاتعود حتى  
تستأصلنا . فذلك امر يحول الله بينك وبينه ويجعل لنا  
العاقبة . وليأتين عليك يوم اكسرفيه اللات والعزى واساف  
ونائله وهبل . حتى اذكرك ياسفیه بنی غالب ! )  
ديه جواب ویرمشدی !

۶

### — غزوة بنی قریظه —

خندق غزوه سی نتیجه لنوبده معاودت هایون  
شرفوقوعبولدینی ساعت ، شهر ذی القعدة نك یکر می  
اوچنجی — وعلی روایة شهر ذی الحجة نك اوچنجی —  
کوننده وقت ظهر ایدی .

ذات عالی رسالتیناهی صلوة ظهري بعدالاداء زینب  
رضی الله تعالی عنها حضر تلرینک خانه سنی تشریفه

وسلاحلرینی ترك برله مبارك باشلرینی حضرت مشارالیه  
بیقادر لرکن درحال جبریل امین - سواری وهم برعمامه  
سیاه ایله متعمم و معتجرا ولدینی حالده - کلوب :

— ( سن سلاحکی ترك ونزعمی ایتدک یارسول الله ! )  
دیدى . افندیزده :  
— ( نعم ) .

بیورمقله حضرت جبریل :

— ( سکا امداده کلان ملائکه هنوز سـلاحلرینی  
براقدیـلر . الله تعالی سنی بنی قریظه اوزرینه سفر ایله  
مأمور ایتـمـشـدر . بنـده معیتـمـده کی ملاکـرله انلره عامدیم .  
قلعه لرینی انلر واسطه سیله تزلزله اوغرا ده جغم )  
دیه رك معیتله برابر دونوب بنی قریظه یهودیلری سمتنه  
طوغری کیتمشدر .

بونك اوزرینه حضرت نبی محترم صلی الله تعالی علیه  
وسلم افندیـمـز ، بلاله : ( اللهمك امرینی دیکله یه جك واكا اطاعت  
ایده جك اولانلر ، صلوة عصری بنی قریظه ناحیه سنده  
قیاسونلر ! دیه ندا ایت ! ) امرینی اعطا وبعده درع  
شمرینی اکتسا بیوردیلر . سیف شریفلرینی ده قوشاندیلر .  
سونگولرینی ده اله الدقـدن صوکره ( حلیف ) نام آتلرینه بینوب  
حرکته حاضر اولدیلر .

مدینه منوره محافظه قائم مقام غنه (عبداللہ بن ام مکتوم)  
 رضی اللہ تعالیٰ عنہ حضرت تلمیذی تعیین ولواء شریفی جناب  
 علی المرتضیٰ افندیمرہ بالتسلیم انی بر مفرزہ عسکریہ ایلہ  
 مقدمۃ الجیش نصب بیوردیلر. حضرت علی دخی، کیدوب  
 سنجاغی بنی قریظہ حصار لرینک دینہ دیکدیکندن حدت  
 ایدن یهودیلر، اکا قارشی جناب رسول کبریایہ وزوجات  
 طاهرات حقندہ فنا لقردی سویلہ دیلر .

لکن مسلمین سکوت ایدوب انجق :

— ( سزکله ارامزده یالکز قیلنج واردر )

دیدیلر. حضرت پیغمبر، اردوی هایوناریلہ برابر مدینه دن  
 قالقوب مقدمه لرینی یولده تعقیب بیورورلرکن بنی نجاردن  
 برطاقم نقراته تصادف ایدہ رک . انلرہ :

— ( سزہ بریسی تصادف ایتدیمی ! )

دیه صوردی . انلرده :

— ( اوت ! دحیة الکلبی حضرت تلمیذی تصادف ایتدی ! )

حتی بزه سلاح لنامزی امر و تنبیہ ایتدکن باشقه [ رسول  
 اللہ شمدی سزہ بوراده اوغرایه جقدر [ دیمشدی )  
 جوانی ویرنجہ ذات عالی رسالتپناهی :

— ( ایشته او کوردیککز، جبریل امین ایدی )

بیور مشلردی .

وَقَتَا كِه شِير خُدا حَضَرَت عَلَی الْمَرْتَضَى ، رَسُو كُبریَانَك  
شَرَف وَصُول هَمایُون لَرِنِی كُورْدِی . النَّدَه كِی لَوَاء شَرِیفِی  
( قِتَادَةُ الْاِنْصَارِی ) رَضِی اللّٰهُ تَعَالٰی عَنْهُ حَضَر تَلَرِیْنَه بِالْاَعْطَا  
حَضُور عَلَی یَه كَلَه رَك :

— ( یَا رَسُوْل اللّٰه ! سَزَك بُو خَمِیْش لَرَه پَك قَرِیْب كِی تَمَكُز  
مَنْاسِب اَوَلَه مِیَه جَق ! )

دِیْدِی . رَسُوْل اَكْرَم افَنْدِیْمَز :

— ( غَالِبَا حَقْمَدَه اَنْلَرْدَن بَرَاذِیْت اِیْشَتَك ! )

بِیُور مَلَرِیْلَه جَنَاب عَلَی دَخِی جَوَاب وِیْرْدِی :

— ( اَوْت )

بُوسُوزَه مَقَابِل :

— ( بَنِی كُور سِیْدِیْلَر اَنْلَر اَوِیْلَه بَرِشِی سُوِیْلَه یَه مَز لَرْدِی )

دِیَه جَوَاب وِیْرَن سُلْطَان اَقْلِیْم رَسَالَت ، اَرْدُوِی سَعَادَت لَرِیْلَه  
بِرَا بَر حَصَارَه وَاَصْل وِبَر صُوكُنَارِیْنَه نَازِل اَوَلُوب یَهُودِیْلَرَه :

— ( اِی خَنْزِیْر لَر لَه مِیْمُون لَرَك قَرْنَدَا شَرِی ! اللّٰهُ سَمَزَه

غَضَب اِیْتَمَش وَاوَز لَر لَرِیْكُزَه نَقْمَتِنِی اِیْنَدِیْر مَشْدَرَه . بَكَانْدَن  
شَتَم اِیْدِیُور سَكُز ؟ )

بِیُور نَجَه هِیْبَت اَحْمَدِیَه دَن اَوْر كَمَش اَوَلَان یَهُودِیْلَر ، فَنَالَا قَرْدِی  
سُوِیْلَه مَدَكَارِیْنَه یَمِیْن وَقَسْم لَر اِیْدَه رَك :

— ( یا ابا القاسم ! اغزیکزدن بویله فسا لاقردی .

چیقماز ایدی ! )

دیدیلر .

عسا کر اسلامیة اطرافدن فرقه فرقه کله رک اقامه  
دکین اوچ بیکدن عبارت اولان کافه سی ده طوپلاندی  
ایچلرندن اوتوزالتیسی سواری ایدی .

اون بش کون دوام ایدن محاصر دن صوکره یهودیلر ،  
هر درلو حرکات و تحملات یهودیانه لرینی توکتمش ایدیلر .  
نهایت جناب رسالتپناه افندیمرک امر محاربه و محاصر ده  
قطعا فراغت بیورمیه جقلری و او تقدیر ده غالب و مضفر  
اوله جقلری یهودیلر جه تسلیم ایدلدیکندن ( ثعلبه بن سعنه )  
و ( اسید بن سعنه ) نام ایکی برادر لرله ( اسید بن عمید )  
هر اوچی متفقاً بنی قریظه یه :

— ( یابنی قریظه ! اسلامی قبول ایدیکز ! که مال

و جانلری کزدن امین اولور سکز والله بو ذات ، ابن الهیبانک  
اولجه سزه خبر و یردیکی ذاتدر ) دیدکلری حالد : ( بو ،  
او ذات دکلدر ! ) جوانی المشدیلر .

شو امر حادث حقنده تدابیر لازمه اتخاذی ایچون  
تشکیل اولنان مجلس مخصوص مشورتده رئیس لری بولنان



( کعب بن اسد ) نام یہودی دخی عموم افراد انجمنہ خطاباً:

— ( یامعشر الیہود ! شو آدمک صدق نبوتہ ایمان

وکندیسنه اولو جہلہ اتباع ایدہم . واللہ سزجہ محققدرکہ

بو آدم مدینہ دار ہجرتی اولمق اوزرہ کتابریکزدہ ہردرلو

اوصاف عالیہ سنی بولدیغکز نبی ذیشان آخر الزماندر .

بنی اسرائیلدن مبعوث اولدیغندن طولایی حسدیکزدن

باشقہ ہیج برشی اکا متابعتدن سزی منع ایتیور ! بن

اکا قارشی نقض عہد ایدلدیکنندن ذاتاً استکرام ایدردم

ہر حالده باشمزہ کلان ہردرلو بلاولالات ، ایشہ شو

اوطوران مشؤم حریفک یوزندن کلشدر )

دیہ ( حی بن اخطب ) نام لعینہ اشارت ایتدیکی حالده:

— ( دیدیکک کبی اولسہ بیلہ بز توراتک حکمنندن

آیریلہ میز . انی باشقہ بر کتاب ایلہ استبدالده ایدہ میز ! )

جواب ناصوابی ویرمکده مجلسی متفق الافکار بولنجه

کعب :

— ( اودہ اولمزسہ اولا اولاد وعیالمزی اولدیرہم .

بعده ہپ مسلول السیوف اولدیغمز حالده محمدیلرک

اوزرینہ شدتلی هجوم ایدہم . یاجملہ من ہلاک یاخود مظفر

اولورز )

مطالعہ سنی در میان ایتدی !

فقط او مطالعه نك عليهنده مجلس طرفندن :  
 — ( بز ، اومسكين عيال واولاديمزى اولدير دكدن  
 صوكره هلاك اولز سق بيله دنياده ارتق بزم ايجون نه  
 خير قالير ! )

رديه سى وارد اولنجه كعبك :  
 — ( اويله ايسه بوكيجه جمعه ايرته سى كيجه سيدر .  
 محمديلر بزدن امين اولورلر وارد اولنجه بك احتياطه  
 رعايت اتمزلر . اينه لم بردن هجوم ايده لم . بلكه ظفرياب اولورز )  
 كبي بياناتى عليهنده تكرار مجلس طرفندن :  
 — ( يوم سبته حرمت قاعده دينيه مزه خلل كتيره ميز  
 او ، بزدن اولكي لارك يامدينى برايشدر )  
 اعتراضى درميان ايدلديكندن ايجلرندن ( عمرو بن سعدى )  
 نام كمسه اويابده كي مطالعه سنى :

— ( اويله ايسه يهوديلككزى محافظه ايدرسكز  
 لكن جزيه ويرمكهده راضى اولورسكز ! )  
 زميننده ايراد ايله مش يهوديلرده آنى :  
 — ( عربلره جزيه ويرمكه بورجلنمكدن قتل اولتمق  
 دها خير ليدر )

سوزيله رد و جرح ايتمش اولدقلى رينى متعاقب طرف على  
 پيغمبريدن بر روايته كوره « ابولبابه هارون بن عبدالمندر

الانصارى « رضى الله تعالى عنه حضرت تلى انزلله مكلله  
ايتك اوزره مأموراً اعزام بيورلمشدر .

ثناء مكلله ده مأمور مشاراليه؛ برالى ايله صقانى  
ديكر اليله ده بوغازنى طوتوب برطرز غريبده رمز واما  
اوله رق يهوديلره كوستردىكى اشارتله « صاقين قفالريكنز  
كسيه جك ! » مفهومنى القا ايتدكدن صوكره ايش كوره  
ميهرك كبرى كلشدر !

مرويدر كه اوزمان ابولبابه، ايتديكى معامله  
اهانتكارانهك بك بيوك برخيانت وجنايت اولديغنىك  
فرقه وارد يغندن در حال نادم اولمش وحتى حس و حاصل  
ايله ديكي حجابى سبيله حضور رسالتپناهى يه دخى  
كله ميهرك باشقه طرفه صاوشدقندن فضله سوء عملنه مبنى  
مجازاة كندى كندى برديره كه باغلامش « والله بوندن  
صوكره نه يرم؛ نه ايجرم تا كه يا اولورم يا خود حضرت  
مولا بنى عفو ايدر » ديه قسمده ايتمشدى !

برمدت بووجه اوزره مقاومت ايده طوران يهوديلر  
يكرمى كوندن زياده دوام وامتداد ايدن محاصره سبيله  
آچلقدن بيتاب وتوان قاله رق جمله سى ياس وفتوره دوشدى  
بناءً عليه بنى نصير يهوديلرى كچي كنديلرى ده دوه لر ينك  
طاشيه بيله جكى قدر اشيا آلوب ديار آخره كيتملى شرطيله

حصار دن چیقارلملری استدعاسی ضعیفده رسالتیناه افندی بیزیه  
مخبریه باشلادیلر . لکن استدعالری نظراعتبارالنه مدی .  
ایشته اول حالده حضرت علی المرتضی کرم الله وجهه  
افندیمر :

— ( یاعمم حمزمنک ایچدیکی شهید ابه شهادتق ایچر  
طاتلی جاندن یکرم یا حصاره طالار کیرم ! )  
دیه داخل حصاره طوغری هجوم ایتکه باشلادی . اکا  
اویولده ( زبیر بن العوام ) حضرتلری ده رفیق اولدی .  
حالبوکه اوجهته اولان هجوم ، صبیان ونسوانی ایاق  
التنده براغه جنی جهته بکده تحسین وتجويز ایدلماشکن  
یهودی لر ، بلاعهد و شرط نفسلرینی وحصارلرینی تسلیمه  
مجبور اولدیلر که مجموعی طقوز یوز یاسکز یوز قدر کیسه لر  
ایدی .

بونک اوزرینه ابتدا ایچلرنده حرب و ضربه مقتدر  
اولان درت یوز قدرینک اللری ارقلرینه باغلانندی .  
اولجه — یعنی ایکنجی سنه هجریه سی شهرشواننده —  
جوار مدینه ده کی محللرندن طرد وتبعید ایدلمش اولان بنی  
قینقاع یهودیلری ، خزر ج قبیله سنک عهد و اماننده بولندقلری  
کی بنی قریظه یهودیلری ده خزر جیلره معادل بولنان اوس  
قبیله سنک حمایه سی وعهد و امانی التنده اولدقلری حالده

( اهل اسلام عليهنده بولناملری ) شرطيله جناب رسالتپناه  
افنديمزه عهد وثيق ویر مشلرکن اهل اسلامك اك مشغول  
بولنديفی ، اك چوق صیقلدینی بر طار وقتده نقض عهد  
ایتمش وعلیهلرنده واقع اولان بودفعه کی حرکت اسلامیه ده  
حضرت نبی ذیشانہ واهل بیت رسالتپناهیلرینه سب و شتم  
کبی بر چوق فنا لا قیردیلری ایتمکه جرءه ایتمش بولناملرینی  
نظر اعتباره کتیرن اکثر اهل اسلام ، انلرک اعدامی رأینی  
قبول والتزام واورأیده اصرار ایتمشدر .

لکن بنی قینقاع مسئله سنده اشراف خزر جیه دن  
منافق شهیر ( عبدالله ابن ابی بن سلول ) ك نیاز و ابرام  
شفیعانه سی سببيله آزاد ایدلمش بولنان قینقاعیلره قیاساً  
انلرک مظهر اولدقلری اماندن بنی قریظه نكده حصول  
استفاده لری ضمننده آزاد ایدلملری اوسیلر طرفندن استدعا  
ایدلديکندن ایشهرؤسای اوسیه دن ( سعد بن معاذ ) رضی الله  
تعالی عنه حضرتلری حکم انتخاب ایدلمشدر .

سعد حضرتلری ایسه خندق وقعه سنده قولندن اوق  
ایله یاره المش بولمغله فراشنده خسته یاتیور ایدی .  
مشار الیهی همان بر حماره وعلی روایة بردوه یه ارکاب و حضور  
پر نور رسالتپناه یه احضار ایتدیله .

جناب سعدی را کباً احضاره مأمور اولان اوسیلر .  
بولده :

— ( یاسعد ! بنی قریظه حایف و معاهد لر کدر .  
حق لر نده لطف و رأفته معامله ایت ! عبدالله بن امیک  
بنی قینقاعی بویله بر حالدن تخلیصده نقدر سعی ایتدیکنی  
بیلیرسک )

دیهرک صورت شفیعانه ده اطناب کلام ایتدکلرندن سعد  
حضر تلی صقالتی الیه صیغایوب صوکره :

— ( لقد آن لسعدان لاناخذہ فی اللہ لومة لائم )

بیوردیلر .

تعبیردن منفهم اولان معنای تہدید، اوسیلرجه هیجانی  
موجب اوله رق هپسی براغزندن :  
— ( هلکت قریظة واللہ ! )

دیمش لر در .

حالبوکه سعد، خندق مسئله زائله سی اثنامنده بنی  
قریظه نک نقض عهد ایتدیکنندن و برده مصلحت تحقیقیه  
ایچون مکالمه یه مأموراً کیتدیکی زمان کندیسنه بد معامله ده  
بولنمش اولملرندن طولای پک زیاده سیله گوجنوب حتی :  
— ( بنی قریظه ایله حرب ایتمدن الله، بنم جانمی

الماسون ! )

دیه دعا ایتمشدی .

حضرت پیغمبر، سعه :

— ( قد جعلت الحكم فيهم اليك . فاحكم فيهم ! )

بیوردیلر .

سعد، قالقوب بنی قریظه طرفنه توجه واقبال ایدهرک :

— ( عليكم عهد الله وميثاقه ان الحكم فيكم ما حكمت ؟ )

دیدى . بنی قریظه دخی :

— ( اوت ! )

جوانبی ویردیلر .

بعده جانب اشرف رسالتپناهی به ده خطاب ایتدی .

لیکن صورت تحلیف و تحکمه ذات عالی نبوی ایله

مواجهه دن حجاب ایتدیکندن مجرد تجیل واجلال ایچون

وجهنی جانب آخره تمیل وصیغه خطابی لفظ غائبه تبدیل

ایدهرک :

— ( وعلى من هنا ؟ )

دیدى . افندیمز دخی رضا واجازت لرینی :

— ( نعم ! )

تعبیر یله اظهار بیوردیلر .

ایشته اندن صوکره سعد حکم ایتشدر :

— ( انی حکمت فيهم بان تقتل الرجال وتسبي النساء )



## والذرية وتقسم الاموال )

سعدك حكم واقعه كي اصابت تامه سنى تأييد ضمننده جناب  
نبوت پناه افنديمى : ( لقد حكمت فيهم بحكم الله من فوق سبعة  
اربعة ) بيورديلىر . شوستايش جليله مظهر بيورلمش  
اولان حكم مشار اليهك حكم كننده اساساً يهوديلىر راى ده  
منضم بولنمش اولديغندن ارتق كيمسه نك برديه جكي قالمامغه  
ديديكى كې ده اجرا ايدلمشدر .

حصارده موجود اولان اموال واشيا طويلانلدينى زمان  
بيك بشيوز قيلنج ، اوچيوز درع ، بيك مزراق ، بشيوز  
قالقان ، وبرچوق حيوانات ومواشى وبرطاق اوانى بيتيه  
واناك يداغتمام اسلامه كچديكى آكلاشلمشدى .

اموال غنايمك مدينه منوره يه نقلى وحيوانات ومواشى نك  
بنى قريظه اوهرنده رعى ايجون مرعالرده موقه ترك  
ايدلمسى خصوصى طرف اشرف رسالت پناهيدن امر بيورلدى .  
ايشته بو وجهله عساكر اسلاميه غنائماً وسالم مدينه  
منوره يه عودت ايتد كده ارلك اسيرلرك ( اسامه بن زيد )  
رضى الله تعالى عنه حضر تلرينك ، قادين اسيرلرك دخى  
( قلابه ابنه الحارث النجار يه ) نك خانه سنده اقامت ايتلمرى  
وايرته سى صباحى مدينه سوقاغنده قويولر حفريله ذكور دن  
اولان اسيرلرك مقتولاً او قويولره القاسى امر بيورلمش

اولديغندن قتل والقايه مأمور بولنان شیر خدا ( علی المرتضی ) کرم الله وجهه حضرتلریله ( زییر بن العوام ) رضی الله تعالی عنه حضرتلری طرفلرن عین مضمون اراده سنیة جناب رسالتیناهی اوزره اجرا اولمشدر . فقط قتل اسرا ایشی تماماً یتمزدن مقدم حرارت نهار یعنی وقت ظهر حرارتی مشتد اولمغله حضرت رسول جلیل علیه افضل التحیه والتبجیل افندیمر :

— ( لاتجمعوا علیهم حر هذا اليوم والسلاح قیلوهم حتی

یپردوا )

بیوروب اسرا حقنده اظهار رأفت ایتدیکنندن قالان اسیرلر ایرتسی کونه براغلمشدر .

صباحلین اسیرلرک اوکنه برقاج یولک خورما دخی طاغیدلمشدی . اسرا ایسه مربوط الید اولدقلرندن خورمائی اوک دیشلریله یردن آلوب یدیلر ! بعده کما فی الاول قتل واعدام اولندیلر !

مقتلرینک ( دار ابی الجهم ) جوارنده اولدینی و قانلرینک داخل مدینه منوره ده ( احجار الزيت ) نام موضعه دکین سیلان ایتدیکی مرویدر .

اثناء محاصره ده حصار دنبری یو وار لایوب دوشوردیکی قوجه برطاش ایله اهل اسلامدن [ خلاد بن سوید ]

رضی الله تعالی عنه حضرت تارینی شهید ایتمش اولان و ( حکم )  
 نامنده کی یهودینک زوجه سی بولنان ( نبأته ) اسمعی بریهودی  
 قاریسی ده اولدیلمشدر . مرقومه نك زوجی کندیسنه  
 زیاده محبتلی اولمغله برابر شوو مقانله ده حیاً خلاصنك ده  
 امكانسر اولدیغنی یقیناً بیلدیکندن فوتندن صو کره سو کیلی  
 زوجه سنك اهل اسلام الله دوشمامسی خصوصه مدار  
 اولق فکرینه بناءً حکم لعینك ، امریله ملعونه ( نبأته )  
 طاشی حصار دنبری جناب خلادك اوستنه دوشورمش  
 وقصاصاً قتله اولوجهله استحقاق کسب الله مشدر .

روایت کوره اصحاب کرامدن ( ثابت ) رضی الله  
 تعالی عنه حضرت تارینی و قتيله اسارتدن قورتارمش بولنان  
 ( زبیر ) نام یهودی حقنده صحابیؑ مشارالیه ، شفاعت  
 واسترحام ایده رک انی قیلنجدن قورتارمشدی .

لکن یهودیؑ مرقوم ، بتون ذکور اقرباسنك قتل  
 ایدلدیکنی کورنجه کندیسنك ده اقرباسی یاننه کوندرلمسی  
 حقنده وقوع بولان استدعاء یهودیانه سی اوزرینه اودخی  
 اقرباسنه پیرو ایدلمشدر .

اصحاب کرامدن « سعد بن زید » حضرت تری ، سبا یا  
 وذراریؑ بنی قریظهنك بر قسمی نجد طرفلرنده سلاح  
 وآت کی اشیاء حربیه ایلله ( سعد بن عباد ) حضرت تری ده .

تقسم دیکرینی شام طرفلرنده كذلك اشیا ایلہ مبادلہ  
مأموریورلدقلمندن انلرده اولوجهله یامشردر .

هردرلو غنائمک خمس افراز اولندقدن صوکره قالان  
قسم غزات اسلامیه تقسیم و انجق عقارات و اراضی  
بنی قریظه، انصار کرامک انضمام رأی و موافقت علیه لریله  
مهاجرین اسلامیه نك خانه سزا اولان فقراسنه ترك و تخصیص  
بیورلمشدر .

ذات عالی رسالت پناهی افندیمز، اسیرلرک ایچنده «ریحانه  
بنت شمعون» نام قیزی کندیلرینه انتخاب برله اعتاق و بعده  
تزوج بیوردیله .

زوجه مشار الیه، حجة الوداع سنه لرینه دکین یاشامش  
واو نبرنجی سنه هجریه ده فوت اولوب «بقیع» قبرستانه  
دفن ایدلمشدر .

«سعد بن معاذ» رضی الله تعالی عنه حضرت لری  
جریحه لری فنا لشوب شهیداً فوت اولمشدر .

حضرت ابی بکر الصدیق رضی الله تعالی عنه افندیمز  
مهاجرین اسلامیه نك افضل اولدقلری کبی شهید سعید مشار  
الیه ده انصار کرامک اشرف و افضل و طور و اخلاقه  
هر کسدن زیاده عمر الفاروق رضی الله تعالی عنه افندیمز  
مشابه بولنورایدی .

وقوع ارتحالی اهل اسلامي بك زياده سيله كدر اندير مش  
 وحقننده حضرت سيدالانام عايله الصلوة والسلام افنديمزه  
 — « سعد بن معاذ [ رضى الله عنه ] ك وفاتيله عرش  
 اعلا دتره دى ! و جنازه سنه يتمش بيك ملك حاضر اولدى  
 بيور مشدر. قبر منورينك مسك كى كوزل قوقدينى و تراب  
 قبرندن برپار چه نك احباب كرامدن برينك النده مسكه تحول  
 ايتديكى شرح بخاريده مذكوردر. يارب ارض عنه !  
 بوائنارده ايدى كه « بالال مزنى » : كندى قبيله سندن  
 درتيوز قدر اتباعى ايله برابر مدينه منوره يه كلوب قبول  
 دين ميين اسلام ايتمشدر . رضى الله تعالى عنهم !

۸

### — اعشى الباهلى —

معلقات سبعة نك طبقة خامسه سى احبابندن « ميمون  
 بن قيس » اسميله مسمى و « ابوبصير » كنيه سيله مكنى  
 [ اعشى الباهلى ] نام شاعر آشنريان، برار الق مداح و محامد سينه  
 نبويه يى حاوى ترتيب ايله ديكي قصيده سنى هم تقديم، هم ده  
 اووسيله ايله حضور پر نور رسالت پناهيده شرف مثولى احراز  
 ايتمش اولوق فكر مخصوصى ايله نزد هايون احمدى يه

— بشنچی سال هجریده — متهبی عزیمت اولدیغی خبرینی  
ایشیدن گروه مکروه مشرکین؛ صیت اسلامیة وشهرت  
نبویه نك کویا شاعرك وساطت شاعرانه سی سببيله شایع  
ومنشتر اولمسندن قورقديغندن « اعشی، اکر قبول دین  
اسلام ایدرسه شعريله بتون قبائلی بزم علیه مزه تحریک ایدره  
دیه اوفکردن منعه همان ابوسفیانی مأمور تعین ایتشلردی  
ابوسفیان، شاعره چاته رق زویه کیده جکنی صورمش  
اوده شریعت خرای اسلامیة نك ناشر عالیسی اولان ذات  
جلیل احمدی بی مدح ایچون نزده هایونلرینه متهبی عزیمت  
اولدیغی و دین مبین اسلامی قبوله مائل بولندیغنی افاده  
ایتمکله ابوسفیانك اکا:

— « ای اما او، هیچ ترک ایدمه جکک شیلردن  
سنی منعه قیام ایدم جک! مثلاً قارندن، ربادن، شرب خمرندن  
منع ایله یه جکدر »

دیدیکنه مقابل اعشی ده : — « بنم ذاتاً قارایله ربا ایله  
القم یوقدر . لیکن مادام که او یله در . شمدیدن بتون  
بتون محروم قالمدن شو مطهر مده کی شرابی ایچیمیم »  
جوانی ویرمشدی .

ابوسفیان؛ اعشینك جواب شاعرانه سنی دیکله دکدن :  
صوکره ایدی اعشی؛ مدینه یه عزیمت فیکرندن تماماً

وازچوب کیری یه دونمک و دین اسلامی ده قبول ایتمامک  
شرطیله یوزدوه وعده ایدرک اقناع و مملکتته ده ارجاع  
ایتمشدر .

لکن اعشی: موعود دوه لری الیر امیدیه دونوب  
کیری کلیر ایکن را کب اولدینی دوه سندن دوشهرک  
- نه دین اسلامی قبول شرفی احرازه، نه ده موعود  
دوه لری المغه موفق اولمق سزین - فوت اولمشدر .

اشعارینی دائماً مترنماً سویله مکله معتاد بولمسی سببیه  
کندیسنه « عرب چالغیجیسی » معناسنه [ صناجة العرب ]  
دییلمشدر .

اعشی: شعراء جاهلیه اده سنده اقتداریه تمیز و تفرد  
ایتمش و مدح و هجوده پک یوکسک درجه ده حسن تصرفه  
مالک بناء علیه او وادیده کندینه مخصوص بر طرف شعر  
و فکر اتخاذ ایلمش، شاعر رنکیکن مقال ایدی .



## فصل تاسع

### التجبي سنة لهجيه وقايعي

نجدہ حرکت . غزوہ ذی قرد . وقعہ غمر . وقعہ ذی الفصہ .  
 وقعہ حموم . وقعہ عيص . وقعہ طرف . وقعہ وادی القری .  
 بعث دومة الجندل . وقعہ غميج . ام القرہ . اسیر بن زرامکہ  
 قتلی . مثله وعلکلیلر وقعه سی . مصالحہ حدیبیہ .

— ۱ —

### نجدہ حرکت

شہر محرمہ ایدی انصار کرامدن « محمد بن مسلمہ  
 الانصاری » رضی اللہ تعالیٰ عنہ حضر تلی؛ اوتوز نفر  
 سواری عسا کر اسلامیہ ایلہ برابر نجد دیارینہ عزیمت  
 ایتمش واورادہ اوردیغی برعشیرتک یوزاللی رأس دودہ سیلہ  
 برخیلی قویونلرینی اخذ واغتنام وبنی حنیفہ اشراقندن  
 « ثمامہ بن اثال » [۱] نام ذاتی اسیر ایتمشدی .

ثمامہ مأسوراً مدینہ منورہ یہ واصل اولدیغندہ مسجد

[۱] ثمامہ : ثاء مثلثة نك ضحی، میمك فتحي ابله در .

شریف نبوینک بر دیرہ کنہ باغلا نمشدی. حضرت نبی اکرم  
افندیمز اکا توجه و اقبال الہ خطاباً :  
— « و ماوراک یا تمامہ ؟ »

بیوردقلرنده تمامہ خوف و ہیجانی یوزنده بللی اولدینی  
حالدہ جوابده :

— « اکر بکا عقاب ایدرسهك مذنبه عقاب ایتمش  
اولورسهك . اکر من واحسان ایدرسهك شا کر النعمه  
من واحسان ایتمش اولورسهك . اکر مال ایسترسهك  
یک چوق مال واردر »  
دیدي .

تمامہ ؛ اسلامہ کلدکن صو کره دیدي که :

— « یا محمد [ علیه السلام ] ! بوندن اوللری روی  
زمینده سنهك وجهکدن اکره [ حاشا ] کوردیکم هیچ  
برشی یوغیدی . شمدی جمیع اشیادن زیاده او بنم محبوب  
قلبم اولدی . سنهك دینکدن زیاده منفور و مبغوضم برشی  
یوغیدی . شمدی اندن دهها زیاده سوکیلی برشیئم یوقدر .  
سنهك بولندیغک شوشهردن زیاده احقر کوردیکم بر محل  
یوغیدی . شمدی دنیاده اندن دهها زیاده اشرف بر محل  
تصور ایدہ میورم »

مملکتک مکہ طرفنه اولان ذخیره اخراجاتی قطع ایتک  
شرطیلہ تمامہ مجاناً اطلاق بیورولدی . افندیمزدن الدینی

مساعده مخصوصه اوزرينه عمره ايجون اوزمان مکه يده  
کيتمشدي .

مشرکين مکه اکا : [ صبا ئمامة ] ديديلر . تمامه انلره شويله  
جواب ويردي :

— « لا . ولكن اسلمت مع رسول الله صلى الله تعالى  
عليه وسلم »

تمامه ، مملکتته عودت ايتديکي زمان ، شرطی موجبنجه  
مملکتتک مکه طرفنه اولان ذخيره اخراجاتي قطعياً منع  
ايتمشدر .

## ۲

## — غزوة ذى قرد —

خلال ربيع الاولده ايدى مدينه منوره يه اوچ ساعت  
مسافه ده کائن [ غابه ] نام محلك مرعاسنده « ابوذر الغفارى »  
رضى الله تعالى عنه حضرتلرى ، مخدوملريله برابر خدام  
نبويه دن رباح اسمنده کي کوله نك نظارتلرى التنده اولدينى  
حالده رسالتپناه افنديمك صاغيلير يکرمى رأس دوه لريني  
کودرلرکن بنى غطفان قبيله سندن فزاره عشيرتک رئيسى  
[ عيينه بن حصين بن بدر الفزارى ] نام کيمسه ، قرق

- وعلى رواية اللي - نفر سواری اتباعی ایلہ برابر اولدینی  
 حالده بر چهارشنبه کیجه سی بغته باصوب جناب ابی ذر  
 رضی الله تعالی عنه حضر تلمینک اوغلنی شهید ودوه لری  
 اخذ و سوق ایلہ دیکی خبرینی رباح، مدینه یه ایصال ایلہ مشدر.  
 روایت کوره :

کیجه لین وقوعه کلش اولان اشبو وقوعاتی رباح،  
 مدینه منوره یه یتشدیر مک اوزره صباح نمازندن مقدم  
 قوشوب کلیر ایکن یولده اصحاب کرامدن تصادف ایلہ دیکی  
 [ سلمه بن الاکوع ] نام تیز پای شهر، رباحک سبب  
 سرعتنی صور مش اوده جواباً ماهو واقعی بیان ایتشدی  
 حالوکه جناب [ سلمه بن الاکوع ] غایت ماهر بر تیر  
 انداز اولدینی کی قوشمه قدده طاقث بشریه فوقدده دینیلہ جک  
 قدر سرعت صاحبی ایدی . خبری الدیغنی عقیبنده  
 غطفانیلری همان تعقیبه شتابان اولمش وهمده یتشوب  
 حیوانلری انلرک ایدی اغتصابندن تخلص ایلہ مشدر :  
 سلمه بن الاکوع رضی الله تعالی عنه حضر تلمیندن  
 مرویدرکه :

[ مدینه دن « غابه » طرفنه چیقدم . کیجه ایدی .  
 ده صبح اذانیده او قونما مشدی . یولده بکا « عبدالرحمن  
 بن عوف » رضی الله تعالی عنه حضر تلمینک مدینه منوره یه

متوجهاً راست کلان برغلامی - یاخود رباح - کمال  
خلجیان ایلہ قوشار ایکن :

— « رسول اللهك دوه لری کیتدی ! »

دیدى . بن :

— « کیم آلدی ؟ »

دینجه اوده کمال تلاش و سرعتمدن ناشی دها زیاده تفصیلات  
اعطاسنه وقت بوله میهرق یالکز

— « غطفان ! »

جوانی و یروب یولنه دوام ایتدی . بن همان یوکسکجه  
بریره چیقهرق اوج دفعه :

— « یا صباحاه ! »

دیه باغیردم . سسم تا ذات عالی رسالتپناهی به واصل  
اولدی . حتی مدینه ده [ الفزع ! الفزع ] دیه بین الناس  
ندالر جیمغه باشلادی . بعده اوکه طوغری یورودم .  
ایکی طرفه بیله باقدن همان غابه طرفه طوغری قوشدم .  
نهایت دوه لری الان بنی غطفان طاقنه یتشدم . حیوانلرینی  
صو ارمقده ایدیلر . بن اوزرلرینه همان اوق یاغیرمغه  
باشلادم . هم اوق آتار ، هم ده :

انا ابن الاکوع  
اليوم يوم الرضع

ديه اظهار شجاعت ايدردم. شجاعت وجسارتك اثر  
ومكافاتی اوله رق دوه لری قورتاردم . اوله برصردده  
ذات رسالتپناهی دخی يتشدي . دیدم که :

— « يا نبی الله ! قد حميت القوم الماء . وهم عطاش .

فابعث اليهم الساعة ! » [۱]

بوسوزيمه جوابده طرف اشرف رسالتپناهيدن :

— « يا ابن الاكوع ! ملكت [ او : اذا ملكت ]

فاسجح ! [ او : فاسمح ] »

بيورلدي . بوندن صوكره دونوب مدينه منوره يه كلدك .  
هم كلير ايكن رسول اكرم صلى الله تعالى عليه وسلم افنديمز .  
« غضباء » نام ناقة سعادتلرنده نبی تركه لرينه بنديروب  
مدينه منوره يه دكين كتيرديلر ! »

رياح ، وجه مبسوط اوزره ذات عالي پيغمبري يه ايصال  
كيفيت ايله دكده رسول مكرم صلى الله تعالى عليه وسلم  
افنديمز ، درحال [ مقداد بن اسود ] رضی الله تعالى عنه  
حضر تلرينك انه برسني جاق ويره رك اني برمقدار عسكرله

[۱] ابن سعدك روايته كوره ابن الاكوع : « يا نبی الله !

قد حميت القوم الماء وهم عطاش . فلو بعثتني في مائة رجل استنقذت  
ما بأيديهم من المرح . واخذت باعناق القوم » عبارده سيله خطاب  
ايله مشدر .

ایلری به اعزام ایتدی . کندیلری ده معیت سینه لرینه  
 بشیوز و علی روایة یدی یوز قدر غزات اسلامیه آلوب  
 ناقة هایونلردن [ غضباء ] را کبا بر چهارشنبه صباحی  
 نجد حوالی سنده بنی غطفان دیارینه طوغری سفر بیوردی .  
 خیبر یولنده مدینه منوره یه ایکی کونلک مسافده  
 کائن [ ذوقرد ] نام محلنده دشمنه یتسلمشدی .

او محله « ابو قتاده » حضرتلری طرفندن دشمن  
 عسکرندن « مسعده » اسمنده بری ، جناب « عکاشه »  
 طرفندن دخی « ابان بن عمرو » نامنده دیگر بری قتل  
 و دوه لردن اون رأس اعاده واسترداد ایدلکدن صوکره  
 عودت هایون شرفوقوعبولمشدر .

بوغزو و ده [ محرز بن نضله ] رضی الله تعالی عنه  
 حضرتلری ، شهید اولشدی .

— ۳ —

— وقعة غمر —

اصحاب کرامدن [ عکاشه بن محسن ] رضی الله تعالی  
 عنه حضرتلری ، شهر ربیع الاولده قرق نفر عسکرله  
 مدینه دن حرکت ایتدی . مکه طرفلرنده « غمر » نام



درهیه اضافتله معروف اولان غمر محلی اها لیسنتک عایینه  
ایدی. فقط حین وصولرنده دشمن ، طاعلمش بولمغله  
تلاقئ طرفین واقع اولامش ، انجق قوم مرقومک ایکی  
یوز رأس دوهلری بالاغتنام عودت ایدلمشدر .

— ۴ —

### — وقعة ذی القصبه —

شهر ربیع الاولده ایدی انصار کرامدن [ محمد بن مسلمه ]  
رضی الله تعالی عنه حضرتلری ، معینته اون نفر اهل  
اسلام عسکری ویریلرک اعزام اولندی. فقط «ذی القصبه»  
نام محله مواصلتنده بنی ثعلبه عربانندن یوز نفر عسکرك  
لیلاً شدتلی محاصره سنه کرفتار اولدیغندن رفیقلری عموماً  
شهید اولدی. کندیسی ده اغیر صورتده یاره لندی. دشمن  
ایسه مشارالیهک تماماً فوت اولدیغی ظنیه شهدا اره سنده  
براغوب کیتمشدی . اخیراً اهل اسلامدن معرکه یه  
راست کلان بری واسطه سیله غازی نامدار ، مدینه یه  
ایصال ایدلمشدر .

بو وقوعات اوزرینه مرقوملرک تنکیلنه [ عئیده بن  
الجراح ] رضی الله تعالی عنه حضرتلری مأمور تعیین

واعزام بیورلشدی . دشمن فرقه سی حرکت اسلامیة دن  
خبردار اوله رق خوفدن اطرافه طاغیلدی . بناءً علیه  
مقاتله حصوله کلمدی . محللرنده یداغنامہ کچیریلان بر  
قاج رأس حیوانلری مدینه یه سوق وایچلرندن برینی ده  
اسیر ایتشلردر .

۵

### — وقعة حموم —

زید بن حارثه رضی الله تعالی عنه حضرتلری ، حموم  
حوالیسنده ساکن بنی سلیم طائفه سنک تنکیلنه مأموراً  
شهر ربیع الاخرده مدینه منوره دن حرکت ایتمشدی .  
محل مأموریتی بولنان « حموم » حوالیسنده وصولنده  
مزینه قبیله سندن اله کچیردیکی برقادینک دلالتیله زید  
| حضرتلری عشیرت مرقومه یه دسترس ظفر اوله رق بعض  
افرادینی اسیر و برخیلی حیواناتینی ده اغتنام ایتمشدر .  
اسرا اده سنده مزبوره قادینک زوجی ده موجود ایدی .  
مدینه جناب رسالتپناه افندیمر ، زوجین مرقومینی آزاد  
بیوردیلر .

### ○ وقعة عيص ○

غزوۀ ذی قرد انا سنده شامدن قریشیلرک برکاربانی  
مکبیه متوجهاً چیقدینفی ایشیدلمشدی . اوقافله بی ضبط  
واغتنام ایتک اوزره شهرجمادی الاولیده [ زید بن حارثه ]  
رضی الله تعالی عنه حضرتلری یتیمش نفر اهل اسلام  
بهادریله مدینه منوره دن چیقارلمش و سردار مشارالیه  
حضرتلری دخی مدینه یه دوت میل مسافه سی بولنان  
« عيص » نام محله قافله یه تصادف ایتدیکنندن انی  
اوروب اموالی اخذ واغتنام ایله مشدر .

قافله نك متاعی ارسنده رؤسای مشرکین قریشدن  
« صفوان بن امیه » نك کلیتلی کوشی ده موجود ایدی .  
امتعده دن باشقه برقاچده اسیر اله کچمشدی . حتی رسالتناه  
افندیمزک کریمه مکرمه لری [ زینب ] رضی الله تعالی عنها  
حضرتلرینک مکمه مکرمه ده زوجلری ایکن بالآخره افتراق  
ایتمش اولان « ابوالعاص بن الربیع » دخی اسرا ایچنده  
ایدی .

مدینه یه کتیرلدیکی زمان « زینب » رضی الله تعالی عنها یه  
وقوعبولان دخالت والتجاسنه بناءً جناب زینب دخی

انی حمایه اتمکله فخر عالم صلی الله تعالی علیه وسلم افندیمز  
ابوالعاصی مجانا اطلاق بیورمشدر !

ایشته بووقعه دن صوکره « ابوالعاص » انصافه کله رک  
دین مبین اسلامی قبول ایتدیکندن شرف صهریت نبویه بی  
اعاده احرازه موفقیت سعادت سرمدیه سنه نائل بیورلمشدره



### ○ وقعة طرف ○

شهر جمادی الآخره دینه [ زید بن حارثه ] حضرت تلی ،  
بنی ثعلبه علیهنده اون بش نفر اهل اسلام ایله یوله  
چیقارلمشدی بنی ثعلبه ایسه ، « طرف » نامیله معروف  
اولان صویک جوار بادیه لرنده ایدی . لکن عشیرت  
مرقومه ، حرکت واقعه دن خبردار اوله رق همان اطرافه  
طاغیلویوردیکندن بعض اموال و حیواناتی النوب عودته  
ایدلای .



### ○ وقعة وادی القرى ○

رجبده ایدی زید حضرت تلی ، وادی القرى اها لیسو  
علیهنده اعزام اولنمشدر . فقط وقوعه کلان مقاتله ده

اهل اسلامدن برخیلی ذوات شهید اولدینی کبی رئیس  
السریه حضرت زید دخی یاره لمشدر .

۹

### ❖ بعث دومة الجندل ❖

شهر شعبانده ایدی که جناب رسالتپناه صلی علیه الاله  
افندیمر ، بنی کلب قبيله سنی دین اسلامه دعوت ضمننده  
کبار اصحاب کرامدن [ عبدالرحمن بن عوف الزهری ]  
رضی الله تعالی عنه حضرت تلرینی ، معیتنه بر مقدار عسکر  
ویره رک « دومة الجندل » بلده سنه بعث بیور مشدر .

مبعوث مشارالیه ، اهالی بلده یی اوچ کون دعوت  
ایتدکدن صوکره قبيله نك - نصارا دیننده بولنان -  
رئیس « اصبع بن عمرو » نام ذات ، قبول دین مبین  
اسلام ایتدیکندن قبيله خلقندن ایمان ایتدک همان پک  
آز برشی قالمشدر . ایمان ایتیانلر دخی جزیه به ربط  
و محللرنده ابقا ایدلایلر .

جناب عبدالرحمن حضرت تلری ، اشبو موفقیتدن  
صوکره « اصبع » ک [ تماضر ] نامده کی قیزی تزوج  
ایدوب مدینه منوره یه عودت ایتشدی . که بحابی مشارالیه ک

[ ابو مسلمه ] اسمنده کی اوغلی مزبورده تماضر دن متولد  
اولدینی مرویدر .

— ۱۰ —

### — وقعة غميج —

بنی سعد بن بکر قبيله سنك اهل اسلام علمنده خیر  
یهودیلر یله عقد رابطه اتفاق ایتمکده اولدقلری بین الاسلام  
مسموع اولدیفنك عقینده حضرت علی کرم الله وجهه  
افندیمر ، برفرقة عسکریه ایله اوجانبه حرکت ایتدیکی  
حالده عشیرت مرقومه یه تصادف ایدمه ماش و انحق  
« غميج » محلنده قبيلة مزبورنك حیوانات ومواشیسنی  
بولغله بشیوز دوه ، ایکی بیك قویونلرینی سوروب  
مدینه منوره یه کیشدر .

اشبو غنایمك خمس ، خزینه بیت المال مسلمینه  
بالافراز متباقیسی غزات کرامه تقسیم بیورلدی .

۱۱

### — ام القرفه —

ام القرفه ، بنی فزاره دن برعشیرتك رئیس سی واهل  
اسلام علمنده شدت عظیمه کوسترنلرکده بری ایدی . حتی  
زید بن حارثه حضرتلری ، مدینه دن شام حوالیسنه کیدرکن

مرقومه نك عشيرتندن بر طاقم كيمسه لر صار قندياق ايدمرك  
 مشار اليه نك نزدنده كي امتعه سني اخذوا غتصاب ايتشاردي!  
 بناءً عليه تأديب وتنكيل لرينه لزوم قطعي كورونديكندن  
 خصوص مذكورك امر اجراسنه زيد، مأمور بيورولدي.  
 سريه، عشيرت مذكور نك مسكنه صباح وقتي واصل  
 اولمشدي. انلري در حال تحت محاصره يه الديلر. انشاء محاصره  
 ومصادمه ده مرقومه «ام القرفه» قيزي ايله برابر اله كچدي..  
 ملعونه بي اهل اسلامدن [ قيس بن محسر ] نامنده بري  
 اقباح قتل ايله اعدام ايتدي.

سريه نك غانماً و سالمأ معاودت ايدم. بيايمسندن طولاني  
 رسالتناه افنديمز، محظوظيت مخصوصه اظهار بيورديلر.

## ۱۲

### — اسير بن زرامك قتلي —

اوچنجي سنه هجريه سنده قتل اولنديغي بحث مخصوصنده  
 يازيلان ابورافع سلامدن صوكره خيبر يهوديلري، ايجلرندن  
 «اسير بن زرام» نام شخصي كنديلرينه امير انتخاب ايتشاردي!  
 اسير مرقوم ايسه قبائلي اهل اسلام عليهنده تحريك  
 وتحشيد ايتمهك باشلا ديفي مسموع عالي اولغله تحقيق كيفيت  
 ضمننده «عبدالله بن رواحه» رضي الله تعالى عنه حضر تلري



اوج نفر رفیق ایلہ خیرہ کوندردی . مسمو عاتک صحتی تحقق  
ایتدی ! بناءً علیه لعینک ارتق ازاله وجودی وجوبی ده  
تحقق ایتدیکندن صحابی مشارالیه ، تکرار خیرہ کیتدی .  
معیتده اوتوز نفر اهل اسلامده موجود ایدی . اسیره  
دیددی که :

— « یا اسیر ! سنی پیغمبریمز علیه السلام ایستدی . خیر  
ولایتی والیلکنی سکا توجیه ایده جک ! »

ملعون ، حرکت ایتدی . ممنون ایدی ! . اوتوز نفر  
عونه سیله برابر اولدینی حالدہ کلیرایکن یولده « قرقره » نام  
محله وصولنده دعوت واقعیه ! اجابة حرکتندن دامت  
ایتدی . فکرنی دکشدیرمشدی ! . غدروخیانت جهتنه میل  
ایتمشدی : سیفنی چیقارمق اوزره یاواش یاواش قبضه سنه  
ال اوردینی کورولدی !

اصحاب کرامدن [ عبدالله بن انیس ] رضی الله تعالی عنه  
حضر تلری درحال :

— « های خائن ! نه دیمک ایسته یورسک ؟ »

دیرکن حرینی دوه دن مقتولاً یزه دوشورمش دیگر اصحاب  
کرام ، سائر یهودیلره کیریشه رک هپسنی اوراده قتل و اعدام  
ایتمشلر در . !

اصحاب سرینه نك سالماً ومظفراً عودتند افندیز :  
 [ قدینجیکم الله من القوم الظالمین ] بیوردیلر .

۱۳

مثله

و

عکلیلر وقه سی [۱]

عکل وعمرینه قبیله لرندن برقاج کیمسه، حضور لامع  
 النور جناب رسالتیناهی به کله رك اظهار اسلامدن صوکره :  
 — « یانبی الله ! بز شهر آدمی دکلز . قیون، صیغیر  
 کوده کلش بر طائفه دتزو . مدینه نك هوا سنه تحمل ایده میه جکزه  
 دیه عرض حال ایتدیلر . افندیمزک ایسنه خارج  
 مدینه ده بر محل معینده برقاج رأس دوه سی کودولسکده  
 ایدی . انلری مراد ایدرک بیوردیلر که :  
 — « کیدیکز ! او دوه لرك سودیله کچینکز ! »  
 اشخاص مرقومه دوه لرك اولدینی محله وصولارنده همان  
 چوبانی قتل ودوه لری اخذ وسوق ایتشلردر !  
 حتی چوبانی قتل ایله بورتی، قولاغنی قطع ایتدکلرندن  
 باشقه کوزینه ده دیکنلر صوقشردی !  
 [۱] عکل : عین . همله نك وكافك ضمه لریله ،

اشبو و قوعات، مسموع عالی اولدینی زمان حریفلرک  
تعقیبنه « کرزن جابر الفهری » بر قاج نفر اهل اسلام ایله  
برابر مأموراً اسرا بیورلمشدی .

کرز، او آدم لری طوتوب مدینه کتیردی . روایت  
کوره با اراده سنی جناب پیغمبری او زمان حریفار، کوزلرینه  
قصاصاً میخار قاقیلوب اشـد العذابہ گرفتار ایدلمشلردر .  
اندن سوکره او مثللو معاملہ، منہی قالدی .

ع ۱

### — مصالحة حدیبیہ —

حدیبیہ، بین الحرمین بر قویو یا خود برا غاج اسمیدر .  
مدینه منوره یه طقوز، مکّه مکرمه یه بر مرحله مسافده  
بولنور . عصر سعادتده بئر مذکورک یاننده حدیبیہ نامیلہ  
متعارف برقریه وار ایدی .

تاریخ هجرت نبویه نك التنجی سنه سی غرة ذی القعدة  
سنده ایدی که حضرت پیغمبر، بیک درت یوز و علی روایت  
بیک بشیوز و یا خود یدی یوز قدر اصحاب کرامیلہ برابر  
مدینه منوره دن مکّه یه حرکت بیوردیلر .

اشبو حرکت هایون احمدیده زوجات طاهرات

نبویه دن « ام سلمه » رضی اللہ تعالیٰ عنہا حضر تاری ده معیت سنیہ نبوتیناھیارنده ایدی .

بوحرکتدن مقدّمجه حضرت رسول مکرم صلی اللہ تعالیٰ علیہ وسلم افندیمر رؤیالرنده: « برچوق اصحاب کنز ینبله برابر مکّه مکرمه یه کیدوب بیت الہی زیارت ومفتاح کعبه یی ده اخذ بیوردقلرینی، کورمش واو، رؤی نبویه یی اصحاب کرامنه نقل ایله برابر مکّیه کیده جکلرینی وکعبه یی ده طواف ایده جکلرینی بیسان بیوردقلرنده اصحاب کرام . اورویانک کورولدیکی سنه سننده همان مکّیه کیده جکلرینی امیداتمشلردی . لیکن وقت عزیمت وزیارت ایچون طرف اشرف رسالتدن برصراحت کوسترمامشدی .

نیتلری محاربّه اولمیوب الحق عمره « یعنی سعی وطواف ایله کعبه معظمه یی زیارت » دن عبارت اولدیغی ایچون اکادلیل اولمق اوزره یولجی کبی برقیلنچ طاقملرینی اصحاب کرامنه امر بیورمشدی .

بناءً علیہ افراد اسلامیہ، حرکات حریه ده قولالاندقلری اسلحه و آلات تدارکندن صرف نظر ایدوب بریولجی طرز وقیافتنه کیرمشدر .

روایتہ کوره بنیادیت حرکت اسلامیہ ده یانلرینه هیچ

سلاح المیهرق بر منزل قدریول کیتد کدن صوکره حضرت  
عمر الفاروق افندیمرک ذات عالی رسالتیناهییه :

— « یارسول الله ! بز شمدی اولیه بر خالق مملکتیه  
کید یورز که اکثر اشرفانی اولدیر مشدک . او حالده  
سلاح سز کیتمک مناسب اولمز رأینده بولنیورم »

دیسی اوزرینه بررقیلنج النمنه طرف اشرف پیغمبریدن  
اراده سنیه شرف متعلق بیورلمغله هر کس اورادن دونوب  
بررقیلنج قوشا نمشدر .

حجاج اسلامیه اهل مدینه نک میقاتی اولان « ذوالحلیفه »  
نام محله مواصات ایتدیکی زمان انده ایکیشر رکعت نماز  
ادا ایدهرک احرامه کیردیلر، یتش قدر قربانلق دوه لره  
علامت ده وضع اولندی .

بوعلامتلان قربانلق دوه لره ایچنده ابوجهل لعینک  
وقعه بدرده اخذوا غنم اولنان دوه سی ده موجود ایدی !  
ایشته بومیقاتده اکثر اصحاب کرام دخی احرامه کیرمشدی .  
رسول اکرمک حدیبیه جوار لرینه کلدیکی صره ده  
ایدی . . برارالق صحاب کرام ؛ حضور پر نور جناب  
رسالتیناهییه واردیلر . انلرک قدوم و مراجعت لرینه  
بر حاجته مبتنی اولدیغنی کشف و تفرس بیورمش اولان  
ذات احمدی دیدی :

— « مالکم ؟ »

بوکا اصحاب کرام :

— « یارسول الله ! رکوء ہایونکزدہ کی صودن

باشقہ ایچمکہ وابدست المغہ صویمز یوقدر ! »

دیہ جواب ویردیلمر . صوکرہ اوینبوع الحکم افندیمر مبارک  
دست شریفلرینی رکوءنک ایچنہ وضع بیوردیلر . درحال  
اصابع شریفہ نبویہنک ارالرندنبری پیکار کی صواقغہ  
ورکوءدہ کی صوہان طولوب اطرافدن طاشیمغہ باشلامش  
واوصودن بیک درتیوزشوقدر حجاج اسلامیہ ہم ایچمش  
ہم آبدست المشدرد !! .

حتی جابر رضی الله تعالی عنہک :

— « اکریوز بیک آدمده اولسیدق اوصوبزہ ینہ

کفایت ایدہ جکدی »

دیدیکی مشهوردر !

لکن قریشک زیارت اسلامیہ بی منع وانلرلہ محاربہ یہ

قیام ایتسی عقلاً پک مستبعد اولمدیغندن مدینہ حوالیسندہ

بولنان « غفار، مزینہ، جہینہ، اشجع، اسلم، دئل [۱] »

کی قبائلده - برلکدہ حج ایتک اوزرہ - حرکت و زیارت

بیت الله دعوت بیورولمشلردر .

قبائل مرقومہ ایسہ : « رسول الله، اولجہ کندی ذات

[۱] غفار : غینک کسری، فانک تخفیقلہ و مزینہ : میبک ضعی،

زانک فتحی، یانک سکونیلہ و دئل : دالک کسری ہمرہ نک سکونیلہ در

هایونلرینی مکده محاصره ایدوب اک بیوک تهلکهیه القا ایتمش اولان قریشک ایچنه کیدیور. نفسی تهلکهیه آتیور. ارتق آنکیچون صاغ اولدوق کلمک احتمالی یوقدر «کی بعض افکاره مبنی کیتمکدن امتناع ایچون کویا اداره امور بیتیه لرینه باقه جق کیمسه لری اولدیغندن وسائر دن بحثله بدیهی البطلان برطاقم بهانه لر بیانه مراجعت ایدرک معذرت درمیان ایتدیله .

رسول اکرم صلی الله تعالی علیه وسلم افندیمر حضرتلری قریشک احوالی او کرونوب بر خبر کتیرمک اوزره «ذوالحلیفه» محلندن جانب مکیه

«بسر بن سفیان» یاخود «عینه بن حصین» [۱] حضرتلرینی جاسوسلغه کوندرمشدی .

جاسوس مشارالیه، «عسفان» [۲] یاخو «غدير الاشطاط» نام محله مواصلت هایون ائناسنده دونوب اصحاب کرامه التحاق ایتدی .

حالبوکه حرکت اسلامیه دن خبرالمنش اولان قزیش،

[۱] عینه : جهینه وزنده اسم مصغردر

[۲] عسفان : عثمان وزنده .



اهل اسلامى مكه يه دخولن منع ايجون « بلدح » [۱]  
نام محله عسكر طوپلامغه باشلامشدى .

« عيينه » حضرت تلى . قريشك ترتيب ايله ديكي اردونك  
« ذى طوى » موقعه وايكى يوز نفر عسكر له طليعه يه مأمور  
تعيين ايتديكي « خالد بن الوليد » دخی « كراع النعميم » نام  
محله قدر كلديكنى خبر ويردى .

حضرت پيغمبر ، بوسفر هيايوتلى حرب و قتال ايجون  
اوليوب بلهك حج و طواف ايجون اولديغندن موجود  
افراد اسلاميه يانلرينه برر قيلنجدن باشقه سلاح امامشاردى .  
بناءً عليه ايشى اوراده مجلس مذاكره يه وضع و حقه  
ده اصحاب كراميله مشاوره بيورده رق ديديلركه :

— « جواب ويريكز ! زيارت بيت اللهدن بزى منع  
ايدنلره و يا ذراريسنه مى ميل ايدجكز ؟ يوقسه نه يابه جغز ؟ »  
حضرت ابى بكر الصديق افنديمىز حضرت تلى طرفندن جواباً  
— « يارسول الله ! سز زيارت بيت اللهى مراد ايدرك  
چيقديكز . قتالى قصد ايله چيقمديكز . او حله بته ميل  
و توجه بيور ! بزى منع ايدن اونور ايسه انكه طييعى مقتله  
ايدرز »

[۱] بلدح : با و دالك فتحه لرى ، لام و حاء مهمله نك سكونلريله .

دینلدیکنه قارشى ذات‌عالیٰ پیغمبری ده :

— « بزى قریشك یولندن باشقه بریوله چیقاره جق  
آدم وارمى ؟ »

بیورمقله میدانه « ناجیه بن جندب الاسلامی » [۱] کیره رک :  
— « بن یارسول الله ! »

دیمش و دیدیکی کبی ده باشقه یولدن عسکری کچیرمشدره .  
اولوقت که برانیش یره راست کلدیلهر حدیدییه موقعنه  
اینک ایچون ذات‌عالیٰ رسالتیناهی ؛ اردوی سعادتلرینه  
خطاباً :

— « صاغ طرفی طوتیکز ! »

فرمان هایونتی ویرمش اولمغله اردوی اسلام ، براز صاغ  
جانبه میل ایدوب صرپ بریوقوشدنبیری « ثنیة المرار »  
اسمنده کی دبهیه چیقمشدر « حدیدییه » قریه سی ایشته  
اودپه نك اشاغیسنده کائن ایدی قریش ، قریه مذکوریه  
اردوگاه اتخاذا یتمشدی .

قریشك طلیعه سی « خالد بن الولید » انی اوزاقدنبیری  
کورونجه همان دونوب قریشه کیده رک اوانده کی مشهوداتنی  
خبرویردی .

[۱] جندب : جیمك ودالك ضمه لری نون وبانك سكونلریله .

روایتہ کورہ « کراع الغمیم » محلہ قریب بریرہ  
 اینہرک صلوۃ وقت ظہری جماعۃ ادا ایتمش اولان  
 جماعت اسلامیہ نک ایکندی نمازینی اداہہ شروعندہ خالد  
 بن الولیدہ انلرک ارقلرندن ہان هجوم ایتک جہتتی تصور  
 ایتمشکن انک اوتصوری جبریل امین طرفندن خبر  
 ویرلدیکیچون وقت عصرہ صلوۃ خوف ادا بیورلدیغندن  
 اہل اسلامدہ کی آثار بصیرت وانتباہہ قارشئ موفقیتمز لکنی  
 آکلا یہرق قریش اردوسنہ طوغری رجعت ایتمشدی .

بحکمۃ اللہ تعالیٰ درکہ حضرت رسول اکرم افندیمرک را کب  
 اولدقلری «قصواء» اسملی ناقۃ سعادتلری «ثنیۃ المرار» دہ سندہ  
 ہان یرہ چوکیویردی ! . اصحاب کرام : « خلائ القصواء »  
 خلائ القصواء « دہ کیفیتی ذات رسالتپناہی یہ  
 عرض واعلام ایتدکن صوکرہ انی قالدیروب یوروتمیکی  
 ایستدیلرایسہدہ ہر درلو جبرواقدا ملری ثمرہ سز قالہرق  
 موفقییت حاصل ایدہ مدکارندن رسول کبریا :

— « ما خلائ القصواء . وما ذاک لها بخلق . ولكن  
 حبسه حابس الفيل : یعنی قصوا سرکشک ایدوب دہ طورمدی .  
 اولہ عادتئ دہ یوقدر . لیکن ابرہہ نک فیانی یرہ چوکیدرن  
 قصوایی دہ یرہ چوکیدردی »  
 دیوب انک عقیندہ :

— «والذى نفسى بيده لايسـألونى خطـة يعظمون  
فيها جرـمات الله الا اعطيتهم اياها»

كلامنى ده علاوه بيورديلر. كه مقصده على جناب پيغمبريلرى  
«الله تعالى حضرتلرى اصحاب فيلى مكهيه عنوة كيرمدن  
منع ايله ديكي كى بزده بوحال وهيئت ايله دخول مكهيه  
رخصت ويرمدى . بيت الله حرمتنك انتاج ايدن  
قتالك عدم وقوعنه سبب اولمق اوزره اهل مكهك بندن  
ايسـتـيه جـكى هر درلو موادى قبول واعطايه البت راضى  
اولورم» ديمكى .

چونكه قريش اوزرينه همان وارلسه محاربه ومقائله  
حصوله كمامك هر حالده غير قابل ايدى .

«غفار، مزينه، جهينه» قبائلى كى حوالى مدينه  
منوره ده ساكن عربان، معيت سنیه نبويه ده اوله رقىارت  
بيت الله كله مدكلرندن حجاج اسلاميهك مجموعى انجق  
بيك بشيوز قدر اولديغندن باشقه يانلرنده مكمل سلاح  
دخى موجود دكلدى .

بوكمقابل اهل مكه ايسه افراد اسلاميه به نسبة دها  
زياده ايدى . حتى طائف امراسندن «عروه بن مسعود  
الثقفى» نام اميرواحايش قبيله سى شىخى اولوب جنكاور

لكيله بين العرب معروفه حليس بن علقمه دخی برابر  
لرنده ایدی .

اهل اسلامده موجودیتی، مشرکین عربجه دخی  
منکر اولیان یکدستی انضباطه نسبتله پریشانی عسکریمی  
کندیسنی پک چاپک هزیمته دوچار ایده کلان قریش  
اردوسی، باشی بوزوق بر جمعیت عادیه طرزنده کورینور  
ایدی .

بناءً علیه اهل اسلامک - صبر و ثباتی اولدینی تقدیرده -  
عون و عنایت خدا ایله مظفریت کسب ایتمی شبهه سز  
ایدیسه ده او حالده ده طرفیندن برچوق تلفات عسکریه  
وقوعندن سوکره دخول مکه حرباً حصوله کله رک حرم  
شریف بیت الله چاره سز برنوع حرمتسزلاک ایدلمش  
اولور ایدی. بوندن باشقه برده اسلامی هنوز اظهار ایده -  
مامش اوله رق مشرکین مکه ایچنده طوران اضعفاء مسامین  
دخی او عریده عسکریه ارمه سنده هیچ بللی اولمقسزین  
کورواتی به کوندرلمش اوله جقلردی .

ایشته ناقه سعادتک - خلاف معتادی اوله رق -  
من طرف الله اوله ناکهانی چوکیور می بوکبی دها پک  
چوق دقیقه رمز و اشارت ایدی !  
ناقه سعادت؛ اصحاب کزین طرفندن قالدیریلوب

یورودلک ایچون اولقدر زور لاندینی حالده ینہ قالقمایوب  
قالمش ایکن رسول ا کرم افندیمنزانی بالذات سوق ایدنجه  
همان قالقهرق یوریویوردی ، فقط مکہ یه طوغری یول  
ایله کیتمیوب برطرفه صاپدی . « حدیبیه » نك نهایتده  
صوی چکلمش برقویونك باشنه طوردی . اردوی هایون  
دخی اوقویونك کنارینه ایندی .

لکن قویوده کی ازمقدار صوعسکر طرفدن آوچله  
چبقه اریلوب کرک انده ، کرک قویونك جوارنده ارتق  
صوبولندی جغتله جماعت اسلامیه ده مضایقه یوزکوستردی  
اصحاب ، صویه اولان احتیاجدن شکایت ایتدیله رسول الله  
افندیمنز ، اوزمان تیرکشلرندن براوق چیقاروب صوسز  
قویونك دینه طوغری اتمق اوزره اصحاب کرامدن « براء بن  
عازب » رضی الله تعالی عنه حضر تلرینه امر و اعطایورمش  
اودخی بروجه فرمان نبوی اوقی آتوب ایندیردیکنك  
عقبینده قویودن اولقدر صوفوران ایتمشدرکه جماعت  
اسلامیه نك صویه اولان هر درلو احتیاجاتی ازاله ایله دی !! .

بعض تفاسیرك بیاناتنه کوره بئرمذ کورک صوی آرثق  
اندن صوکره بردها قوروماش و « انسان العیون » ک  
بیانه کوره اردوی اسلام اورادن قالقدینی زمان عازب

سهم مـذ کوری قویبودن چیقاردیغندن صوی تکرار  
چکیلوب قورومشدر .

فخرکائنات افندیز، بوسفرلرنده حربی مراد ایتدیکنی  
بیلدیرمک ایچون بنی خزاعه قبیله سندن « خراش بن امیه »  
حضرتلرینی « ثعلب » اسمنده کی دوه لرینه بندیره رک قریشه  
کوندردی . قریش ایسه خراشی اولدیرمک ایچون اوزرینه  
هجوم ایتمشلر حتی احابیش عربلرینک ارمیه کوروب دم  
مددکارانه معاوناتی اولمسیدی جانی قورتاره بیلمش  
اولیه جق درجه سنده بیوک تهلهکه یه براقشلردی .

جناب خراش، همان دونوب کیفیتی نبی ذیشانہ تبلیغ  
ایدنجه او حضرت ده نیت شریفه لرینک نه یولده اولدیغنی  
کوزلجه تفهیم ایتمک مأموریتیه حضرت عمر الفاروق  
رضی الله تعالی عنه افندیمنی اعزام ارزولرینی اظهار  
بیوردیلر . جناب فاروق :

— « رؤسای قریش، بنم کنندیلری حقنده نقدر غیظ و غلظتم  
اولدیغنی بیلیرلر قورقارم که بکاسوء قصد ایدهلر . برده مکده  
بنی حمایه ایده جک عشیرتم یوقدر . فقط عثمان بن عفانک .  
کیتمسی بندندها زیاده مناسه بدر . زیرا اونک اوراده  
اقرباسی، عشیرتی چوقدر . علی الخصوص ابوسفیان ایله  
قراقتی ودوستلغی واردره »



دیه جواب ویردی . بعده حضرت پیغمبر « عثمان بن عفان »  
رضی الله عنه حضرت تلرینی اون نفر اصحاب کرام ایله برابر مکّه یه  
کوندردی . ابوسفیان و رؤسای قریش ایله ملاقات  
ایدوب مقصد عالی جناب پیغمبرینک مجرد طواف و زیارت  
بیت الله اولدیغنی بیلدیره جک و مکّه ده اسلامی عنوز اظهار  
ایده بیلمش اولمایانلرله ده کوریشوب انلرده تسلیت  
ویره جکدی .

رؤسای قریش ، سفیر مشار الیهی بیوک منونیتله  
استقبال ایتدیلر . لیکن حضرت عثمان رضی عنه الرحمن ،  
وصایای علیه و سالتیناهی بی رؤسای مرقومیه تبلیغ  
ایتدیکی زمان انلرده

— « یا عثمان ! سن کلدک باری بوراده قال !  
وبیت اللهی ده طواف و زیارت ایت ! محمد [ علیه الصلو  
والسلام ] ی مکّیه قویمایه جغز »  
جوابی ویردکارندن حضرت عثمان :

— « رسول الله زیارت ایتدکجه بن زیارت ایتم »  
دیه مکدلیلرک تکلیفنی رد ایتمکله رؤسا بوسوزده قارشى  
منفعل اوله رق مشار الیهی توقیف و کوز حبسنه ادخال  
ایله مشلردر !

بر دیگر روایت کوره :

هم خراشك ، هم ده جناب عثمان رضی الله تعالی عنهما  
 عنهما نك او سفارتلری هنوز وقوع بولمامشدی خزاعه  
 قبيله سی رئیسى « بدیل بن ورقاء » نام کیمسه قبيله سندن  
 بر طاقم آدم لرله برابر اولدینی خالد قافله هاینه کلدی .  
 ابن ورقاء خزاعی نك منسوب اولدینی خزاعه ،  
 تهامه ده کی قبائلدن اولوب زمان جاهلیته بر خصوصدن  
 طولای هاشمیلرله عقد اتفاق ایتش اولغله ظهور  
 اسلامدن سوکرده او عهد اتفاق اونو تیه رق حضرت  
 رسول اکرم افندی مزه طرفدار اولنقدن کیری طور -  
 میورلردی . حتی هنوز قبول دین مبین اسلام شریفه  
 مشرف اوله مامش لر ایکن ینه قریشك حرکاته واحوال  
 وافکار سائر سینه دائر حضرت نبی ذیشانله کیزلیجه  
 مخابره بیله ایدردی .

بوکرده ابن ورقاء خزاعینك کلشی خیر خواهلق  
 یولنده ایدی . وقتا که ابن ورقاء حضور پر نور رسالتپنا -  
 هی یه کیردی دیدی که :

— « قریش عسکرینی کوردم . حدیبیه نك صولی  
 یرینی و حرکات عسکریه یه مساعد مواقعی ضبط ایتش لر !

تدارکلی ده بولمشلر. هله کیری دونمک نیتند. دکلدرلر .  
سزه شدیداً ممانعت ایده جکلر .

حضرت رسول کرباجواب اوله رق :

— « بزکیمسه لر ایله حرب و قتال ایچون کلمش.  
دکلز . انجق عمره نیتله کلدک . قریش طائفه سنی محار-  
بات سابقه ضعیف و بیجبال براقشدر. فقط ایسترلر سه  
انلرله مصالحه و معاهده ایدرم . صوکره بنم شریعتکم.  
ظهور و انتشارنده ارزو ایدرلر سه انلرده باشقه لری کچی  
تابع اولورلر . اکر بو صورتی قبولدن امتناع و بخیه  
مکبه دخولدن منع ایده جک اولورلر سه کندم یالکتر  
قالنجیه دکن انلرله حرب ایدرم . ارتق جناب حق  
امری نه ایسه البته یرینه کتیریر .

دیدی ، انک اوزرینه بدیل :

— « او یله ایسه بن واریم بو بابده کی بیاناتکزی

قریشه اخبار ایدهیم .

دیدکدن صوکره رخصت الوب قریش اردوسنه عودت.  
ورؤسای قریش ایله ملاقات برله انلره :

— « بن شمدی محمد [ علیه الصلوة والسلام ] ک

یانندن کلیورم . سویله دیکی سوزی ایستر سه کز سزه  
تبلیغ ایدهیم .

دید یکی حالدہ « عکرمہ بن ابی جہل » ایلہ « حکم بن عاص »  
کی بعض سفہاء روساء قریشک :

— « سنک ویرہ جکک خبرہ بزم احتیاجمز یوقدر »  
دید کلرینہ قارشی اودہ همان سکوت ایلہ کلام بینندہ  
متردد اولہ قالمش ایکن عرب اغنیاسندن وطائف امرا -  
سندن « عروہ بن مسعود الثقفی » ، او مثللو ملاحظہ سز  
بقونوشان رؤسایہ :

— « ہلہ بدیلک سویلہ یہ جکی سوزی دیکلہ یکنزدہ  
ایشکزدہ کایر ایسہ قبول والا رد ایدیکز ! »  
سوزیلہ نصیحت ایلہ دیکندن او نصیحتک تأثیری اولہ رق  
« حارث بن ہشام » ایلہ « صفوان بن امیہ » طرفلرندن بدیلہ :  
— « سویلہ باقہ لم ! »

دینلمش بعدہ اودہ جناب حبیب کبریانک دہسان شریفلرندن  
اولان کافہ مسموعاتی جواباً تبلیغ ایلہ مشدر .  
بونک اوزرینہ « عروہ بن مسعود بن معتب الثقفی »  
ایاغہ قالقدی .. رؤسای قریشہ خطاباً :

— « بکا امنیتکنز وارمی ؟ »

دیور ایدی . قریشدہ :

— « اوت سندن ہر وجہلہ امینز ! »

سوزيله اكا اولان امنيت تامه لرني اظهار ايتديكندن  
اوده بديله اشارتله :

— « بو آدم سزه مصلحانه ومنصفانه بر طريق  
سلامت كوستريور ! طوريكزبن بر كره انك ياننه كيدوبه  
باقهيم ! »  
ديمش قريشده :

— هايدي كيت ! كوردم  
ديه رخصت ويرمشلدر .

بناءً عليه عروہ اردوی هایونہ کلدی . ذات اشرف  
رسالتپناهی ایله کوروشدی . ومسئله حاضرہ حقندہ  
مذاکرہ ومکالمہ ضمنندہ دیدی کہ :

— « يا محمد [ عليه الصلوة والسلام ] قريشك بتون  
رؤسا واشرافى تداركات كليہ ایله قارشو كزه چيقدی .  
سنی مكیہ دخولدن منع ایچون قوتلی بر معاهده دخی  
پیدا ایتدیلر . سنك يانكده کی عسکر ایسه ضعیف بر  
بلوكدن عبارت ! . اوله بیلور کدیارین جمله سی قورقولرندن  
قاجوب سنی میدانده یالکیز براغیور لرلر ! »

بو سوزه قارشى جانی پك زیاده صیقلمش اولان  
یارغار نبوی جناب صدیق رضی الله تعالی عنه حضر تلی

قاشلرینی چاتدقدن وفنا بر صورتده اکاباقدقدن سوکره  
کمال حدتله :

— « امصص ببظر اللات ! بزمی طاغیلوب ده حضرت  
سید کائناتی یالکز اوله رق میدانده براغه جغز ؟ »  
سوزلریله عرویه یی اغیر تکدیر ایتمش و حضرت عمر الفاروق  
رضی الله تعالی عنه افندیلمزده انک کو کسنه حدتدن شدتلی  
یومسروق ایندیر مشدر !

جناب صدیقک اشبو جواب تکدیر آمیزانه سنی  
عرویه ایشیدنجه :

— « انی سویله یان کیمدر ؟ »

دیوب اصحاب کر آمدن :

— « ابوبکر »

جوابی الیغنده عرویه اکا دونه رک :

— « والله یا ابا بکر ! اکر سنک بکا اولان التفات

ومتک اولمسیدی جواب ومقابله ده بولور ایدم »

دیدى .

بعده عرویه - عادت عرب اوزره - حضرت فیخر  
کائنات علیه وعلی اصحابه اکمل التحیات افندیلمزک مبارک حیه  
سعادتلرینی الیه طوتوب اوقشامق ایستدی . او درلو

نوازش مشرکانه ایسه تعظیمه منافی بر کیفیت اولدینی  
حاله سید کائنات علیه افضل الصلوة افندیمر حضرتلری  
عروءنک او حرکت ناسزاسنه قارشینی اکا لطف و نزاکت  
ایله معامله بیورورلردی .

« مغیره بن شعبه الثقفی » رضی الله تعالی عنه حضر -  
تلری که او زمان ذات عالی رسالتپناهینک باشی اوجنده  
یالین قیلنج بر حاله طور یور ایدی . همان عروءنک -  
لحیه سعادتتی طوتمق اوزره بولسان - النی اوته طرفه  
حدتله ایتهرک :

— « چک الکی ! مشرکک اکا طوقانسی اولمز »  
دیمش وانک او صورتله شدت معامله سنی کورمش  
اولان عروءه :

— « بر مظلوم و غدار ! سنک دو کدیگ قانک چرکین  
لکه سنی هنوز تمیزلدم . بکا شمعدی بو طور و معامله ک  
نه دیمک ! »

دیه مغیره بی شدیداً تکدیر و مواخذه ایتمک ایستدیکندن  
مغیره دخی قارشولوق اوله رق بر طاقم سرت سوزلر  
سویله مش بولمغله حضور عالی رسالتپناهیده اوزونجه  
و شدتلیجه بر مجادله وقوع بولمشد .



مجادله نك سكونتذير اولدينى ائنه حضرت نبي محترم  
 بديله مقدهما سويله دكلى نيك عيني اوله رق عروه يده ده و انجق  
 طواف بيت الله ايجون كلديكنى وعقد رابطه صلح و صلاح  
 ايديله بيله جكنى فقط قریش بو ايكي شيله قناعت كتر -  
 مديكى تقديرده ارتق صولك درجه يه قدر مقاتله ايديه جكنى ،  
 سويلدى ! .

عروه ايسه قالمشدى يده جكي صره ده :

— « يا محمد [ عليه الصلوة والسلام ] فرض ايدمه كه  
 غالب كلذك عربده سندن اول كلانلردن اصلنى تلف ايدوب  
 بتيرمش كي مسه وار ميدر ؟ »  
 ديمش اولدقدن باشقه هر درلو مكالمات ومذاكراتك دوام  
 وجريان ايله ديكي ائنه اصحاب كرامك حضور على  
 نبويده كي اوضاع و اطوار معظمانه لرني كوره رك جمعيت  
 اسلاميه نك جهت وحدتي بولنان دين مين اسلام  
 اساسنده كي متانت ارتباطيه و انضباطيه سنه پك زياده سيله تعجب  
 وتحير ايديه قالمشدى ! .

وقتا كه عروه كيدوب انجمن مشورت قریشه قارشدى ،  
 انلره ديدى كه :

— « اى معشر القریش ! بن قياصره و اكاسره  
 ونجاشي حبشه كي برچوق حكمداران ايله كوروشدم .

اتباعك كنديلى حقنمه كى معاملاتنى ده كوردم . والله  
 هيچ برينك قومنده ، هيئت اسلاميه نك محمد [ عليه -  
 الصلوة والسلام ] ايتديكى حرمت واطاعتى كورمدم .  
 قولايقله طاغيله جق بر جمعيت دكلدر . قورقارم كه سز  
 اكا غالب ومظفر اوله ميه جقسكز »

انجمن قریش ايسه :

— « صوص يا ابا يعفور ! بويله لاقردى سويله مه !  
 اولسه اولسه بوسنه رد ايدر زده كله جك سسه قبول  
 ايد بيلورز »

جوابيله مقابله ايتش اولديغندن عرومه نك فنا حالده  
 جاني صيقلمش و :

— « لا ارا كم الاستصيبكم قارعة »

ديهرك حدثله قالقوب اتباعيله برابر اولديغى حالده مملكتى  
 بولنان طائف طرفه طوغرى يورومش كيتمشدر .

عرومه نك بو انصرافنى متعاقب بنى كنانه دن احابيش  
 قبيله سى رئيسى « حليس بن علقمه » :

— « هله بن ده بر كره كيدهم »

ديدى . قریش ده مناسب كوره رك حليس ، اردوى  
 اسلامه طوغرى كلدى .

حلیس ، قارشیدن کوروندیکی زمان رسول مكرم .  
انك حقننه :

— « هذا فلان . وهو من قوم يعظمون البدن فابغوا  
هاله »

بیورمش وانك اوزرینه طرف اسلامدن بر طاقم ذوات  
انی استقباله چیقارلمشدی .

لكن اردوی اسلامده کی مشهودات و محسوساتی  
علامتلمش بر طاقم قربانلق دوملر کی آثار و امارات  
اعماریه دن عبارت قالغله بعض مکالمه دن صوکره هان  
مجلس مشورت قریشه عودت وانلره :

— « بویله زیارت بیت الله ایچون کلش اولان جما .  
عت ناصل منع اولنه بیلیر . فی الواقع سزکله متفقز اما  
زوار بیت اللهی منع ایتمک اوزره متفق دکلز »  
دیه معلومات و مطالعاتنی بیان ایله هر کسده صلح و مسا .  
لمته میل و رغبت اویاندریر ایکن طرف اشرف جناب  
پیغمبریدن — وجه مشروح اوزره — رسالت و سفارت  
مأموریتله عثمان بن عفان رضی عنه الرحمن حضرتلری  
قریشه اعزام بیورلمشدر .

حضرت عثمان ذی النورین افسدیمز ، مکیه دخول  
ایتمزدن مقدم اهل مکهدن « ابان بن سعید » نام کیمسه به  
راست کلمش اوده صحابی مشارالیهک سفارته کلدیکی  
ایچون دخولنی تجویز ایده رک او حضرت عظماء قریشه  
کتیروب تقدیم ایتمشدر .

حالبوکه عثمان ، مأمور به اولدینی امر رسالت و سفا-  
رتی تبلیغ ایتدیکی زمان قریشدن :

— « ایسترسهک یالکز سن بتی طواف ایت ! ! »

جوابی المشدی !

فقط اکا مقابل !

— « خیر بن یالکز طواف ایده م . تاکه رسول الله

طواف ایده »

دیه مقابله ایتدیکنندن عظماء قریش سفیر معالیسمیر  
مشارالیهی اون نفر اصحابیله برابر اولدینی حالده طوتوب  
کوز حبسنه قویمشدر !

مصالحه — حلیس بن علقمه نک بیان ایتدیکی مطا-

لعانی اوزرینه ارتق قریشده آز چوق صلح و مسالت  
فکر وارزوسی حاصل اوله رق اندن صوکره فصیحای  
عربدن خطیب مشهور « سهیل بن عمرو » ایله برابر  
« مکرز بن حفص » « خویطب بن عبدالعزی » نام

اشخاص ثلثه بي مأموراً اردوى اسلامه بعث واعزام  
ايتديلر .

مبعوثانك ورودلرى زماننده ذات على رسالتپناهى،  
سهلى كورونجه مرقومك اشبو مأموريت ومبعوثيتى برفال  
خير عد ايدهر ك اصحاب كرامنه :

— « سهل امركم »

ديه تبشير بيور مشلردى !

مبعوثان ايله ملاقات وقوعبولدقدن صوكره همان  
شروط مصالحه بي مذاكره مبادرت اولمش وجريان  
ايدن برچوق مباحثات ومناقشات دخى حریت وجدان  
شرط مهمى اساسى اوزرنده اون سینه مدتله مصالحه  
ومتاركه بي انتاج ايله مشدركه اساس مذكور اوزرينه  
عقد اولنان اشبو متاركه صلحنامه سى سايه سنده — طرفين  
كر ك منفرداً ، كرك مجتمعاً يكدى كرى عليهنه حركت  
وتعرض ايدهميه جكلرندن — اهل اسلام علناً نشر دين  
مبين اسلام ايدميه جكلردى .

مع مافيه همان اهل اسلامك اوزمانده مكه كى كروب  
طواف كعبه ايتلمرى شرطى ذات على پيغمبرى طرفندن  
تكليف اولندى . سهيل ايسه او شرطك علمهنده :

— « خير ! بو اولماز ! . زيرا مكه كى غنوة كيرلمش

اولدینی حوادثی طوائف عرب میانہ یاییلیر و او حوا -  
 دثده قریشک شان واعتبارینه خلل کتیرر . لکن  
 کله جک سنه طواف ایدم بیلیرسکنز )  
 دیمش وسعی وطوافک ارتق سنه آتیه یه ترک وتعلیق  
 فکری طرف اشرف رسالتیناهیدن ضروری اوله رق  
 قبول بیورلمشدر .

بعده سهیل :

— ( لکن سزدن بری بزه کلیر ایسه انی بز رد  
 ائیمه جکنز ! بزدن بری سزه کیدرسه انی رد ایدم جکسکنز )  
 تکلیف تحمل سوزی درمیان ایتدی .  
 بوتکلیف وخیمدن طولای حدت ایدن اصحاب  
 کرام :

— ( بوهیچ اولور شیمیدر ؟ بزه بر مسلم کلدیکی  
 حالده انی طوتوبده مشرک لک اننه ناصل تسلیم ایدم )  
 دیدیلر .

سهیل ایسه بو شرط اخیر قبول اولند قجه مصالحه یه  
 قرار ویریله میه جکنی قطعاً بیان ایتدی کندن رسول محترم  
 صلی الله تعالی علیه وسلم افندیمز . او شرطی ده ضروره  
 قبول بیوردی . اصحاب کرام رسول اللهک او قبولندن  
 طولای پک تعجب وتخییر ایدم رک :

— (یا رسول الله! بوشرطی ده یازدیره جقمیسک؟)

دیرلرکن او حضرت نبی ذیشان :

— (اوت یازدیره جغم! بزدن انلره کیده جگ

اولانلری الله بزدن بعید ایتسون! انلردن بزه کلوب ده

آغاده ایدیله جکلر ایچون ده جناب حق البته بر چاره

خلق ایدر)

میوردیلر .

رسول مکرم صلی الله تعالی علیه وسلم افندیمرک

مدینه منوره ده کوردیکی رؤیایه کورد بو سفرده همان

مکه یه دخول وطواف کعبه میسر اولدجفی قویاً امید

ایتمش لکن هم او یله بر موفقیته نا مظهر همده اغیر بر

طاقم شرائطله متارکه قبولنه مجبور اوله قالمالری اصحاب

گرامه پک کوچ کلدیکن همان بر چوغی از قالدی دائرة

ایمان واطاعتدن چیقور ایدی !

حتی رأی رزینی بیانده کی سرعت وشدتیه

مشهر اولان جناب فاروق افندیمر ، رسول ذیشانه

خطاباً :

— (سن اللهک رسولی دگلیسک؟ و بزم دینمز ؛

دین حق دکلیدر ؟ نیچون بو ذل وحقارتی قبول ایدیورز؟)



دیمکه قدر جسارتده شدت اظهار ایتدیکندن اكا حضرت .  
رسالتپناه افندیمزده :

— ( بن اللهك حق رسولی یم . لكن اكا عاصی .  
اوله یم . او بنم یارد مجمدر )

دیه جواب ویرمش بعده جناب فاروق :

— ( یاسن بیت اللهی طواف و زیارت ایده جکسکز .  
دیمدکی ؟ ) دیمکله اکاده طرف ذیشرف احمدیدن :

— ( اوت دیدم . اما بوسنه دیمدم . ینه دیورم که .  
مکویه کیره جکسکز . سعی و طواف ایده جکسکز ! )  
سوزیله مقابله بیورلمشدی .

طرفین بیننده قبولی تقرر ایدن مواد ، ارتق صفیحه  
صحیفه چیقارلق اوزره امر تحریره جناب علی کرم الله  
تعالی وجهه افندیمز مأمور بیورلدینی زمان مشارالیه .  
اولا لوحه صلحنامه بی [ بسم الله الرحمن الرحيم ] ایله .  
تزیین ایتدی ... سهیل :

— ( بن او اسمی طانیم . باسمك اللهم یاز )  
دیدیکندن اصحاب کرام بو خصوصده مخالفت ایتک .  
ایستدیلر .

حالبوکه حصوله کلان اختلاف یالکمز بر نزاع  
لفظیدن عبارت اولوب اساس مقصده هر ایکی کلام

چنینده فرق بولمدينى ايجون حضرت رسول اللهك امر  
شريفيله ( باسمك اللهم ) ديه يازلدى .

بعده رسول اكرم ، عنوان صاحبنامه يي ( هذا  
ما صالح عليه محمد رسول الله ) ديه يازديرديسه ده سهيل اكاده  
اعتراض ايدرك :

— ( اكر بز سنك رسالتكى تصديق ايتسيدك  
سنكله مقاتله ومجادله ايدوب ده زيارت بيت الاهدن سنى  
واتباعكى منع ايتزدك . لكن اسمى وباباك اسمى  
يازدير ) ديمكله رسول الله افنديمز سهيله خطاباً :  
— ( والله سز بنى تكذيب ايتسه كزده بن رسول اللهم )

حيمش وجناب علىه :

— ( بأس يوق يا على ! رسول الله عبارده سنى محو  
ايتده محمد بن عبدالله ديه ياز )  
امر شريفنى ويرمشدر .

جناب على ايسه جوابده :

— ( بن رسول الله عبارده سنى بوزه م )

عنه قسم ايتديكمندن رسول اكرم صلى الله عليه وسلم  
افنديمز :

— ( اويله ايسه او عباره يي بكا كوستر ! )

سيورورلر كن عباره كوستريلوب انى كندى دست

شریفاریله محو بیورمش واثناء محوده مشکوۃ صدر  
شریف رسالتدن : ( یا علی ! بوجبی معامله سنزک حقکزده  
دخی برکون وقوعه کله جکدر ) شعاع حقیقتی اشعه پاش  
ظهور اولمشدی .

مستقبله متعلق اخبار مغیبات قبیلندن اولان  
معجزاندندرکه وقعه صفینده مخالفین فرقهسی بولان  
شامیلرله بیلرلنده یازیلله حق صاحنامده ( امیرالمؤمنین )  
لقبنک طی ایدلمسی خصوصی تکلیف و تکلیفده سهیل  
قدر اصرار ایدلدیکی زمان حقیقت کلام رسالتیناهی  
کرکی کبی اکلاشیله رق سلطان اقلیم ولایت اولان  
علی کرم الله وجهه [ صدق رسول الله ] بیورمشلردی ! .  
متن صاحنامده کی او درلو تعدیلات لفظیه ایشلری  
یتدکدن صوکره : ( اون سنه مدته عقد رابطه صلح  
و صلاح اولندیغنی یعنی بو مدت ظرفنده طرفین  
یکدیگرینک علیهنده سلاح قوللانمایه جفی و اوسننه اهل  
اسلام طواف ایتدکسزین یعنی مکده کیرمکسزین مدینه یه  
دونوب کیده جکی ولکن سنه آتیده بلا سلاح کله رک  
طواف کعبه ایده جکلری ، واثناء طوافده مکده یالکنز  
اوج کون اقامت ایده بیلله جکلری و بو مدته اهالی مکه  
طیشاری یه چیقملری شروطی ایله برابر برده افراد

قریشدن طرف اهل اسلامه کئیلرک مکملیرم رد  
اولنسی واهل اسلامدن - ارتدادآ - مکیه قاجان  
اولور ایسه انک مدینه یه رد واعاده اولنماسی ماده لری )  
یازلدی .

لکن بو ماده اخیره قریشدن دین اسلامی قبول  
ایدرک کله جکلمه مخصوص اولوب قبائل سائر مستثنا  
طوتلدی . مثلاً قریشدن باشقه اولان قبائل ، طرفیندن  
هرهانکی برینی ایسترسه اونک عهد وامانی التنه داخل  
اولمق اوزره مخیر براغیلدی . ایشک بو جهتی بر کره  
تصدیق ایدلدیکی کبی همان خزاعه قبیله سی عهد وامان  
محمدی یه ؛ بنی بکر قبیله سی ده قریشلرک عهدینه داخل  
اولدقلرینی اعلان ایتدیلر .

صلحنامه بو وجهله تمام اولنجه اشراف مهاجرین  
وانصار کرامدن ورؤسای مشرکیندن سائر حاضر و شاهد  
اولانلرک اسامیسی ذیلاً تحریر اولنمشدر .

حکمت صلح — هر نه صورتله اولور ایسه  
اولسون قریش ایله اهل اسلام بیننده آثار صلح و مسا  
لمتک وجودی مقتضای حکمت حال و مصلحت ایدی .

زیرا مصالحه سایه‌سندہ اہل اسلام علناً ترویج  
 حقیقت ایدہ بیلہ جکدی . حالہو کہ حدیدیہ مصالحہ سنے  
 کلنجہ یہ دکن اہل اسلام ایلہ معاندین قریش ارسندہ  
 امنیت بولندی ایچون اختلاط سربست بر صورتہ  
 اولہ مدیغندن سربستی اختلاطک عدمی ، مسلمان  
 اولیانری شعائر وخصایص اسلامیہ دن بیخبر برامقده تأثیرلی  
 بولنہرق کرک قریشک ، کرک قبائل وعشایر سائرہ نک دین  
 اسلامجہ موجود اولان ہر درلو حقایق نافعہ دن فعلیاتہ  
 تعلق ایدن جہتی ادرا کہ قریش غوائل مانع اولہ یورایدی  
 اگر صلح طرفی التزام ایدلیوب دہ ہان مکہ یہ عنوة  
 دخول تصورندہ بولنلسہ اودہ کعبہ معظمہ یہ قارشی برنوع  
 حرمتسزلک اولہ جغندن فضلہ نشر دین اسلام اوغورندہ  
 طرفیندن برچوق تلفات وقوعی دہ بدیہی ایدی .  
 ایستہ بوکی محذورات وقوعنہ محل برآمدن نشر  
 اسلامہ یول بولمق ایچون صلح ومسالمتی التزامدن باشقہ  
 بر معقول تدبیر کورولہ مامکدہ ایدی . امام مصالحہ وقوع عبولدیغی  
 تقدیردہ ارسندہ کی اختلال واختلاف یرینہ صالح سایہ سندنہ  
 عمومی بر آسایش قائم اولہرق طرفین افرادی یکدیگریلہ  
 سربست کوریشہ بیلوب مشرکین ، حضرت سلطان اقلیم  
 رسالت افندیملزک معجزات باہراتی وحسن سیرت وعاداتی

ودین اسلامك اديان سائر مه نسبت قبول ايتيان خصايص  
 ومحسناتى كوره رك وافراد اسلاميه ك حائز اولدينى  
 حريتى ده اكلايه رق آحاد مشركيندن كيمك دائره فاخره  
 اسلامه دخوله واهل اسلام عليهنده كى افكار فاسده كده  
 زواله صلح سبب اوله جق واوله ايله ايسه رؤساي قریش  
 كندى افكار مستبدانه لرنده يالكز قاله جق وسر بستى  
 اختلاطك حسن تاثير اتندن اولمق اوزره اسلام حقنده  
 قبائليه حصوله كلان ميلان قلبى سبيله از وقت ظرفده  
 دين ميين احمدى وشرع پاك محمدى عربستانك هر طرفه  
 منتشر اوله جقدى !!

بناءً عليه ايله بر زمانده قيمتلى مصالحه ك اهميتى  
 يالكز جناب فخر الانبياءك نزد عالى دقايقدانيلرنجه  
 كشف وتفرس بيورلمش اولديغندن همان صلحى التزام  
 ايتمش ومصالحه فكر مصيبتك عليهنده بولنورجه سنه  
 شرائط صلحيه يي قبولده استتقال كوسترن اصحاب كرامنه دم  
 انجق رضا ومتابعه ايله امر بيور مشدر .

رد ابى جندل — صلحنامه ك هنوز تصديق و امضا  
 ايدلديكى برائنده ايدى كه اولجه قبول دين اسلام ايتمش  
 اولديغى چون باباسى — وقریش مرخصى بولنان — سهيل



بن عمروك زنجير بند بر حالدہ حبس ايتديكي اوغلي ابوجندل  
حضرتلری بر تقریبله قورتيله رق زنجیرینی سورویه سورویه  
وتکییر کتیره کتیره حضور عالی نبوی یمه کلشدر !

باباسی سهیل ایسه انی کوردیکی کبی همان :

— « صلحنامه مقتضاسنجه سزدن ابتدار دینی ایستیه —

جك اولديغم آدم بودر ! »

دیرایکن اهل اسلام طرفندن ده بالمداغه :

— « خیر ! صلح قراری هنوز شمدی اولدی .

بواراده قاچوب کلان مستثنا اولوق لازم کلیر . بوندن

صوکره کله جکلری رد ایدرز ،

دینلديكي حالدہ شایدرد ایدلمديكي تقدیرده مصالحه نك کآن

لم یکن حکمنده براغه جغنی قطعاً بیان ايتديکندن نقض

عهددن اجتناباً اوغلي ابوجندل کنديسنه رد وتسليم

ایدلمشدر ،

سهیل ، بونك اوزرینه ابوجندلی یقه سندن طوتوب

دوکه دوکه کتیرر وابوجندل ایسه :

— « یامعشر المسلمین ! بن اهل ایمان دنمروای حق میدرکه

بنی اعداء دین اولان کیمسه لرك پنجه اعتسافنه تسلیم

ایدرسکنز ! »

فریادینی چیقاریر ایکن ذات عالی رسالتنهای یمه



كرك حضرت ابى جندله كرك آنك حالته تأسف ايدن  
اصحاب كرامه صبر و تحمل ايله امر و تسليت بيورورلردى  
شاذ — « سبيعيه بنت الحارث الاسلميه » نام قادينده  
قبول اسلام ايتديكى زمان همان حضور پر نور رسالتپناهى يه  
كلش اولديغندن آنى تعقيب ايدن زوجى « مسافر المخزومى »  
رسول ذیشان افنديمزه خطاباً :

— « يا محمد ! زوجهمى بكا اعاده ايت ! زيرا بزدن  
كله جكلىرى رد و اعاده ايتكم شروط مصالحه دندر »

ديديكى حالده اشبوش شرطك انجق افراد ذكوره شامل  
اولوب انايه شمولى اولمديغندن اكا اويله جواب ويرلمش  
وامر اعاده دهكى محذورى حق جل و علا حضرتلى « .....  
فلا ترجعوهن الى الكفار لاهن حل لهن ولا هم يحلون لهن  
واتوهم ما انفقوا » آيت كريمه سنى انزال بيور مشدر .

بناءً عليه مسلمة مرقومه يي اعاده دن صرف نظر و انجق  
مخزومى مرقومك انفاق ايتديكى يعنى ويرديكى مهر كنديسنة  
اعاده ايدلدكن صوكره سبيعيه يي مؤخرأ جناب فاروق  
حضرتلى كندينه تزويج ايله مشدر .

شومعه دهك وقوعى اوزرينه جوار سعادت قرار

رسالتہا ہی یہ کیروب اخذ بیعت ایدن مؤمنات مهاجراتک  
 بری ده عقبہ بن ابی معیطک قیزی [ ام کلثوم ] در! مرقومہ ،  
 مکہ دن مدینہ منورہ یہ دکیں ماشیاً ہجرت ایتمشدی  
 معاہدہ واقعہ احکام نبجہ انی کیری المق اوزرہ ایکی برادری  
 « عمارہ » ایلہ « ولید » مدینہ یہ کلمش لرسہ دہ طرف اشرف  
 رسالتدن : [ جناب حق او و امثالک ردینی منع بیوردی ]  
 جوانی الهرق دوندیار ! مرقومہ ام کلثومی ابتدا زید بن  
 حارثہ حضرتلری ، نکاح لامش وجناب زیدک مؤتہ دہ  
 وقوع شہادت اوزرینہ زید بن العوام الهرق اندن « زینب »  
 نام بر قیزی اولمش بعدہ تطلیق اولتمقلہ عبدالرحمن بن عوف  
 حضرتلری المش جناب عبدالرحمانک فوتندن صوکرہ  
 مرقومہ بی عمرو بن العاص نکاح لامش۔ در . ام کلثومک  
 عبدالرحماندن [ ابراہیم ، عوف ] ناملرنده ایکی چوجفی  
 اولمش و وفاتی۔ زوج اخیری بولنان۔ عمروک تحت نکاحندہ  
 ایکن قوعہ کلمشدر .

### بیعة الرضوان — اشوبیعة الرضوانک زمان وقوعی

حقیقہ کی روایات اختلافدن آزاده دکلدر . مثلاً بعض  
 روات آنک مصالحہ دن مقدم ، بعضی دہ مؤخر اولدیفنی  
 خبر ویر یورده صلحنامہ نک طرفینجہ تصدیق وامضا

ایدلیدیکی و ابو جندل حضرت تیرینک ده حسب المصالحه باباسنه  
رد و اعاده اولندیغی اناده - مدت مکث و اقامتی اوچ کونه  
بالغ اوله رقعودتی براز چکمش اولان - عثمان ذی النورین  
افندیملک خبر مقتولیتی الندیغندن همان ایشه اوزمان رسول  
ذیشان علیه صلواة الرحمن افندیملر :

— « لانبیح حتی نناجز القوم »

بیوردقندن صوکره بیعت امر و فرماتنی ویرمشدی . که بو  
روایت عقله دهاموافق کورنمکده در .

ایشته بووجهله شرفصادر اولان اراده سنیة حضرت

رسالتپناهی اوزرینه منادی :

— « یاایها الناس ! البیعه البیعه . نزل روح القدس . فاخرجوا

على اسم الله ! »

دیه ندا ایتمش و ارتق رسم بیعتی اجرا ایچون افراد  
اسلامیه طرف اشرف احمدی به طوغری قوشوب کیشدر .

اوزمان ذات عالی پیغمبری ، حدیییه محمده

« سمره » اسملی برنوع اغاجک التنده کولکده اوطور

یورلردی . ایشه او محمده حضرت رسالتپناه صلی علیه

الاله افندیملر ، او اغاجک التنده اوطور دقلری حالد کندیسنه

عموماً بیعت اولمشدر .

لکن بیک درتیوز آدمی جامع اولان قوجه براردونک

ایچنده « جدم بن قیس » اسمنده بری دوه سنک ارقه سنه  
صاقلانه رق بیعت ایتماشدی ! .

جناب ذی النورین افندیمرک مقتولیتی خبرینک عدم  
صحتی احتمالیله آنک ده بیعتنه لزوم کورمش اولان ذات  
عالی رسالتپناهی وکالة صاغ النی صول الی اوستنه قویه رق  
بعده :

— « اللهم ان هذه عن عثمان . فانه فی حاجتک وحاجة  
رسولک »

دیه بیعتی اجرا ایتمشدر .

اشوبیعت « یافتح مکه یه موفق یارتبه شهادت احرازی  
میسر اولمدقجه قاجامق ایچون موته توطین نفس ایتمک  
اوزره » ایدی .

بناءً علیه اولوجهله بیعت ایتمش اولاندردن حق تعالی  
راضی اولمش ورضاء عالیرینی استعید بالله [ لقد رضی الله  
عن المؤمنین اذبايعونک تحت الشجرة . الخ ] آیت کریمه  
سیله ده بیلدیرمش اولدقدن باشقه حضرت رسالتپناه صلی  
علیه الاله افندیمر دخی :

— « لا یدخل النار احد بايع تحت الشجرة »

و :

— « لا یدخل النار من شهد بدرأ والحديية »

بیورمشلردر .

هر کس دن اول بیعت ایدن « سنان بن ابی سنان  
الاسدی » حضرتلری ایدی . سنان مشارالیه ، امر بیعتی  
بک کوزل و مرغوب بر صورتده اجرا ایتمش اولدیغدن  
سائر اصحاب کرامده حین بیعتلرنده رسول الله خطاباً :

— « نبایعک علی ما بایع سنان ! »

دیرلردی .

عمره — امر مصالحه صورت قطعیده ختام بولدقدن  
صوکره رسول محترم افندیمز ، اصحاب کرامنه خطاباً :

— « قربانلریکزی کسیکزی ! »

بیوردیلر . واشبو اراده علیه لرینی اوچ دفعه تکرار دخی  
ایتدیلر . لکن مصالحه نك بر طاقم اغیر شرطلره تقرر  
ایتمش اولمسندن طولای غلیانه کلان هیئت ایچندن اکثر  
افرادده و بلکه هیچ برنده اثر اتمشال کوره مدیکندن  
حرم هایونلری « ام سلمه » رضی الله تعالی عنها حضرتلرینک  
یاننه کیروب ماهوالواقعی افاده بیورمشلردر .

حرم مشارالیه ایه جوابده :

— « اویله ایه سزاراق هیچ کیمسه به برشی دیمدن  
کنندی قربانکزی کسیکزی ! باشکزی ده تراش

ایدیکز ! »

دیدى . بعدہ افندیمنز دخی قربانلق دوه سنی کس دیروب لحمی  
فقرا یه تقسیم بیورمش وقیرمزی برپوست اوستنده اوطوردینی  
حالدہ مبارک باشلرینی اصحاب کرامدن « خد اش » رضی اللہ تعالیٰ  
عنه حضرت تدرینه تراش ایتدیرمشدر .

بعض اصحاب کرام ده رسول اکرمک اودرلو  
معاملات اعتماریه سنی کورنجه امثالاً همان قربانلرینی نحر  
وباشلرینی ده تراش ایتدیرمشدی . لکن حضرت عثمان  
وابوقتاده رضی اللہ تعالیٰ عنهما کبی اوسنه همان دخول  
مکبه موفقیت امیدندہ بولنمش اولانلر طوافدن صوکره  
تراش اولق اوزره صاچلرینی کسوب بقیه براقش  
اولانلرندن طولای رسول اکرم افندیمنز، حجاج اسلامیه  
حقندہ کی دعاء رحمت ومغفرتلرینی :

— « اللهم ارحم الخلقین دون المقصرین »

دیه محلقین کرامه حصرو قصر بیوردیلر .

اشبودعایی ایکی وعلی روایة اوج دفعه سویله دکن  
صوکره اوجنجی ویادردنجی دفعه ده : « اللهم ارحم الخلقین  
والمقصرین ! » بیوردقلری ده مرویدر .

ایشته او یله برصرده برروز کار چیقہرق حجاجک  
صاچلرینی قالدیروب حرم شریف کعبه یه اتمش اولمغله

عمره اسلامیه نك حسن قبول بیورلدینی آ کلاشیله رق  
ممنون و متشکر اولمشلردی .

روایت کوره حضرت پیغمبر؛ قربانلق دوه لردن  
یکرمی رأسنی اصحاب کرامدن «ناجیه بن جندب» حضرت تدریله  
مکيه کوندروب نحر و لحومنی فقرایه تقسیم ایتدیر مشدر .

بحث و مناقبه — هجرت علیه جناب رسالت پناهیدن

آزمقدم فرس دولت ساسانیانیه سی روما دولتی اوزرینه  
غلبه ایدمرك شام و آنك انطاکیه، قدس شریف و بلاد  
سائر مثله و حوالیسنده دین نصاری ای قالدیروب یرینه کندی  
دینی بولنان و آیین مشرکیندن برنوع اولان مجوس دینی  
اقامه ایتمکه تشبث ایتمش و روم طائفه سنك نصارا دیننده  
و بناء علیه اهل کتاب اولمسی سببیه ادیان سائر مدن زیاده  
اهل اسلامه قریب اولمسنندن طولانی مشرکین قریش،  
کتابمیز فرسلرك اهل کتاب بولنان روملره غلبه سنی  
ایشندکری زمان بك زیاده سیله ممنون و محظوظ قاله رق  
اهل اسلامه :

— « بزم اخوانمیز سزك اخوانکزه غلبه ایتمش بزمه

سزه البته غالب اوله جغز ،

دیمشلردی ! .



مشرکینک بوسوزینه قارشى حق تعالى استعید بالله  
 « الم غلبت الروم فی ادنی الارض وهم من بعد غلبهم سیغلبون  
 فی بضع سنین ... » آیات کریمه سنی ازال بیورہ رق اون  
 سنہ یہ وارمدن رومک فرسہ غالب اولہ جغنی تبشیر بیورمغلہ  
 ابوبکر صدیق رضی اللہ تعالیٰ عنہ حضرت تلمی قریشہ :  
 — « او قدر سو نیمکز ! اون سنہ یہ وارماز روم فرسہ  
 غالب اولہ جقدر »

دیدیکندن اشداء مشرکین قریشدن « ابی بن خلف » نام  
 لعین اوسوزک علیہندہ : « کذبت » دیہ ایمانسزلک اظهار  
 ایتدکن صوکرہ :  
 — « کل سنکله بحث ایدہلم »

دیمش وجناب صدیق افندیمزده اکا موافقت ایدوب  
 « طقوزسنہ ظرفنده روم دولتی فرسہ غلبہ ایدرسہ » ابی بن  
 خلف « جناب صدیقہ یوزدوه ویرمک وغلبہ ایتمزسہ  
 حضرت ابوبکرده اکایوزدوه ویرمک اوزرہ » بحث  
 ومناحبہ ایتملر دی .

حتی بحث ومناحبہ ادعاسنده کی اصابتہ اعتماد وامنیته  
 مکمل کورن ابی بن خلف لعین ، حضرت ابوبکر  
 مهاجر تلمی اثنالزنده مشار الیہدن اوغلی « عبدالرحمن  
 بن ابی بکر » ی کفیل المش لعین مرقومک احده سفری .

زمانلرنده « محمد بن ابی بکر » دخی اندن بر کفیل الهرق  
اساس بحث و مناچه تحکیم ایدلمشدی .

ایشته بو حدیبه سفری اثناسنده رومک فرسه غلبه  
کامله سی خبری شیوعبولمشدر . ابن خلف ایسه احد  
غزوه سنده رسول اکرم صلی الله علیه وسلم افندیمر .  
حضرتلرینک بر ضربه سیله بره لنوب سرفده تلف اولمش  
بولندیغندن جناب صدیق اودوه لری لعینک ورثه سینه  
تضمین ایتدیردی . و بعدالمعاوده الوب حضور رسول الله  
کیدره رک تقدیم ایتدی . رسول اکرم دخی :

— « فقرايه تصدق ایت ! »

دیه امر بیوردیغندن طرف صدیقدن دو ملر تماماً تصدق  
و ایشار بیورلمشدر .

معاودت همایون — حضرت نبی محترم افندیمرک

حدیبیه ده کی مدت مکث واقامت علیه لری اون طقوز  
و علی روایه یکر می کونه بالغ اولدقدن صوکره ایدی  
اصحاب کرامیله برابر اولدیفی حالد مدینه منوره یه متوجه  
عودت بیورمشلردر .

طواف و زیارت کعبه و قوعبولقسزین عودت ایدلدیکنه  
بعض اصحاب کرام تأسف ایتمکده ایدیلر .

لكن « كراع الغميم » نام محله مواصلت همايون  
 اثناسنده - يك شانلى بر بيوك فتوحاته قريباً مظهر  
 اوله جغنى مبشر اولان - سورة شريفة فتح نازل  
 اولديغندن نزول سورة خصوصى حضرت رسالتپناه صلى عليه  
 الاله افنديمىز، اصحاب كرامنه :

— ( انزلت على سورة هي احب الى مماطلعت عليه  
 الشمس )  
 وياخود :

— ( انزلت على سورة مايسرنى بها حمر النعم )  
 ديه تبشير وبعده سورة شريفة مذكورينى تلاوت بيور -  
 دقده اصحاب كرام دى بوندى طولاي يك زياده سبيله  
 ممنون و متشكر اولمشلر و ممنونيت فوق العاده لرى سبيله  
 كرك جناب پيغمبرى ، كرك يكديكرينى تبريك وتهنئه  
 ايتمشلردر .

حالبو كه طواف ايده مدن دوندكلر يچون متأسف قالان  
 بعض اصحاب :

— ( كفار بزى طواف كعبه دن منع ايتمش اولدينى  
 حالده بونك ايلر يسنده نه فتوحات اولور ؟ اوفتح دكلدر )  
 ديه اظهار اثار تأسف واستبعاد ايتديلر ! حضرت پيغمبر  
 اوزمان انلره خطاباً :

— ( نه چركين لاقردى ! بلکه فتوحاتك اعظمی  
 ايشته بو دفعه کی ایشمزدرد . کفار مصالحه ایچون سزه  
 التجا ایتدی . اك زیاده اکرام ایتدکاری شیئی سزدن  
 کورمش اولدیلر . الله تعالی سزی انلره غالب ومظفر  
 ایله دی . وهمده سالماً ومأجوراً اعاده بیوردی که  
 بوده فتوحاتك اعظمیدر . يوم احده بنم سزه ( اخراکم )  
 ديه چاغ-یردیغمی و يوم احزابده کفارک التکزدن  
 اوستکزدن کلدیکی و اوزمان اوضرا دیغکز مصیبتی  
 اونوتدیگزمی ؟ )

بیورمغله انلر دخی ایشی اکلایه رق :

— ( والله یا نبی الله ! بزسنگ دوشوندیگی دوشو -  
 نه مامش ایدک . سن دها ایو بیلورسک ! )  
 ديه تسلیمیت کامله اظهار ایتدیلر .

معجزه — یولده بر اراق ارزاق دوکنه رک دوه -  
 لری ذبح واکله تشبث اولنمشدی رسول ذیشان افندیمر  
 اوزمان اصحابنه :

— ( پوستلریگزی ، عبارلیگزی یاییگزی ! )

دیدى . اصحاب کرام دخی یایدیلر . حضرت پیغمبر :  
 — ( یاننده اکمک اوفاغی ، ارزاق بقیه سی بولنا نلر ،

بقایاسنی بونلرک اوستنه آتسونلر ! )  
بیوردی . یاننده بقیة ارزاق بولنانلر ، بقایاسنی کتیروب  
اورایه دوکیدیلر .

رسول اکرم افسدیمز دخی بساطه دوکیلان بقیه  
برکتله دعا ایتدکدن صوکره :

— ( شمدی وعلریکزی یاناشدیروب طولدیریکز )  
امر عالیسنی ویردی . اصحاب کرامده قاپلرینی طولدیردیله .  
طوینجیه دکین یدیلر . اما ارزاقی توکده مدیلر ! حتی انک  
برمثلی ده ینه بساط اوزرنده قالمشدی !

ینه او ائشاده ایدی که زمان عزیمت اسلامیهده  
ذوالحلیفه جوارلرنده بر یرده وقوعبولدینی وجه اوزره  
بر زمان اصحاب کرامجه صویه احتیاج حاصل اولمش  
وبر قدح صویی بیک درتیوز نفرلی بر قافلهیه کفایت  
درجهده چوغالتمق معجزه سنی حضرت رسول الله اظهار  
بیورمشدر !

الغاء ماده — حدیبیه مصالحه سندن وقافله اسلام .  
میهنک مدینه منورهیه مواصلتندن صوکره ایدی مکده  
شرف قبول دین اسلام ایله مشرف اولان ( ابو بصیر

عقبه بن اسيد الثقفي ) حضرتاری قريشك ايچندن صا .  
ويشوب مدينه يه كمشدى .

لكن انى اعاده ايتك اوزره اوچكون صوكره برى  
خنى عامر بن لؤى عشيرتندن . ديكرى ده عشيرت مرقومه نك  
آزادليارندن اوله رق قريشك ايكي مأمورى مدينه منوره يه  
كلوب بره موجب معاهده اعاده سنى ايستديلر . ايكي مأموردن  
يرينك الزده « ازهر بن عبد عوف » ايله « اخنس بن  
شريق الثقفي » طرفدن رسالتناه افديمرك نام هايونلرينه  
يازلمش برده مكتوب وار ايدى .

رسول اكرم دخى اعاده يه مجبور اولدى . حالبوكه

( ابوبصير ) حضرتلرى :

— ( بن كنديمى آلايش شركدن هنوز تميزله مش

ايكن مشركينك ايچنه بردها ناصل كيده بيليرم ؟ )

حيه فرياد ايدور ايدى . معاهده ، انك اعاده سنى ايجاب  
ايتديكندن حضرت رسول خدا :

— ( يا ابا بصير ! بز عهديمزى بوزمه ميه جعفر .

ارتاق سن ده براز صبر و تحمل ايت ! جناب حق سكا

ومشركين ايچنده سنك كبي قالان ديكر اهل اسلامه

البته بر طريق نجات ويرر )

دیدکن صوکره انی مأمورلره ویردی .

ابو بصیر حضرتلری ایسه مأمورلرک النده اولدینی حالده کیده رک یولک ذوالحلیفه نام محلنه وارد قیلرندمه خرمایمکه برکناره او طورمش اولان مأمورلردن برینک قیلنجنی ( باقیم ناصل قیلنجدر ) دیه قینندن چیقارمش وانه الدینی فرصتدن بالاستفاده انی او قیلنج ایله همان اولدیرمش دیکری ایسه مدینه منوره یه قاچهرق حضرت پیغمبره ابو بصیرک حرکت قاتلانه سندن شکایت ایتشدرد .

بونک عقینده کلان ابو بصیر دخی حضور عالی نبوی یه کیردی . ورسول ذیشانه خطاباً :

— ( یا رسول الله ! سن بنی بر مقتضای معاهده انلره تسلیم ایتدک . وعهدیکیده ایفا ایتمش اولدک اما شمدی بنی جناب حق خلاص ایتدی )

دیه رک مدینه منوره ده قالمق خصوصنده کی ارزوی شدیدینی تکرار اظهار ایله دی .

حالبوکه معاهده نامه نک او فقره سی هر وقت کله جکله شامل بولندیغیچون توقیفی نقض عهد دیمک اولدیغندن حضرت سید کائنات افندیمر ، انی مدینه ده یقویه مدی . لکن :



— ( مدینه دن چیقده ایستهدیکک یره کیت ! )

دیه رخصت ویردی که بوده اگا برنوع تسهیلات مخصوصه ،  
برنوع ارشاد ایدی .

بو درلو رخصته مظهر اولان ابو بصیر حضرتلری  
دخی مدینه دن همان چیقوب ساحل دریاه طوغری  
یورودی . و مکهنک شام یولی اوزرنده کی « عیص » نام  
موقعی طوتدی . مشرکین مکهنک شامه کیدن یولجیلرینه  
صارقندیلق ایتکه باشلادی .

مکده اسلامنی اخفا ایدن اهل اسلام ؛ ابو بصیرک  
بو حرکت قهرمانانه سنی ایشتمدکلرنده همان طاقم طاقم  
چیقوب یاننه طویلاندیلر .

جناب ابو بصیر ، کندی امامت و ریاستی التنده  
واز وقت ظرفنده یتمش نفری حاوی بر جماعت اسلامیه  
تشکیل ایدی .

اشبو جماعت اسلامیه ؛ مکهنک شام یولنی تماماً کسیدی .  
مکهدن شامه چیقان یولجیلری طوتار و مالی یغما  
ایدر اولدی .

حدیبیه مصالحه سی زماننده اهل اسلامه کلدیکی  
حاله اعاده ایدلمش اولان ( ابو جندل بن سهیل )  
حضرتلری دخی باباسنک قیدو بندندن بر تقریب ایله

قورتيله رق فرار و ابو بصيرك نردينى جاى استقرار  
ايله دى .

بوندن صوكره جماعت اسلاميه نك امامتى ابو بصير ،  
ابن سهيله ترك وتوجيه ايتديكندن ابو جندل ، امامت جماعته  
كچدى . جماعت اكا اقتداء نماز قیلار ایدی .

ابو جندل حضر تلرينك اشبو فرارى وعي صده ابو  
بصيره التحاقى اطراف مكه جه شايع اولنجه بو خبرى  
ايشيدن بتون بنى غفار ، بنى اسلم ، بنى جهينه و قبائل  
سائر مسلمانلرى قاجوب عيص جماعت اسلاميه سنه  
التحاق ايتمكله حاضر اولان افراد جماعت اوچيوزمه  
بالغ اولمش ومكه نك شام يولى بونلرك النده ارتق بستيون  
مسدود ومنقطع اوله قالمشدر !.

مكه اهالي سى وبالخاصه قریش قبيله سى ايسه معيشتلىرى  
تجارت سايه سنده بر قبيله اولديغندن شام يولنده موارد  
ومراسله تجاريه نك بو وجهله انقطاع وانسدادندن  
طولايي بك زياده اندیشه واضطراب ايچنه دوشديلر .

وحتى عيص جماعت اسلاميه سنى مدينه يه جلب  
ومصالحه نامه دن مدينه يه واران قریش آدملى نك لزوم اعاده  
سنى ناطق اولان ماده سنى لغو خصوصى رجا ايتمك .

اوزره همان رسول الله افنديمرك حضور عاليترينه ايكي آدم ده  
مأموراً کوندرديلر .

غريبدرکه بو ماده نك رد ويا قبولی حقنده بين الطر-  
فين خيلي اوزون مناقشه وقوعه کلمش ونهايت اولنسر  
عقد رابطه صلح ومسالتك دائره امكان داخلنده اولنديقي  
قربش مرخصی سهيل طرفندن قطعياً بيلديرملکه چاره سز  
قبول ايدلمشدي .

بوکره او ماده نك لغو وابطالنه جناب حق، انلری  
ينه مجبور براتمش وواقع اولان الحاحلرندن طولاني  
فوائد ومحسناتی اهل اسلامه راجع اولمق حکمتی اسا-  
سنده مؤسس اوله رق ابطالده ايتديرمشدر .

بو خصوص لغو ايسه كرك ذات عالی رسالتيهاهی  
وكرك باشقه اهل اسلام طرفندن اك ملتزم ومطلوب  
اولان مواد مهمه دن اولديغندن همان قبول ايديلهرك  
او ماده لغو ايدلمش وعييس جماعت اسلاميه سنك مدينه  
منوره يه كلمرينه دائر جناب ابی بصير حضر تلرينه خطاباً  
برده نامه همایون يازيله رق کوندرلمشدر .

حالبو که او زمان ابو بصير، اغیر خسته اولوب  
نامه همایونك زمان مواصلتنده همان صوك نفسه کلمش  
بولنیور ایدی .

تحریرات علیہ رسالتناھی بی ابو بصیر حضرتلری  
 انه الدینی کبی همان یوزینه ؛ کوزینه سورہ رک تسلیم  
 روح ایله دی . رضی اللہ عنہ

ابو جندل حضرتلری ده مشارالہی اورادہ دفن  
 ایتدکن صوکرہ معیتندہ کی جماعت اسلامیہ سنی الوب  
 مدینہ کلمدی .

بو مادہ نك لغوندن وعیص جماعت اسلامیہ سنك ده  
 مدینہ یه ورودلرندن صوکرہ هرکس ارتق سربستی دین  
 و آیین حاصل ایتمش دیمک اولدی .

## فصل عاشر

### یہ نجی منہ لہجہ و فابغی

غزوہ خیبر و قدوم جعفر ، فدک مصالحہ سی ، غزوہ  
وادی القری ، صلح نیا ، سفراء پیغمبری ، عمرہ القضاء .

— ۱ —

### — غزوہ خیبر —

خیبر — مدینہ منورہ ایلہ شام ارہ سندہ و مدینہ یہ  
درت قوناق مسافہدہ واقع و اطراف مزارع و بساتین  
متعددہ ایلہ مزین بر شہر متین ایدی . اہالیسی دہ  
عموماً یہودی ایدی .  
جوار مدینہ دہ کی یہودی لردن کیمک نفی و اجلا ،  
کیمک دہ قتل و اعدام ایدل کدن صوکرہ بقیہ سنک چوغی  
قلاع خیابردہ اجتماع ایتشدی .  
حتی بنی نصیر یہودی لرینک ریسی « حی بن اخطب »  
نام لعین دخی آل حقیقک التون ، جوہر کی قیمتلی اشیا سی  
کتیروب خیبر دہ بر کیزی بردہ دفن و اخفا ایتشدی .

بوندن باشقه عربك اك بيوك واك مهم تجارتكاهي  
 شام اولديني حالدۀ اوحوالينك يولى اوزرنده بولنان خيا  
 برۀده يهوديلرك اولوجهله طوپلانوبده قوۀ عسكريه پيدا  
 ايتكدۀ اولملري اهل اسلام عليهنده برتشت ديمك اوليور  
 ايدى .

لكن هيئت اسلاميه نك مكۀ اهالي سي طرفدن دائماً  
 شبهه سي اولديغي چون حوالى شاميه يي دوشونمكۀ وقتي  
 اوله ميور ايدى .

حالبوكۀ اخيراً حديبيه معاهده سنده اجرا اولنان عقد  
 مصالحه دن صوكره غوائل قريشيه ارتق برطرف اوله رق  
 شام طرفي ايشلريني تسويه يه وقت فرصت الوير مش ايدى .  
 بناءً عليه رسول مكرم صلى الله تعالى عليه وسلم افندي مز ،  
 حديبيه دن معاودت بيوردق دن صوكره مدينه ده بر آي  
 وعلى رواية ذى الحجه يي چيقارنجيه دكين يكرمى كون اقامتله  
 « سباع بن عرفطة الغفاري » حضر تاريني امر محافظۀ بلده يه  
 قائم مقام نصب و تعيين ايدۀ رك بعده تاريخ هجرتك يدنجي سنه سي  
 شهر محرم اونى صره لرندۀ قلاع خيابرۀ يه طوغرى  
 حركت بيور مشارد ركۀ اشبو حركت همايونده معتلرندۀ بيك  
 درتيوز پياده ايكي يوز سوارى موجودى ده وار ايدى .  
 حضرت پيغمبر ، نزد همايونلرندۀ امهات مؤميندن

« ام سلمه » رضی اللہ تعالیٰ عنہا بولندی حالدہ حرکت  
بیورہ رق مقدمۃ الجیش اولق اوزرہ « عبادین بشر »  
رضی اللہ عنہ حضرت تیرینی بر مقدار عسکرلہ ایلری به  
طوغری اعزام بیورمشدر .

حدیبیہ وقعہ سندہ بعض بہانہ لرہ مراجعت واستناد  
ایدہ رک دعوت رسالتپناہی به اجابت ایتماش اولان « غفار »  
مزینہ، جہینہ، اشجع، دئل، کبی مخلفونک بعضی بودفعہ  
غنیمتہ اشتراک امیدیلہ اردوی ہمایونہ قاتلدیلر .

لکن ذات رسالتپناہ صلی علیہ الالہ افندی مزدہ انلرہ  
— « بنملہ برابر کلکیکز ! انجق جہادہ رغبت ایدہ رک  
یولہ چیقیکیکز ! غنیمتدن ایسہ سزہ ذاتاً حصہ یوقدر »  
بیوردقندن صوکرہ اولوجہلہ اعلان دہ ایتدیرمشدر .  
حالبوکہ بواعلانی متعاقب :

— ( لایخرج الضعیف ولا من لہ مرکب صعب ! )  
امر شریفی دہ علاوہ ایتدیردیکی حالدہ بعض افراد اشبو  
ارادہ سنیۂ رسالتپناہی به مخالفت ایلہ دیکندن حضرت  
نبی محترم افندی مز، جناب بلال واسطہ سیلہ :

— ( جنت عاصی به حلال اولماز )  
تہدیدینی صوت رفیع ایلہ اوچ کرہ تکرار ایدہ رک امر



خروجده هر کسک مسامع دقتی اطاعت نقطه اساسیه سنه  
جلب ابتدی .

اردوی همایون ، خیابره جوارینه موصلت ابتدکی  
زمان قلاع خیابره دن ( نطات ) نام قلعه نك جوارى اردوگاه  
اتخاذ بیورلمشدی .

کبار انصار کرامدن ( حباب بن منذر ) حضرت تلری  
حضور پر نور احمدی به واروب بعض مطالعه بیان ابتدی .  
دیدى که :

— ( یار سول الله ! بو محلی تشریف واردوگاه اتخاذ  
بیوروشکز وحی الهی ایله اولمش ایسه پک اعلا . والا  
تبدیل محل بیوریکز ! زیرا بوراسی هم نطاته قریب ؛  
هم خیابره جنکاورلری هپ بوراده مجتمع ! . برده بورانك  
آدملری حالمزه واقف اولورلرسه انلر بالای قلعه دنبری  
دپه مزه اوق آتارلر . بز اوقلریمزى انلره ایصال ایدمه جکز !  
حضرت پیغمبر صلی علیه رب البر افندی مزده اکا :

— ( نزولمزوحی ایله دکلدرد . بلسکه تصادف قیلندندر .  
برباشقه محل مناسب واریسه اورایه کیده لم )  
جوابی ویردیکندن او خصوصده وقوف و معلومات عسکریه سی  
بولنان بعض اصحاب کرام همان اطرافه طاغیلوب محل مناسب  
تحریر ایدلمش و مناسب اولق اوزره بولنمش اولان

( رجیع ) محلنه نقل وعزیمت اولمشدر که رجیع محلی  
 غطفانیلرله خیابره اهایلسی ارمسندہ برحد فاصل اولدیفندن  
 اوراسنک اردوکاه اتخاذا یدلمسی غطفانیلرک - هیئت  
 اسلامیہ علیہندہ خیابره اهایلسنہ - محتمل اولان التحاق  
 وامدادینی منع ایدہ بیلیمک محسانتی دہ حائز ایدی .

بروقت صباحین هجوم ایدلدی . اثناء هجومده خیابره  
 اهایلسنک چفتجی طاقی ، حراثت وزراعت الاتیلہ برابر  
 تارلایہ کیتیمک ایچون قلعه دن جیقمقدمه ایدیلر . انلر ، اردوی  
 ہمایونی اولاکورمش اولدقلرندن : ( محمد والحمیس )  
 دیہ باغیرہرق قلعه یہ طوغری قاجشدردر .

خیبرکوروندیکی وبعض اهایلسنک دہ اولوجهلہ کری یہ  
 طوغری مرعوباً فرار وحصلرندہ قرارایتدیکی زمان  
 ذات اشرف رسالتپناہی :

— ( الله اکبر خربت خیبر . انا اذا نزلنا بساحة قوم

فساء صباح المذرین )

بیوردیلر .

امر محاصره یہ [ نطات ] نام حصندن مباشرت اولمشدر  
 روایتہ کورہ اشبو حصنک اثناء محاصره سندہ اعز وانفس  
 اموال دیمک اولان خورما افاجلرینک قطعنه ارادہ سنیه

جناب پیغمبری شرفصادر اولمشدی . بناءً علیه همان  
در تیز عدد خورما اغاجی کسلی . اندن صوکره قطعیات  
اجراسی منهی قالدی . که خبر قطعی [ ماقطعتم من لینه او  
ترکتموها قائمه ] علی اصولها فباءذن الله [ آیت کریمه سی  
صراحتاً افاده ایتمکده در . لکن وجه مسرود اوزره قطع  
لینه نک خیبرده اولدینی ده مروی ایسه ده بوبابده موجود  
اولان قرآن تاریخیه نک دلالتنه کورمه قطع مذکورک انجق  
غزوۀ بنی نضیر زماننده لینه بنی نضیر علیهنده اجرا ایدلیدی  
روایتی هر حالده شایان قبول کورولمکده در .

شقیقه نبویه — بعض اوقاتده سر سعادت افسر  
رسالتپناهی به عارض اولان شقیقه یعنی یارم باش اغریسی  
بووقعده ظهور ایتدیکنه مبنی جناب رسول محترم افندیمر  
بالذات حقیقه مدقلریچون نطات حصنلرینک امر محاصره سی  
یدی کون امتداد ایتمش ورایت سعادت قالدیران اصحاب  
کرامدن هیچ بری ده فتوحاته موفق اولوبده عودت  
ایده مامشدر .

نطاتک حاوی اولدینی حصنلردن « ناعم » ک فتحیله  
اصحاب کرام اوغراشیر ایکن « مرحب » نام لعین ، قلعه نک  
دیوارندنبری دوشوردیکی قوجه طاش « محمد بن مسلمه »

حضرت تارینک برادری « محمود بن مسامه » حضرت تارینی  
شهید ایتشدر .

لواء شریفی جناب ابی بکردن صوکره عمر الفاروق  
رضی الله عنهما حضرت تارلی کتروب حضور پیغمبری به  
بر اقدقه رسول اکرم افدیمز :

— « لواء شریفی یارین او یله بر حیدر کرارک دست  
پر زور جلادتنه ویره جکم که او، جناب اللهی و رسولنی  
سور وانلرده آنی سورلر . و جناب حق جل و علا، انک  
ایله فتوحاتی میسرایده جکدر ،

میوردیلر .

بو ستایش جهانقیمت اوزرینه کبارا محاب کرام حضرتانی  
« عجبیا او حیدر کرار کیم اوله ؟ لواء شریفی کیمه ویره جکدر ،  
ایه هر کس ارتق اوستایشه اهل اولق ارزو سنده بولندی .  
حتی جناب فاروق رضی الله عنه حضرت تارینک او صرده  
— « مدت عمر مده قوم بیننده حائر شرف و شان  
وامتیاز اولق ارزو سنه مائل اولدیغم یوقدر . انحق یوم  
مذکورده اوستایش نبوی به قارشی لواء شریفک کندی  
ایله ویرلش اولسنی پک چوق ارزو ایتشدم «  
دیدکلری مرویدر .

دوس قبیله سی شیخی « طفیل بن عمر والدوسی »

رضی الله عنه حضرتلری هجرتدن مقدم مکیه واروب قبول دین اسلام شریفله تشرف ایتدکن صوکره قبیله سنی دعوت ایتک ایچون غیرت و همت ایتمکده بولنمشدی .

بوکره درتیوز قدر اتباعی ایله برابر اولدینی حالده زیارت رسول الله نیتیه مدینه منوره یه کلشدی . حضرت پیغمبرک ایسه خیبر غزاسنه حرکت هایونلرینی ایشتیکی کی اردوی سعادته التحاق ایتمش و اوشانلی غزوه ده برابر بولنمشدر .

دوسیلردن روای شهرت شعار « ابوهریره » رضی الله عنه حضرتلرینک کلوب اصحاب صفیه قاتلدینی ده ایشته بواننادو ایدی .

ایرتسی کون حرب و قتاله تشبث اولنه جفی ساعتده رسول ذیشان صلی علیه الرحمن افندیمر :

— « علی نرده ؟ »

بیوردیلر . اصحاب کرام ده :

— « کوزلرینک اغریسیله یحضور بولنیور »

دیه جواب ویرلرکن حضرت سیدکائنات افندیمرده :

— « آدم کوندریکز ! »

دیوب احضارینه امر و فرمان ویرمش و در حال یانسه بری کوندریلرک یولده کوزینی آچوبده اوکنده کی شیئی

کورمکه طاقتمزدرجه سنده بحضوربولمش اولان حضرت  
شیرخدا احضارایدلمشدر .

بعده ذات عالی احمدی ، او حضرتک کوزلرینه  
تو کوردکن فضله : « اللهم اذهب عنه الحر والقر ! » ديه  
دعا بیوردیغک عقبنده چشم حیدری بشفائہ تعالی بره  
یاب اولمش واندن صوکره مدت عمر ندم بردها اغیرمامشدر  
برکره اولوجهله شفا بولان حضرت حیدرینک صرتنه  
ذات احمدی کندی درع شریفترینی الباس وبلنه ده ذوالفقار  
نام صمصام خون آشام جلادترینی ربط و دست پرزورینه ده  
لواء شریفی اعطا بیوردی که مذکور لواء شریف بیاض  
واوزرنده کلمه توحید سیاه خط ایله محرر و منقوش ایدی .  
بودرلو تجهیزات بیتدکن صوکره جناب علی :

— « یارسول الله ! انلر بزم کبی مسلمان اولنجیه

دکین مقاتله ایده جکم ،

دیرایکن طرف اشرف نبویدن :

— ( اوت وحدانیت الهیه یی ورسالت احمدیه یی

تصدیق و اقرارایتدکیرینه دکین ! . بونی ده یاپارلر سه ارتق

قورتیلدیلر )

جوابی ویرلمش واکا :

— « یا علی ! انلری اولادین اسلامه دعوت ایت ؟  
 و دین اسلامه لازم اولان شیلردن خبردار ایله ! فوالله  
 لان یهدی الله بك رجلاً واحداً خیر من ان یکون  
 لك حمر النعم »

تنبیہاتی ده علاوه بنورلمشدر .

جناب حکمران قلمرو جلادت اقدیمز حضرتلری ،  
 یدیمین سطوتنده رایت سعادت ، دست یسار صولتنده  
 صمصام شہامت بولندیفی حانده قوشه رق لواء شریفی  
 قلعه نك دینه دیکدی . وانك عقبنده « هل من مبارزه ؟ »  
 دیه میدان مبارزه یه ار ایستدی .

اشبو دعوتہ سادات یهودیه دن « مرحب » نام  
 پہلوانك برادری « حارث » ، اجابت ایدہ رك میدانہ  
 طوغری اچیلدی . لكن جناب علینك سیف صارم  
 جلادتنہ مقاومت ایدہ مدیکندن همان ایکی یه بیجیلہ قالمشدی .

حارثك بومقتولیتنی متعاقب بیوك برادری مرحب :

قد علمت خیر انی مرحب

شاکی السلاح البطل المجرب

اذا الحروب اقبلت تلتب

عبارات تمدحکارانه سنی سویله یه سویله یه میدانہ چیقہ رق  
 ایتدیکی مبارزه ده « محمد بن مسلمہ » رضی الله تعالی عنه



حضرتلری مرحبی اوروب ایکی باجانغی بردن قیلنج ایله  
کشمش ، دوشورمشدی .

مرحب ، بقاء حیاتندن امیدسز قالمغله برابر جان  
اجیسی ده زیاده کلدیکندن بتون بتون قتل ایله جریحه  
الندن خلاص ایتسنی رجا یوللو جناب ابن مسلمه  
حضرتلرینه :

— « اجهز علی یا محمد ! »

دیمش ایسه ده ابن مسلمه حضرتلری :

— « لا ! حتی تذوق من الموت مثل ماذاق اخي محمود . »

جوابی ویرمرك او خصوصده التزام تائی ایتدیکی  
حاله جناب : المرتضی افندیز ، او ارالق مرحبی  
اویلله بر حالد ر کتیردیکنندن همان اولدیره رك سلبی  
اخذ ایله مشدر .

فقط حین تقسیم غنایمده سلبك جناب مرتضاده  
قالسنه ابن مسلمه حضرتلری راضی اوله میهرق نهایت  
طرفینجه حضور پر نور نبویه رفع خصام ایدلیدیکی زمان :  
— « یا رسول الله ! بن مرحیک ایکی باجانغی بردن

قیلنجم ایله کسوب دوشوردیکمده شبه یوق که قتلنده  
مقتدر اولمشدم دیمکدی . لکن قرنداشم محمودك مرحب

الندن طاتدینی الم موتدن مرحبک ده طاتمسنی مرادایتدم.  
چونکه مرحب قلعه دیوارندن محمودک اوستنه بر طاش  
دوشورمش ، محمود ایسه اوچ کون صوکره متأثراً  
خوت اولمشدر ! »

دیدیکندن رسول اکرم صلی الله تعالی علیه وسلم افندیمنز  
سلبک ابن مسلمه حضر تفرینه ردو اعاده ایدلمسنی جناب  
حیدره امر وتنبیه بیورمشدی .

وقعه نك شو صورت جریاننه باقیلیر ایسه ملعون  
مرحبک بالمبارزه حضرت علی طرفندن جرح و قتل  
ایدلیدیکی حقنده کی روایتک صحتی اولمدینی تظاهر ایدر .  
حالبوکه مرحبک سالف الذکر تعبیرات تمدحکارانه -  
سنه جناب علینک :

انا الذی سمیتی امی حیدره  
کلیث غابات کریه المنظره  
اکیلکم بالسیف کیل السندره

جوابیله مقابله ایتدیکی مرویدر .  
فقط جناب حیدرک شو جواب حماستکاریسی باشقه  
بر موقعده ، باشقه بر آدمه خطاباً اولدینی دهها موافق  
مقتضای حال کبی کورونمکده در .

رسول اکرم صلی اللہ تعالیٰ علیہ وسلم افندیمنک آزادہ  
لیلرندن، « ابو رافع » رضی اللہ عنہ حضرت لرنندن روایۃ  
صحیح البخاریدہ مذکوردرکہ :

— « جناب علی کرم اللہ وجہہ افندیمنک ، کروہ  
مکروہ مشرکین ارمسندہ شیر زیان کی حملہ و هجوم ایلہ  
مشغول بولنور ایکن یہودینک بری ید مرتضایہ  
اوروب قالقانی دوشورمش ، دیگر بر یہودی دخی او  
قالقانی الوب قاقش اولدیغندن اشبو معاملہ یہ قارشی  
غضب وحدتی دہا زیادہ اولان حضرت اسد اللہ ؛ قلعه  
نک قابوسنی بر بطش کوہ براندازانہ ایلہ قوپاروب ارتق  
او قابویی اوکون فتح میسر اولنجہ یہ قالقان کی قولانمش  
وبعدالفتح یرہ اتوب یکمشدی . غائلہ حرب و قتال ختام  
بولنجہ سکز آدم اورایہ کیتدکدہ او قابویی قالدیر مق  
ایچون یرندن اوینادہ مدک ! »

مرحبک حین قتلندہ وقایونک قالقان کی استعمال  
اولندیغی زمانلردہ نطاة قلعه لرنندن « ناعم » فتح اولنمش  
وبعدہ ینہ انک قلعه لرنندن « حصن صعب » محاصرہ سنہ  
انتقال اولنمشدر .

ناعم قلعه سی دہ ایکی کونلک محاصرہ نتیجہ سی اولہ .  
رق فتح اولندی . اشبو قلعه دہ ارپہ ، خرما ، زیت ، یاغ

لحم ، شحم ، ماشیه ، امتعه کبی بر چوق اشیا وارزاق  
اله کچمشدی .

اندن صوکره ینه نطانک قلاعندن « حصن قله »  
محاصره سینه تشبث اولنوب اولو صوبی کسلدی . بعده  
فتح اولندی .

صوکره « شق » قلاعنک حصون ثلثه سندن حصن  
اوله هجوم وفتح ایدیلوب انک حصن ثانسی « براء »  
هجوم و بیوک بر قتالدن صوکره اودخی فتح ایدلمشدر .

بو فتوحات صره لرنده قلاع مفتوحه اهالی یهودیه -  
سی « کشیه » قلعه سنک حصون ثلثه سینه چکیلوب انده  
تحصن ایتمشدیلر .

ارض حبشه ده کی مهاجرین اسلامیه ، اشبو قلعه نک  
ایام محصوریتی اثناسنده کلوب مواصلت ایله دیلردی .

قلاع مذکورده دن سلام بن ابی الحقیقک مسکنی  
اولان « قوص » دخی یکر می کونلک محاصره دن صوکره  
عنوة فتح ایدیلوب بعده « وطیح ، سلام » حصنلری  
فتوحاتنه باشلانیلنججه اهالیسی صلحاً قلعه یی تسلیم  
ایتمشلردر .

موسی بن جیر علیه الرحمه نک حدیثی اولمق اوزره  
سیر الکبیرک یازدیغنه کوره :

خبر حصونندن الك صوك فتح اولنان ، « كشييه »  
 حصنيدر . اون درت كونلك محاصره نتيجه سي اوله رق  
 صلحا فتح اولندي .

شرط مصالحه يي تعيين مذا كرم سي چون يهوديلر  
 مرخصي ومبعوثي اولمق اوزره « ابن ابى الحقيق » ي  
 رسول اكرم افنديمز ، جلب ايدمرك انكله قونوشمشدی .  
 ماللرندن ، متاعلرندن شرط مسرود خلافنه اوله رق  
 يهوديلرك هيچ برشي الدقلى ويا صاقلادقلى تقديرده  
 عهد معقودك مفسوخ وذمة اللهك دخی برى اوله جنى  
 علاوه سيله امر مصالحه يه ختام ويرلمشدر .

اشبو مصالحه ده شرط ايسه ، كوچوك بيوك كافه  
 اهالى خيبر ، ارض خيبردن چيقمق ، وهيچ برى ،  
 اوستنده كي ثوبندن باشقه برشي استصحاب ايتماك ايدى .  
 بركره عقد صالح ايدلكدن صوكره قلعده يوز  
 عدد درع ، درتيوز قيلنج ، بيك سونكو ، بشيوز كان  
 بولنمشدر .

مع مافيه سلام بن ابى الحقيق ، حل وعقد مصالحه يه  
 بالذات مبعوث اولدني خالد عقد ايتديكي عهديني ايفا  
 ايتمهرك اولاكنديسي حكمنسز براقمشدر :

خاندان آل حقيقه مخصوص قيمتلى بعض اوانى

وحلیات وار ایدی که اوانی مذکورہ نک شہرت نفاستی  
حسبیلہ مدینہ و محال سائرہ دہ اجرای ولایم صرہ لرنده  
عاریة طلب و بعد الاستعمال اعاده ایدیلہ کلکہ اولدینی  
جهتله انکار و اخفاسی قابل دکلدی .

قیمتلی شیلر ایدی ! حتی مکده بر مستعیر اوانی  
مذکورہ نک برینی ضایع ایتدیکی زمان اون بیک دینار  
بدل مثلی ضمان ویرمشدی . ایشته اولیلہ اولان حلیات  
و اوانی بی ابن ابی الحقیق ، صاقلایوب موجودیتنی  
انکار ایتدی !!

بونک اوزرینه افندیمر - ایجاب مصلحت اوله رق -  
اکا بیوردیلرکه :

— « هانی بن سزی مدینه جوارندن طرد  
واجلا ایتدیکمده برابر یکزده کتیردی که کز اوانی وحلیات ؟ »  
لکن یہودی لعین ، انکارده اصرار ایتدی و :

— « انلر محاربہ لرده صرف و اتلاف ایدلدی . بویله  
کونلرده انحق انلر صرف اولنیور ایدی ! »  
دیددی . افندیمر ، استیضاحه اهتمام کوستره رک :  
— « اگر بن انلری سزده بولورایسم سزی اولدیره .  
یم می ؟ »

بیوردیلر . ابن ابی الحقیق :

— « پکی بولور ایسه ک اولدیر ! »

جوانی ویردیکندن اقدیمز تکرار :

— « مالکزدن هر نه الیرسم بکا حلال وعقد ذمتکز

قرین زوال اولسونمی ؟ »

بیوروب : « اولسون ! » جوانی الدقن صوکره

مسئلهیه « ابو بکر الصدیق ، عمر الفاروق ؛ علی ، زبیر بن

العوام » رضی الله تعالی عنهم حضراتیله برابر اون نفر

یهودی شاهد تعیین ایدلدی .

ایش بورایه کلنجه یهودیلردن بری قالقوب ابن ابی

الحقیقک قولاغنه کیزلیجه :

— « اکر بو مال سنده ایسه یاخود یرینی بیله یور

ایسه ک بیلدیرده نفسکی تخلیص ایت ! زیرا محمد

[ علیه الصلوة والسلام ] هیچ کیمسه نک بیلمیه چکی

شیلری بیله یور ! »

دیه نصیحت ایتدیکی حالده اندن زجر و توبیخ ایله مقابله

کوردیکندن یرینه چکیلوب او طور مشدی . بعده ابی

الحقیقک اوغللری « کنانه » ایله « ربیع » ک تعذیب

وتنکیللرینه « زبیر بن العوام » رضی عنه السلام حضرت تلی

مأمور اولمشدر .

تعذیب حقنده شرفصادر اولان اشبوراراده سنیة جناب



رسالتپناهى ، يانهى عن المثلهدن مقدم واقع اولمشدر  
وياخود مجرد سياسته محمولدرکه او مقوله احوالدين زجر  
امثال حاصل اوله !

زبير ، تعذيباته دوام ايتديكى حالده کنانه برتجلد  
عنودانده بولنه رق خبر ويرماز ايدى .

ربيع بن ابى الحقيق ، برادرينك شو اغورده وزبير  
النده او غرا دينى فلاكتى كورونجه اقرار واعتراف ايدهرک  
جناب رسالتپناه افنديمزه :

— « کنانه يي کوردم که هر صبح شو ويرانه ده کزردى ! »  
ديديکندن افنديمزه امر همايونيله زبير ،  
او ويرانه يي حفر ايتمش ، کنز مطلوبه ده دسترس  
اولمشدر ! بر مرکب دريسى ايچنده محفوظ و خرابه ده  
مدفون ايدى ! . .

ديگر روايتيه کوره : ( ثعلبه بن سلام ابن ابى  
الحقيق ) نام يهودى يه سؤال بيورولدى . ثعلبه ايسه  
ضعيف الجنه ، خفيف العقل برشى ايدى . ديدي که :  
— « بن بيلم ! فقط کنانه هر صبح شو خرابه ده  
کزردى ! »

بونك اوزرينه رسول اکرم صلى الله تعالى عليه وسلم

افندیمز، زبیره محل معهودی قازدیردی . کنز مطلوب ده  
قسماً چیقدی .

اشبو کنز مدفون بولندقدن صوکره کنانه نك  
(محمد بن مسلمه) رضی الله تعالی عنه الیله قتل ایدلدیکی  
مرویدر . کنانه نك حین محاربه ده قلعه دیوارندبری  
یوارلادینی قوجه طاش ایله (محمود بن مسلمه) حضر تلرینی  
شهید ایتدیکندن طولای (محمد بن مسلمه) حضر تلری  
انی قتل ایتمش اولمق اوزره روایت ایدنلر وار ایسه ده  
بر ایکی صحیفه قدر از یوقاریده مرحب نام جندینك :  
— (بنی یاری مقتول براقه ! تام اولدیرده اجیسنی

چاپك اونوده لم !)

کبی بر خطاب نیازمندانه سنه (ابن مسلمه) حضر تلری :  
— (لا ! حتی تذوق من الموت مثل مذاق اخي محمود)  
دیدیکنی یازدق که وقعنه نك صورت جریانه نظراً صحیحی ده  
بو اولمق لازم کلیر . چونکه بر ذاتی هم او ، هم او قتل  
ایتمش اولمز . مکرکیم فعل قتله مشرک یعنی طاشی رأس  
الحصاردن دوشورمك خصوصنده متحد الرأی و متعاون  
اوله لر !

کنانه ایله ربیعك دملرینك اهراق ، ذریتلرینك  
استرقاق اولنسی شرط معین موجبجه ایدی .

کنانه، عظماء یهوددن حی بن اخطبک یکی دامادی  
 اولمشدی . کنانه ایله برادری ربیع قتل وزوجه لری سبی  
 اولندی که سبی اولنانده ( صفیه بنت حی ) ایله بنت عمی  
 ایدی . شوغزو وده بو ایکیدن باشقه سبایا اولمامشدر .  
 صفیه حضور پر نور پیغمبری به عرض و تقدیم اولندی  
 زمان ذات عالی رسالتناهی مبارک رداء شریفه لرینی  
 یایوب انک اوستنه صفیه یی اوطورتمشدری . اشبو معامله دن  
 صفیه نك، نظر رغبت نبویه یی جلب ایتمش اولدیغی اصحاب  
 کرام آکلامشدری !

حضرت پیغمبر صلی علیه رب البرافندیمز، دحیه الکلبی  
 حضر تدرینه خیر سبایا سندن احسان وعد ایتدکارندن  
 حضرت دحیه، بو کره صفیه یی ایسته مش ایسه ده یرینه صفیه نك  
 بنت عمی و یرمشدر .

رسول مکرم افندیمز اوویرانه یی حفره امر بیورمش  
 وایسته اوراده خزینه نك بعضی بولتمش اولدیغندن  
 متباقیسنك زرده اولدیغنی صور دیغنی حالدله کنانه اخبار  
 واقرار ایتدی کی چون حضرت نبی ذیشان صلی علیه الرحمن  
 افندیمز ملعون کنانه یی جناب زیر بن العوام رضی عنه السلام  
 حضر تدرینك انه و یرمشدر که خزینه نك زرده اولدیغنی جبراً

اقرار ايتديرمك و ايتديكي تقديرده ايدنجه يه دكين تعذيب  
ايتكم امري نه ده اوزمان برابرجه ويرم شدی .

حالبوکه جناب زير، لعينك النى اياغنى باغيلوب بتون  
وجوديني آتشلرله ياقديني حالد ينه اقرار ايتديرمه ميکنندن  
کيفيتي ذات رسالتپناه افنديمزه عرض و حقنדה استيدان  
ايتمش ني ذیشان افنديمزه دخی :

— ( محمد بن مسلمة الانصاري حضرتلرينه تسليم ايتده  
اوده آنی برادري يرينه قتل ايتسون ! )

فرمانتي اصدار بيورديغندن ابن مسلمة حضرتلری دخی  
حريفي قتل و اعدام ايتمشدر .

آل حقيقك اله کچيريلان دفينه سنده کی جواهر و حلياتک  
قيمتي اوزمان اون بيک التون تخمين اولنم شدی .

جنایت تسميميه — بواشاده ایدی برکون مرحبک

قرنداشی حارثک قیزی و (سلام بن مشکم) کزوجه سی (زينب)  
طرفندن حضور عالی رسالتپناه یه قیزاردلمش برقويون  
اهدا و تقدیم اولنديغندن رسول اکرم، انی اکل ايتکم  
اوزره بعض اصحاب کراميله برابر سفریه او طورم شدی .  
قويوندن برلقمه الوب براز چکنه دکده :

— ( کوکلم شهادت ایدرکه بوقویون زهیری ! )

بیوردی .

روایت اخرایه کوره قوزی طرف حق جل وعلا دن  
لسانه کله رک :

— ( لانا کلنی فانی مسموم )

دیدى .

برباشقه روایت کوره رسول اکرم افدیمر لقمه یی  
اغزینه آلوب چکنه دکدن صوکره ده یوتزدن مقدم  
یتشان جبریل علیه السلام رسول الله :  
— ( اولقمه یی اغزکدن ایت ! )

ویا خود :

— ( لقمه یی [ بسم الله الذی لا یضر مع اسمه شیء فی الارض  
ولا فی السماء وهو السميع العليم .. ] دی ده یوت ! تا که اعدا ما یوس  
اولسونلر ) دیه تنبیه ایتدیکنندن حضرت پیغمبر دخی او یله جه  
یاپدقن فضله سفره ده کی اصحاب کرامنی ده کلدن هان منع  
بیوردی .

انجق ( براء بن معرور ) ک اوغلی ( بشر ) حضرت تلی  
بر لقمه یی یوتمش بولمغله تأثیر سمدن خسته دوشمش ووجود  
مسعود هایون احمدیدخی متأثر قالمشدى .

فقط انك عقيبنده مداوآه تشبث بيورده رق بين الكتفين  
حجامت ايتدير مكله زهر ك تأثيراتى صاوشدى .

مع مافيه اندن صوكره هر سنه خير فتوحاتى موسمنده  
سم مذكور ك تأثيرى وجود هايونلرنده ينه حس بيورور-  
لردى . حتى : ( مازالت اكلة خير تعاودنى اوان ان قطعت

اهرى ) بيوردقلى بوتأثير متوالى به اشارتدر !  
حالبو كه بودرلو تسميمات ظهور ايدنجبه مرقومه

زينب حضور عالى نبوى به جلب واحضار ايدلدى .

رسول اكرم افنديم زده استنطاق ضمننده اكا .

— ( بوخيانتة ناصل جرءة ايتدك ؟ )

ديه سؤال بيورديلر . اوده جوابده .

— ( ا ل ر نبى محقق ايسه ك تأثير ايتمز . دكل ايسه ك

الكدن قور تلمش اولورز فكريله جسارت ايتدم . اما

شمدى اكلا دم كه رسول الله ايمشسك . صدق رسالتكه

اينانه رق سكا ايمان ايتدم )

ديديكندن حضرت پيغمبر انى آزاد بيورديلر .

لكن متعاقباً بشر حضرتلرى مسموماً وفات ايتديكى

ايچون ورثه سنك طلب واداسيله زينب قصاصاً قتل

واعدام ايدلمشدر .

خير اراضيسى خزينه بيت المال ايچون ضبط و نساوان

وصبيان اهالی دخی اسیر ایدلدی . کریده قالان سائر  
اهالی یرلرنده یاریجیلقله ابقا ایدلمشلردر .

بو وجهله ابقا اولنان یهودیلر ، زمان خلافت فارو-  
قیهده یهودیلرک حوالی خیابره دن عموماً نفی واجلا  
ایدلدیکی ایامه دکین اوراده قالمشلردی .

اسری ایچنده حی بن اخطبک قیزی وکنانه بن  
ربیع بن حقیقک زوجه سی ( صفیه ) هنوز تزویج اولمش  
بولندیغی وزوجی ده قتل ایدلدیکی ایچون یکی کلین اوله رق  
طول قالمشدی .

حالبوکه صفیه فوق العاده حسن جمال صاحبه سی  
اولدیغی کبی جمالی ده اصحاب کرام حضرت اتجه مشهود اولمش  
بولندیغدن تقسیم غنایم صره سنده هر کیسک حصه سنه  
دوشسه دیکر لرینک کوکلی قاله جق ایدی .

بناءً علی ذلک حضرت سید کائنات افندیمنز اوکی محتمل  
اولان شیرک حدوتنه محل قالماق اوزره صفیه بی کندی  
ذات هایونلری ایچون انتخاب بیوردی .

لکن انک طرف اشرف نبویدن جاریه اولدیغی حالده  
حی قولانیله جق یوقسه امهات مؤمنین اولان زوجات  
طاهرات عدادینه ادخالمی ایدیله جک ؟ بوراسی اصحاب  
کراجه کسدریله مدیکندن وراء حجابیه آلوب النمیمه جنی



انتظاری خصوصه - کبار صحابه دن برینک ارشاد  
ودلائیه - لزوم حاصل اولدی . زیرا زوجات طاهرات  
نبویه یی اصحاب کرام کنیدی والدملری مقامنده عدو اعتبار  
ایدرلردی . انکی چوندرکه انلره ( امهات مؤمنین ) دینلمشدر .  
نسوان اسلامک ارککاره کورونملری اولجه انزال  
بیوریلان آیت کریمه حجاب ایله طرف جل وعلادن منع  
ایدلمش ای دیسه ده بواحتجاب وتستر خصوصی حره اولان  
نسوانه مخصوص اولغله جاریه لرایچون تسترواجب اولماش  
ایدی . جاریه لر آچیق کزرلردی . متعاقباً صفیه نک طرف  
عالی نبویدن حجاب وپرده ارقه سنه التمسيله امهات مؤمنین  
صره سنه کچمش اولدینی اکلایمیدی .

اثناء معاودت هایون نبویده «سد الصهباء» نام منزله  
ذات عالی احمدی صفیه یی حجاب ارقه سنه الدقدن باشقه  
امر زفاف شرف و قوعبولمش و مشار الیه انک امهات مؤمنین  
سلک جلیله ادخال بیورل دینی ارتق اظهار واعلان اولنوب  
افندیمز ، اوزمان سد الصهباء منزله اوچ کون اقامت  
بیورمشدر .

لیلة الزفافده ابویوب الانصاری رضی عنه الباری  
حضرتلری حول قبه رسول الله محافطلق مأموریتنی  
ایفا ایتشدی .

صباحین حضرت رسول مکرم افندیمز، جناب ابی  
ایوبی النده قیلنجی بولندیغی حالده محافظ طور مقده اولدیغی  
کورونجه اکا :

— « اونه یا ابا ایوب ! »

بیوردیلر . حضرت صحابی مشارالیه ده :

— « یارسول الله ! امین اوله مدم . زیرا انک باباسنی  
وزوجنی وبرچوق ده قوم قبیله سنی قتل ایتدک . بلکه  
فرصتله سوء قصد ایدرسه دیه قور قدم ده حول شریفکدن  
ایریله مدم »

جوانی ویرمش اولدیغندن حضرت پیغمبر ممنون  
اوله رق آنک حقنده :

— « اللهم احفظ ابا ایوب کلمات یحفظنی »

دیه دعا ایتمشدر .

اردوی هایونک مدینه منوره یه مواصلتنده حضرت  
عائشه رضی الله عنها، صفیه یی کورمک ایچون هان تبدیل  
قیافت ایدرک نسوان سائر ایلله برابر اولدیغی حالده عروسه  
مشارالیهانک یانسه کزلیجه کیرمشدی . آنک اوصورتله  
کیردیکنی حضرت رسول الله کشف و تفرس بیوردقلری  
حالده اوراده هیج بللی ایتمامش وانجق حجره سنه عودتندن  
صوکره :

— « یا عائشه ! صفیه بی ناصل بولدك ؟ »

میوروب :

— « برقاج یہودیہ لرك اره سنده بریہودی قیزندن باشقه  
برشی کورمدم ! لکن ایشتم کہ سن آنی سوہ یورمشسك ! »  
جوابی ایشدیکندن ،

— « لاتقولی یا عائشه ! فانی لم ار فی وجهها کبوة  
حین عرضت علیها الاسلام = یعنی : دیمہ یا عائشه ! زیرا  
بنی کا عرض اسلام ایتدیکم زمان یوزنده هیچ بر اثر تردد  
کورمدم »

میورمشلردی .

غنائمی ذات عالی رسالتپناهی مجاہدین کرامہ تقسیم  
میوردینی زمان اصحابك صحرا ده کزن براعرابی چوباننده  
حصہ آیرہ رق برواسطہ ایلہ کوندرمشدی .  
چوبان حصہ سنی کوردکده :

— ( بونہ در ؟ )

حیہ سوروب :

— ( غنائمدن حصہ کزہ دوشان قسمدر )

جوابی المغلہ او حصہ سنی همان الہرق حضور رسول اللہ  
کلدی والندہ کی حصہ غنیمتہ اشارتله :

— ( یارسول الله ! بونک ایچون سکا ایمان واطاعت

ایتمدم )

دیدکدن صوکره برالیله خنجره سنی [ بوغازینی ] کوستره رک :

— ( بلکه ایشه شورامه براوق طوقانسون ده شهید

اولهیم . جنته کیرهیم . مرادم انجق بودر ! )

دیدیکندن اکا قارشى ذات احمدی :

— ( اکر سن طوغری سوبله دک ایسه حق تعالی ده

وعدینی یرینه کتیریر )

بیورمشدی .

غریبدرکه اره دن چوق کچمدن وقوعبولان غزاده .

اعرابی مشارالیه اولجه کوستردیکی خنجره سندن

براق اصابت ایدهرک شهیداً ترک دغدغه حیات ایله مشدول

رسول اکرم صلی الله تعالی علیه وسلم افتدیمز حضر تکرى

ایسه آنک اوحالی کوردیکی زمان :

— ( طوغری سوبله دی . الله تعالی ده وعدینی برینه

کتیردی )

بیورمقله برابر مبارک جبه شریفه سنی صاروب اوزرینه ده

نماز قیلدقدن و : ( اللهم هذا عبدك خرج مهاجراً فی سبيلك

قتل شهیداً علی ذلک ) ديه دعا دخی ایتدکدن صوکره

دفن ایله مشدول . اشبو غزوه ده ( جعفر بن ابی طالب ) رضی الله

تعالی عنه حضرت تلرینه وآنسکه برابرارض حبشدن دارالاسلامه  
 هجرت ایدن دیگر احبابنه، دوسیلردن راوی شهرت شعار  
 (ابوهریره) حضرت تلرینه، کذلک معیتی افرادیله برابر  
 (طفیل بن عمروالدوسی) به اموال غنیمتدن حصه افراز  
 واحسان بیورلمشدر. فقط بوخصوصده رسول اکرم  
 افندیمز، غزاة کرامک رأیلرینه مراجعتله اولارضا  
 وموقفتلرینی استیعمال ایله مشدی.

۲

### — فـدک مصالحه سی —

خبر مظفریت عظیمه سی اوزرینه مدینه منوره به ایکی  
 قوناق مسافه سی بولان فـدک نام قریه نک اهالیسی خوف  
 وخشیته دوشه رک سلامتده قالمیری ایچون هیئت اسلامیه  
 ایله بر معاهده یایمق تصویرینه دوشمش وحتی ذات عالی  
 پیغمبری به (محیص یاخود محیصه بن مسعود) [ ۱ ] نامنده  
 بر سفیری اعزام ایده رک مصالحه استدعا ایله مشلردر.

جناب رسالتپناه صلی علیه الاله افندیمزده اشبو فکر  
 مسالته موافقت کوستره رک [ بتون فـدک اراضیسی ذات  
 الاحمدی به ترک ونفرغ ایدلمک وفدک اهالیسی ده اواراضیده  
 یاریجیلقله خدمت ایدوب محصولاتنک یاریسنی ذات عالی

[ ۱ ] قاتل ابن سنینه بو ذات اوله جقدر . صحیفه ۶۴

نبوی یه ویرمک [ شرطنی فدلکیلره قبول ایتدیردکن  
صوکره صورت مصالحه بی حاوی صلحنامه تنظیم و تعاطی  
قینمشدیر . که اندن صوکره فدک حاصلاتی منحصر  
رسالتپناه افندیمرک اولدی .

مدت حیات سعادت آیات رسالتپناهیلرنده فدک  
حاصلاتی خاندان رسالتک اداره معیشتلرینه قارشولوق  
طوتیلورایدی .

۳

### — وادی القری غزوه سی —

جناب فخررسل افندیمر حضرتلری، خیر فتوحاتی  
اتمام وفدک معاهده سنی ده تسویه ایتدکن صوکره وادی  
القری جانبنه عزیمت واورانک اهالی یهودیه سنی ده دین  
اسلامه دعوت بیورمشدی .

حالبوکه یهودیلر، اجابتدن صرف نظرله حرباً مقابله یه  
بیله تشبث ایدمرک ایچلرندن بری قلعه لرندن طیشاری یه  
چیقوب مبارزه یه ارایستدیکندن (زیر بن العوام) رضی الله  
تعالی عنه حضرتلری، انی قتل و متعاقباً ایکنجی برده  
چیقان دیگر یهودی بی ده اعدام ایتدی .

بعده بری برینک عقبنده میدان مبارزه به کین  
 یهودیلردن برینی حیدر کرار، ایکینسی ابودجانه شهرت شعار  
 رضی الله عنهما حضرتلری اولدیردکلرندن یهودیلرک  
 اون برنفر قهرمانی اولوجهله اعدام ایدلمش و صوکره ایلری به  
 طوغری یوروش اجرا ایدن اردوی هایون  
 وادی القرایی درت کون محاصره ایله ضبط و تسخیر ایله مشدر  
 قلعه نك اوزمان الله کچیریلان اموال و اشیاسی غزات  
 کرامه تقسیم و اهالیسی اهالی خیر کبی چفتجی اولمق  
 اوزره یرلرنده ابقا اولندی .

رسول اکرمک آزادلولرندن [ مدعم ] رضی الله  
 عنه، اشبوغزو ده دشمن طرفندن اتیلان براوقک اصابتیله  
 شهید اولمش و انیدیمر شهید مشاریهک غنایم خیبردن  
 قسمته داخل اولمیان برشمه یی کیزلی اوله رق آلمش بولندیغنی  
 اخبار ایله برابر حقننده : [ ان الشملة التي غلها من خیر  
 لتشتعل علیه ناراً ] بیورمشدی !

ع

### « صلح تیما »

بودرلو وقایع حربیه، و فتوحات اسلامیه ده هیئت  
 محترمه اسلامیه نك آواز ؤ سطوت نك کنکره بالاخانه اشتهارده



اهتزاز حاصل ایلهدیکنی ورایت اقبال و مظفریتکده آفاق  
اعتلاده موجه نمای مهابت اولدیغنی کوروبده خلجانه  
دوشمش اولان قبائلدن تیما اهایسیده جزیه شرعیه  
اعطاسنه روی رضا کوستردک صاحبا اطاعت و تابعیتی  
قبول ایتمشدر.

اشبو تیما بلده سی مدینه منوره ایله شام اره سنده  
ومدینه منوره یه سکنز قوناق بعد مسافده واقع بر بلده ایدی  
اردوی هایونک زمان معاودتی، شهر صفرده  
وقوع بولدی بوموفقیته عظیمه دن صوکره ارتق اطرافه  
بعضاً جمعیتلی فرق عسکریه کوندرلکه و هر طرفده سطوت  
اسلامیه نک تأثیری کوسترلکه باشلاندی.. هیئت اسلامیه نک  
بویله بردن بیوک بر قوه عسکریه قازانمش اولمسنه انجق  
مصالحه حدیبیه نک حسن تأثیرات کلیه سی اولمشدر.

مثلاً اکر قریش ایله مصالحه ایدلماش وانلرک  
تجاوزاتندن اهل اسلام تماماً امین بولنماش اولسیدی  
بری طرف ایشلرینه پک اودرجهده سربست باقه ماز  
ایدی . باقه مدینی حالده او یله شانلی فتوحات و غلباته  
مظهرده اوله ماز ایدی .

ایشته و قتیله حدیبیه معاهده سنی چشم استیقال ایله  
کورمش و شروط معاهده یه اعتراض ایتمش بولنان اصحاب

گرام، معاہدہ نك بودرلو حسن تاثيراتنى وفوائد و حسناتنى  
كورونجه نادم اوله رق توبه واستغفار ايتملر در .

اسلام انى موسى — تاريخ هجرتك بوسنه سنده

« ابو موسى الاشعرى » حضرتلى، قبله سندن بر جوق  
كيمسه لرايله برابر اولدينى حالده يندن مدينه منوره يه كلوب  
شرف قبول دين مبین اسلام ايله مشرف اولديلر .  
رضوان الله تعالى عليهم اجمعين !

۵

### — سفرء پیغمبرى —

ينه بوسنه ايچنده ايدى كه استعيز بالله [ قل يا ايها -  
الناس انى رسول الله اليكم جميعاً ] آيت كريمه سى طرف  
اشرف حق جل وعلا دن نازل اولوب سيد الكونين  
رسول الثقلين افنديمز حضرتلى جميع خلايقي دعوته  
مأمور بيورلد يغندن ذات علىء پیغمبرى زمانك اك بيوك  
حكمدارلى بولنان ذواتى تحريراً دعوته لزوم كورمش  
واولوجهله يازدير دقلى مكاتب شريفه لرينى ، تعيين  
بيوردقلى سفرء كرامى واسطه لريله شهر محرم اوائلنده  
ارسال بيورمشد .

اشبو محررات شریفه نبویه ، ذات جلیل احمدینک  
او صروده کموشدن مخصوصاً یایدیروب ایچنه [ محمد  
رسول الله ] عبارۀ شریفه سنی حکایتدیردکاری مهر  
شریف ایله تختیم بیورلمشلردی .

شو مهر شریف ، رسالتپناه افندیمزدن صوکره  
« ابو بکر الصدیق ، عمر الفاروق ، عثمان ذی النورین »  
رضوان الله تعالی علیهم اجمعین حضراتی صروده سیله استعمال  
ایتمشلردر . فقط حضرت عثمان ؛ زمان خلافتلرنده  
ایدی برکون قبا جوارنده بر بستانده الان « بئر خاتم »  
عنوانتی حائر بولنان قویونک جوار وکنارنده اوطور -  
یورلردی . تختیمی لازم کلن بر ورقه ایچون مهرهایون  
حضرت خلیفه ، مهرداری « معقیب » حضرتلرینه  
ویریرلرکن وعلی روایة بعدالتختیم مهرشریفی مهردا -  
رک لندن کری ایر ایکن هر ایکسنکده لندن چیه رق  
قویویه دوشمشدر . معقیب ، او زمان خزینۀ بیت المال  
امینی یعنی امورمالیه ناظری ایدی . اوچ کون متمادیا  
ارانیدیغی حالده بولنه مامشدر . بناء علیه مهر همایونک  
شرف استعمالی جناب علی المرتضی کرم الله وجهه  
افندیمزه نصیب اوله مدی ۰۰ بئر مذکور ، اندن اوللری  
« بئر اریس » اسمیله مسمی ایکن شو وقعه اوزرینه « بئر

خاتم « نامیله اشتہار ایله مشدر .

بودر لودعوتہ تحریر بہ اصولنہ مراجعت بیورلدیغی وقتہ  
دکین رسول اللہ افندیملک مکاتیب ایچون مہر قوللاندقلری  
یوغیدی . لکن بین الملوک محرراتندہ خاتم استعمالی اوزمان  
تحقیق بیورلدیغندن خاتم شریف مذکور لزوماً اتخاذ  
واستعمال بیورلدی .

طرفلرینہ مکاتیب شریفہ نبویہ کودریلان ملوک وتبلیغ  
رسالتہ مأمور اولان ذوات شو :

سفراء کرام نبوی	دعوت اولانان ملوک
عمرو ابن امیہ الضمری	نجاشی حبش : « اصحمہ بن بحر النجاشی »
عبد اللہ بن حذافہ الہمی	فرس پادشاہی : « کسری خسرو پرویز بن ہرمز »
دحیہ بن خلیفہ الکلبی	قیصر روم « ہراکلیوس = ہرقل »
حاتب ابن ابی بلتعہ ثقی	مصر حکمداری : « مقوقس جریج بن مینا »
شجاع بن وہب الاسدی	شام حکمداری : « حارث ابن ابی شمر الفسانی »
سلیط بن عمرو العاصری	یمامہ ملکی : « ہوذہ بن علی حنفی »
علاء بن الحضرمی	بحرین حکمداری : « منذر بن ساوی »

وجہلہ یدی نفر حکمدار ویدی ذات سفیردن عبارتدر .

حبشہ سفیر — جناب عمرو بن امیہ الضمری رضی اللہ

تعالیٰ عنہ حضر تلمری ، امر دعوت حقندہ کی نامہ ہمایونک  
تقدیم وتبلیغندن فضلہ بردہ ارض حبشہ کی مہاجرین

اسلامیه نك ارتق عودت لرینی ایستتمك وام حبیبه رمله  
بنت ابی سفیان رضی الله عنها حضرت لرینی رسول اکرم  
صلی الله تعالی علیه وسلم افندیزه نکاح ایله مك مأموریت  
مخصوصه سنی ده حائز ایدی .

ام حبیبه حضرت لری ، ارض حبشه هجرت ایدن مها-  
جریندن « عبیدالله بن جحش » ك زوجه سی اولوب  
حالبو كه عبیدالله حبشه نصرارا دینه کیردیکندن دین  
میننده ثابت قالان « ام حبیبه » اندن ایریله رق یالکیز  
قالمش و عربك اويله تك قالان قادینلری کندی کفو-  
لرینی بولمقجه ازدواجه رغبت ایتماك ، کندیلرنجه  
طبیعت حکمنه کیرمش بر عادت اولدیغیچون او عاده  
قارشى جناب ام حبیبه حضرت لری کوچ برحاله ، مشكل  
برموقعه دوشمش ایدی .

بویله متانت دینه سی سببيله وطنندن دور وكافه  
خصم وتعلقا تندن مهجور قالان بر اصیلزاده قادینك  
مكافاة تلطیفی نزد جلیل نبویجه الزم امور اولدیغندن اشبو  
نقطه بی نظر عالیقدر اعتباره الان ذات عالی رسالتناهی  
انی تزوجه رغبت بیورمشلردی .

تاریخ نبوت احمدیه نك التنجی سینه سنده مهاجرأ  
عزیمت ایدن جعفر بن ابی طالب رضی الله تعالی عنه

حضرتلرینک دعوتیلہ قبول دین اسلام ایتمش بولنان  
جناب نجاشی حضرتلری ( عمرو بن امیة الضمری )  
رضی اللہ تعالیٰ عنہ حضرتلرینہ صورت مخصوصہده  
اکرام ایتمش وام حبیبہ رملہ بنت ابی سفیان بر منطوق  
فرمان نبوی رسول اکرمہ تنکیح وتزویج ایله دکن  
صوکرہ کرک مشارالہایی ، کرک سائر مهاجرینی ایکی  
کمی یه بندیروب مدینہ یه طوغری کوندر مشدر .

غریبدرکہ امر نکاح عقد ایدلمزدن بر کیجه مقدم  
( ام حبیبہ رملہ ) رضی اللہ تعالیٰ عنہا حضرتلری حالت منامنده  
کندیسنه خطاباً : ( یا ام المؤمنین ! ) دیه ندا ایدلدیکی  
ایشتمش وتعبیرینک نه اوله جغفی ملاحظه ایده طورور  
ایکن عمروک عقد نکاحه وکیل ومأمور اولدینی مژده .  
سنی المش اولدیغندن اشبو بشارت عظمایی کندیسنه  
ویرمش اولان [ ابرهه ] نام جاریه یه حلیاتندن ایکی  
عدد بیله زک ایله برقاج عدد یوزک بخشش اوله رق اعطا  
وايثار ایتمشدی .

لکن جاریه مرقومه جناب نجاشینک جاریه سی  
اولمغله ام حبیبه نك اوزمان ايثار ایله دیکی حلیات مذکو .  
ره یی نجاشی جاریه سندن اخذ واسترداد ایدمرك مؤخرآ



ترتيب و تجهيز ايله ديكي سائر هداياي ثمينه ايله برابر جناب  
ام حبيبہ حضرت تيرينه اعاده و تقديم ايتدی.

اشبو قافله اسلاميه ، حضرت رسالتپناه صلى عليه  
الاله افنديمك غزوۀ خيرده قلاع خيابرودن (كنديه)  
حصن حصينك فتح و تسخيريله اوغراشمقده بولنديغي  
بر صروده مدينۀ منوره يه واصل اولمشدى .

ذات جليل رسالتپناه افنديمك ، جناب جعفرله  
كوروشدكلرنده حاصل ايله دكلري ممنونيت همايونلرندن :  
( بيلمم بو ايكي شيئك هانكي بريله فرحلتيم ؟ فتح  
خيرله مي يوقسه قدوم جعفرله مي ؟ ) بيورديلر !

مهاجرين اسلاميه نك زمان عودتلرنده جناب  
نجاشي اوغلي « ارمي بن الصحمه » يي زيارت پرسعادت  
رسول الله ايجون متعيزان حبشه دن التي نفر ذات ايله  
برابر مدينه يه اعزام بيورمشدى .

ارمي نك النده طرف نجاشيدن ذات احمدى يه  
خطاباً يازلمش جوابنامه دخي وار ايدى .

فرس حكمدارينه سفير — اوزمان ايران دولت  
ساسانيانيه سنك حكمدارى « پرويز » نام شخص يتميز ايدى .  
عبدالله بن حذافه السهمي رضى الله تعالى عنه



حضرتلری مأموراً کیتدی .. پرویز نامنه خطاباً :  
 [ بسم الله الرحمن الرحيم . من محمد رسول الله الى كسرى  
 عظيم فارس . سلام على من اتبع الهدى . وآمن بالله  
 ورسوله . وشهد ان لا اله الا الله وحده لا شريك له وان  
 محمداً عبده ورسوله . ادعوك فاني رسول الله الى الناس  
 كافة . لينذر من كان حياً ويحق القول على الكافرين  
 اسلم تسلم . وان توايت فعليك انم الميجوس والسلام ] عبارة  
 شريفه سيله يازلمش برده نامه همايون وار ايدي . [ ۱ ]  
 وقتا كه جناب عبدالله ، او زمان حكمدار فرسك  
 تختگاه سلطنتی بولنان « مداين » شهرينه واروب حضور  
 حكمداری به كيردى . و نامه همايونی پرويزه تسليم ايتدى .  
 پرويز كافر ، نامه همايونده كى مأل ومندرجاته هنوز مطلع  
 اولمزدن اول اسم شريف پيغمبرينك كندى نام بدكام

[ ۱ ] نامه همايونك :

— « بسم الله الرحمن الرحيم . من محمد رسول الله الى پرويز  
 بن هرمز اما بعد فاني احمد الله الذي لا اله الا هو الحى القيوم  
 الذي ارسلنى بالحق بشيراً ونذيراً الى قوم غلبتهم السفاهة وسلبت  
 عقولهم . من يهدى الله فلا مضل له ومن يضل فلا هادى له .  
 وان الله بصير بالعباد . ليس كمثله شئ وهو السميع العليم .  
 اما بعد فاسلم تسلم من عذاب الله .  
 عبارة شريفه سيله يازلمش برده مرويدير .

ملعترینه مقدم اولدیغنی کوردکده اسم عالی نبویک  
وقوعبولان تقدمنی چکه میهرک همان غضب و حدت ایتش  
و نامه سعادتیه ده شق برله یره اندقدن صوکره سفیر عالی  
جناب عبداللهک دخی خارج مملکته طوغری طرد و اخراج  
ایدلسنی خصوصنی شدیداً امر ایتشدر .

لکن عبداللهک خارج مملکته چقه دیغنی عقیقده  
پرویز ایتدیکی شدت معامله دن هر نه دنسه نادم اوله قالدیغندن  
او وقته دکین تا مدینه یه قدر کلش اولان سفیر مشارالیهک  
اعاده سنی امر ایله دیکی حالدیه موفق اوله مامشدی !

عبدالله ، اولوجهله معامله کوره رک عودت ایدوبه  
ماهو الواقعی ذات عالی رسالتپناهی یه عرض و اعلام ایتدی .  
افندیمز دخی اکا قارشنی یالکیز : « مرق کتابی مرق الله  
تعالی ملکه ! » تیر سریع التأثيرینی پرویزک جبهه ملکه  
وسلطنته طوغری اتمشدی .

غدار پرویز او معامله سیله قناعت ایده مدی ده یتمز  
ملکی « باذان » نام حکمداره ذات اشرف نبویک  
شهر مدینه کوندرلسنی ! حاوی بر امر مؤکد و یرمش  
اوده فرسک یمنده مقیم خاندان حکمداریسندن و مشاهیر  
شجعانندن « بانویه » ایله « خر خسره بن التیجان » نام  
ایکی آدمی حضور پر نور رسالتپناهی یه اعزام ایتشدی .

بونلرك النده باذان طرفندن يازلمش برقطعه مکتوب وار ایدی که مکتوب مذکورک ایچنده پرویزک باذانه یازدینی الامرنامه شدیدالمال دخی ملفوف ایدی .

ایکی سفیر شایان بیوریلان مساعده سینه اوزرینه شرف ملاقاته مظهر اولدیلر سده ابراز و تقدیم ایله دکلری مکتوبک جوانی ایرته سی کونه تعلیق بیورلدقدن صوکره کندیلرینه اذن ویرلمشدر .

حالبوکه « پرویز » اوغلی « شیرویه » طرفندن اوکیجه قتل ایدلیدکندن کیفیتی حضرت جبریل امین واسطه سیله اکلامش اولان ذات جلیل احمدی ، ایرته سی کون کلان ایکی سفیره ، بلاد عراقده پرویزک باشنه دوشان مصیبت وفلاکتی : [ جناب جبار المنتقم حضرتلری ، شهر جمادی الاولانک اونجی صالی کیجه سی ساعت یدیده شیرویه بی باباسی پرویزک اوزرینه مسلط ایدهرک او ظالم غدار ، شیرویه نک شمشیر تدمیریه قتل و اعدام ایدلیدی . وارتنق بزم ایله ملاقات و مقاتله یه وقتی قالمدی ] دیه نقل و تبلیغ ایتدکدن صوکره باذانه خطاباً یازدیردینی جوابنامه عالیلرنده ده کیفیتی عین وجهله درج و تصریح ایتمش و ایکی سفیره ده شفاهی اوله رق :

— « سویلیکیز باذانه که ! اکر بنم نبوت و رسالتی

تصدیق ایدرسه حکومتی کن دیسنه ترك ایدرم . والا  
ملك وملكی جناب حق بنم امتمه ویره جكدر . وبنم  
دینمی ادیان سائر اوزرینه غالب ایده جكدر »  
دیه تنیه دخی ایله مشدی .

مع مافیه هر ایکی سفیره صورت مخصوصده اكرام  
واحررامده بولندی . حتی مقوقسك التون وابریشمدن  
معمول و مصنوع اولق اوزره اهدا ایتدیکی كمر مرصی -  
چین عود تارنده - « خر خسره » یه ویردی . بانویه یهده  
باشقه درلو هدیه لر احسان بیوردی .

كمری المش اولان « خر خسره » نك اولاد و احفاد -  
دینك ایشه او كمر سبیلله الاُن ( ذو المعجر ) لقب و شهرتی حائر  
اولدقلری بعض آئارده كورولمشدر .  
ایکی سفیر ، باذانك مقر حکومتی اولان صنعا یه واروبه  
مسموعات و مشهوداتی حکایه ایتدیلر . بوكا قارشى بالطبع  
متحیر قالان باذانده :

— ( باقلم صحیح حمیدر ؟ )

انتظارنده بولنور ایکن ایکی اوچ کون صوکره وقوعات  
مذکورہ نك صحتی اكلا شیلدیغندن و برده حکمدار جدید  
شیرویه نك کن دیسنه یازدینی تحریر اتده محمد [ علیه الصلوٰة  
والسلام ] علیهنده حرکتدن شدتله نهی اولمشور

بولنديغندن ارتق كرك باذان ، كرك هر ايكي سفير  
وتبعه سائرملري صدق نبوت ورسالت احمديه ايمان  
حاصل ايتمش اولمغله ذات عالي رسالتپناهى دخى باذان  
حضرتلرينك عهده سنده يمن ولايتى واليلىكنى ابقا  
نيورمشدر .

طرف اشرف نبويدن ايلك تعيين بيوريلان والى ،  
ايسته بو باذان اولدينى كبي ملوك ايرانيه دن ابتدا قبول  
دين اسلام ايتمش اولان ده ينه بو ذاتدر . رضى الله  
تعالى عنه !

شرقى روما ايمپراطورينه سفير = شرقى روما  
ايمپراطورى ( هر اكلوس = هر قل ) اولوب مقر  
حكومتى ( استانبول ) ايدى .

دحية الكلبى رضى الله عنه حضرتلري دعوتنامه همايوفى  
الوب كيتدى . . اوزمان هر اكلوس شام حواليسنك اصلاح  
احواليله مشغول بولنه رق قدس شريفده مقيم ايدى .  
قيصر هر اكلوس ، نامه يي الدينى زمان بيوك برمنوه  
نيت كوسترمش وسفير رسالتپناهى حضرت دحية حقنده ده  
حسن قبول ورعايت مخصوصه ابراز ايتمشدر .

اشبهو نامهٔ سعادتک هر ا کلیوسه واصل اولوب  
مواد مندرجه سی حقنـده مراقبه و ملاحظه لـزوم  
حاصل ایلـه دیکـی صـرده عـظما قـریشـدن ( ابوسفیان بن  
حرب ) بر طاقم رؤساء قریش ایلـه برابر اولدینی حالـه  
نزد ایمپراطوریده بولندیغندن هـرا کلیوس طرفندن بعض  
احوال و شئون احمدیه به اطلاع تحصیل ایچون استنطاق  
واستجواب اولنشدی :

مجلس مخصوص تشکیل ایدلدی . عموماً عظماء  
روم مذکور انجمن محاورده حاضر اولدی . ایمپراطور،  
ترجمانی واسطه سیله قریش آدمـلرینه خطاباً :  
— « هانکی بریکز دعوای نبوته بولنان او آدمـه  
نسباً قریبدر؟ »

دیدی . ابوسفیان اکا جواب ویردی :  
— « بن ! »

بونک اوزرینه هـرا کلیوس،ینه اوترجمان واسطه سیله :  
— « آنی بکا، ارقداش لرینی دما کا قریب اوطوردیکـز! »  
دیه امر ایدوب اویله جهـده ترتیب ایدلدکن صوکره  
هـرا کلیوس، ابوسفیانک یانه قریب اوله رق اوطوردیلان  
قریش آدمـلرینه :

— « بوذات، انك حقنده بكا يالان برشی سویلر سه  
سزبونى تكذيب ايديكز ! »

ديمش وبعده مكله ينه ترجمان ايله اولمق اوزره  
ابوسفیان ايله امپراطور اره سنده شو محاوره جريان  
ایتمشد :

هراقلیوس :

— « كيف نسبة فيكم ؟ »

ابوسفیان :

— « هوفينا ذونسب »

هراکلیوس :

— « فهل قال هذا القول منكم احد قط قبله ؟ »

ابوسفیان :

— « لا ! »

هراکلیوس :

— « فهل كان من آباءه من ملك ؟ »

ابوسفیان :

— « لا ! »

هراقلیوس :

— « فاشراف الناس يتبعونه ام ضعفاءهم ؟ »



ابوسفیان :

— « بل ضعفاؤهم ! »

هراقليوس :

— « ايزيدون ام ينقصون ؟ »

ابوسفیان :

— « بل يزيدون ! »

هراقليوس :

— « فهل يرتد احد منهم عن دينه بعد ان يدخل فيه »

سخطة له ؟ »

ابوسفیان :

— « لا ! »

هراقليوس :

— « فهل كنتم تهمونه بالكذب قبل ان يقول ما قال ؟ »

ابوسفیان :

— « لا ونحن منه في مدة لا ندري ما هو فاعل فيها »

هراقليوس :

— « فهل قاتلتموه ؟ »

ابوسفیان :

— « نعم ! »

هراقليوس :

— « فكيف كان قتالكم اياه ؟ »

ابوسفیان :

— « الحرب بيننا وبينه سجال . ينال منا وننال منه »

هرا کلیوس :

— « فهل يغدر ؟ »

ابوسفیان :

— « لا »

هرا کلیوس :

— « ماذا يا امرکم ؟ »

ابوسفیان :

— « يقول اعبدوا الله وحده ولا تشركوا به شيئاً !

واتركوا ما يقول آباؤكم ! ويا امرنا بالصلاة والصدق والعفاف

والصلة ! »

زمین محاوره بومرکزہ کلیدیکی اننادہ هرا کلیوس :

— « بن سکاانک صاحب نسب عالی اولوب اولمدیغنی

صوردم . سن ده اوله در ديدك . رسل کرام ايسه ذاتاً

قومنک نسه بنده اوله رق بعث وارسال اولنور . اولجه

قبيله کزدن هيچ بر آدمک بودعواده بولنوب بولمدیغنی

ده صورم . بولمدیغنی جوانی ويردك . اکر اوله بردعوانک

اولجه برکونا سبق اولسیدی بن آنک حقنده « رجل بتاسی

بقول قيل قبله « ديه بيلير ايدم . آباء و اجدادندن هيچ برى  
 ملكمى ايدى ديدم سن ديدك كه دكل ! اكر اويله اولسيدي  
 باباسنك ملكنى ايسيتور دير ايدم . بودعواسنندن اول  
 يالان سويله ديكنى كوردى كزى ديورم . جوابده يالانجى  
 اولمديغنى سويليورسك . او حالده ده آكلا شيله يوركه « انه  
 لم يكن ليذر الكذب على الناس ويكذب على الله ». اشراف  
 صريمدر اكا ايمان و اطاعت ايدن ؟ يوقسه ضعفاء  
 ملتيمدر ؟ ديدم . سن ، ضعفاء قومدر ديدك . ضعفاء  
 قوم ايسه اتباع رسلدر . اتباعى چوغاليورمى يوقسه  
 ازاليورمى ديورم . چوغالمقده اولدقلىرىنى خبر ويردك  
 امر ايمان ده بويله در تمام اولنجيه دكين چوغالير كيدر .  
 اتباعندن هيچ برى دينه سخطه حاصل ايدوب ده ارتداد  
 ايتشميدر صور يورم . ايتديكنى سويله يورسك ! ايمان ده  
 بشاشتى قلوبه كيرر كن بويله در . غدر ايدر مى ديدم ايتمز  
 ديدك . رسل كرام هيچ غدر ايتمز لر . سزه نه يى امر ايدر  
 ديدم يالكز الله عبادتى و اكا هيچ بر شيتك اشراك  
 ايدلامسنى امر و عبادت اونانندن شديد آهنى ايتديكنى و صلاة ،  
 صدق ، عفاف ، صله رحم ايله امر ايله ديكنى سويله يورسك  
 اكر سنك بوديديكك وجه اوزره امر و نهى ايد يورسه  
 محق قدر كه او آدم ده ايكي اياغمك باصديغى شـ و محلى [ يعنى

روما ممالکنی [ قریبا ضبط ایدم جکدر . هر زمان بیلیر  
ایدم که اودیدیکک ذات مطلقا بر زمان ظهور ایدم جک !  
لکن بیلیمزدم که سزدن ظهور ایتسون ! اکر اکا خلوص  
اوزره بولنه بیله جکمی بیلیمزدم شرف ملاقاتی احرازه  
جان آناردم . اکر غندنده بولنسیدم مبارک ایکی قدم  
شریفارینی بیقرار ایدم »  
سوزلرینی علاوه ایتدی .

ابوسفیان دیر ایدی که :

امر محاوره بوسه سوزلرله نهایت بولدقدن صوکره  
رسول اللهک دحیه رضی الله تعالی عنه حضرتلرینک یدیله  
کندیسنه کوندردیکی نامه سعادتیه هرا کلیوس احضار  
ایتدیروب او قودی

نامه نک قرائتی ده ختام بولنجه مجلسده کورولتی چوغالدی  
غلبه لیکلی سسلریوکسلدی . بزده مجلسدن طیشاری چیققدق  
جناب دحیه ، نزد قیصریده مظهر اکرام واحترام  
اولمش وافندیمزده مخصوص بعض هدایایی حامل بولندیغی  
حاله ممنوناً ومطیباً عودتده ایتشدی .

انجیق روایتده کوره یولده [حسمی] محلنده هنیید نام  
شخص، هوادار لرلیله برابر اولدیغی حالده حضرت دحیه یی  
صیقشدیروب نزدنده کی هدایایی المش اولمقله هنییدک شو

معامله سی، حسمی اها لیسینک تأدیب وتنکیلی ایچون  
علیهلرنده سمریه اخراجنه باعث اولمشدی .

مصر حکمدارینه سفیر = کبار صحابه کرامدن «حاطب  
ابن ابی بلتعۃ اللخمی» رضی الله عنه حضرتلری ،  
معیتنده «ابوذر الغفاری» رضی الله عنه حضرتلرینک  
آزادلیسی «جابر» حضرتلری بولندیغی وحکمدار  
مصر بولسان «مقوقس جریج بن مینا» یه خطاباً  
طرف اشرف رسالتپناهیدن [ بسم الله الرحمن الرحیم .  
من محمد عبدالله ورسوله الی المقوقس عظیم القبط . سلام  
علی من اتباع الهدی . اما بعد فانی ادعوك بدعایة الاسلام  
اسلم تسلم یؤتک الله اجرک مرتین . فان تولیت فعلیک  
اسم القبط . یا اهل الکتاب تعالوا الی کلمة سواء بیننا و بینکم  
ان لا نعبد الا الله ولا نشرك به شیئاً ولا يتخذ بعضنا بعضاً ارباباً  
من دون الله! فان تولوا فقولوا اشهدوا بانا مسلمون ] عبارة  
شریفه سیله یازلمش بر نامه هایونی حامل اولدینی خالده  
مأموراً مصره کیتمشدر .

اوزمان اقلیم مصر حکومتی رومادولتی طرفندن اداره  
اولنور یعنی مصر حکومتی حکمدارلری روما دولتنک  
انتخاب وتعیینی ایله اولور ایدی .

جناب حاطبك سفارت سنيه سي اثناسنده كي حكمدار  
دخمي ملت قبطيه دن « جريج بن مينا » نامنده بر شخص  
ايدي .

سفير مشاراليه، اني اسكندريه ده بولدي . و مراسم  
لازمة الايفاي ملاقاتي بعدالاجرا نامه هايوني تقديم  
ايتدي . لکن مفهوم شريف مكتوب مقوقس جريجك  
معلومي اولدقن صكره ردو استتقال جهتنه از ميل ايدر  
كي كورينهرك :

— « مادام كه محمد [ عليه الصلوة والسلام ] نبي  
ذیشاندر . كنديسنه مخالفت ايدنلري تيرسريع التاثير  
دعاسيله نيچون قهر و تدمير ايله من ؟ »

ديمكه جرءه ايتمسيله ميانة طرفينده باب بحث و مناظره  
آچلمش اولديغندن حاطب :

— « اي اما عيسى عليه السلام نبي باحق ايكن  
كنديلرني تصديق ايتماكله برابر بيك درلو اذا وجفا  
ايتمش اولان قومن نيچون صدمه دعاسيله برباد ايتماشدر ؟ »  
سؤال حقيقتمال سفيرانه سنده بولنش ، مقوقس جريج  
ايسه اسكي دعواسنده براز تلغشمن ونهايت سكوتدن  
باشقه ديهجك جواب بوله مينجه حاطب حضرتلري ،  
سوزده تكرار باشلايه رق .

— « زمان سالفده ضلالتله مفطور حقاء بشردن  
 بعضار ، حاشا دعواى بيمناى الوهيت ايتمشكن هيچ برى  
 دفعةً دوچار پنجه قهر قهار اولمامشدر . سزك زمان  
 اداره حكومتكردن مقدم مصرده تسلطن ايتمش بر شخص  
 دخى دعواى الوهيتيه قالقشدينى وحتى دعواسنه  
 كوره بيك درلو معاملات ظالمانه ده بولندينى حالده  
 بدايت امرده لحكمة دوچار قهر اولمامشكن عاقبتده  
 نه وجهله مصائب عظيمة دنيويهيه وخسران ايم اخر  
 وى به گرفتار اولدينى معلومكز اولمشدر . شمدي سزم  
 لايق اولان ، غيريكزم مدار عبرت اولمامقدر . ناصل كه  
 حضرت موسى عليه السلام خلقى قدوم عيسى ايله تبشير  
 ايتمش ايسه حضرت عيسى دخى شرفقدوم حضرت محمدى  
 ايله امتى تبشير ايلمشدر . كه هرايكى تبشيرده يكديكرينك  
 عيى ! بزم سزى حضرت قرألك احكامنه دعوتمز ،  
 سزك اهل توراتى احكام انجيله دعوتكز كى ! . هر يغمبر ،  
 ادراك ايتديكى قوم وملت ، كنديسنك امتى اولديغنه  
 اينانير ايسه كز شمدي نبى ذیشان اخر الزمان اولان  
 افنديمز سزه وبزه ادراك ايتمشدر . ارتق سز وبز انك  
 قوم وامتى بولنيورز ديمك اولور . بناءً عليه امتى بولنديغكز



او نبی ذیشانہ اطاعت و اتباعہ سزی دعوت ایدیورز ،  
دیدیکندن نتیجه مباحتده حاطب غالب کلمکله مغلوب  
وملزم قالان مقوقس جریج ، نهایت اعتراف ماهوالحق  
ایده رک .

— « یا حاطب ! بن او حضرت نبی ذیشانک اطوار  
سنیه سنی ، اخلاق و افعال شریفه سنی هر زمان تحقیق  
واستخبار ایتمکده میم . بیلیرم که خلق عظیم اوزره یارادلمش  
بر وجودیکتادر ، خلقه تبلیغ ایتدیکی احکامی عین صواب کوردم .  
امر ونهیnde نامعقول برشی کورولمز ذات شریفی حاشا  
سحر ، کهانت ، کذب و خیانت کی اعمال و اقوال سخیفه دن  
کلیاً منزهدر . اسرار و خفایای قلبیه یی وحی الهی ایلہ  
کشف و اظهار ایتمک کی اسباب نبوت انک ذات شریف  
اعجاز صفاتلرنده جلوه کر اولمقده در . شو حالده بکا  
براز مهلت و یرده دوش و نه میم »

دی رکن نامه هایونی آبنوسدن برحقه ایچنه وضع ایتمش و اوستنی  
مهرلیوب بعده خزینة خاصة ملوکانه سنه کوندر مشدر .  
مدت مهلت منقضی اولدقدن صکره برقطعه جوابنامه

یازدیری [ ۱ ] و ذات عالی رسالت پناهی به مخصوص  
[ ۱ ] مقوقسک جوابنامه سی اولق اوزره تصادف اولنان  
شودر : « لمحمد بن عبدالله من المقوقس عظیم القبط سلام عليك .

اوله رق . [ ماریه نامنده بر جاریه وانک سیرین اسمنده کی  
همشیره سیله والده سی ، بیک مثقال التون ، كذلك «لزاز»  
« سمدل » ناملرنده ایکی رأس آت ، دلدل نامنده بیاض  
بر قاطر ، عقبه یاخود فغفیر اسمنده بر اشک ، بللوردن  
بر عدد قدح ، التون ایله ابریشمدن معمول بر مرصع کمر ،  
دریدن معمول بر قالقان ، قرای مصریه دن « بهنا » نام  
قریه ده حصوله کلکده اولان عسل مشهوردن بر مقدار  
بال ، یکر می قات مکمل البسه [ هدیه کوندردی .

ماریه مر قومه اقصابی صعید مصرده ونیل کنارنده  
« اسنا » اعمالندن « قفط » نام قریه اعمالیسندن ایدی .

بر روایت کوره اهدا اولنان جاریه لر ، درت نفر ایدی .

شامده حارث بن ابی شمر الغسانی یه سفیر —

حارث ، روایت کوره اوزمان شامک [ غوطه ] نام بلده سنده  
مقیم ایدی . ملوک بنی کنده دن شاعر امری القیس ،  
بنی اسد علیه نه استعانه ضمننده استانبوله کلیر ایکن

اما بقدر فقد قرأت کتابک وفهمت ما ذکر فیہ وماتدعو الیه  
وقد علمت ان نبیاً قد بقی . وکنت اظن انه یخرج بالشام وقد اکرمت  
رسولک وبعت الیک بجاریتین لهما مکان من القبط عظیم .  
وبکسوة واهدیت لک بغلة لترکبها »

بعض اشیا سنی شامده و فاسیله معروف سموئل نام شاعره  
تودیع ایتدیکی زمان [ قبل الهجره - ۴۵۰ و یا خود ۵۰۴ ] اشیا  
مود و عه نك طرفنه تسلیم و اعطاسنی سموئله شدیداً تکلیف  
ایدن ذات ، شامده اوزمانکی حاکمی « حارث بن ابی شمر  
الغسانی » ایدی .. فقط نامه بود فعه نامه همایون یازیلان  
حارث ، او کو نلرده کی حارث میدرد کلمیدر ! تعینی مشکلدرد !  
حارثك منسوب اولدینی غساننه حکومتك ملوکی ؛  
فی الاصل یمندن او حوالی یه هجرت ایدن طوائف عربدن  
اولوب اوزمانه قدر تقریباً بشیوز الی سنه قدر برمدتن  
بری روما حکومتك نظارت و حمایتی تحتنده اولمق اوزره  
حوالی مذکورده اجرای حکومت ایتشدیلر . حکو -  
متری تاریخده [ غساننه حکومتی ] نامیله مذکوردر .  
نامه همایونی [ ۱ ] تبلیغ و ایصاله مأموراً سفارتله  
بعث بیوریلان [ شجاع بن وهب الاسدی ] رضی الله  
تعالی عنه حضر تلی ، غوطه ده و یا خود باقاده حارثه

[ ۱ ] نامه همایونك صورت منیفه سی :

بسم الله الرحمن الرحيم . من محمد رسول الله الى الحارث ابن  
ابی شمر . سلام علی من اتبع الهدی . وانی ادعوك الى ان تؤمن  
بالله وحده لا شریك له یبقی لك ملكك .

تسلیم ایتشدی . حارث ایسه او قود قدن صو کره بیرتوب  
یره آتمش و : [ کیت سویله ! ایشته عسکرله اوزرینه  
کلیورم ] کبی تهدیدده بولنمش اولمغله سفیر مشارالیه مشهو -  
داتی رسول اکرم افندی مزه عرض واعلام ایله مشدر .

حارث ، همان اهل اسلام علمینده حرکت ایتک  
اوزره استیزان ایتدیکی خالدہ قیصر مساعده ایتامشدی !  
جناب رسالتناه افندی مز ، مرقومک شو معاملہ سنه  
قارشى : [ باد ملکہ ] دیه بد دعا بیورمش حارث دخی  
از وقت ایچنده کافراً فوت اولوب جزاسنى ، بلاسنی  
بولمشدر .

یمامه ده هوذه یه سفیر — هوذه بن علی یمامه ده

نصرانی المذهب بر ملک ایدی . و قتيله یمن والیسی  
هرزک کسرایه کوندردیکی هدایای حامی اولان قافله نک  
بحرین طریقندہ بنی تیممه منسوب بنی یربوع  
طرفندن غارت ایدلدیکی زمان قافله ده کی دوه صاحب لری نک  
افادات وشکایاتی کسرایه عرض ایتکده یمامه ملکی  
[ هوذه بن علی ] توسط ایتمش وشومسئله دن طولایی بنی قیس  
ایله بنی کنانه اره سنده تکیون ایدن خصومت یکر می سنه  
امتداد ایدهرک الک صو کره کی « فجار الاخر » محاربه سنده

فمخر رسالت افنديمز، بنی کنا نه طرفدارى اوله رق تقریباً اون  
 درت ياشلرنده اولدينى حالده مذکور محاربه ده بولنمشدى  
 لکن بو هوذه نك اوزمانكى هوذه اولوب اولمديغنى تماماً تعيين  
 ايده جـك بر اثره تصادف ايده مدم . [سليط بن عمرو العا  
 مرى] رضى الله تعالى عنه حضرتلى ، کتيروب نامه  
 همایونى [ ۱ ] هوذه يه تسليم ايتدى . هوذه ، بدايت امرده  
 عزت واکرام ايله مقابله ده بولندى حتى نامه شريفى  
 او قویوب مأل منيفنه مطلع اولدينى زمان قيرلييه جق  
 صورتده جواب بولمق اوزره بعض بهانه لر بياننه مراجعت  
 ايده رك جواب نامه سنده : [ طائفة عرب ، سلطنتك بنم  
 المدن کيتديکنى ايسته ميور . بناء عليه معذورم . بکا  
 بو ماده دن باشقه برشى امر ايت ] ديه يازمش ورسول  
 اکرمه بعض هدايا ايله سايطى ممنوناً اعاده ايتمشدى .

قول آخره **كوره** : بويله دکل ! هوذه ، بعض  
 تهديداتده بولنمشدى . حتى جوابده : [ کنديسندن  
 صوکره ملک و سلطنتنه بنی وصی وولى عهد تعيين

[ ۱ ] بسم الله الرحمن الرحيم . من محمد رسول الله الى هوذه  
 بن علي . السلام على من اتبع الهدى . واعلم ان ديني سيظهر  
 الى منتهى الحف والحافر . فاسلم تسلم واجعل لك ماتحت يدك .

ایدرسه مطیع و مسلمان اولور و الا انکله حرب ایدرم ! [ دیمشدی !

لکن نبی مکرم افندیز ، سلیط حضرت تارندن هوذنه نک اوضاع و بیاناتی او کرندیکی زمان حقنده بد دعا ایته دیکندن فتح مکهدن اثناء عودتنده هوذنه نک هلاک اولدیغنی جبریل امین ، بیلدیرمش و افندیز دخی اصحاب کرامنه اخبار ایله برابر : [ یمامه ده قریباً بر کذاب ، دعوی نبوت ایدمه جک و بنم ارتحالمدن صوکره قتل ایديله جکدر ] بیورمشلردر .

کذاب مرقوم ، مسیلمه ایدی [ ۱ ] عین افاده علیه اوزره قریباً ظهور ایدوب بعدالارتحال - حمزه نک قاتلی و حقی طرفندن - قتل ایدلمشدر .

بحرینده مندره سفیر - علاء الحضر می رضی الله

تعالی عنه حضرت تری ایدی .

[ ۱ ] مسیلمه ، یمامه ده بنی حنیف قبيله سنک رئیس ایدی . اسمی « هارون بن حبیب » کنیه سی [ ثمامه ] در . خلق و صورتی خلق و سیرتی قبیح بر آدم ایدی . ثابت بن شماس ایله برلکده حضور نبوی به کلدیکی وقت افندیز ، مرقومک آتیده دعوی نبوتله خروج جرأتنده بولنه جفنی قوه کاشفه نبویه لريله کشف بیوردقلرندن حقنده کوردیکی رؤیای مراد ایدمه رک : [ ما اراک الا الذی رأیت فیہ مارأیت ] بیورمشلردی !

منذر بن ساوی ، نامه هما یونی آنیجه دین اسلامی  
 قبول وزیر اداره سنده بولان اهای بی ده دعوت ایستدیکندن  
 بعض رعایای مسلمان اولمشدر .  
 بناءً علیه ماهو الواقعی سده سنیه رسالتپناهی به تمام  
 عرض واعلام ایتمکله برابر قبول اسلامدن طولانی  
 رعایا سنجه حاصل اولان اختلاف مذهبی به کوره اداره به  
 متعلق بعض مسائل حقنده طرف اشرف رسالتپناهی دن  
 استیدانی حاوی بر جوابنامه دخی یازمشدی . افدیمز  
 دخی ؛ هم بیان محظوظیتی همده مسائل مذکوره  
 حقنده ایضاحاتی حاوی اولمق اوزره : [ بسم الله الرحمن  
 الرحیم . من محمد رسول الله الی المنذر بن ساوی .  
 سلام علیک ، فانی احمد الیک الله الذی لا اله الا هو  
 واشهد ان لا اله الا الله وان محمداً رسول الله . اما بعد فانی  
 اذکرك الله عز وجل فانه من نصح فانما ينصح لنفسه فانه  
 من يطع رسلی ویتبع امرهم فقد اطاعنی . ومن نصح  
 لهم فقد نصح لی . وان رسلی قد اثنوا علیک خیراً .  
 وانی قد شفعتک فی قومک فاترك للمسلمین ما اسلموا  
 علیه وعفوت عن اهل الذنوب فاقبل منهم وانک مهما  
 تصلح فلن نعزلک عن عملک . ومن اقام علی یهوديته



و مجوسیتہ فعلیہ الجزیة [ جوابنامہ ہایونی اسطار  
واسرا بیوردیلر .

— ٦ —

### — عمرۃ القضاء —

التنجی سنہ ہجریہ سندہ واقع اولان حدیبیہ مصالحہ  
سندہ اہل اسلامک عمرہ سی سنہ آتیہ تعلیق و کیفیت  
تنظیم اولان معاہدہ نامہ دہ اولوجہلہ تصریح ایدلمشدی .  
بناءً علی ذلک رسول ذیشان افندیمز ، اشبو یدنجی  
سنہ سی شہر ذی القعدہ سی اوائلاندہ اصحاب کرامنہ :  
[ حدیبیہ دہ حاضر بولمیش اولانلر ، عمرہ لرنی قضا  
ایچون شمعدی حرکتہ حاضر اولسونلر ! ] بیوردی .  
خیبردہ شہیدویا فراشندہ فوت اولانلرک غیرہ بتون اہل  
حدیبیہ درحال حاضر اولدیلر .

افندیمز ، ایشته اوزمان عمرہ یعنی سعی وطواف  
نیتیلہ مدینہ منورہ دن مکہ مکرمہ یہ طوغری حرکتہ  
بیوردی . موکب ہایونک اشبو حرکتندہ « ابو ذراغفاء  
ری » رضی اللہ تعالیٰ عنہ حضرتلری ؛ مدینہ منورہ دہ  
امور مملکتک اداره سی نظارتہ قائم مقام تعیین بیورلمشدی .

معیت سنیہ ہمایونلرندہ صبیان ونسواندن باشقہ ایکی  
بیک نفر اصحاب کرام موجود و قربانلق یتمش رأس دوه  
ایله برابر یدکده یوز آت وار ایدی .

ذوالحلیفه محلنه مواصلتده افندیمز ، انصار کرامدن  
[ محمد بن مسلمہ ] رضی اللہ عنہ حضرت تریفی آتیلر  
فرقه سیله ایلری یه کوندروب کندیلری او محلده احرامه  
کیردیلر . صحابی مشارالیه [ مرالظهران ] محلنه وار .  
مشدی . مکہ لیلردن بر طائفه یه تصادف ایتدی . طائفه  
صوردی :

— « کلان کیمدر ؟ »

محمد بن مسلمہ حضرتلری :

— « رسول اللهدر . ان شاء الله یارین بومحله وصول

ایده جکدر »

جوانی ویردی . طائفه مرقومه ، الدقلری اشبو معلوماتی  
کیدوب اهل مکیه اعلام ایتدیلر .

رسول اکرم ، ایرتہ سی کون مرالظهرانه واصل  
اولدی . وحجاج کرامک اسلحه سنی انصار کرامدن  
[ اوس بن خویل ] رضی اللہ تعالی عنہ حضرتلرینه بیک  
نظارتی تحتده اوله رق ایکی یوز نفرلی بر محافظه فرقه سیله

برابر ایلری به [ بطن یا جج ] محله کوندردی .  
 قریش ، موکب همایونک حرکتی ایشدیکی جهته  
 بر موجب معاهده مکبئی ترک و تخلیه ایدوب خارجه ،  
 طاع باشلرینه چیقدی .

بناءً علیه جناب رسالتناه افندیمز ، مرالظهراندن  
 قالقدی . قربانلق دوه لرینی ایلری به سوق و [ ذی طوی ]  
 محلنده حبس ایتدیردی .. کندیلری [ قصه واء ] نام  
 ناقة سعادتلرینه را کب ایدیلر .

موکب همایونده ارتق اهل مکبه قارشى انتظامی  
 دوزلندی . افندیمز را کب اولوب اصحاب کرام دخی حول  
 و اطراف همایونی احاطه ایتمش بر ترتیبد ایدیلر .  
 ایشه ترتیب مذکور اوزره [ حجون ] ه نازل اولان  
 بر یوقوشدنبری مکبه داخل اولدیلر .

شاعر شهر قدسی نوا [ عبدالله بن رواحه ] رضی الله تعالی  
 عنه حضرتلری ، حبیب خدانک ناقة سعادتلرینک یولارین  
 طوته رق اوکنده یورور و :

خلوا بنی الکفار عن سبيله  
 انی شهید انه رسوله  
 خلوا وکل الخیر فی رسوله

یارب آنی مؤمن بقیلہ  
 اصر فحق الله فی قبولہ  
 نحن ضربناکم علی ترتیلہ  
 کما ضربناکم علی تنزیلہ  
 ضربا یزیل الہام عن مقیلہ

رجز لطیفی صوت بلندایہ او قور ایدی !  
 جناب عبداللہ حضرتلری ، خزر ج قیلہ سندن وعقبات  
 بیعتلرندہ اخذ و قبول دست بیعت ایدوب بدر غز اسندہ حاضر  
 بولنش اولان انصار کرامدن و شعرای فصیحای بنامدن ایدی .  
 دائما کفارک دین باطللرینی ذم و قدح یولندہ شعر سویلردی .  
 حضرت عمر الفاروق ، اویلہ بر حالده ابن رواحه  
 حضرتلرینی شعر دن منع ایتک ایستدی . دیدی کہ :  
 — یا ابن رواحه ! سن رسول اللہک حضورندہ  
 شعر می او قویورسک ؟ »

رسالتاب افندیمز ، عمری منع ایتدی :

— « خل یا عمر ! فلهی اسرع فیہم من نضج النبل »  
 اهل مکہ ایسہ اوزمان قیقعان یاخود [ قیقعان ] طاغلرندہ  
 ایدیلر . مکہ یہ عقیب دخولده حجاج اسلامیه همان بیت الہی  
 طواف وبعده صفا ایلہ مروہ ارہ سندنہ سعی ایتشدیر .

موكب هايونك مكهيه دخولني اوز اقدن سيرو تماشا  
ايدركن قریش طرفندن : [ محمدك اصحابي، مدينه نك  
اغیر هوا سندن ستمه يه طو تولديلر . ستمه خسته لغنك  
تاثيريله وجودلري ضعيفلنوب كعبه يي طوافه كوچلري  
قالما دی ] دینلديكي مسموع عالی اولمغله نبی اکرم،  
اصحاب کرامنه :

— « کنديکزی دشمنه ضعيف کوسترمیکز بلکه  
قوتلی کوستریکز ! »  
ديه امرابتديکندن اثناء سعی وطوافده حجاج کرام دخی  
سرعت کوسترمشردی !

مکه يه يوم دخولك ايرتسی کونی عم نبوی عباس،  
حارث بن عبدالمطلب قیزی وکندی زوجه سی ام الفضلك  
همشیره سی [ میمونه ] رضی الله تعالی عنہای افندی مزه نکاح  
ایتدیرمشدر .

قربانلر کسلمش وعمره نك احکام وشرائطی اتمام  
ایدیلهرک مراسم لازمه الايفای اعمتاریه تمام اولمشدی .  
بناء علیه اهل اسلامك مکه دن برموجب معاهده  
همان خروج ایتلری خصوصنی تکلیف ایتمك اوزره

اهل مكه طرفدن « سهيل بن عمرو » نزد جليل رسالتپناهی به  
ارسال ایدلدی . سهیل .

— « بز؛ شرطمزہ وفا ایتدک . سن ده ایتلیست؛  
اوج کون ديدک . اوج کون اولدی . آرتق چيقه جقسک ! »  
دیدى . رسول الله افندیمز دخی .

— « اوت اویله در . لیکن بن عممک قیزینى الدم .  
برکون دها مهل ویریکنز ! تا که آنی برابر الهیم . هم  
سزده کلیکنز برابر طوز اتمک ییہلم ! »  
بیورمش ایسه ده سهیل :


— « خیر ! بزا کا راضی دکلز . طعامکی ده ییمیز .  
چاگیر سهک ده کلیمز »

جوانی ویرمش اولغله ارتق شرط عهدایفا ایدلمش  
اولمق اوزره همان مکهدن خروج ایدلمش وحضرت میمونه  
رضی الله تعالی عنهایه دخول وزفاف ده یولک [سرف] نام  
محلنده واقع اولمشدر .

بعض آثار، حضرت میمونه نك بنی هلال قبیلہ سندن  
اولدیغنی دیگر بعض ده حارث بن عبدالمطبک قیزی اولمسی  
سببیلہ بنی هاشمدن ایدوکنی بیان ایدیور . جناب رسالتآب  
افندیمز دخی سهیلہ [ عمم قیزینى الدم برکون دها مهل . ]

دیمشدی . او تقدیرده میمونہ مشارالہانک بنی ہلالدن دکل  
 بلکہ بنی ہاشمدن اولمسی اقتضا ایدہ جکدر .  
 حضرت میمونہ ، تاریخ ہجرتک ( ۵۱ ) نجی سنہ سندنہ فوت  
 اولوب نمازینی عبداللہ بن عباس حضرتلری قیلدیرمش  
 قبرہدہ اووضع بیورمشدی .

جلدی ثانی بیتدی











## فهرست

دین اسلام بمحندہ [کتابک خلاصہ مندرجاتی]

### فصل سادس

اورینہی سنہ ہجریہ وقایعی

صحیفہ

- ۳۴ کعب بن اشرفک قتلی  
 ۴۷ غزوہ قردہ  
 ۴۹ ازدواج النبی باحفصہ بنت الفاروق  
 ۵۰ تزویج ام کلثوم  
 ۵۱ غزوہ احد  
 ۱۳۱ غزوہ حمراء الاسد  
 ۱۳۷ ام المساکین و زینب بنت خزیمہ  
 ۱۳۸ ولادت جناب حسن (رضی اللہ عنہ)  
 ۱۴۰ تحریم خمر

### فصل سابع

وردنجی سنہ ہجریہ وقایعی

- ۱۴۴ وقعہ بئر معونہ  
 ۱۵۳ سفیان ہذیلینک قتلی

- ۱۵۷ بعث الرجیع  
 ۱۶۷ غزوة بنی نضیر  
 ۱۸۱ سلام ابن ابی الحقیقك قتلی  
 ۱۸۵ غزوة ذات الرقاع  
 ۱۸۷ ولادت جناب حسین ( رضی الله عنه )  
 ۱۸۹ ام سلمه  
 ۱۹۰ بدر صغری

## فصل ثامن

### بشجی منہ لہجریہ رقابعی

- ۱۹۴ زینب بنت جحش  
 ۱۹۵ آیت حجاب وتسترک نزولی  
 ۱۹۷ غزوة ذومة الجندل  
 ۱۹۹ غزوة بنی مصطلق  
 ۲۱۰ غزوة خندق  
 ۲۵۷ غزوة بنی قریظہ  
 ۲۷۳ اعشى الباهلی

فهرست

فصل تاسع

التجبي منه لهجربه وقابعى

صحيفه

٢٧٦ نجده حرکت

٢٧٨ غزوة ذى قرد

٢٨٢ وقعة غمر

٢٨٣ وقعة ذى القصبه

٢٨٤ وقعة حموم

٢٧٥ وقعة عيص

٢٨٦ وقعة طرف

٢٨٦ وقعة وادى القري

٢٨٧ بعث دومة الجندل

٢٨٨ وقعة غميج

٢٨٨ ام القره

٢٨٩ اسير بن زرامك قتلى

٢٩١ مثله و عكالميلر وقعه سى

٢٩٢ مصالحة حدييه

فهرست

صحیفه

## فصل عاشر

بدینجی سنہ ہجریہ و قایمی

۳۴۳ غزوہ خیبر و قدوم جعفر


۳۷۱ فدک مصالحہ سی

۳۷۲ وادی القری غزوہ سی

۳۷۳ صلح تبیا


۳۷۵ سفراء کرام پیغمبری

۴۰۳ عمرہ القضاء

















3 1761 07290939 3